

ЛУҚМОН БЎРИХОН

ХИЗР КЎРГАН ЙИГИТ

Қиссалар ва ҳикоялар

«ШАРҚ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ – 2007

Бўриҳон, Луқмон

Хизр кўрган йигит: Қиссалар ва ҳикоялар. – Т.: «Шарқ», 2007. – 256 б.

Утбу тўпламга ёзувчи Луқмон Бўриҳоннинг «Хизр кўрган йигит», «Сирли муаллим», «Қидирудаги қиз» номли қиссалари ва бир неча сара ҳикоялари киритилди. Мұхаббат ва Нафрат, Ҳаёт ва Ўлим каби мангу мавзуларда яратилган бу асарлар қизиқарли, таъсирчан воқеаларга бой. Гўзал, жозибали бадиий тил, тиник, жонли тасвиirlар беихтиёр ўқувчини ўзига ром этади, завқ-шавқ улашади. Олис овулларда умргузаронлик қилаётган, катта шаҳарларга баҳт излаб келган қаҳрамонларнинг аччик қисмати, қалб жароҳатлари ҳеч бир китобхонни бефарқ қолдирмайди. Ўша қаҳрамонларга кўшилиб беихтиёр йиғлайсиз, беихтиёр куласиз. Улар билан бирга севасиз, нафртланасиз.

ББК. 84(5Ў)6

ISBN 978-9943-00-027-8

© «Шарқ» нашриёт-матбаа акциядорлик компанияси
Бош таҳририяти, 2007.

ҚИССАЛАР

ЧОРБОФ ҚЎРИҚЧИСИ

ёхуд

ХИЗР КЎРГАН ЙИГИТ

Kucca

*Қонун тақиқлай олмаган нарсаларни
гоҳо номус тақиқлай олади (агар у бор бўлса).*

Сенека (ва Аллаким)

Кечагина эшагига қийшиқ минган қишлоқи әдим, бугун эса ажабтовор машина ўринидига ястаниб ўтирибман-а?! Наҳотки, Хизр кўрганим чин?!

* * *

Уч-тўрт тўй-томушада уч-тўрт донгдор курашчининг курагини ер искатиб полвон номини олдим, Қоржов полвон бўлдим. Эл-улус Чоршанби чўпоннинг кенжаси Хизр кўрган, энди иқболи баланд бўлади деган гап-сўз тарқатибди. Мен кулибгина қўяр әдим. Тусмолдан биламан, бу миш-мишларни бўйинсам Ҳусан-Улаш агрономнинг ўғли тўқиб-бичиб тарқатган. Ўзи қўй қумалогидеккина бўлса ҳам ҳовлиқмалиги оламни бузади, устига-устак, отасининг шоирлигидан оз-моз юккан — гапчиноз, дарров тўқиб-бичади, кўпиртиради.

Аслида ҳаммаси кеч кузнинг изғиринли кечаларидан бирида жўнгина бўлган эди.

Ўшанда Ҳусан икковимиз қўшни совхоз фермасидан товуқ ўғирлаб келгани кетаётган әдик. Бизникида синфдошлилар йиғилишиб, бир зиёфат уюштироқчи бўлганмизда. Гўшт топиш Ҳусан икковимизнинг бўйнимизга илинган. Шу сабаб шом шафафи қизарган маҳал эшакларимизни кичаб-қичаб йўлга тушдик. Кенгсой дашти бошланганда фира-шира коронбулик иниб қолди. У ёқ-бу ёқдан гангир-гунгур турунглашиб боряпмиз. Ҳусан нуқул мақтангани-

мақтангандын. Келгуси йил мактабни битиргач катта шаҳарга кетар экан. Институтта кирар эмиш. Түғриси, мақтанганича бор қурғурнинг — мактабда тузуккина ўқийди-да! Муаллимлар ҳам бири кўйиб-бири олиб уни алқашади, «Хусандан умидимиз катта, қишлоғимизнинг фахри бўла-ди», деб башоратлар қилишади. Менга эса ўқрайиб қарашгани-қарашган, ҳаммасига баланд бўйим, қорувли қоматим айбдордай бош чайқашади: «Эсиз жасад... эсиз кучкuvват...». Баъзан орим қўзиб, астойдил ўқишга бел боғлаб китобларга кўмилиб ўтирган пайтларим ҳам бўлган. Бироқ ўз-ўзимга бош оғриқдан бошқа нарса орттиргмаганман. Китоб-дафтарга термулиб ўтириш алланечук энсамни қотиради, назаримда, мен бошқа бир ишлар учун яралгандек эдим. Хаёл сурсам, хаёлларим Кенгсойнинг қирадирларидан нарига ошиб ўтолмайди, кўй-қўзилар сурувига аралашиб ялангликларда ўтлаб қолади. Шу сабаб ўша изгиринли кечда уч-тўрт товуқ дардидаги борар эканмиз, Хусандек мақтана олмадим.

Кенгсойнинг қоқ белига етганимизда қоронгулик хийла куюқлашиб қолган эди. Бир пайт қаншаримиздаги қирда оппок шарпа пайдо бўлди. Ҳатто эшакларимиз ҳам таққа тўхтаб ўша ёқса тикилиб қолишиди. Хусаннинг аллақачон ранг-кути ўчган.

— Арвоҳ! Ўлай агар, оқ арвоҳ бу! — ваҳимали пи-чиirlади у аранг. — Илгари Кенгсойга шаҳидлар кўмилганини эшитганман, шуларнинг арвоҳи!

— Ҳовлиқма-е, — дедим қир томон тикилиб.

Мен дўстим айтган «арвоҳ», «шахид» деган сўзларнинг маъносини англаб етмаганимданми, ҳарнечук қўрқмаётган эдим.

Оқ шарпа аста-секин биз томонга эниб келар эди.

— Қочдик! — дея қичқириб юборди Хусан, эшагини ортга буриб.

Хуркибина турган жонивор жонхолатдаги қистовдан йўртиб кетди.

Мен саросимада қолдим. Бироқ ҳануз қизиқишим қитиқлаб кўймас эди. Хурка-хурка орқага қайтишга уринаётган эшагимни бир амаллаб тинчлантириб оқ шарпа тикилиб туравердим.

Ниҳоят, дўстим таърифлаган «арвоҳ» яқин келди. Шундагина мен унинг оқ иштон, оқ яктакдаги қария эканини тусмолладим. Эшагим ҳам одам нуқсини сездиёв, тинчланиб, хас-пас илинжида ер искаб қолди.

Оқ шарпа мулла Мирза экан! Кўй-кўзиларини нева-
ралариға ишонмай ўзи бокиб юрадиган, саксон ёшни қора-
лаб қолган ўзимизнинг қадрдан қария!

— Ассалому алайкум, мулла бова! — деб салом бер-
дим эшагимдан иргиб тушар эканман.

Мулла Мирза саломимга аранг алик олди. Изгирин-
да тиришибина қолган эди у. Тинмай қалтирайди. Мен
устимдаги эски бўлса-да, қалингина чопонимни дарров
ечиб чолнинг елкасига ёпдим. Кўл-оёкларини укалаб исит-
ган бўлдим.

— Барака топ, болам, — дея алқади мулла Мирзо,
ниҳоят, тили қалимага айланиб. — Илоё, никоҳингни
ўзим кияйин, илоё, суйганингни бағрингга босиб юр.

— Мулла бова, нега шундай сарсон бўб юрибсиз?

— Э, сўрама болам...

Кария тутила-тутила арзи-ҳол қилди. Мулла Мир-
за одатдагидай кўй-эчклиарини боқиб юрган экан. Шом
намозининг вақти бўлиб қолибди. Қария эшагидан ту-
шиб ибодатга уннаган эмиш. Бундай ўйлаб караса, ус-
тидаги қалингина чакмони бетаҳорат туюлибди. Чол
чакмонини ечиб эшаги устига ташлаб қўйибди-да, оқ
якtagини тўшаб намозга киришибди. Шу пайт нимадан-
дир хурккан сурув тўзғиб кетган эмиш, эшак ҳам ша-
талоқ отиб қочиб қолибди. Намозни бузмай хотиржам
яқунлаган қария қарасаки, на кўй-эчклиардан, на эшак-
дан дарак бор! Устига-устак, қаричилик қурсин, мул-
ла Мирзанинг кўзи қоронбулика беш-олти қадамдан
нарини илгаёлмас экан. Қария тусмоллаб-тусмоллаб у
ён-бу ён юргургилаб, қирма-қир ошибди, охир-оқибат
менга йўлиқибди.

Мен ҷонни эшагимга миндириб:

— Мулла бова, сиз қишлоққа кетаверинг. Мен мол-
ларингизни топиб изингиздан ҳайдаб бораман, — дедим.

Анча-мунча исиб бийронгина бўлиб қолган мулла Мир-
за дуо устига дуолар қила кетди.

— Илоё, Художоним Ўзи сенга паноҳ бўлсин, илоё
суйганингта етишиб қўша қаринглар, илоё менимас, ҳаз-
рати Хизрни кўрган бўл...

Мен қария билан бўлиб ўтган воқеани хеч кимга
айтмадим... Тўғрироғи, хокисор мўйсафидни у ер-бу ерда
ҳазил-мазах қилишларини истамадим. Бироқ унинг дуо-
илтижолари юрак-юракларимга сингиб кетган эди. Шу-
нинг учун ҳам ўша кеч Ҳусани қишлоқда қайта учрат-

ганимда мақтаниб қўйдим: «Бекор қочиб кетдинг-да, мен ҳазрати Хизрга дуч бўлдим...»

Хусан гап-сўзларимга лаққа ишонган экан. Кейинчалик ўзидан қўшиб-бичиб кимларгадир етказибди-ю, шуши одамлар орасида Хизр кўрганга чиқиб қолдим. Энг фалатиси, ўша воқеадан сўнг кетма-кет омадим чопавергач одамлар оғзидаги чўпчакка ўзим ҳам чиппа-чин ишона бошладим: «Балки Хизр... мулла Мирза бўлиб кўринган...»

Мен курашга кўнгил берган эдим. Аввалига у-бу тўй-томушаларда хашаки полвонлар билан беллашиб кўрдим. Қарасам, оппа-осон голиб бўляпман. Сўнг сал давра исини олганларнинг белбоғидан тутдим. Улар ҳам полвонлик сиёғимга тан бериб, манглубларча майдонни тарқ эта бошлишди. Кейинчалик уч-тўрт номдор курашчиларнинг куррагини ер искатдиму, эл-улус мени олқишилай берди.

Ўрта мактабни битириб гангиг юрган пайтларим эди. Дўст-жўраларнинг қўпи катта-катта ўқишиларни қўзлаб, катта-катта шаҳарларга катта-катта орзулару катта-катта тугунлар билан кетишган эди. Мен отамга кўмакчилик қилиб юрибман. Отам эса мени ўқитишга қўли калталик қилаёттанидан хижолатланади, иш-юмушларни ҳам ботинмайгина буюради. Биласман, у менинг ўқимишли бўлиб, бирор бир амалдорлик курсисини эгаллашимни жудажуда хоҳлайди. Ҳатто бир гал бу ҳақда ўзимга кўнгил ёзган.

Ўшанда баҳорнинг адоклари эди. Отам қишлоғимиздан ўн чақиримча наридаги отарга чиқиб кетган. Мен мактабдан бўшадим дегунча ўша ёққа отланаман. Тўллаш мавсуми тугаб, чўпоннинг ташвиши андак ариган бўлса ҳам, менга ўҳшаган полвонлардан беш-олтитасининг тинкасини қуригадиган юмуш ҳамиша топилар эди.

Куёш кўнглимдай чараклаб турган кунлардан бирида одатдагидай отарга жўнадим. Ҳаво иссиқ эди. Ўт-ўланлар аллақачон қовжираб сарғайган. Теваракдаги қиртепаликлар беҳол сулайган туяларга ўхшайди. Бир бўзтўргай баланд учиб, куёш тиғларига тўш урган кўйи бўзлаб ётиби. Аҳён-аҳён менинг ҳам лаб-лунжимдан ажабтовур хиргойилар чиқиб кетмоқда.

Вақт пешиндан оққан бир маҳал ҳарсиллаб-лорсиллаб отарга чиқиб бордим. Нақ тантананинг устидан чиқиб қолибман. Ўтovимиз ёнида илгари ҳам бир-икки кўрганим — туман амалдорларига тегишли «Волга» ав-

тоулови савлат тўкиб турар эди. Отамнинг чўлиқларидан бири ўчоқка ўт ёкиб, кора қозонни тўлдириб гўшт қайнатмокда. Менинг эса ич-ичимдан алланечук фазаб, алланечук алам қайнаб тошяпти: ахир, анови автоулов не сабабдан келганини, ичкарида кимлар ўтирганини хўб билардим-да. Улар ҳар йилнинг шу фаслида албатта бир бор пайдо бўлишади. «Қаҳратонда қирилди... йиртқичлар еб кетди... тўллашда нобуд бўлди...» деган баҳоналар билан сурув-сурув қўй-қўзиларга акт-ҳужжат тузишади. Аслида ўша «қирилиб кетган» жониворлар қирадирларни тўлдириб ўтлаб юрган бўлади. Фақатгина давлатнинг мулк дафтаридан ўчирилиб, ўша акт-ҳужжат ижодкорларининг хусусий мулкига айланган. Шу сабаб ҳам отам боқадиган сурувнинг хийлагинаси аллақандай амалдорларга тегишли чорва эди. Эсимни таниб бундай «фокус-мокус»ларни англаб-билганим сайин ўзимни қўярға жой тополмай қолаётган эдим, гоҳ жаҳлим чиқар, гоҳ хўрлигим келар эди. Шу сабабли ўша куни қайнаётган кора қозон ёнидаги чўлиқ билан ҳам саломлашмасдан ўтов ичига қараб юрдим.

Ичкарида, тузуккина тузалган дастурхон теграсида тўрт-беш амалдор нусха ёнбошлаб ётишар эди. Молҳоли семиргани сайин ўзи озиб-қуриб бораётган ферма мудиридан бошқасини танимадим.

Газаб ва аламни аранг босган кўйи эши билар-эши билас салом берган бўлиб бўсафада қаққайганча турибман.

— Ҳа-а, сенми, кел, Коржов, — деди ферма мудиризиз, сўнг ёнидаги бетлари тобатошдай, қабоқлари салки кишига юзланди. — Бу чўпон бованинг кенжаси, полвон йигит. Хувв, раиснинг тўйида нуроталик полвонни бир силтвода босган.

Ўтирганлар пинак ҳам бузишмади. Ҳатто ўтов тўрида тутгларини бўшатиб рўмолчаси билан елпиниб ётган тўра кош учирлиб, кинояли тиржайиб қўйди. Мен ҳам ўтов керагаси ёнида сурбетларча туравердим, улар билан қўл бериб қўришиш дардиде ялтоқилик кильмаётганимдан хузурланар эдим. Отам пойгакда, шундоққина оёқ кийимлар ечилган жойда чўк тушиб, хотиржам бир киёфада ўтирган экан. (Уни дарров пайқамаганимдан ўзим ҳам ҳайрон.) У киши менга сал таажжубланиб кўз ташлаб қўйди. Мен эса унга алам-изтироб билан тикилдим. Тикила-тикила унинг пешонасидаги қат-қат ажинлар аллақандай йиртқич панжасидан қолган изларга

ўхшашини ногоҳ пайқадим. Сийрак соқол, қорамтири орік юзи эски бир кигиз парчасини әслатади. Гүё, аллакимлар уни топтаб, нимталаб ташлагандек әди. Нимадир бўғзимга аччиқ данақдек тикилиб келди.

— Ота, мен сурувга кетяпман, — дедим аранг қултүрлут ютиниб.

Отам хайрон. Казо-казолар қовурдоқ чайнаб, чой ҳўплаб ўз гурунгларига қайта шўнғишишган.

Мен шитоб билан ташқарига отилдим. Бутун ғазабу нафратимни тўплаб, ўтовдан сал нарида мудраб ётган қари кўпакни беаёв тепиб юбордим. Ит чий-чийлаб қочди. Мен эса қайнаб ётган қора қозон қошидаги чўлиқни ҳангуга манг қолдириб дашт томон чопиб кетдим.

Ўша куни кечқурун яйловдан қайтганимда арзанда амалдорлар жўнаб кетишган экан. Отам мени бамайли хотир кутиб олди. Бугунги ғазаб-нафратим қора ўчоқнинг тутунидай тарқаб кетган бўлса-да, алам-изтироблар ҳануз ўчоқ тубидаги кулдай тъбимни тирриқ қилиб турар әди.

— Нега бугун ўз бошингга тизинглаб қолдинг? — дея сўради отам, қўтон ёнидаги харсангта ўтирас экан. — Мехмонларнинг олдида уялтиридинг-ку?!

— Улар меҳмонмас... — тўнғилладим мен ҳам чўпон таёғимга ўмган тираб. — Ўғрилар... тирик молларни ўлдига чиқариб...

— Тавба, акт қилишганини энди кўряпсанми? Ҳар доим шундай-ку?! Бунинг нимаси орқангни қичитяпти?

— Ота... — дедиму яна ўчиб қолдим, бутун дарду аламимни яққол ифодалайдиган сўзни тополмай қийналар әдим. — Ота, шу сизга зарилми, а? Нима, уларнинг олдида муттхахаммисиз, қулимисиз шу энағарларнинг? Давлат молининг ўрини қуритиб ётган шулар-ку? Шу кузғунлар нима деса, доим кўнасиз...

— Хўш, нима қил, дейсан?

— Кўлингизга таёқ олиб қувламайсизми барини? Кўйдай бўғизлаб ташламайсизми?

— Нима учун? Давлатнинг молига акт тузиб ўзиники қилиб олгани учунми? Менга нима. Боқиб юрган сурувим ўзимники бўлмагандан кейин, менга нима фарқи бор, давлатникими ё каттаконларникими? А, нима фарқи бор?

Мен миқ этолмай қолдим. Отамнинг зардасида жон бор әди. «Чин-да, фарқи нима?» деган гап лип этиб

ҳаёлимдан ўтди менинг. Бироқ бу ўй барибир таскин беролмас, ўша алланечук алам-изтироб ич-ичимдан чарх уриб ётар эди.

— Фарқи бор, — дедим зўрға, ўз эътирозимга ўзим ҳам ишонмай. — Бирорларнинг қули бўлгандан кўра давлатнинг ҳақиқий чўпони бўлган яхши.

Отам хохолаб кулди. Бу шунчаки зўраки, меникидан-да ортиқ алам, нафрат қалқиб турган қулги эди.

— Ҳа-а, нодон бола-я, — деди отам бош чайқаб. — Сен қурмағур қўп валдирама. Билмасанг билиб қўй, сен айтган ановилар бировлар эмас, давлатнинг ўзгинаси! Ҳа, мен улардан қўрқаман! Улар қўрққаним учун менга нон беради, тамом-вассалом. Сен, серри, бир-икки нимкала полвонни йиқитдим, деб катта кетма! Давлатдан қўрқ, уларнинг қонунидан қўрқ...

Мен ҳануз чўпон таёғимга кўкрак тираб, энтикиб турар эдим.

— Агар менга ичинг ачиса, сен ўқи, — дея давом этди отам, овози алланечук майин тортиб, — ўқигин, болам. Сен ҳам бир устолни эгалла. Сен ҳам ўтов тўрида ёнбошлаб майшат қил, акт ёз. Ана шунда отангнинг кўнгли тоғдай кўтарилади, ана шунда чарчоқларим тарқайди, болам. Ана шунда чин зўр саналасан, бу иш таёқ кўтариб бировларни кувлаб юргандан ҳам соз бўлади. Ўқисанг, арбоб бўлсанг, таёқ кўтарганинг мингтаси оёғинг остига кигиздай тўшалади...

Туйқус отамнинг овози ҳирқираб, кўзлари ёшланиб дуога чоғланган кўллари кўк томон чўзилди:

— Оми-и-ин, Худо-ё, биз бечоралардан ҳам мурувватингни аяма! Кўзим очиқлигида, хеч курса, кенжамнинг ўқимишли арбоб бўлганини кўрай, илоё...

Қизик, ўшанда отамнинг илтижолари қабул бўлдими, ё менинг Хизр кўрганлигим чин чиқдими, ишқилиб, синфдош жўраларим катта шахарларни кўзлаб кетган, мен гангиб, отам хижолатланиб юрган кунлардан бирида, нихоят, омад деганлари биз ёққа ҳам кулиб боқди.

Саратоннинг ҳароратли оқшоми эди. Мактаб директори пўрим уст-бошли, саватдек соchlари жингалак, митти кўзлари зийрак, афт-ангoriga шахар нуқси урган, серғайрат, сергап бир кишини бошлаб келди. Тағин бир тафтишчи бўлса керак, деган хаёлда довдираган отам кутилмаган меҳмоннинг қош-кобоғи очиқлигидан, ўзини эркин, қувноқ тутишидан сал-пал хотиржам тортди.

— Мени танимадингиз-а, Чоршанби бува? — деди меҳмон кулимсираб.

Отам сийрак соқолини тутамлади:

— Кўзимга иссик-иссик кўриняпсиз-у... қарилик қурсин...

— Олашўрлик Худоёр маҳсумнинг улиман, отим — Тоштемир.

— Э, ха-а, — деди отам танигандай бўлиб, — ҳамсоя эканмиз-ку...

Йўқ, Тоштемир ака кўп ҳам ҳамсоя эмас экан. У ўн-йн беш йилдан бери пойтахтда яшар экан. Ўша ёқда аввал ўқиб, сўнг ишлаб, нон-насибасини териб юрган эмиш.

Биз кутилмаган меҳмон учун баҳоли қудрат дастурхон ёздик. Мен совчиларни сезган қари қиздай оёғим олти, қўлим етти бўлиб хизмат қиласр эдим.

— Ўғлингиз Коржовбойнинг довругини эшитиб келдим, — деди гап орасида Тоштемир ака, қўй қатифидан ҳузурланиб ичаркан. — Ўзим ҳам бу полвоннинг биринки курашини кўрганман...

Мен хаяжондан терлаб кетган эдим. Тоштемир ака мени шахарда тарбиялаб, шуғуллантириб катта спортчи қилиш ниятида экан! Айтишича ўзи ҳам дзюдо кураши бўйича спорт устаси эмиш.

— Бинойи, бинойи... — дея минғирлади отам норози бир қиёфада. — Мен буни ўқитсан, деган хаёлда эдим.

— Албатта, ўқитамиз-да, — деди тағин жонланиб Тоштемир ака, — спортчилар учун ҳамма институтларнинг эшиги ланг очик...

— Бинойи, лекин... бу... савил қўлимиз калта-да...

— Ие, бова, мен сиздан бирор нима беринг, деб талаб қиласрманми? Ҳаммасини ўзим тўғрилайман. Лекин бу йил кеч. Ҳозирча Коржовбой биз билан шуғулланниб спортда ўзини кўрсатиб турсин, келгуси йил, Худо хоҳласа, ўқишга жойлайман...

Шундай килиб, эртаклардагидек бир юмалаб пойтахтга келиб қолдим. Одамларнинг гавжумлигидан, серқатнов машиналарнинг шовқин-суронидан бошим оғриди, кўнглим айниди. «Ничево, ҳали кўнишиб кетасан», деди Тоштемир ака мени кўчама-кўча, идорама-идора етаклаб юрар экан.

Тез орада бир ижара уйга жойлаштирилдим. Бу ерда бўйдор, ҳайбатли уч-тўрт йигит мени лоқайд, нописанд

кутиб олишди. Кейинчалик ҳаммамиз дўстлашиб, акаука киришиб кетдик. Ахир, барчамиз курашчи, бир спорт клубининг аъзолари эдик-да, кет қўяр қўрпамиз, ош сяр товоғимиз бир эди. Ҳамхужралардан иккови номи жарангдор институтларда, бирори аллақандай колледжа ўқииди, тағин бир шерик менга ўхшаб келгуси йилни пойлар эди.

Мен бу ерда барчамизнинг бош-қошимиз, ғамхўримиз Тоштемир ака эканини кунма-кун, соат сайин англаб, ҳис қила бордим. Андак кейин билдимки, бундай жонкуяр зотлар «менеджер», деб аталар экан. (Менеджерми, мени жерми, ишқилиб, шунаقا.)

Сергап, сергайрат, оғзида ҳамиша сақич, спортчиларга хос енгил, ихчам кийиниб юрадиган Тоштемир ака ҳайратимга ҳайрат қўшар эди. Чиндан-да тоштемир эди у! Шу одамнинг ётиб ухлашига ҳеч ишонқирамасдим, қачон қарасанг, тик оёқда, жанговар, аллақайларгадир шошгани-шошган... Ҳар куни машқ-машғулотлар чоғлари бирга бўлсак-да, кечки пайтлар ҳужрамизга албатта бир бош суқиб ўтарди у. Албатта, ҳамишаги шиорнамо насиҳатини бот-бот такрорлайди: «Чекишдан, ичишдан, секслан сақланинг!»

Куз охирлари, қишининг бошлари биз учун қизғин мавсум эди. Тоштемир ака бошчилигида жануб вилоятларига сингиб кетар эдик. Тўйма-тўй, тантанама-тантана изғиб, кураш тушамиз. Ютуқ-совринларимиз тоғдай уюлиб кетади, ҳамёнлар қаппаяди. Лекин ҳужрага қайтиб келганимизда тоғдай совринлару қаппайган ҳамёнларнинг чўғи пасайибгина қолганига гувоҳ бўлар эдик. Мен аввалига эътибор бермай юрдим, кейинчалик уқдимки, биз полвонларнинг топган-тутганидан тузуккина улуш менеджерга (мени жерга) тегишли бўлар экан!

Тоштемир ака менга қўп яхшиликлар қилди: шаҳарга олиб келди, расмий спортчи полвонлар тўпига қўшди, машқ-машғулотларга ҳамма шарт-шароитларни яратиб берди, кейинчалик, ўзи ваъда қилгандай ўқишга ҳам жойлаб қўйди, ҳамиша ғамхўр, ҳамиша жонкуяр! Бироқ... бироқ негадир у менга ёқмайди, ношукурчилик, нонқўрлик бўлса ҳам барибир очиқ икрор бўлишим шарт — ҳа, Тоштемир акани негадир жиним суймас эди. Унинг беадоқ меҳрибончиликлари, мен учун югуриб-елишлари таъбимни тирриқ қилиб, ғашимни қўзғайди, холос. Шун-

дай кезлар ҳамма нарса кўзимга балодай қўриниб қолади: шаҳар ҳам, спорту дўсти биродарлар ҳам. Ҳамма-ҳаммасига кўл силтаб, дала-даштимга қочиб кетгим келар, бироқ отамнинг ўша илтижога чўзилган қўллари ҳамиша йўлимни тўсиб чиқар эди.

Ха, Тоштемир ака минг бир чопа-чоп билан мени ҳуқуқшунослик коллежига жойлаб қўйди. Бундан худди ўзи ўқишга киргандай керилди, ял-ял яшнаб қувонди. Мени эса вахима босди: «Қандай ўқийман бу коллежда, калла бўм-бўш-ку?!»

— Энди бу хушхабарни етказиб, чўпон бовани би-ир қувонтиришимиз керак, — деди Тоштемир ака, коллежнинг қабул ҳайъатидан чиқиб келар эканмиз.

Мен минг бир саросима билан эътиroz билдиrmоқчи бўлдим:

— Сал-пал ўқиб кўрай-чи хали... Ўша ёқларга тўйга борганимизда бизникига кириб ўтармиз...

— Бекор айтибсан, хайрли ишнинг эртаси яхши, галварс.

Ўша куниёқ Тоштемир аканинг машинасида қишлоқقا жўнаб кетдик.

Отам ўқишига илашганимни эшишиб ўн ёшга яшариб кетгандай бўлди. Дарров қўй сўйиб зиёфатта уннади.

— Тоштемиржон, барака топинг, — дея бот-бот алқайди у устозимни. — Олдингизда қарздорман.

Тоштемир ака қўлларини кўксига қўйиб сўзамоллик қиласди:

— Қарз-парздан гап очманг, бова. Бизларга дуодан йўқлаб турсангиз, бас. Ҳай, кўнглингиз жойига тушмаса, ана, ҳимматингизга қаранг, бир-икки кўзини бизга атаб сурувга кўшибиғина кўйинг, кўпайишибиғина юраверсин. Лекин қарз-парздан гап очиб, мени хафа қилманг, дуода бўлинг, бова, дуода. Ахир, савоб ҳам керак-ку...

Мен беҳуда хавотирланган эканман. Бошқаларини билмадиму, бироқ ҳуқуқшуносликка ўқишдан осони ийқ экан. Бир жуфтгина дафтарни қўлтиққа қисиб бориб-келиб юравердим. Унча-мунча расмий мусобақаларда танилиб қолганимдан обрўйим ҳам зўр эди. Ҳатто коллеж директорининг ўзи ҳузурига чорлаб қўлимни қисиб кўйган: «Кураш майдонларида коллежимиз номи жаранглаб турса, бас, буёғидан хавотир олманг...» Худо бергани шуда, гоҳ машқ-машғулотларни, гоҳ тайин-бетайин мусоба-

қаларни баҳона қилиб дарсларга ўлда-жўлда қатиашар эдим. Тоштемир ака ҳамишагидек раҳнамо, ҳамишагидек бош-қош. (Мени жер!)

Нуфузли мусобақалардан бирида устоз билан аразлашиб қолдик. Ўшанда оппа-осон ярим финалга чиққан эдим. Тағин озгина файрат кўрсатсан мутлоқ ғолибга айланишим тайин эди. Бироқ ярим финал беллашуви аввалида Тоштемир ака мени бир чеккага тортди:

— Қоржов, сен йиқилиб беришинг керак, — деди у шивирлаб.

Мен ҳайрон қолдим:

— Нега?!

— Шунақа ишлар... У ёқ билан келишдик, ғалаба уларга, соврин бизга, қалай?

— Йўқ, бунақаси кетмайди, ҳалол қурашамиз, — шундай дедим-у, бироқ ич-ичимдан барибир кўнишишимни сезиб турар эдим.

— Қоржов, тушун, бу таклиф улардан чиқди. Рақиб томон сендан қўрқяпти, товон тўламоқчи. Демак, сен маънавий ғолибсан.

— Йўқ, — дедим ўзимни қайсарликка солиб, — майдонда ғолиб бўлишни истайман.

— Уф-ф...

Тоштемир ака тумшайди-қолди. Узоқ вақт хона деразасидан ташқарига термулиб ўзича фам-фуссага ботди. Ҳатто, сақич ҳам чайналмай қолди. Мен устозимиз бу ёғига қандай чора топишига қизиқиб, зимдан уни кузатиб турардим.

— Эсиз яхшилик, эсиз меҳнатим, — дея ўз-ўзига гапиргандай минфирилашга тушди Тоштемир ака. — Сени қишлоқда битга беланиб ётганингда шаҳарга опкелдим, элга қўшдим, ўқишга жойладим, эвазига нима топдим... Мана, хурмат, мана оқибат...

Тоштемир аканинг ёзғиришларидан уни билмадим-у, мен енгил тортдим. Ич-ичимни тирниаб юрган аллақандай саволларга, нихоят, жавоб топгандай бўлдим.

— Ҳазиллашдим, устоз, мен розиман, — дедим зўраки илжайиб. — Анавиларни хурсанд қиласверинг.

Тоштемир аканинг кўзлари бир кур порлаб кетди. Жағлари шитоб сақич чайнашга тушди.

— Балли, боқса одам бўласан, — дея ўшшайди ўзича эркалаб.

Хаммаси Тоштемир ака истагандай бўлди. Ярим фи-

нални атай бой бердим. Устоз мўмайгина товои пулининг бир қисмини қайта-қайта санаб менга узатди.

Мен унинг қўлини заҳархандалик билан силтаб ташладим.

— Устоз, менга маънавий фалаба ҳам етарли, моддий фалаба сизга бўлақолсин...

Ха, дабдурустдан худди шундай деб юбордим! Оғзимдан чиқсан илмдорларга хос сўз ўзимни ҳам қойил қолдирди, ишқилиб, ҳуқуқшунослик коллежининг тупроғини бекорга ялаб юрмаган эканман.

Тоштемир ака юзимга бир зум анграйиб қолди: ё пурмаъно сўзларимдан ҳайратланди, ё дурусттгина ҳақдан воз кечганимга ишонкирамади. Бироқ улушни олишимга ортиқ кистамади.

— Хай, майли, — деб қўйди у пулларни ўз чўнтағига қайта жойлар экан. — Бир кун суришиб кетармиз.

Шу воқеадан кейин ўртамиздаги омонат парда буткул йиртиб ташлангандай бўлди. Тоштемир ака қўз ўнгимда шунчаки Тоштемир (мени жер)га айланди-қолди. Унинг олдида бемалол оёқ узатиб ўтирадиган, узунданузоқ жаврашларини (сергап-ку у!) шартта узадиган бўлдим. Қизиқ, Тоштемир ака бундай хатти-ҳаракатимдан хеч бир оғринмас, билиб-билмасликка олиб қўяверар эди. Балки илгари ҳам унинг феъл-атвори шунаقا бўлгану мен пайқамагандирман (Ҳар қалай, ҳувв, маънавий фалабадан сўнг сезир, шубҳакор бўлиб қолган эдим).

Ўша машмашадан кейин Тоштемир акага ўчакишиб, ўзбошимчаликлар қилишга ружу қўйдим. Энг аввал унинг «ичишдан, чекишдан... сексдан сақланинг» деган шиорини ўзимча бузишга киришдим. Бироқ дарров англадимики, бузғунчилик ҳам эплаганники экан. Бир дона сигаретни тутатиб бир сўргандим, ўпкам оғзимга тиқилиб, кун бўйи йўталиб юрдим. Ичкилик эса бундан беш баттар қилди. Аллақандай қаҳвахонага кириб яrim қадаҳ ароқ сипкордим, (устидан газак қилиш кераклигини қайдан билай) уч кун кўнглим айниб қусишдан бўшамай қолдим. Аммо... устоз тақиқлаган учинчи гунох иш шунчалар жозибали эдик... ҳали қўл урмай туриб, хаёлиниг ўзиёқ лаззат бағишилар эди. Тўғриси, Тоштемир ака билан фижиллашмасдан илгариёқ беихтиёр ўша учинчи гуноҳнинг кўйига тушиб қолган эдим. Кўча-қўйда, колледжа қиз-жувонларни зимдан-зимдан кузатиш жону

дилим эди. Ўз-ўзимга минг бир насиҳатлар қиласман, спортнинг одоб-ахлоқи ҳақидаги қоидаларни дуодай тақрорлайман, бироқ ҳеч бир нафи сезилмади. Не-не полвонларни ҳам бир силтвода синдирадиган гаройиб бир куч мени етаклаб юрар, қулогимга аллақандай сирли сўзларни шивирлар, учқур-учқур хаёлларга миндираш эди. Транспортлардаги тиқилинчларда қиз-жувонларга суйкалиб туриш, уларнинг хидини искаш ҳузурбахш машғулотимга айланди-қолди. Шундай серсаргузашт қунлардан бирида оппоққина жувонга илакишиб қолдим. Автобусдаги ур-сур пайт унинг бел-биқинларига қаттиқроқ тирғалганим чоғ, аёл мен томон кескин бош бурди. Чўчиб кетдим. Бироқ аёлнинг жаҳли билан чимрилган қошлари лаҳза ўтмай табассум билан ёйилиб кетди. Лаб-ёноғида ишвали қулгу ўйноқлади. Менга жон кирди. Бекатларнинг бирида жувоннинг изидан тушиб қолиб унга қора-ма-қора боравердим.

Аллақандай магазин ёнида аёл таққа тўхтаб менга юзланди:

- Мендан нима истайсиз, йигитча?
- Ҳеч нарса...
- Нега мени қувлаб юрибсиз?
- Ўзим...

Аёл нозли бир қулиш қилди:

- Ҳеч нарса... ўзим... намунча довдираисиз? Кинг-конг... Шу гавдага яраша ҳамён ҳам борми, йигитча?
- Бор.
- Уф-ф... ундей бўлса юринг, менга бир стакан сув олиб беринг, қувлай-қувлай ичимни кўйдириб юбордингиз.

Аёл бир талпиниб тирсагимдан тутди. Ҳаяжондан менинг ҳам томоқларим қуруқшаб қолди-ёв...

Чанқовлар босилгач, аёл ўлардай очлигидан нолиди. Хайрият, ўша қуни анчагина пул олиб чиқкан эканман, шўрвадан сўнг палов, паловдан кейин кабобхўрлик қилдик. Шу орада бир-биrimизга анча кўнишиб, апоқ-чапоқ бўлиб қолдик. Ошпазлар билан ҳисоб-китоб қилиб, эндиғина кетишга чоғланиб турган пайтимиз семиз бир хотин пайдо бўлдию ёнимдаги жувон билан хуш-хандон кўришиб, сўрапша кетди. Мен теваракка ахён-ахён олазарак кўз ташлаб, хижолатланиб ўтирадим. «Тағин бу ҳам оч бўлса-я?!» деган хавотир ҳам йўқ эмасди, албатта.

Семиз хотин алланималарни шивирлаб ёнимдаги жувонни четта тортди. Улар гавжум ошхонанинг бир бурчидаги хийла вақт гаплашиб қолишиди. Бир маҳал жувон ранг-рўйи тундлашиб, йигламоқдан нари-бери бўлиб ёнимга келди.

— Қоржов-жо-он, ёнингизда қанча пул бор? — дея пицирлади у, синик бир товушда. — Анови ўлгурдан пича қарз эдим, қистаб қўймаяпти.

Мен бирор бир эътиroz билдиришга улгурмадим. Жувоннинг кейинги сўзлари нишонга бехато тегди:

— Ўлгурни тезроқ жўнатиб юбормасам, икковимизга халақит беради, — деди фам-фусса орасидан илжайиб. — Қарзга қолмасма-ан... суришиб кетами-из...

Мен, албатта, шунча харажатга куйиб қолишни истамас эдим. Ноилож, чўнтақдаги бор-йўғимни чиқариб аёлга тутқаздим. Аёл бир чангаль пулни икки-уч қайта санааб, пичасини қайтиб берди:

— Ортиқаси керакмас. Узр. Қоржовжон, сизни ҳам безовта қилдим. Мен ҳозир... бир минут, кутиб туриңг, ҳўп...

Жувон дугонасини қўлтиқлаб, алланималарни жеркиб гапирганича ошхона ёнбошига ўтиб кўздан йўқолди. Мен лаззатли бир хаёллар оғушида кутиб ўтиравердим. Орадан ҳаш-паш дегунча ярим соатлар чамаси вақт ўтдикетди. Хавотир билан аёллар кетган томон юриндим. Афсуски, минг синчиклаб тикилсам-да яқин ўртада уларнинг қораси қўринмади. Мен шундагина хаёлан жувонни ечинтириб турган чоғим, у аллақачон ўзимни ечинтириб, ипсиз боғлаб кетганини сездим. Хайрият, бу машмашага бирор бир таниш-билиш гувоҳ бўлмади. (Хизр қўрганим чин, шекилли!) Аммо бу саргузашт ҳам фойдадан холи эмасди, катта харажатлар эвазига бўлса-да, ҳар қалай, аччиққина сабоқ олдим, Тоштемирнинг ўзи ёмон бўлса ҳам, у бот-бот такрорлайдиган спортчилар ақидаси нақадар яхши, нақадар ҳақ эканини чукур ҳис этдим.

Хуллас, шундай қўшимча сабоқлар ола-ола ҳуқуқшунослик коллежини битириб қўйибман. Уч йил дегани ҳаш-паш дегунча ўтиб кетибди. Шу уч йил ичидаги отамнинг юзидан мамнунлик аримади. Ҳар гал қишлоқка борганимда мени ўтқазгани жой тополмасди. Мен эса қўй-қўзиларнинг маърашини, гўнг исини соғиниб борганимдан ёш боладай ўйноқлаб қўтонларда изғигим келар эди.

Ноилож, ўзимни катта шаҳардаги катта давраларни кўрган, сипо ва жиддий қиёфага солиб ўтираман. Бу ҳол отамга хуш ёқади, ҳамқишлоқларнинг ҳавас-ҳасадини келтиради. Ака-опаларим ҳам наслимизга бир амал тегиб қолиши муқаррардек керилиб юришар эди. Айниқса, синфдош жўраларимнинг атрофимда гирди-капалак бўлишларини айтмайсизми? Гўё мен пиру комил, улар — хокисор муридлар! Аллақандай институтта кириш илинжида икки марта уриниб, икки марта ҳам омади чопмаган дўстим Хусан отамга чўлиқлик қилиб юрган экан. (Ахён-ахён ҳазрати Хизрнинг йўлини пойлаб Кенгсойнинг қир-адирларида изғишлари ҳам ҳозирча ҳеч бир наф бермабди.) Мен ҳар гал қишлоққа борганимда дўстимга астойдил далдалар берарман, кўнглини кўттарарман.

Ўтган уч йил ичida отам мендан хабарлашгали пойтахтга уч карра келиб кетди. Уч марта ҳам ўзидан катта қопни орқалаб олган эди. Тандиркабобдан ҳузурландик. Тоштемир (мени жер)нинг рўзгори ҳам икки-уч кун овқат ташвишидан қутулди. Отам қўярда-қўймай коллежимизнинг талай кайвони ўқитувчиларини ҳам меҳмон қилди. Хуллас, меҳмонга келган мезbon ҳамманинг кўнглини овлади. Ўқитувчиларим ҳам қарзга қолишини истамагандай мени хўб мақташди, коллажнинг фахрига чиқаришиди.

Отам бундан бир ойча бурун келиб-кетганида Тоштемир ака иккови мени ўртага олишган эди. Ўша кунлари коллажнинг битириув имтиҳонларини топшириб юардик.

— Энди-и, Коржовбой, — деди отам салмоқлаб, — институтнинг ҳаракатини қиласиз.

Тоштемир ака ҳам зўр бериб бош иргаганча отамнинг гапларини маъқуллаб ўтиарди.

Менинг кулгим қистади:

- Ота, институтга каллам кичкиналик қиласи-да.
- Кўпчиликнинг калласи билан бир амаллаймиз-да, улим. Мана, устозинг ҳам иложи бор деяпти.
- Сендай спортчи институтларга ҳам керак, — деди Тоштемир ака ҳовлиққаннамо.

Мен елка қисиб қўя қолдим.

— Эсам гап шу, — ҳукм чиқарди отам. — Кўнгилгинани бўлмай, Тоштемир акангнинг йўриғидан чиқмай, шу атрофда қора бериб тураверинг, улим. Насиб бўлса, ҳаммаси бинойи бўлади. Худодан умидимиз бор...

Ўшанда отам билан пинхона келишувлари жуда қатъий бўлганми, хар қалай, Тоштемир (мени жер) истиқболим учун зимдан югуриб-елиб юрган экан. Куни кеча коллеж билан хайр-хўшлашиб, ич-ичимдан алланечук фусса қўзғалиб ҳужрамга етиб келганимда Тоштемир ака мени бетоқат кутиб турар эди. Юз-кўзлари тўла ҳаяжону завқшавқ.

— Коржов! — деди у қаршимга қулоч ёйиб чиқаркан. — Хизр кўргансанми, нима бало? А?

Дарров англадим: омадим чопган. Ҳа, деб омад кулиб боқаверса ҳам одамнинг эти ўлиб қоларкан, шекилли, на қувондим, на ҳаяжонландим. Тоштемир аканинг кўнгли учун илжайиб туравердим.

— Бекқул Тўракуловични ҳеч эшитганмисан? — деб сўради устоз, йўлакдаги курсиларга ўтиарканмиз.

— Ҳа, — дедим бош иргаб, — бир марта кўрганман.

Рост. Учинчи курснинг бошларида коллекимиз ҳовлисига серҳашам, ойналари қоп-қора бир автоулов сувдаги оққушдай енгил, шовурсиз келиб тўхтаган эди. Бунгача «Бекқул Тўракулович келяптилар!», деган андак ваҳимали, андак ҳаяжонли шов-шув яшиндек тарқаб ултурган, коллекнинг директоридан тортиб фаррошигача дарвоза ёнида қўл қовуштириб туришар эди. Автоуловдан ораста кийинган оқ сочили, қора кўзойннак тақсан, ўрта бўй, олтмиш ёшлар атрофидаги бир зот виқор билан тушди. Директор етовидаги бир гурух ўқитувчилар тавозеълар билан уни қуршаб олишди. Кейинчалик эшитиб билдимки, Бекқул Тўракулович барча хукуқшунослик, қонуншунослик ўқув юртларининг раҳнамоси экан!

— Бекқул Тўракулович буюк олим, — дея оғзидан бол томиб таърифлашга тушди Тоштемир ака. — Қонунчилик илмини сувдай симирган. Қонунчилик бўйича бир... уч юзталар китоб ёзган-ов, университетда маърузалар қиласди. Ҳозирги амалдаги қонун-қоидаларимизда Бекқул Тўракуловичнинг хиссаси жуда катта. Ишонмасанг, ана, қонунчилик бўйича ёзилган китобларни очиб қара, жиноят кодекси дейсанми, маъмурий кодекс дейсанми, ҳаммасида устознинг исм-шарифлари бор. Бирида муаллиф, бирида таҳрирчи...

Тўғриси, колледжа уч йил ўқиб бундай узундан-узоқ маъруза эшитмаган эдим. Тоштемир ака қўзларини яrim юмиб, худди сехрли бир эртак сўйлаётгандай мароқ билди.

лан гапириб ётар эди. Икки-уч эснаб, икки-уч уф тортишларим ҳам кор қилмади.

— Бекқул Тўрақулович қаттиққўл раҳбар, ўта вижонли инсонлар. У киши ҳаётда қонун устуворлигидан бошқасини тан олмайди. Пораҳўрлик, таниш-билишчилик деган иллатларнинг ашаддий душмани. Билимни, меҳнаткашликни қадрлайдилар...

— Э, бўлди-да, — дедим охири чидаёлмай, — бу гапларнинг менга нима алоқаси бор? Қизиқ экансиз, устоз...

Тоштемир ака уйқусида алаҳсираб ётган одамдек туйкус кўзларини катта-катта очди, мамнун илжайди:

— Ана шу кишининг сенга назари тушган.

— Назари тушган? Менга-я?

Тавба, ҳазрати Хизрдан ҳам бошқа назаркардалар борлигини ҳеч хаёлимга келтирмаган эканман.

— Сени ўзига хос соқчиликка танладилар, — деди устозим ҳануз мамнун қиёфада. — Шахсан ўзларига телехранитель бўласан!

— Нима, мендан бошқа зўрлар қурибдими?

— Билмадим... номзодлар кўп эди. Сенинг ҳужжатларинг билан танишиб, шу полвон бизга маъқул, дептилар. Тўғри... биз ҳам қараб турганимиз йўқ, баъзи бир акахонлар аралашишди, ишқилиб... сен учун ўлиб-тирилдик.

— Қонун ҳимоясидаги одамга қўриқчи нега керак экан?..

— Бу ҳам бир престиж-да, Коржов, — дея чуқур тин олди Тоштемир ака. Бундай хушхабарни чапак чалиб кутиб олмай эзмаланишим энсасини қотираётганди унинг.

Тан олиш керак, аслида мен ҳам ич-ичимдан қувониб, илоё, омадим чопгани чин бўлсин, деб турибман. Бироқ бирор ишқали чиқиб қолмасин тағин деган ўй ҳам тинчлик бермаётганди. (Ахир, ошхонадаги воқеа анчагина сермулоҳаза, тадбиркор қилиб қўйганди-да.)

— Бекқул Тўрақуловичнинг шу пайтгача қўриқчиси йўқмикан? — деб сўрадим ўзимча бепарво.

— Бўлган. Ҳамма гап шунда-да, — тағин илҳомланди Тоштемир ака. — Бекқул Тўрақулович хизматга яраша химмат кўрсатадиган киши. Қўриқчинини сийлаб яхши бир ишга жойлаб қўйганлар. Энди ёш қадрлардан олмоқчи.

— Устоз, қўйинг шу ишни, мен курашчи полвонман, мунтлашувга гирт нўноқман, шарманда бўламиз.

— И-е, ким сенга муштлашасан, деяпти? Сен уй қўриқлайсан.

— Уй?!

— Ҳа, дача-пача дегандай.

Мен кулиб юбордим:

— Ҳозиргина «телоохранитель», деб лоф-коф ураёт-гандингиз-ку? Чорбокқа қоровул керак экан-ку у кишига?!

— Да... умуман, — бўшашиб бош қашиди Тоштемир ака. — Нима фарқи бор сенга? Ишқилиб, фўдайибгина юрсанг бўлди ўша ерда.

— Ойлик ҳам берармикан?

Тоштемир ака сапчиб ўрнидан туриб кетди:

— Ўвв, намунча ўзингни тарозига солиб қолдинг?!?

— Сўрадим-да.

— Сўрама! Бу ёғи билан ишинг бўлмасин. Сен ҳали синов муддатидан ўтиб ол-чи? Колгани бир гап бўлар... Ўргилдим сендақа ойликхўрдан.

— Ўқиши-чи? Мен ҳали институтга кирмоқчи эдим-ку?

Тоштемир ака пихиллаб кулиб юборди. Бу қулгуда жаҳл ва қувонч алланечук аралашиб кетган.

— Эҳ, галварс, эҳ, тўнка, — деди у афсуслангандай бош чайқаб. — Ҳамма ташвиш ўқишига киришинг учун бўляяпти-ку?! Сен ҳозирча қўриқчиликда ўзингни кўрсашиб тур, колганини менга қўйиб бер...

— Бекқул Тўракулович таниш-билишчилик қилмайди, дедингиз-ку ҳозиргина?

— Тўғри. У киши бунақа ишларга аралашмайди. Ну... сенинг ўша хонадонда хизмат қилишинг менга етарли, колганини ўзимга қўйиб бер, тушундингми?

— Тушундим.

— Уф-ф... хайрият, — Тоштемир ака енгил тин олиб, елкамга қўл ташлади.— Коржов, ука, сен бундай мижғовликни ташла. Менга ҳалақит бермай айтганимни қилиб юр. Мана, бугун коллажни битирдинг, институтларнинг қабулига ҳали уч ой вакт бор. Үнгача кўп нарсаларга ултурамиз, факат сен менга қулоқ сол, хўп?

— Хўп.

— Яша, укажон, мен сени әртага Бекқул Тўракуловичга топшираман.

Мана, бугун Бекқул Тўракуловичга топширилдим. Шундай ҳаяжонли, қувончли воқеа арафасида бўлишим-

га қарамай кеча дарров донг қотиб ухлаб қолибман. Тоштемир ака эрталаб аранг үйғотиб олди. Тун бўйи мижжа қоқмай чиққанидан нолиди. Ювениб-тарандик, чой-пой ичдик, хуллас, талай тараддулардан сўнг чошгоҳ маҳали отландик.

Тоштемир ака машинасини елдириб бора-бора, ҳануз менга маслаҳатлар бериб ҷарчамайди.

— Энди бу ёғига бўшашма, Қоржов, — дейди у серқатнов қўчадан кўз узмай сақич чайнаб. — Ўзингни ўқимишли, маданиятли тут. Ҳар нарсага бурнингни тикма. Бўш вақтларингда домланинг кўзларига иложи борича китоб билан кўрин. Хизматларига ҳамиша шай тур. Балки сени у ёқ-бу ёқларга ёnlарида олиб юришлари ҳам мумкин. Ишқилиб, ишнинг пачавасини чиқарма...

Мен бирор-бир ҳашаматли ҳукумат идорасида серсавлат, пўрим амалдор билан учрашишни хаёл қилиб борар эдим. Йўқ, Тоштемир ака уловини Олой бозори биқинидаги турна қатор машиналар ёнида тўхтатди-да, лип этиб кабинадан чиқди. Ҳудди шуни кутиб тургандай, биздан андак наридаги қип-қизил, серҳашам машинадан «Адиdas» русумидаги спортчилар кийимини кийган, ўрга бўй, оқсоқ киши қора берди.

Тоштемир ака у билан кўшкўллаб кўришаркан:

— Ассалому алайкум, Бекқул Тўрақулович, — деди ялтоқланиб. — Кечирасиз, куттириб қўйдикми?

Мен, хувв, коллеж бўсағасида кўриниш берган, не бир қонунлар ижодкори шу зот эканига ишонқирамай қарадим. Ҳамма серташвиш, куйинчак одамлар қатори у ҳам хорғин, зериккан қиёфада машинасига суюниб сигарет чекиб турибди. Қизаринқираб турган кўзларига қараганда кеча улфатчилик чакки бўлмаган кўринади.

Улар анчагина сухбатлашиб қолдилар. Тоштемир аканинг узук-юлук қулоғимга чалинган гап-сўзларидан Бекқул Тўрақулович меҳнат таътилида эканини, унга аллакимлар салом йўллашганини аранг илғаб олдим.

— Коржовбой! — дея имлади Тоштемир ака нихоят мен томон юзланиб. — Бу ёққа келинг.

Машинадан тушиб қироатли салом билан уларга якинлашдим.

Бекқул Тўрақулович бўй-бастимга синчков-синовчан кўз ташлаб ўзича ҳазиллашган бўлди:

— Ў-ў-хў-ў, бу полвон ҳовлимизга сифмайди-ку!

Тоштемир (мени жер) моли мақталган чайқовчидай хушхон илжайди:

— Ўзимизнинг жайдарилардан, домла. Юз процент ишончли йигит. Илиги қўй ёғига тўла. Ислим Қоржов.

Иккаласи хиринглашиб кулишди. Бекқул Тўрақулович қўй соатига қўз ташлаб, менга юзланди:

— Қоржов полвон, қани, машинага марҳамат.

* * *

Кечагина эшакка қийшиқ мингандан қишлоқи эдим, бугун эса ажабтовур машина ўринидида ястаниб ўтирибман-а?! Наҳотки, Хизр қўрганим чин? Ё ҳаммаси тушмикан? Йўғ-э, хушим-ку, (кўзларим катта-катта очик) ана, Бекқул Тўрақуловични кўриб турибман, ана, машина дeraзасидан сершовқин, серҳашам шаҳар лип-лип ўтиб турибди, кенг-текис, серқатнов йўл, баланд-паст иморатлар...

Бекқул Тўрақулович машинани ҳам сипогина ҳайдар экан. Аҳён-аҳён мен томон қўз қисиб, илжайиб қўяди. Ҳар қалай кўнглига ўтиришганга ўхшайман. Йўл бўйи яхшигина танишиб ҳам олдик. Албатта, мен Тоштемир ака тайинлагандай ўзимни илму маърифатга чанқоқ, ўқиш дардида юрган бир мусофиридай кўрсатишга тиришдим. Бекқул Тўрақулович интилишларимни маъқуллаб ўзича талай насиҳатлар қилди. Мен бош иргаб чарчамадим. Гап орасида Бекқул Тўрақуловичнинг ўзи ҳам аллакандай Боғдодми-Барбодми деган қишлоқдан чиққани маълум бўлди. Машаққатли меҳнату ўқиш туфайли шундай даражага эришибди.

Машина бир маромда елиб борар эди. Ҳаш-паш дегунча шахар турки ортда қолиб, боғлару парча-парча экин далалари аро кетган кенг йўлга тушиб олдик. Ҳойнахой, чорбокқа борсак керак.

Бир пайт Бекқул Тўрақулович афтларини бужмайтириб, рул чамбарагига кўкрак тираб қолди.

— Қурғур, қорин, — деди у аранг, — эртадан бери бураб-бураб оғрийди-я...

Менинг кулгим қистади. Шундай катта олим, катта арбобни ҳам эл қатори ич оғриғи безовта қилиши хеч хаёлимга сифмас эди.

— Янтоқ қайнатиб ичинг, — дедим ўзимни билагон кўрсатиб. — Бир соатда отдай бўп кетасиз.

Менинг маслаҳатим Бекқул Тўрақуловични қулоғига

кирмади хисоб. У теваракка аланглай-аланглай қуюқ да-рахтзор орасига юргилиаб кетди.

Бир оздан сўнг яна йўлга тушдик.

— Ай, яш-шанг, Коржовбой, — деб гап бошлади Бекқул Тўракулович, афтидан ўртадаги андак ўнгайсизликни даф этиш учун. — Сизни безовта қилмас эдигу, баъзи бир оғайнилар, шогирдлар қўйишмади-да...

Бекқул Тўракуловичнинг ёзгиришидан маълум бўлди-ки, аслида ҳеч қандай қўриқчию ҳеч қандай хизматчига эҳтиёжи йўқ экан. Домла шунчаки ёр-биродарларининг кўнглидан ўтолмабди, тўғрироғи, зиқна деган фийбат гаплардан қочиби.

— Ана шунака, — деб қўйди у сигарет тутатиб, — камтаргина кун қўришинингга ҳам қўйишмайди булар.

Мен гўё бирорвинг оштоворига берухсат қўл чўзгандай туйкус таъбим тирриқ бўлди. Бекқул Тўракулович авзойимдаги ўзгаришни сезди-ёв (нақадар зукко, маданиятли зот) дарров вазиятни сувшага тушди.

— Ну, Коржовбой, сизни ўзим талаб қилдим, — деди у кулиб. — Кўнмаганингизда хафа бўлардим. Баъзан зериккан пайтларим ёшлар билан сухбатлашишни ёқтираман. Сиз айнан менбоп сухбатдош экансиз.

Биламан, домла бу гапларни шунчаки кўнглим учун айтаяпти. Лекин димогим чоф бўлди. Кўнглимга қарайпами, демак, хувв, ярим финалдагидай маънавий ғолибман.

* * *

Чорбоғ кенг-мўл, жуда хушманзара эди. Баланд девор бўйлаб экилган қатор тераклар, мевали дараҳтлар солланиб турибди. Чорбоғ этагида мармар ҳовуз. Ҳовуз теварагига қалин қум тўшалган. Улкан, сершоҳ, сербарғ дараҳт ҳовуз атрофига қуюқ соя ташлаб турибди. Чорбоғнинг у ер-бу ерида ранго-ранг гулзорлар барқ уриб ётиби. Сайр учун атай қурилган бетон йўлакчалар ҳар ён-хар ёнга қон томирларидаи ёйилиб кетган. Дарвозанинг чап томонида машина гаражи, гаражга тақаб қурилган гугурт қутисидеккина хужра. Дарвозанинг ўнгига эса баланд пойдеворли, деразалари бокқа қараган, кўркам, шинам уй.

— Мана, бизнинг дача шу, — деб қўйди Бекқул Тўракулович у ён-бу ён кўз ташлаб.

Ха, домла рост айтган экан. Одам тугул пашша учеб

киролмайдиган бундай баланд қўрғонга хеч бир қўриқчи шарт эмас эди.

Биз дарвозадан бош суқиб, оёқ оширган чоғ мармар ҳовуз ёқдан бир бўй қиз чопкиллаб кела бошлади. Мен қўзларимни қаён яшиаримни билмай қолдим! Кўкрагиу киндигидан пастига кийиб олган бир-бир тутам матони айтмаса, қиз қип-яланғоч эди.

— Привет, пап, — деди у Бекқул Тўракуловичнинг бўйнига жажжи қизалоқдек осиларкан.

Домла ҳам қизини нўноқларча кучиб, оқ-сариқ юзидан ўпиб қўйди:

— Ах, ассалим! Қалай, дам оляпсизларми?

— Ҳа, — деди қиз ингичка қошларини қоплаб тушаётган соchlарини ноз билан силтаб ташлаб. — Ўртоқларим келишган. Имтиҳонлардан қутулганимизни бассейнда ювяпмиз.

Ўзининг сўз ўйинидан ўзи завқланиб қиз қиқир-қиқир кулди. Домла ҳам ҳиринглаб, арзандасининг яланғоч яғринларини силаб қўйди.

Мен қизнинг оппоқ, силлиқ сонларига, бир тутам сийнабандидан тошиб турган кўкракларига беэътибор бўлиш дардида ўлиб-тириларканман, қўзларим дуч келган ёққа аланг-жаланг бўларди. Лаш-лушларим солингган елим халтани gox у қўлимга, gox бу қўлимга бетоқат алмаштираман.

Бекқул Тўракулович туйқус мен томон юзланди:

— Танишинглар, Қоржов, бу менинг эрка қизим Маржона.

Маржона икковимиз бир-биrimizga енгилгина кўз ташлаб, енгилгина бош иргаб қўйишдик. Қиз лабларини қимтиб зўр бир қаҳқаҳадан аранг тийилиб турганини пайқагандай бўлдим. Афтидан, қўполдан-қўпол исмим ё бесўнақайларча хижолатланиб туришим унинг кулгисини қистар эди.

Шу орада уйнинг мармар зинапояларида ранг-рўйи мармардек совуқ бир аёл кўриниш берди. Пешонасини сириб танғилган гулдор мато устида уюлган сарғиштоб сочи похол фарамига ўхшайди. Юз-қўзига суркалган бўёқнинг қуюқлигидан асл кўзу асл лаб-дахани илғаш анчагина қийин. Устида семиз, биққи қоматини сириб турган енгизиз, тор халат.

— Ассалў-ўм, — дея димоғида салом берган бўлди аёл.

Бекқул Тўрақулович айбдоргина илжайиб бош иргади:

— Биз келдик.

Шу орада Маржона оппоқ орқаларини диркиллатган кўйи яна мармар ҳовуз ёқقا чопқиллаб кетди.

— Яхши бориб келдингизми, адаси? Чарчамадингизми?

Лаби-лабига тегмай писта чақаётган бу аёлнинг анча ёш кўриниши сабабли, ҳар қалай у Бекқул Тўрақуловичнинг хотини эканига дабдурустдан ишониш қийин эди. (Бирок, аччиқ ҳақиқат.)

Домла яна менга қуш қарааш қилди.

— Танишинглар, Қоржов, бу... кеннойингиз Илмира.

Мен тағин енгилгина бош иргадим.

— Яхши, хурсандман, — деб кўйди Илмира янгам мени бир буюмдай кўздан кечиаркан. — Хуш келибсизла-а...

У туйқус орқага бурилди-да шанғиллаб чақирди:

— Роза опа-а, ани-ий!

Лахза ўтмай мармар зинапояда ўрта яшар, жонсарак бир аёл пайдо бўлди. Бошидаги сарғиши рўмол, белига тутган сарғиши этак унинг шу хонадон хизматчиси эканидан дарак берар эди.

Чорбоққа киргандан бери кўнглимни алланечук ғашлик қоплаб олган. Бу ғашлик гўё Маржона билан чопиб келдию ич-ичимга қамалиб, тирноқлаб ётмоқда эди.

Роза аний пилдирабгина келди-да қўлимдаги елим халтани олиб эшитилар-эшитилмас товушда, «юринг», деб кўйди. Эру хотин ўзаро фунфирлашиб мармар зинапоядан кўтарила бошлашди. Мен Роза анийга эргашиб гараж ёнидаги хужра томон юрдим.

Хужра шинамгина экан. Хужра тўрида кўрпа-тўшакли каравот. Бутун чорбоғ кўзга ташланиб турадиган де-раза ёнида емак столи, бир жуфт стул. Ҳатто эскигина бўлса-да телевизор ҳам бор экан.

Роза аний каравот устидан кўрпа-тўшакка ҳаворанг жилд кийгиза-кийгиза тинимсиз жавраб аввалги қўриқчини мақтади, ора-чора менинг вазифаларимни тушунтирди. Унинг уқтиришича, энг зарил ишим чорбоққа кечаю қундуз кўз-қулоқ бўлиб туриш, келиб-кетувчиларни кутиб олиб, кузатиб қўйиш, ишқилиб, шум ниятли баъзи бир касларга ҳамиша хозир нозир эканлигимни кўрсатиб қўйиш экан.

— Бирорта ит-пит боғлаб қўйишса ҳам бўларканку? — дедим энсам қотиб.

— Ай, — дея қўл силтади Роза аний, — ит круглий ташвииш. Кечаю кундуз вовуллайвериб безор қилади. Тағин уни боқишиң айтмайсизми? Итни ухаживать этишнинг ўзига яна бир одам керак, фу-у...

Оқсоч аёл итдан кўра менинг тузуклигимни исботлаш учун тағин аллақанча жавради. Охири ўзи ҳам чарчаб каравот қиррасига ўтириб қолди.

— Телевизор ишлайдими? — деб сўрадим уни чалғитиб.

— Да, конечно, — дея ҳорғин елка учирди Роза аний, — охранник ухлаб қолмасинлар деб телевизор қўйилган.

Бир оздан сўнг у чиқиб кетди. Чиқиб кета туриб менга оғир ботмайдиган тарзда тушунтирган бўлди.

— Ҳозир обедни хозяинлар била қиласиз. Сўнгра... бундан кейин овқатларингизни шу ерга чиқариб бераман, уқдинғиз-а?

Роза аний қўздан пана бўлгач ашқол-дашқолларимни жойлаб, кийимларимни алмаштиришга уннадим.

* * *

Тушликка товуқ гўштидан тайёрланган антиқа овқат едик. Бекқул Тўрақулович бутун тушлик давомида аллақандай газетадан кўз узмади хисоб. (Олимлар бот-бот такрорлайдиган моддий ва маънавий озиқ олиш усули шунаقا, шекилли?)

Илмира янгам эса жағи-жагига тегмай мени сўроққа тутди. Қишлоқ турмушини сўраб-суринтириди, спорт хаёти билан қизиқсинди. Ора-чора у ҳам зиммамдаги вазифани силлиқлик билан уқтириб ўтишни унутмади.

— Гулзорни тез-тез сугориб турмаса қуриб коляпти, — деди у стакандаги шарбатдан хўплаб. — Хувв, этакдаги олма давно ҳосил бермайди, кесиб ташлаш керак.

Биз ҳайхотдек залнинг бир бурчагига қўйилган емак столи атрофида ўтириб овқатланардик. Зал серҳашам, шарқона безалган, шинда биллур қандиллар осилган, оёқларимиз остида майин гилам. Ланг очиқ деразадан чорбоғ, дарвоза йўлаги яққол кўзга ташланади. Кириш эшигининг ўнгида, хувв, метро кассирининг хужрасини эслатиб юборадиган, уч тарафи ойнабанд тўсинли ошхона. У ердаги ошхона жиҳозлари орасида ивириштган

Роза аний фира-шира кўзга ташланади. Кенг залнинг у ер-бу ерида тўрут нақшинкор эшик, хойнаҳой, ётоқлар, хос хоналар ўша ёқларда жойлашган.

«Домланинг дачаси шундай бўлса, шахардаги уйи қанақа экан», деган ҳасадгўй хаёл калламдан лип этиб ўтди. Мен, албатта, бундай беадаб ўйларни дарров ҳайдаб, хушёр ва холис фикрлашга уриндим. Олим одам, йўлчи юлдуз қонунлар ижодкори шундай фаровон, серҳашам яшашга, меҳнатга яраша роҳат қўришга ҳақли эканини тан олдим.

— Қалай, дачамиз ёқдими сизга? — деб сўраб қолди Бекқул Тўракулович чойхўрлик ҳам охирлаётган бир пайтда. Афтидан, у атрофимга анграйиб қолганимни пай-қаганди.

Мен бош иргаб қўйдим.

— Яхши... эл қатори-да.

— Шуни айтинг, Коржовжон, — дея Илмира янгам дарров мени қўллаб-қувватлади. — Кўпдан узилиб қайга борардик, эл билан тирикмиз-да.

Мен нақшинкор эшиклар тараф имо килдим:

— У ёқларни ҳам қўрса бўладими?

Эру хотин бир лаҳза кўз уриштириб қолишиди. Мен лаб тишладим: «Об-бо, бефаросатлик қилдим-ов...». Йўқ, (Хизр қўрганим чин, шекилли) туйқус мавқеим ошиб кетди. Эру хотин сўровимдан чин қўриқчиларга хос пухталик, ишбилармонлик фазилатларини қўришибди.

— Бемалол, Коржовбой, bemalol, — деди Бекқул Тўракулович ўрнидан қўзғалиб. — Албатта, ҳаммаёқни кўздан кечириш сизнинг бурчингиз, яшанг, ука.

Бесўнақайларча жойимдан жилишим барибири Илмира янгамда шубҳа уйғотди:

— Эҳтиёт бўлинг-а, — деб қўйди у, ҳойнаҳой нозик уй жиҳозларидан хавотирланиб.

Домла билан етаклашиб хоналарга бир-бир кўз ташлаб чикдик. Оғир, кимматбаҳо пардалар тутилган оп-поқ- момиқ кўрпа-тўшакли диванлару гардероблар билан жиҳозланган икки салқин хона ётоқ экан. (Албатта, бири Маржонаники!)

— Мана, бу кироатхона, — деб қўйди Бекқул Тўракулович энг чеккадаги ҳужрага бошлаб кираркан.

Ҳужра тўридаги уч-тўрут токчали жавон китобу ҳар хил журналларга лиммо-лим эди. Чорбоқقا қараган де-

раза ёнида бежиримгина ёзув столи, бир жуфт курси турарди.

— Китобларингиз кўп экан, — дедим бошқа мақтov калламга келмай.

Бекқул Тўрақулович камтарона кулди.

— Бу шунчаки, читальний... Ҳовлида маҳсус кутубхонам бор, унча-мунча институтницидан қолишмайди.

Шу пайт Тоштемир аканинг ўгитлари қулоқларим остида яна бир жаранглаб ўтгандай бўлди: «...ўзингни ўқимишли кўрсат...»

— Домилла, — дедим муллаваччаларга хос илжайиб, — китобларингизни беш минут титкиласам майлими?

Бекқул Тўрақулович қўлларини қанотдай ёйди:

— Бажону дил, Қоржовбой, бемалол.

Сўнг у орқага тисарилиб хужрадан чиқди-да, эшикни оҳиста ёпиб қўйди. (Накадар маданиятли, сипо киши-я!)

Зил-замбил китоблардан бирини қўлга олиб, муқовасидаги ёзувни хижжалаб-хижжалаб ўқидим. Ўрисча-ёв, тағин жойига қўйдим.

Шу пайт чорбоғ ёқдан қувноқ қаҳқаҳалар қулоғимга чалинди. Қарадим. Бу ердан ҳовуз бўйи дов-дараҳтлар аро элас-элас кўзга ташланар экан. Улкан дараҳт соясида Маржонадай шир яланғоч икки қиз қилпиллаб рақс тушар эди. Бир парча магнитофондан жазавали мусиқа янграмоқда. Ўтадаги дум-думалоқ стол усти ҳар хил хўрагу ичимликларга тўла.

Мен гаройиб томошани тўсиб турган шоҳ-шаббаларни сўка-сўка дераза раҳига ўтириб қолдим. Қизлардан бири қувноқ қийқириб ўзини ҳовузга отди. Гумбурлаб сачраган сув гўё баданимга теккандай сесканиб кетдим.

Туйқус болалигим эсимга тушди.

Пахта пайкалларидан тошган сув темир йўл ёнидаги сайҳонликда каттагина кўл бўлиб қолар эди. Қиз-ўғил аралаш ўша ерда чўмилаверардик. Қизлар узун кўйлакларини ечмай, қий-чув кўтариб ўзларини сувга отишар эди. Орадан йиллар ўтиб овозларимиз андак йўғонлашиб қолгач, қизлар биздан айрича, пана-панада чўмилар бўлганини пайқадим. Жазира мақалардан бири эди. Ўшанда саккизинчи синфни тугаллаб ёзги таътилга чиққан эдик. Ҳусан икковимиз пахта пайкали орасига яшириниб, кўлда чўмилётган қизларни пойлардик. Қўйкис улардан бири бизни кўриб қолди. Қий-чув, тўс-тўполон

кўтарили. Кизлар баданларига чиппа ёпишган ҳўл кўйлакларининг сувини шўриллатиб дуч келган ёққа тумтарақай бўлишди. Биз довдираб қолдик. Шу пайт кўл ўртасида сузолмай, типирчилаб ётган қизга кўзим тушди. У синфдошим Бибигул эди. Ўйламай-нетмай ўзимни сувга отдим. Ҳануз қўрқув ва уят ичида иргишилаётган Бибигулнинг белидан қучиб кўл қирғоғига қараб суздим. Тахликали бир ҳол бўлса-да, қучогимда момик қиз баданини ҳис этиб ажиб бир ҳаяжонга чулғангандим. Оғизбурнимга икки-уч сув кириб кетди. Судраклаша-судраклаша бир амаллаб қирғоққа чиқиб олдик. Буткул ҳолдан тойган Бибигул ўт-ўланлар устига чўзилиб қолди. Мен ҳам ҳансираганча синфдош қизнинг ёнига чўқдим. Бир пайт Бибигулнинг кўзлари катта-катта очилди. Буткул бехоллигига қарамай (бilmadim, қайдан куч топди) юзимга шарақлатиб бир тарсаки тортиб юборди. Изидан хўнграб йиглашга тушди.

Мен ҳовуз ёққа пойлашга урина-урина хийла вақт ўтириб қолганимни пайқамабман. Бир пайт кироатхона эшиги қия очилдию чўчиб тушдим. Роза аний экан.

— Дарвоза қўнғироғи чалинди, — деди у ичкарига бош сукиб. — Хозяинлар дам олишяпти.

Тушундим. Эринчоқлик билан ўрнимдан турдим.

Дарвоза ёнида қош-мўйловлари қалин, семиз кипи бир кучоқ совға-саломлар билан турарди. Андак нарида унинг машинаси.

— Бекқул Тўрақулович уйдамилар? — деб сўради у мени таажжуб билан кўздан кечирапкан.

— Домилла дам оляпти.

Мехмон мен томонга товуқ «кишт»лагандай қўл силтаб қўйди-да ичкарига сукилиб кирди:

— Ҳечқиси йўқ, ўтириб турамиз.

Мен беихтиёр лўкиллаб меҳмонга эргашдим. Совға-саломини қўлидан олар-олмасимни билмай гангидим.

Кун аёвсиз қиздирап эди. Аллақаердадир мусича лоҳас кукулайди. Мен ҳам ўзимни ланж сезардим. Меҳмонни залга кузатиб кирдиму ҳужрамга қайтдим.

Ҳужрам салқингина эди. Каровотимда бирпас хаёл суриб ётдим. Кўзим илашибди. Бир маҳал дарвоза ёнидаги шовур-шовурдан сергакландим. Маржонахон ўртоқларини кузатаётган экан. Йўқ, бу гал ҳаммасининг устбоши бут, отам айтгандай бинойигина. Улар ҳиринглабиб, пичирлашиб узок хайрлашдилар.

Мен зерика бошладим. Телевизорни ишлатдим. У-бу каналларга қизиқсиниб босиб кўрдим. Зўр. Телевизор эскигина бўлса-да, тип-тиниқ кўрсатар экан. Аллақайси каналда намойиш этилаётган «ур-сур» кинони томоша қилиб ўтиредим. Анча вақтдан сўнг мармар зинапояда ўша қош-мўйловлари қалин меҳмон кўриниш берди. Беккүл Тўракулович уни кузатиб кўяётган экан.

Мен шоша-пиша хужрадан чиқдим. Хизматга шай, жанговар ҳолатимни пайқаган домла мамнун бош иргаб қўйди.

* * *

Эрталаб хужра деразаси қаттиқ тақиллаганидан чўчиб уйғондим. Кун аллақачон ёйилиб кетган эди. Пўрим кииниб, қайларгадир отланиб турган Беккүл Тўракулович ва Илмира янгамга кўзим тушди. Роза аний зўр бериб ланг очиқ деразамни тақиллатиб турарди.

— Ҳозир, — дедиму иргиб ўрнимдан турдим. Кийимларимни апил-тапил устимга илиб ташқарига отилдим.

— Кечирасизлар, ухлаб қолибман, — дедим кўйлак тутгмаларини қадашга уринарканман.

— Ҳечқиси йўқ, — жилмайиб кўйди Беккүл Тўракулович. (Оҳ, нақадар маданиятли, тушунган инсон!)

Илмира янгам эса зарда билан дарвоза томон юраюра, димогида мингиллади:

— Кўриқчини кун ярмида аранг уйғотиб олсанг-а...

— Биз кечга яқин қайтамиз, — деди Беккүл Тўракулович менга. — Сиз Роза холангиз билан бамаслаҳат чорбоққа қараб туринг. Келиб кетувчиларга ўзингиз эшик очинг. Хўп, келишдик-а? Яна ухлаб қолманг-а...

Мен хижолатланиб бош иргадим.

Машина аллақачон шайлаб кўйилган экан. Эру хотин жўнаб кетишиди.

— Бир танишлари тоққа приглашать этган, — деди Роза аний машина ортидан қараб қоларкан. — Қимизхўрликка...

Роза аний очиқкўнгил, меҳрибонгина аёл экан. Ухлаб қолганим учун қуюқкина койиб, қуюқкина нонушта тайёрлаб берди. Асал ва сариёғ солинган сутли чойдан сўнг, бир бўлак колбаса, бир нечта қовурилган тухумни иштаҳа билан туширдим. Суҳбатимиз ҳам қизиди. Оқсоч аёлдан антиқа-антиқа ахборотлар олдим. Масалан, Илмира янгам Беккүл Тўракуловичнинг иккинчи оиласи экан. Катта

янгамиз касалланиб вафот этганидан сўнг ҳам кўп йиллар домла суюкли рафиқасининг руҳи поки чирқилламасин, деб Илмирахонни расмий никоҳига олмаганлар. Шунчаки пинҳона учрашиб, бир-бирига меҳр-муҳаббат кўрсатиб юришган. Катта янгамиздан ёдгор фарзандлар — икки ўғил, бир қиз ўсиб-улғайиб, уй-жойли бўлгандан сўнгтина Илмирахонни тўю томоша билан уйига олиб келган. Албатта бу орада ўзаро муҳаббатнинг меваси Маржонахон ҳам анчагина бўй чўзиб қолган экан. Ҳозир у аллақандай университетда ўқир эмиш.

— Бу гапларни бирорларга сўйлаб юрманг тагин, — дея огоҳлантириди Роза аний дастурхон устидан идиштовоқларни йигиштириб оларкан. — Фийбат ёмон.

Мен ўзимча оқсоч аёлни тинчлантирган бўлдим, оғзим маҳкамлиги билан мақтандим. Рози аний менинг эътирофларимга деярли эътибор бермади, туйқус Илмира янгамни мақташга тушиб кетди. Янгамнинг очиққўллигидан тортиб, меҳмоннавозлигию дид-фаросатигача оқизмай-томизмай таърифлади.

Шу орада гап айланиб кеча ташриф буюрган меҳмонга бориб тақалди.

— Ҳа, уми, — деди нижинганнамо қўл силтаб Роза аний. — Домланинг шогирдларидан, Бақоев...

Бақоев — кунда-шундалардан экан. Шахарда терговчи бўлиб ишлар эмиш.

Ишқилиб зерикмадим. Ҳузур-ҳаловатдан куч-ғайратим тошиб оқсоч аёлнинг ул-бул юмушларига қарашдим, ертўладан масалликлар олиб чиқдим, суви тўхтамай қолган жўмракни созладим, супир-сидир пайти оғир стол-стулни у ёқ-бу ёққа силжитишдим, хуллас, Роза анийнинг кўнглидан чиқишига тиришдим.

Кун иссиқ эди. Хушманзара, серсоя чорбоғ ҳам алланечук мудраётгандек туюларди. Ҳовузнинг кўм-кўк, муздаккина сувида завқ-шавқ билан чўмилдим. Андак хуморим босилгач, ҳужрамга кириб эрмак учун хийла вакт соч тарадим, ўзимча ороландим.

Бир пайт Маржонахонга кўзим тушди. У уйнинг мармар зинапоясидан эринибгина тушиб келар эди. Устида ҳаворанг, енгиз, ёқасиз кўйлак, оёғида уй шинпаги, кўлтиғида семиз бир китоб, соchlари яланғоч елкаларида паришон ёйилган. Кўп ухлаганиданми ё пардоз-андоз кам бўлганиданми юзлари алланечук салқи, синиқкан туюлади.

Мен негадир шошиб хужрамдан чиқдим. Вужудимга енгил бир ҳаяжон югурди.

Бироқ Маржона менга қиё ҳам боқмай шундоқкина тубгинамдан димоф-фироғ билан чорбоғ томон ўтиб кетди. Мен унинг атай диркиллатиб бораётган орқала-рига алланечук алам, алланечук изтироб исканжасида караб қолдим. Негадир хўнграб-хўнграб йиғлагим келди.

Хужрамга қайтиб кирдим. Кирдиму бироқ ўтиrolмадим. Юрагим тошарди. Шундагина анчадан бери кизнинг изидан бориш учун баҳона қидириб ётганимни пайқаб қолдим. Пайқадиму ўз-ўзимдан уялдим, ҳатто, алланечук чўчиб кетгандай бўлдим.

Аллақайдадир бир мусичанинг интиқ-интиқ «ку-ку»-лагани қулоғимга чалинади. Мен минг бир саросима билан яна хужрамдан чиқдим. Худди шуни кутиб тургандай ногоҳ Маржонанинг овози жаранглади:

— Эй, охранник!

Мен ялт этиб товуш келган томон юзландим. Маржона! У ўша серсоя дарахт тагидаги ёғоч ўриндиқда оёқларини чалиштириб ўтирган кўйи менга имларди.

— Эй, ану-у ердан озгина район териб беринг!

Киз ишора қилган жойдаги гулзорнинг бир чеккасида дарҳақиқат ям-яшил районлар барқ уриб ётарди. Алланечук титроқ билан хушбўй ўтдан бир даста тердим.

Кун беҳад қизиб кетган эди. Дарахт шохларида чумчуклар безовта-безовта чирқиллашади.

— Раҳмат, — деб кўйди Маржона қуруққина, қўлимдаги район дастасини афтиимга қарамай оларкан — Ах, какой запах.

Мен юрак ютиб тўнфилладим:

— Менинг исмим Қоржов, охранникмас.

Киз «нима фарқи бор», дегандай елка учирив, лаб буриб кўйди.

— Хафа кўринасиз, маззангиз йўқми? — деб сўрадим ҳануз қизнинг ёнидан кетгим келмай.

— Да, пустяки, — қўл силкиди Маржона, — бекорчилик.

— Ўқишлиар тугаб зерикяпсизми, дейман-а?

Маржона жавоб бермай димоғида кулиб қўйди. Сўнг олдидаги очиқ китобни қўлига олиб ўқишига тутинган бўлди.

Мен худди ботқоққа ботиб қолгандай, оғир, ланж қадамлар билан ундан узоклашдим.

* * *

Роза анийчасига айтганда — «хозяин»лар шомдан сўнг қайтиб келишди. Мехмондорчилик қуюқ бўлган шекилли, эру хотин бири кўйиб бири олиб кекиради. Беккул Тўракулович келиб-кетувчилар ҳақидаги ахборотимни лоқайд эшилди. Маржона гўё бир-икки йил кўрмагандай гоҳ ойисининг, гоҳ дадасининг пинжига шоду хандон тиқиларди. Эру хотин унинг кун бўйи чорбоғдан чиқмаганига ишонқирамади. Қизнинг фалати қайфиятидан таажжубланиб бир-бирига тикилишди, Илмира янгам лаб чўччайтириди, Беккул Тўракулович елка учирди.

Улар фала-ғовур билан ичкарига кириб кетишгач дарвоза ёнида қоқкан қозиқдек хийла вақт туриб қолдим. Ичимга чироқ ёқса ёришмас эди. Хаёлларим паришон. Ҳужрамга кирдим. Чироқни ёқмай каравотимга чўзилдим. Чорбоғни тобора қоплаб келаётган зулмат гўё менинг ичимдан сизиб чиқаётгандек эди. Ҳаво дим. Аллақайдадир қурбақа қуриллаб юборди.

Анча пайт каравотимда эзгин, оғир ўйларга қоришиб ётдим. Бир маҳал ҳужрамнинг чироғи ёнди. Роза аний экан. У тушликдан қолган, илитилган бўтқани емак столим устига дўқиллатиб кўйди.

Мен хижолатланиб дедим:

— Сизниам круглий ташвишга қўйдим-да.
— Полвон болага ухаживать этиш керак, — деди Роза аний, ўзича бошимни эркалаб силаб.— Е, болам, е, ҳеч уялма, бу сенинг ҳаққинг.

Корин оч бўлса-да беиштаҳа овқатга интилдим. Ҳануз хаёлларим паришон. Ҳувв, кечаги кўнгил ғашлигим дам сайин қуюқлашиб бораётганини тобора ҳис этмоқда эдим. Манави хонадон аҳлидан тортиб Тоштемир акаю тағин аллакимлар кўз ўнгимда айқаш-уйқаш бўлиб турарди. Мен овқатнимас, гўёки аллакимларнидир чала чайнаб ютардим.

Нихоят, коса туби кўринди. Совиб қолган чойдан босиб-босиб, хўриллатиб-хўриллатиб хўпладим.

* * *

Тун. Уйқум келмас эди. Устига-устак Илмира янгамнинг ҳалигина бот-бот тайинлагани қулоқларим остида

жаранглаб турарди: «Боғни тез-тез айланиб туринг-а, эҳтиёт яхши-да».

Хужрамдан чиқдим. Уй пештоқидаги чироқ нурида чорбоғ ола-чалпоқ ёришиб турибди. Енгил эсган эпкиндан япроқлар маҳзун шитирлайди.

Мен уй ёнидаги йўлак бўйлаб секин-аста юра бошладим. Боғнинг қоп-коронғу бурчакларига, серсавлат уйнинг бўйи-бастига разм солган бўлдим. Шу пайт ланг очиқ ётоқ деразасига суюниб сигарет чекиб турган Маржонага кўзим тушиб қолди. Беихтиёр юракларим хапқириб, томоқларим қурқшади. Негадир... негадир қувониб кетдим!

Маржона ҳам туйқус мени кўрдию қип-қизил чўёла-ниб турган сигарет қолдини бокқа улоқтириб хона ичкарисига шўнгиди.

Унинг ётоғи тунчироқнинг алвон-сарғиш ёғдуларига чўлғанган эди. Мен ҳануз юракларим гурс-гурс урган кўйи боғ ичкарисига қараб юрдим. Бир туп олма дарахт ёнидан қиз ётоғи тузуккина кўзга ташланар экан! Бутун вужудим кўзга айланиб ўша ёққа алангладим. Маржона! У алланечук эринчоқлик, алланечук ноз билан аввал кўйлагини сўнг сийнабандини ечди. Бўлиқ кўкраклари бир қур яйрагандай диркиллаб кетди. Қиз оҳиста энгашиб тағин алланималарни сидириб ташлагандай бўлди. Шаршарадек кўйилган соchlари елка бўйинларига чирмашиб ютоқа-ютоқа ўпаётгандай эди. Лаҳза ўтмай қип-яланғоч Маржона бутун бўйи-бости билан тунчироқнинг қизил-сарик ёғдуларига қоришиб намоён бўлди. У гўзал, самбитдек қоматини атай кўз-кўз қилгандай уч-тўрт дақиқа у ён-бу ён юринди, силаниб-сийпаланди. Ниҳоят, бир парча уйку либосини кийди-да боғ тараф нигоҳ ташлаб, пастга, каравотига шўнгиди.

Мен ажиб бир туйгулар, ажиб бир иштиёқ оғушида титраб, таранг тортиб турардим. Беихтиёр дарахт танасини маҳкам қучоқлаб, тахир таъм пўстлоғига лаб босдим.

* * *

Эрталаб кўзгуга боқиб кўзларим қизарганини пайқадим. (Тунги қизғиши-сарғиш шуълалар қароғларимда қотиб қолган, шекилли?) Соқолларим қоп-қорайиб, қовоқларим салқи тортган, ранг-рўйим синиқсан эди.

Эру хотин афт-ангормига бир зум синовчан-синовчан

тикилишгач ўзаро мамнун кўз уриштириб олишди. Ҳар нечук, улар тун бўйи чорбоғ кезиб ўз вазифамни астойдил дўйнтирғанимга юз фоиз ишонишган эди.

— Бугун меҳмонлар келади, — деди Бекқул Тўракулович зериккан бир қиёфада. — Сал у ёқ-бу ёғингизга караб олинг-а...

Домла жилмайиб жағ-иякларини силаб қўйди. Бу «соқол-поқолни қиртишлаб олинг», дегани, албатта. (Накадар маданиятли, хушмуомала зот!)

Бирок «у ёқ-бу ёғимга караш»га хеч хафсалам йўқ эди. Анча вақт каравотимда чўзилиб ётдим. Бутун вужудимни фалати бир ланжлик, хорғинлик қоплаганди.

Чошгоҳ пайти меҳмонлар келишиди. Мен хужрам ёнида енгилгина бадантарбия қилиб турардим. Чорбоғнинг қия очиқ дарвозаси ёнига икки автоулов оҳиста келиб тўхтаганини кўрдиму кўйлагимни кийдим, у ёғ-бу ёғимни орас-талаган бўлдим.

Мехмонлар узун-калта, ориқ-семиз саккиз жон эди. Ораларида соchlари ҳинду чайласидай хурпайган, димофдор уч аёл ҳам бор экан. Меҳмонлар тўпидағи Тоштемир (мени жер эмас!) акага туйқус кўзим тушдию қувониб кетдим. Тоштемир ака бўйи баробар аллақандай совға-саломларга кўмилиб турганиданми, ҳар қалай, уни дарров пайқамабман. Бир маҳал соғинчга ўхшаш аллақандай ҳисларга чўлгандим, ҳатто, беихтиёр лаб-лунжим табассумдан ёйилиб кетди. Бирок Тоштемир ака ҳамма қатори мен томон шунчаки бош иргаб ҳовлига кирди.

— Ўхў-ў! — дея хитоб қилди Бекқул Тўракулович кулоч ёйиб зиналардан тушиб келаркан. — Хуш келибсизлар, марҳабо-о...

У билан изма-из пастваётган Илмира янгамнинг ҳам кўллари кўксига, лаблари кулгуда эди:

— Ва-ай, тушимми-ўнгим?! Хуш кўрдик...

— Соғиндигу бостириб келавердик, — деди кечагина келиб кетган ўша қош-мўйловлари қалин Бақоев, кулоч ёйган кўйи Бекқул Тўракуловичга пешвуз юраркан.

Совға-саломни айнан ким келтирганини домла кўрганига буткул ишонч ҳосил қилди, шекилли, Тоштемир (мени жер!) қўлидаги нарсаларни менга тутқазди.

— Қани, полвон, — деди у овозини атай баландлатиб. — Буни ичкарига опкиринг-чи....

Салом-алик, қучоклашиб ўпишишлар, табассуму мулозаматлар анча пайт давом этди.

Бугун ҳаво эрталабданоқ қизиб кетган эди. Дов-да-рахтлар орасидан фира-шира кўзга ташланиб турган, муздек, тип-тиниқ сувга лиммо-лим мармар ховуз ўзига оҳанграбодай тортарди. Мехмонлар ниҳоят залдаги очил дастурхон теграсида андармон бўлиб ётган маҳал ховузга икки-уч ўйнғиб чиқдим. Ланжликларим андак тарқагандай бўлди.

Тушга яқин Маржона қайгадир отланиб қолди! Енгёкасиз оппоқ кофта, йўл-йўл чизиқли кулранг шим баданларини сириб туради. Лабларида қирмизи, қовоқларида кўкиш бўёқ.

Мен минг бир таманно билан уйдан чиқкан Маржонани кўрдиму уялиб кетдим. Назаримда тун бўйи уни хаёлан кучиб-ўпгандаримдан киз хабардордек эди. Беихтиёр қад ростлаб, уст-бошларимни орасталаган бўлдим, эрталаб соқол қиртишламаганимдан афсусландим.

Маржона! У илкис бир бош силтаб манглай соchlарини кўқитди, чимирилди, теваракка лоқайд бир кўз ташлаб кўйди, лабларида алланечук эрка, инжиқ қулгу ўйноқлади.

Мен эски қадрдонлардек илжайиб қиз билан саломлашишга, икки-уч оғиз гаплашишга чоғландим. Бироқ Маржона шундоққина бикинимдан бепарво, узун боғичли чарм сумкаласини ўйноқлатган кўйи ўтиб кетди.

«Хаёл билан кўрмай қолди-ёв...», деб ўйладим мен ўз-ўзимни овутиб. Бироқ алланечук гусса, ўқинч бутун вужудимга бостириб кирди. Маржонанинг тобора узоклашиб бораётган «так-туқ» қадам товушлари шундоққина юракларимда акс-садо берар эди.

Кушлар чугур-чугурига тўла чорбоғ, еб-ичишаётган меҳмонларнинг фала-ғовурига, енгил мусиқа садоларига кўмилган уй бир лаҳзадаёқ хувиллаб қолгандай туюлди.

Лошимни аранг судраб зиналардан кўтарилидим.

Ошхонада Роза анийнинг қўёли-қўлига тегмайди. Газ ўчиқ устидаги қозон милт-милт қайнаб турибди. Ҳавони лаззатли таом иси туттган.

Базм столини қуршаб ўтирган меҳмонларнинг жағижаига тегмайди. Фала-ғовур. Пишқириқлар. Қошиқ-вилкалару чинни идишларнинг «чинг-чунг», «жаранг-журунг» садолари биллур қандилларда акс-садо бераётгандек ту-

юлади. Сузилган кўзлару, бўриққан юзлардан меҳмонларнинг анчагина ширакайфга келиб қолганини англаш мушкул эмас. Барча бир-бирига қулоқ солмай, бир-бирига гап уқтириш билан банд. Тўрдаги тепакал, семиз, бадқовок киши Бекқул Тўрақуловичга куйиб-пишиб алланеларни тушунтирас, домла эса чап бикинидаги косовдай қоп-қора, озгин, сийрак соchlари опшоқ нусхани не сабабдандир койир эди.

— Мехрибон ҳукуматимиз омон бўлсин, — дея гулдираб қўйди меҳмонлардан бири ўз бошича, чапиллатиб овқат чайнаркан.

Тоштемир соқи гоҳ узалиб, гоҳ ўрнидан туриб бориб жажжи қадаҳларга ичкилиқ қўймоқда. Базм столининг адогини ишғол этган аёллар ҳам пичирлашган, ҳиринглашган кўйи ўз-ўзлари билан овора. Уларга яқин ўтирган Бақоев — ўша қош-мўйловлари қалин, бақлоқ нусха заифаларга тез-тез мулозамат қилиб кўяди.

Мен кириш эшиги ёнида анчагина қаққайиб турдим. Мезбону меҳмонларни зимдан кузатиб сездимки, ҳозирча бу ерда ҳеч керагим йўқ. Секин ташқарига чиқиб кетишга чоғландим. Шу пайт ширакайфдан андак чайқалиб ўтирган Бекқул Тўрақулович менга қадалиб-қадалиб қаради. Сўнг қошиқ тутган қўлини ҳавода имлаганнамо силкитаркан, кўзлари пирпираб, лаблари чўччайди, афтидан, у менинг исмимни дабдурустдан эслеёнмай гаранг эди.

Мен истар-истамас домланинг ёнига бордим.

Бекқул Тўрақулович енгимдан тутиб ўтирганларга викор билан юзланди:

— Мана шу йигит-да бизнинг лотареяга чиққан!

Домланинг товуши туйкус жаранглаб чиққаниданми ё менинг ногоҳ давра тўрида пайдо бўлганимданми, ишқилиб, меҳмонлар бир қур сергак қотишли. Барчанинг кўзи менга қадалган эди.

— Олпомиш-ку, бу, а?! — дея пихиллади шундоқкина бикинимдаги ўша тепакал кимса мени бош-оёқ кўздан кечиришга тиришаркан.

Озгин, оқсоч меҳмон бир менга, бир Бекқул Тўрақуловичга анграйиб ўзича асқия қилган бўлди:

— Буни қандай боқаяпсиз, домла?

Даврада енгил кулги кўтарилилди.

Бекқул Тўрақулович асқиячига эътиrozли кўз ташлаб, бош чайқади:

— Яхшимас... йигитнинг иони кўчада, деган мoshайхлар, унақа хунук гап қилманг, яхшимас...

(О, нақадар доно, хушхулқ зот!)

— Ҳа-а, ҳақиқий спортсмен, — деди Бақоев ўзича менга ҳайрат билан тикилиб. — Домланинг чорбоғига худди шундай полвонлар ярашади.

Аёллар ўртасида ҳам енгил фала-ғовур кўтарилиди. Улар гоҳ Илмира янгамга, гоҳ Бекқул Тўракуловичга юзланиб, бири қўйиб-бири олиб чуфурлаша кетди:

— Муборак бўлсин...

— Буюрсин... Яхши кунларда хизмат қилсин...

— Кўз тегмасин...

Тепакал, семиз кимса сипқорилган ичкилик устидан бир бўлак олмани қарсиллатиб чайнаркан:

— Домла, — деди Бекқул Тўракуловичга юзланиб. — Бундай зўрларни қаердан топасиз-а?! Биз бечораларга қайғурдаги пиёнисталар учрайди. Би-ир... ёрдам қилинг энди, а?

Кайфи тароқлигидан уни ўчиб, анчадан бери мудрай бошлаган, лаблари дўрдок, дўнг пешона меҳмон ҳам мин-филлаб қўйди:

— Тўғри... биз ҳам ҳеч ялчимаяпмиз.

Бекқул Тўракулович мамнун бош ирғаб Тоштемир соқи томон ишора қилди:

— Мана, шу укамиизда гап кўп. Илтимосларни Тоштемиржонга айтинглар. Бизнинг полвон ҳам шу укамиизнинг шогирдларидан.

Тоштемир (мени жер!) ўрнидан андак кўзғолиб, артистлардай даврага таъзим қилди. Илжайди.

Ўтирганлар уни фала-ғовурга кўмиб ташлашди.

— Ия, фабрикант ўзимиздан экан-ку?

— Бизнинг заказниям қабул қилинг, Тоштемиржон.

— Шогирдлардан кўпми ҳали?

— Тоштемиржон...

Мен чув-чувдан фойдаланиб секин залдан чиқиб кетдим. Туйқус ўтов бўсағасида бўйин қисибгина ўтирган отам эсимга тушди. Зил-замбил қадамлар билан зинапоядан пастладим. Дилем сиёҳ, хаёлларим алғов-далғов эди. Ногоҳ қўлларимга кўзим тушди — мушт! Ё, ҳазрати Хизр?! Қачон мушт бўлиб туғилди бу қўллар! Ҳалигина дастурхон бошидами? Балки кечадир? Балки хувв, ўтов-

даёқ кўлларим муштга айлангану шу пайтгача сезмагандирман? Бу муштлар кимга ўқталган, кимга?! Балки... балки ўзимгадир?!

* * *

Мехмонлар қарта ўйинига андармон пайт Тоштемир ака худди гуноҳ ишга қўл ураётгандек теварагига ўғринча алантглай-алантглай хужрамга кириб келди.

Мен каравотимда мук тушиб ётардим.

— Намунча қовок-тумшук? — деди у хушхандон. — Худди бирор арпангни хом ўргандай бўзраясан? Тинчликми?

Мен миқ этмадим. Тоштемир ака ёнимдаги стулга омонат ўтири.

— Нима, касал-пасалмисан? — сўради у бир зум сакич чайнашдан тўхтаб. — Соқолларингни қиртишлаб олсанг ўласанми? Қара, қўпол этикнинг изига ўхшаб қолибди, худди бирор ўхшатиб жағларингта тепгандай.

— Тоштемир ака, кетаман бу ердан, — дедим каравот киррасига ўтириб. Овозим алланечук хириллаб чиқди.

Тоштемир ака сапчиб ўрнидан туриб кетди. Ланг очиқ деразадан ташқарига кўз ташлаб олиб, лабларига кўрсаткич бармоғини босди:

— Тисс... Ўчир! Бу нима деганинг, тўнка? Кўрдингку, ҳамманинг дикқатидасан хозир. Ановиларнинг бари шаҳарнинг кўзурлари, сен билан қизиқишаپти, тентак! Кетармиш...

— Кетаман... керакмас ҳеч нарса, чарчадим...

— Чида, ўзв, бола, — деди Тоштемир ака ғижиниб, сўнг завқ билан кўз қисди. — Ҳозирча очколаринг зўр.

* * *

Мехмонлар кечга яқин дабдаба билан жўнаб кетишди.

Илмира янгам уй зиналаридан беҳол кўтарилиларкан:

— Анийга қарашворинг, — деди менга.

Роза аний ўлгудек чарчаганига қарамай бетизгин жаварди. Иккимиз ивирсиб кетган зални, ошхонани саранжом-саришталагунимизча у бугунги меҳмонларни биттама-битта таърифлаб чиқди. Афтидан, шундай машхур, курсиси баланд одамларга хизмат қилганидан мамнун эди у.

Оқшом маҳали хувв, тунов кунги ўртоқларини бош-

лаб Маржона келиб қолди! Чорбоғ яна қий-чув тўйполонга қўмилди.

Мен ич-ичимдан ажабтовур севинч силқиб чиқаёттаганини сездим! Бутун борлиғимга хуш бир қайфият ўрмалади. Маржона! Мен қизнинг беписанд, бепарво нигоҳларига йўлиқиши учун атай дарвоза ёнида турдим. Йўқ, бу гал Маржона ҳеч кутилмаганда мен томон енгилгина бош иргаб саломлашди. Ҳатто жилмайгандек бўлди. Унинг ўзидек тор кофта, тор шим қийган дугоналарини икки гўдайган йигит қўлтиқлаб келарди. Ҳаммасининг димони баланд. Кийимлари қимматбаҳо.

Мен йигитларга ошкора файерлик, ошкора қўрслик билан разм солдим. Бириси новча, чайир, бириси кўпчиған хамирдеккина. Сочларини энг сўнғиги урфда калтартириб, оҳангжамо билан тарашлаган, бирининг бўйнида, бирининг билакларида олтин занжир. Тусмолимча, иккови ҳам менга тенгдош.

Нафратомуз тикилиб турганим таъсир қилди чоғи, йигитлар қизлардан бўшаб, мен билан қўл бериб кўришишди.

* * *

— Вот, всё, — деди Роза аний пайт топиб мен билан гаплашаркан. — Азонгача уйқу йўқ энди.

Оқсоч аёлнинг куйиб-пишиб тушунтиришларидан англадимки, Маржонахон ўз ўртоқлари билан ҳовуз ёнида гулхан ёқиб, ўйин-кулгу қилишар экан. Бу — табиий ҳаётга қайтиш эмиш!

— Яхши-ку, — дедим кулиб, — бир кечага қўриклишликдан қутуламан.

Роза аний бош чайқади.

— Наоборот... Сен гулханга ўтин ташийсан, бассейни қурбақалардан қўриклийсан.

Ҳаммаси оқсоч аёл айтганидан-да баттар бўлди.

Маржонахон ўртоқлари билан залда бир соатлар чамаси еб-ичишгач, қий-чув, тўс-тўполон билан чорбокка чиқишиди.

— Эй, молодёж! — Илмира янгам ланг очик деразадан узалиб ўзича огохлантирган бўлди. — Шум-гам кўтарманглар, биз дам оляпмиз!

Ёшлар унга қулоқ солишмади ҳисоб. Бир зумда ечиниб, хувв ўша кунгидек шир яланғоч ҳолга келишди. Йигитлар ўзларини ҳовузга отишиди. Сачраб кетган со-

вук сувдан жунжиккан қизлар қувноқ қийқириб юбо-ришиди.

Мен шомдан бери зимдан кузата-кузата, тусмоллай-тусмоллай анови... «табиат шайдо»ларининг исмларини билиш олган эдим.

Бўйчангина, кўзлари кўкиш қиз — Сайёра, соchlарини турмаклаб-туғиб олган, қошлари қалин дугонасининг исми Гулюз экан. Баҳодир деганлари ўша ўнг кўзи пир-пир учиб турадиган новча, чайир йигит, кўпчиган хамидреккина оғайнисининг оти — Жаҳонгир! (Вой-бўй!)

Мен ҳам кўйлак-чолворимни ечиб ташлаб бир парча лунгида қолдим. Ахир, худо бериб, ановилар таклиф этиб қолишса, бажону дил давраларига қўшилиш ниятида эдим-да. Шу боис ҳам телевизордан тез-тез кўз узиб, ланг очик хужрам деразасидан мармар ҳовуз ёққа умидвор-умидвор тикилардим.

Бир пайт Маржона йигитлар билан ҳиринглашиб уйертуласига кириб кетди.

Қизиқсаниб қараб туравердим. Бир оздан сўнг улар бир жуфт чарм қопламали, энсиз, узунчок тўшак судраклаб чикишиди.

«Ҳа-а, шўрликлара-а, — деб ўйладим мен кулиб. — Тўшакка чўзилиб табиатга қайтишаркан-да... Бунинг учун уйдан чиқмай ётишса ҳам бўлади-ю...»

Мен Роза аний дамлаб берган кўк чойни эрмакка ҳўплаб-ҳўплаб, телевизорга паришон термулиб ўтирап-канман, дам сайин хужрамга сифмай борардим. Ҳануз-хануз эс-хушим ҳовуз бўйида эди.

Бир пайт Маржонанинг таниш товуши жаранглади:

— Эй, охранник! Эй... бу ёққа қаранг!

Ўзимча бепарво деразадан бош чиқардим. Бирок юрагим қинидан чиқкудек типирчиларди.

Шоҳ-шаббалар орасидан чала-ярим кўриниб турган Маржона имлаган бўлди:

— Бу ёққа келинг, бизларга қарашворинг!

Тун. Ҳаво иссик, дим. Уй пештоқидаги чироқ чорбогни ҳамишагидек ола-чалпоқ ёритиб турар эди. Кўк тўлағуж-ғуж юлдузлар титкиланган қўрдаги чўёлардек жимирлайди.

Улкан дарахт тагидаги юмалоқ стол устида мева-чева солинган идишлар. У ер, бу ерда пиво ичимлигидан бўшаган шишалар сочилиб ётиби. Ҳали очилмаган та-

лай шишалар сув тўла тоғорага ташлаб қўйилган. Кичкинагина магнитофонда майин, маъюс мусиқа янграмокда. Баҳодир билан кўкиш кўз Сайёра ҳиринглашган кўйи ҳовузда сузиг юришар эди. Гулуз эса чарм жилдли тўшак устида қуруқликка чиқиб қолган балиқдек чўзилиб, бепарво сигарет чекяпти. Қумга қоришиб ётган Жаҳонгирнинг ҳам бир қўлида сигарет, бирида шиша, у гоҳ чекиб, гоҳ ичиб аллақандай кино ҳақида гап сотарди:

— ...Том Хенкс жа қийворган. Ну, музика туфта...

Назаримда менинг ҳовуз бўйида пайдо бўлишимга хеч бири эътибор бермади.

Юмaloқ стол қиррасига қўл тираб, солланиб турган Маржона бепарво мева чайнаркан:

— Бизга олов ёқиб беринг, илтимос, — деди.

Мен унинг самбитдек яланғоч қоматидан аранг кўз уздим.

— Хўп... Ўтинни қаердан оламиз?

Товушим алланечук титраб, ҳиркираб эшитилганидан ўзимнинг жаҳлим чиқди.

— Ху-у, там, — деди Маржона чорбоғнинг қоп-коронгу бир бурчагига ишора қилиб.

Чиндан-да чорбоғ деворининг тубига кесилган қари дарахтларнинг шох-шаббалари тахлаб қўйилган экан. Бир қучоқ кўтариб келиб ҳовуз бўйига шарақлатиб ташладим.

— Ну-у... даёш! — деди чўчиб тушган Гулуз.

— Ока, кўп ўт керакмас, — дея фўлдиради Жаҳонгир пиво шишини оғзига чоғлаб. — Итак ҳаво иссиғу-у...

Гулуз ҳам чўзилиб ётган жойидан тўлғониб уни маъкуллаган бўлди:

— Так просто... экзотика учун озгина ёқинг, всё.

Балки бошқа вазиятда манави маҳмадоналарнинг уриб бошини ёрган бўлардим. (Энг аввал «ока»нинг шўри қисарди!) Бироқ айни чоғ гоҳ балиқдек чўзилиб ётган Гулуз, гоҳ самбитдек Маржонага кўзим тушиб ғалати бир туйғуларга қоришиб қолган эдим. Титрофимни аранг босиб шох-шаббаларни уймаладим.

Шу пайт... Маржона шундоққина биқинимга чўнқайиб гугурт узатди:

— Мана, ёқинг.

Мен беихтиёр гугуртга қўшиб қизнинг иссиқ қўлла-

рини ушлаб олдим. Юз-кўзларимга олов сарагандай бўлди.

— Ҳозир... ҳозир ёқаман, — деб фудрандим, Маржонанинг қалқиб чиққан сийналарию сонларига қарамасликка тиришиб.

Бироқ гугурт чақишим анча қийин бўлди.

— Сув тегибди, шекилли, — деб қўйди Маржона қад ростлаб. Назаримда унинг ҳам товуши нам тортгандай хириллаб чиқди.

Охири, гугурт чақиб шох-шаббага тутдим. Ўтин қупкуруқ бўлса-да, имиллаб оловланарди. Ўчиб қолишидан чўчидимми ё беҳад ҳаяжонланганимданми, милт-милт ёна бошлаган хас-чўпни кўзлаб пуфлаб юбордим. Ўт гуриллаб ёна кетди.

— Ҳамма олов ичингизда экан-ку?! — дея шарақлаб кулди Маржона.

Мен ҳам илжайдим. Қўлларини белига тираб соллаётган қиз қоматига қош-кўзларимни қашлаган бўлиб панжа орасидан қараб-қараб олдим.

Олов гуриллаб ёнар эди.

Мен ўрнимдан турдиму яна беихтиёр чўккалаб қолдим. Ахир... торгина лунгим бутун сиру синоатимни яширишга ожиз эди! Хайрият, бу орада Маржона магнитофон кассетасини алмаштириш билан овора экан. Гулюз ва Жаҳонгир куйиб-пишиб аллақандай қўшиқчини мактаб туришарди.

Мен бир амаллаб ўрнимдан турдиму ўзимни ҳовузга отдим. Албатта, гумбурлаб тоғ қулагандай бўлди. Энтиканча совуқ сувга шўнгир эканман Жаҳонгирнинг «ока, потише!», дегани элас-элас қулогимга чалинди.

Нихоят, муздек сув ҳароратимни босди.

Оҳиста, суза-суза теварагимга кўз ташладим. Гулюз билан Жаҳонгир ҳануз ўзаро гап сотишарди. Маржона! У лов-лов ёнаётган гулханга термилиб қўлидаги шишишдан аҳён-аҳён пиво ҳўпламоқда. Мунча чиройли-я?!

Мен шундагина Баҳодиру анави Сайёра кўринмаётганини пайқаб қолдим. У ён, бу ён сергакланиб кўз ташладим. Худди излаётганимни сезишгандай ҳовузнинг нариги тарафидаги бир жуфт арча панасидан улар чиқиб келишди. Афт-анголларида мамнун бир ифода. Улар бир-бирини қучган, эркалаган кўйи шундоқкина ҳовуз лабидан юра бошладилар. Туйқус Сайёра шўхлик билан

Баходирни сувга итариб юборди. Йигит ховуз ичига кулай-кулай қизнинг ҳам қўлидан тортиб кетди. Икковлари ҳам қувноқ қийқиришиб ховузга шўнғиши.

Мен уларга халақит бермаслик учун ҳовузнинг бир бурчида туриб қолдим. Вужудимга хуш ёқаётган сувни тарқ этгим йўқ эди. Тўғрироғи, ҳовуздан чиқсан, бу антиқа даврада қолишга бошқа баҳона тополмай ҳужрамга қайтишдан кўрқдим. (Йўқ! Ё, Хизр!)

Икки ошиқ-маъшуқ бир-бирига сув сачратиб ўйноклаша кетди. Мен ўзимни яна-да чеккароқ олдим. Шу пайт Жаҳонгир ва Гулоз эътиборимни тортди. Улар шундоққина қўл узатсан етар жойда чўзилишган эди. Очиғроғи, қиз сурила-судрала йигитнинг нақ биқинига келиб қолибди!

— Пошли, юр, — дея шивирлади Гулоз йигитнинг тирсагига сийнасини ишқалаб.

Мук тушган кўйи сигарет тутатаётган Жаҳонгир оғир сўлиш олди.

— Уф-ф... барибир бўлмайди-да.
— Бўла-ар... — яна-да эҳтиросли шивирлади Гулоз. —
Ҳаракат қилиб кў-ўр, даволандинг-ку...
— Гап бундамас... Сен билан духовний контакт йўқ...
— Бошқалар билан-чи? — серзарда пичирлади қиз. —
Бирортасини эплаган жойинг борми ўзи?

Жаҳонгир тағин оғир сўлиш олиб қиздан ўзини тортди:

— Дай покой, а...
— Твар! Иплос! — пичирлади Гулоз нафрат билан кум фижимларкан. — Менга бошқа яқинлашма! Шармандангни чиқазаман, показуха! Ҳаммага айтаман!
— Смотри, унаштирилганмиз-а...
— Ўчир-е! — қиз сапчиб ўрнидан туриб кетди.

Мен беихтиёр сувга шўнғидим.

* * *

Олов бир пастлаб, бир кўкка иргишилаб ёнар эди.

Маржона шишадаги пиводан ҳўплаб-ҳўплаб ҳануз гулхан қархисида, узунчоқ, йўғон ёўла устида ўтирибди. Унинг хаёлларга фарқ кўзларида аланга аксланмоқда.

Баҳодир ҳовуздан чиқдио дарахт шохига осиб қўйилган гитарасини олиб гулхан теварагидаги бўш стулчага ўтирди. Тинғиллатиб-тинғиллатиб ўзича чолғу пардала-

рини созлаган бўлди. Сайёра тоғарадаги шишалардан бирини очиб ичқиликдан қулт-қулт хўплади, сўнг Баҳодирнинг оғзига тутди.

Мен, албатта, тун бўйи ховузда қололмас эдим. Имиллаб кирғоққа чиқдиму таваккал гулхан ёнига бордим. Маржона... «ҳали ҳам шу ердамисан», дегандай менга таажжуб билан қараб қўйди.

Баҳодир оҳиста қўшиқ бошлади:

**Ҳамма ёқда атиргул иси,
Ҳар нарсадан излайман маъно...**

Ўзи озғин, новдадеккина бўлса-да туппа-тузук овози бор экан, қурмағурнинг. Ҳатто, пирпираб турадиган қўzlари ҳам унга ярапарди.

**Қулогимдан кетмайди исми,
Гулираъно, о, Гулираъно-о...**

Мен гулханг бир-икки чўп ташлаб қўйган бўлдим.

Гулюз даст туриб ўзини ҳовузга отди. Хомуш сигарет сўриб ётган Жаҳонгир ҳам бир зум тараддуланиб тургач, сирпанибгина сувга тушди.

Гулираъно, о, Гулираъно-о...

Бир пайт... қўшиқ оҳангига мос бош тебратиб ўтирган Маржона андак сурилиб менга ғўладан жой берди! Оҳиста унинг ёнига чўқдим. Беихтиёр елкаларим қиз елкаларига тегиб кетдию қаршимдаги олов аъзои баданимга ўрмалагандай бўлди.

Гулираъно, о, Гулираъно-о...

Маржона ичқилиги яримлаб қолган шишани менга узатди. Ҳатто, қувноқ қош учирашиб қўйди. Мен беихтиёр шишани қўлга олдим. Ҳалигина қиз лаблари теккан жойга лаб босиб суюқликдан қулт-қулт ютдим. Тахир бир таъм томокларимни куйдириб ўтди.

Қўшиқ тамом бўлди. Баҳодирга муҳаббат билан термилиб ўтирган Сайёра йигитнинг тиззаларидан кучди.

Мен ачимсик суюқликни буткул сипқориб бўш шишани бир чеккага улоктиридим. Шундагина зўр бериб ўз-ўзимни чалғитишга, шундокқина бикинимдаги қиз баданини ҳис қилмасликка уриниб ётганимни пайқадим. Бироқ аъзои баданим қизигандан қизиб, тобора чилдирмадай таранглашиб борар эди.

Шу орада сувга бир-икки шўнғиб чиққан Гулуз икки шиша ичимликни кўтариб гулхан ёнига келди. Унинг хўл кўкрак халтаси сирфалиб, оппоқ сийналари деярли тошиби чиққан эди.

— Ким хоҳлайди? — деб сўради у шишалардан бирини даврага узатиб.

Мен беихтиёр қиз қўлидан шишани юлқиб олдим.

— Маржона, сенинг Санжаринг келмагани ямон бўлди-да, — деди Сайёра ҳануз Баҳодирнинг тиззасига тирфалиб.

Маржона бепарво қўл силтади:

— Да, он... доим банд.

Мен ютоқиб-ютоқиб тахир суюқликдан сипқордим:
«Ким экан у, Санжар?!»

Олов сапчиб-сапчиб, чирсиллаб-чирсиллаб ёнар эди.

Баҳодир гитарасини тинғиллатиб янги бир хонишга шайланди. Жаҳонгир мук тушган кўйи ўз қумлоғига қоришиб ётибди.

Мен ҳаш-паш дегунча шишани бўшатиб бир чеккага улоқтиридим. Алланечук тетиклик, жўшқинлик бутун вужудимга ёйилди. Гулузнинг оппоқ сийналарига, йўғон, силлик сонларига ошкора тикилдим. Қиз бу ҳолни дарров пайқади. Ичкиликтан хўплай-хўплай қош учирашиб, кўзларини сузиб кўйди.

Олов эшилиб-эшилиб, тўлғониб-тўлғониб ёнар эди.

— Санжаринг совчиларини юбордими? — дея Сайёра тағин Маржонага юзланди.

Маржона зардали қўл силтади:

— К чёрту... керакмас...

Баҳодир қувноқ тебранган кўйи қўшиқ бошлаб қолди:

**Энг гуллаган ёшлик чогимда-а
Сен очилдинг кўнгил боғимда-а...**

Маржона илкис ўрнидан турди. Турдию сип-силлик орқаларини шундоқкина тумшуғим тагидан диркиллатиб ўтиб ўзини ховузга отди.

**Шунда кўзим кўрди баҳорни,
Шунда юрак таниди ёрни-и...**

Мен ҳам ўрнимдан турдим. Кўшиқ сехрига маст бўлиб ўтирганлар менга эътибор беришмади.

Олов чарх уриб, алангалари бир-бирига чирмashiб-чирмashiб ёнар эди.

Шундан бери тилимда отинг...

Маржона! Бир қувонч, бир интиқлик бутун вужудимни қамраб олган эди. Энтикканимча ҳовузга калла ташладим. Мўлжални аниқ олган эканман! Сув остида чалқанча сузаётган Марジョンанинг ёнгинасида пишқириб бош кўтардим. Қиз чўчиб кетди. Мен ҳансираф бир қўлим билан Марジョンанинг белидан қучдим, бир қўлим эса сув тагида қизнинг момик сонларини силади.

Маржона бир силтаниб қучоғимдан чиқди-да, ялт этиб юзимга тикилди. У шунча пайтдан бери мени эндиғина кўриб турғандек эди!

— Чў, такой? — деб пиҷирлади у оғзидан сув пуркаб.

Бу пиҷирлаш, бу ҳуркак қарашлар мени баттар жўштириб юборди. Энтикканча яна қиз томон интилдим.

Маржона ҳовузнинг нариги қирғонига қараб сузди. Мен гулхан алангасининг ёғдуларида қиз юzlаридаги нозли табассумни илғагандай бўлдим. Томирларимда қон тобора кўпирав эди.

Маржона таъкибларимдан қоча-қоча ҳовузнинг нариги лабига чиқиб олди. (Нур устига нур!) Мен ҳам бир сапчиб қирғоққа чиқдим. Шу орада Жаҳонгир анграйганича бизни кузатаётганини фира-шира пайқаб қолдим.

Маржона қад ростлаб тағин қочишга шайланди. У ҳаяжон ва қўрқувдан титрар, қўкраклари лоп-лоп кўтарилиб тушар эди.

— Нима қиляпсиз?! — дея пиҷирлади қиз ҳансираф. — Ҳозир бақираман.

Мен қулоч ёйиб интилдим.

— Маржона...

Шаштим баланд бўлса-да овозим барибир хирқираб чиқди.

Қизнинг катта-катта очилган кўзларида гулхан шуълалари ўйнокларди. У орқасига, ҳувв, икки туп арча томон тисарила бошлади. Мен бир сапчиб Марジョンанинг билакларидан тутдим-да қучоғимга тортдим. Қиз типирчилади. Мен лабларига лаб босдим, сўнг уни даст кўтариб арчалар панасига ўтдим. Бу ерда ўша чарм жилдли тўшакнинг бири ер парчин бўлиб ётган экан! Ҳануз типирчилаб, юлмоқлаб, қучоғимдан кутилишга уринаётган қизни тўшак устига босдиму ютоқканча дуч келган жойидан ўпа кетдим.

— Коржов ака, қўйворинг, Коржов ака, жо-он ака...

Маржонанинг товуши тобора майинлашиб, нозли тус олмокда эди...

* * *

— Зўрлаб қўйди-и! Номусига тегди-и! — Жаҳонгир жаҳонни бошига кўтариб бақирав эди.

Унинг жазавали чинқиришлари менинг шууримга анчадан сўнг — эхтиросларим пича босилиб, эс-хушим тиниқлашгач бориб етди. Мен кўкракларимга юзини яшириб пиқ-пиқ йиғлашга тушган Маржонани ўпид, эркалаб овута бошлагандим.

Киз туйқус мени устидан итқитиб ташлади. (Билмадим, кайдан куч топди?!) Ҳойнахой, унинг хам эс-хуши тиниқлашиб, ҳовуз бўйида тўс-тўполон бошланганини англаб етган эди.

— Тапса босиб номусига тегди! Ўлай агар, ўзим кўрдим!

Жаҳонгирнинг бўғик, таҳлика тўла товуши уй томондан эшитилди!

Кўп ўтмай «тап-туп» қадам товушлари, Бекқул Тўрақуловичнинг ғазабкор гулдираши, Илмира янгамнинг йиғлоқи қарғашлари қулоқларимга чалинди.

Апил-тапил латта-пүттасини устига тортиб қад ростлаган Маржона ваҳимали пицирлади:

— Ўлдим...

Киз увв тортиб йиғлаганича гулхан томон чопди. Мен хам ўрнимдан сапчиб туриб теваракка алангладим.

Олов ожизгина, титраб-қақшаб ёнмоқда эди.

Баҳодир ва Сайёра бир-бирининг пинжига суқилиб тек қотишган. Кўзлари тўла таҳлика, таажжуб.

Гулз алланечук асабийлашиб у ён-бу ён юринар, аҳён-аҳён, гўё унинг номуси булғангандай узун-узун панжаларини юзига босиб бош чайқар эди.

— Қани?! Қани у итвачча?! — деб бўғик ўшкирди Бекқул Тўрақулович ҳовуз бўйига ҳарсиллаб-лорсиллаб етиб келаркан. Устида оппоқ майка-иштон, кўлида гўшт чопқи, башараси fazab ва нафратдан бужмайган.

— Ва-ай, шўри-им! — дея чинқириди қоқила-сурила сув бўйида пайдо бўлган Илмира янгам хам. Унинг сочлари тўзғин, устига чала-ярим кийган узун халати судроқланган, кўзлари аланг-жаланг эди.

Маржона хануз увв тортиб йиғлаган кўйи ўзини она-сининг бағрига ташлади:

— Ойи-а!..

Эру хотин ўртасида бетоқат типирчилаётган Жаҳонгир ҳамон қуйинчаклик кўрсатарди.

— Худо ҳақи, пойлаб бориб кўрдим! Номусига тегди! Дарров уйга югурдим...

Менинг бутун вужудимни кўрқув таҳликадан кўра уят ҳисси қоплаб олган эди. Юз-кўзларим мисдек қизиб кетган. Беихтиёр сирғалиб ховузга тушдим.

— Чик бу ёққа, ҳароми! — дея бўкирди Бекқул Тўрақулович менга кўзи тушиб.

У кўлидаги гўшт чопқини хаволатиб ховуз лабига бостириб келди. Сайёра чинқириб юборди. Баҳодир Бекқул Тўрақуловичнинг қўлига ёпишди:

— Домла! Ўзингизни босинг, домла! Ўлдириб кўясиз?!

— Ўлдираман уни! — баттар бўкирди Бекқул Тўрақулович тағин хезланиб. — Нонқўр, ифлос!

Гулуз ҳам чопқиллаб келиб фазабкор отанинг елкасига осилди:

— Домла, тегманг! Жавобгар бўлиб қоласиз, у фирт масти!

Бекқул Тўрақулович ҳансираф андак орқага тисарилди, бироқ фазаб ва алам тўла кўзлари ҳануз менга қадалган эди.

— Ока, сувдан чиқинг! — деди Баҳодир менга қайрилиб. — Домланинг кўзига кўринманг.

Юрагим гурс-гурс урганича ховуз лабига чиқдим.

Илмира янгам қучоғида ҳиқ-ҳиқ йиғлаб ётган Маржонанинг соchlарини силаб овутарди.

— Тинчлан, қизим, қўрқма. Даданг милиция чакирдилар. Қамоқда чирийди сени хўрлаган анови ислиқи...

Илмира янгам ногоҳ энгашиб ерда юмалаб ётган бўшишани кўлга олдию менга улоқтирди:

— Кўзгинангга илоё тупроқ тўлсин, мараз!

Шиша ёнгинамдан учиб ўтдию ўша арчалар тубига пўкиллаб тушди.

Баҳодир ва Жаҳонгир қўярда қўймай уй томон етаклаётган Бекқул Тўрақулович ҳамон депсинар, хезланар эди.

— Кочаман деб ўйлама, ҳайвон! — бўкирди у елкаси оша менга ўқрайиб. — Ернинг тагидан бўлсаям топаман сен битлиқини!

Илмира янгам ҳам Маржонани силаб-сийпалаб охис-та уй томон юришди. Сайёра ва Гулноз бир-бирининг пинжиға тиқилган кўйи ерга тикилиб боришарди.

Олов ўрнида лахча-лахча чўғлар тутаб ётар эди.

* * *

Мен ҳужрамда бош чангллаб ўтирибман. Гоҳ-гоҳо жойимдан иргиб туриб ўзимча у ён-бу ён юриб қўяман, пушаймонлар билан гувранган бўламан. Аслида... на қувончу ўкинч, на афсусу на қўрқув бор эди менда. Юрагим бўм-бўш, онг-шуурим музлаган.

Уй зинапоясида Баҳодир ва Жаҳонгир чекишиб, ўзаро «фунг-фунг» гаплашиб туришибди. Менга қоровул улар. Уй ичкарисида аҳён-аҳён Бекқул Тўракуловичнинг алланималар деб қаҳрли ўшқиргани, Илмира янгамнинг ҳасратли қарғанишлари эшитилиб қолади. Икки-уч бор Маржонанинг аччиқ-аччиқ йиғлагани қулоғимга чалинадиу юракларим сирқираб кетди.

Мен, отам айтгандай, ҳаммаси бинойгина, осуда ке-чаётган гўзал, лаззатли лаҳзаларнинг не сабаб тўс-тўполнга эврилганини англашга уринардим. Тусмолимча, Жаҳонгир чиндан-да бизни пойлаган. Кўнгли тортганича томоша қилиб тургану, бизнинг эс-хушимиз хирашиб, кўзлар кўрмай, қулоқлар эшитмай қолган пайт аюҳаннос солган. Гулхан теграсида ўтирганларни ҳангуманг қолдириб уй томон чопган, ҳайҳотдек зални бошига кўтариб чинқирган. Оқибатда...

Ичкарида Маржонанинг зорланиб йиғлагани яна юракбағримни ўртаб ўтди. Бекқул Тўракуловичнинг таҳдидли ўшқириғи эшитилди:

— Ёз, ҳаммасини ёз! Қайса́рлик қилма, у ифлоснинг жойи турма! Ҳозир наряд етиб келади, тезроқ ёз!

— Ёзақол, қизим, уялма, — Илмира янгамнинг қақшаб ялингани элас-элас эшитилди. — Биламан, ай-бинг йўқ, анови қутирган буқага бас келиб бўлармиди. Ёзақол, қизим, уялма...

Тун ярмидан ошган. Кўк тўла юлдузлар маъюс-маҳзун милтирашади. Чорбоғ алланечук хурпайиб, уй пештокидаги чироқ ёруғидан хижолат чекаётгандек кўринади. Адлқад тераклар енгил эпкиндан шитирлашиб, гўё тунги сирлар хақида шивирлашар эди.

Бир пайт дарвоза ортига гуруллаганича машина ке-

либ тўхтади. Тўхтадио қоронгилик қатига тифдай санчилган фара ёғдулари сўнди.

Машина шовқинидан сергакланган Жаҳонгир ичкарига югарди. Лахза ўтмай бўсафада ҳануз оқ майка-оқ иштондаги Беккул Тўрақулович (ё, ҳазрати Хизрмикан?) довдираган кўйи пайдо бўлди. У қокила-сурила бориб дарвозани очди.

— Ассалому алайкум, домла...

Дарвоза ортидан Бақоевнинг таниш товуши эши билди. У икки нафар барваста, уйқусираган милиция ходимини чорбоққа бошлаб киаркан, Беккул Тўрақуловичга бош-оёқ таажжубли-таажжубли тикилди.

Домла миқ этмай уларни ичкарига бошлади.

— Телефонда овозингизни эшишиб кўркиб кетдим, — дея мингирилди Бақоев. — Дарров нарядни олдиму бу ёққа ҳайдадим...

Бақоевнинг товушида гира-шира қувонч шарпалари сезиларди. Афтидан, Беккул Тўрақуловичдай улуғ устоз ҳам ташвишга йўлиқиб унга иши тушганидан мамнун эди.

* * *

Эшик-дарвозалари темир панжарали милиция машинаси нихоят манзилга етди. Қўлларим орқага кишсанланганидан хўб азият чекдим.

Икки ходим менинг сирғалиб машинадан тушишимни бетоқат кутиб туришди. Ерга оёқ босар-босмас теваракка бир кур аланглаб олдим.

Баланд темир панжара билан ўралган, электр фонуслардан чароғон ҳовли. Ҳовлида ранг-баранг автоуловлар, у ён-бу ён жонсарак ўтиб қайтаётган яккам-дуккам мундирили ходимлар кўзга ташланади.

Биз шундоқкина қаншаримиздаги баланд, ойнабанд иморат томон юрдик. Бақоев илдам қадамлар билан йўл бошлади. Икки милиция ходими мени ўртага олишган.

— Эй, кўп аланглама, — деб қўйди улардан бири биқинимга туртиб.

Ичкарига кирдик. Бақоев эшиги тепасига «Навбатчилик қисми», деб ёзиб кўйилган, ҳаммаёfi ойнабанд, темир панжарали ҳужранинг тирқишидан бош сукди. Алланечук Роза анийнинг ошхонасини эслатиб юборадиган бу ойнабанд бўлмадаги сон-саноқсиз телефонларнинг бири

кўйиб, бири жиринглайди, уч-тўрт ходим уйкули товушда кўнгироқларга жавоб беришади.

Бақоев ўзидек мўйловдор, баджаҳл капитан билан анча пайт гаплашиб қолишиди. Капитан қалин, кирчил дафтарга алланималарнидир ёзи.

Анчадан сўнг яна карвон бўлиб жўнадик. Бақоев сарбон, икки ходим ўртасида мен. Гоҳ кенг, гоҳ тор йўлаклар бўйлаб, баъзан зиналардан чиқиб, баъзан тушиб борардик. Онда-сонда қаршимизда учраб қоладиган ходимларнинг баъзилари Бақоев билан шунчаки бош ирғаб саломлашса, баъзилари қуюқ сўрашиб, икки-уч оғиз ҳангомалашиб қолишиди.

Нихоят, чироқлари хира, зах ва чиркин ҳид уфуриб турган, ертўлатоб жойда пайдо бўлдик. Ёнимиздаги эшиклари маҳкам қулбадан гоҳ инграган, ўкирган товушлар, гоҳ қутуриб бўкиришлар, сўкинишлар эшитилади.

«Видеосалон, шекилли?» — лип этиб хаёлимдан ўтди менинг. Хувв, бир пайтлар худди шундай ертўла нусха жойда кино томоша қилганимизни эсладим.

— Эй, у ёқقا анграйма, тезроқ юр, — деб тўнғиллади орқамдаги ходим.

— Кино бўляяптими, дейман-а? — беихтиёр оғзимдан чиқиб кетди менинг.

Икки ходим маъноли кўз уриштириб тиржайиб қўйишди. Сўровим қулоғига чалинган Бақоев елкаси оша мен томон кўз ташлади.

— Ҳа, маданий хордиқ чиқаришяпти. Сенга ҳам эртанин билет тегиб қолар.

Шу пайт семиз, япаски бурун, қисиқ кўз сержант қаршимизда юмронқозиқдек қад ростлади.

— Бўш камера борми? — сўради ундан Бақоев.

Сержант хоргин, асабий бош чайқади:

— Йў-ў... Ҳаммаси лиқ.

— 99-ни оч-чи, — деди Бақоев андак ўйланиб тургач.

Сержант лапанглаб йўл бошлади.

Тор, пастқам йўлакнинг ҳар икки тарафида қоп-қора, темир эшиклар тизилиб кетган эди. Бетон деворнинг у ер-бу ерида бўртиқ, қалин лампалар алланечук кирчил, хира шуъла тарайди. Ҳаммаёқ фалати бир ваҳима, таҳдидга бурканган.

Бақоев хўмрайган қўйи менга яқин келди:

— Ҳолингдан кимга хабар берайлик?

Кўз ўнгимда ота-онам, ака-опаларим бир қур чаппар уриб ўтдию чўчиб кетдим.

— Керакмас, — дедим шоша-пиша. — Хеч кимга айтманг.

Бақоев тиржайиб бош чайқади:

— Йў-ўқ, яқинларингта хабар беришимиз шарт. Адвокат топиб сени химоя қилишсин, адолатли қонунларимиз талаби шундай.

Шу пайт хаёлимга Тоштемир ака келди. Айтдим.

— Ҳа, анови тренерми? — деди Бақоев чехраси андак ёришиб. — Бўпти, унга хабар бераман.

* * *

Оркамдан оғир, темир эшик гумбурлаб ёпилди. Бўсафада бир зум гангид туриб қолдим. Камерада қўланса ис анқиб ётарди. Эшик пештоқидаги лампанинг ўткир ёруғидан кўзлар қамашади. Қалин бетон қоплама ерда ҳар хил ҳашаротлар ўрмалаб юрибди. Камеранинг икки ёнида ётоққа мўлжалланган икки ёғоч сўри. Айни авжи саратон бўлишига қарамай камера захкаш, муздек.

Мен жирканиб у ён-бу ён алангларканман, ўнг бурчакда буришибгина намоз ўқиб ётган йигитчага кўзим тушди. (Хойнахой, гуноҳлари меникидан-да оғир бўлса керак, тавбага зўр берибди.) У бир парча матони жойнамоз ўрнида тўшаб олган. Сажда пайти бетон қопламага қаттиқ урилган, шекилли, ёрилган қош-қобоғидан қон силқиб турибди, юzlари моматалоқ.

Йигитча намозини тугатиб чўқ тушган жойидан тупаркан, менга бош иргаб салом берди.

— Ассалому алайкум.

Беихтиёр у билан қўл бериб кўришдим.

Ёғоч сўриларнинг бирига у, бирига мен ўтириб анчагина жим қотдик.

— Сизни... нега қамашди? — сўрадим охири ўнғай-сизликдан қутилиш учун.

Йигитча жилмайиб елка учирди:

— Шу... 159-модда... диний масала бўйича.

Мен унга анқайиб қолдим. Очиги, эскигина кўйлагининг у ер-бу ерига қон доғлари теккан бу йигитчанинг икрорига ишонгим келмади.

Ҳа, жамиятда шариат хукмрон бўлишини талаб килиб хукumatнинг фашига тегиб юрган бир диний жамоа ҳақида эшитганман. Бироқ уларни кўзлари филай,

тишлари сўйлок, хунукдан-хунук маҳлуклардай хаёл этардим, тўғрироғи, матбуотдаги таъриф-тавсифлар менда шундай тасаввур ўйғотган эди. Аммо... қаршимда ҳали она сути оғзидан кетмаган, хушрӯйгина йигитча ўтиради.

— Ҳайрон қараб қолдингиз, ё ишонмадингизми? — сўради у хижолатланиб.

— Йў-йў, — дедим шоша-пиша, — ишонаман.

Жимжималоқдай холига бутун бошли давлат билан олишиб юрган бу йигитчага боқдиму не бир сабабдан бу гўшага келиб қолганимни эслаб уялдим. (Эсиз жасад, эсиз бўй...)

— Сизни нега опкелишди? — сўради йигитча.

— Шу... — хижолатли фудрандим, — моддасини билмайману... зўрлашда, номусни булғашда айланаман.

Йигитча афсус билан бош чайқади:

— Чатоқ бўпти-ку... — сўнг ўйчан кўшиб қўйди. — Аммо... лекин тушунмадим, йўқ нарсани қандай булғадингиз?

Мен «пик» этиб кулиб юбордим. Бироқ йигитчанинг ҳануз ўйчан турганини кўриб дарров лаб-лунжимни йиғиштириб олдим.

Тағин бир оз жим қолдик. Ҳамхонам қон силқиёттан қовоғига латта босди. Мен қаршимдаги алланечук улуғвор, хотиржам қиёфали йигитчанинг дидига мос гап излардим ўзимча.

— Мен... мен ҳазрати Хизрни кўрганман, — дедим, ниҳоят калламга келган фикрдан қувониб.

— Ҳа-а, шунақами? — деди йигитча ёлғондакам ҳайратланиб. — Қачон? Номусни булғаётганда эмасми, ишқилиб?

Мен бу гал барадла қах-қаха уриб кулиб юбордим. Ҳамхонамнинг ғалати бир ўткир сўзлиги, самимияти кўнглимда завқ-шавқ ўйғотди. Йигитча ҳам кулгимга жўр бўлди. Кулгиларимиздан бетон деворлар зириллаб кетди.

Ногоҳ темир эшик қулфига шарақ-шуруқ қалит солинди. Биз бир-биримизга таажжубли тикилдик.

Эшик бўғиқ данғиллаб очилди.

— Нима гап?! Қанақа шовқин? — ўшқирди ичкарига бостириб кирган ўша япаски бурун сержант, қўлидаги резина таёфини ҳаволатиб.

— Хизр кўрдик, — дедим мен унга пешвоз туриб.

Сержантнинг семиз, япалоқ юзига таҳлика оралади.

— Нима? Қанақа Хизр?! — деди у теваракка аланглаб. — Бу ерга ҳеч ким кириши мумкин эмас!

Йигитча пик-пик кулиб юборди. Мен ошкора «хокх»лаб ўтириб қолдим.

Ҳануз таҳлика билан аланглаётган сержантнинг резина таёғи ҳавони шувуллаб кесиб ўтди.

* * *

Эртаси куни чошгоҳга яқин Тоштемир ака билан учраштиришиди.

Мени бошлаб чиққан милиция ходими тепасига «Учрашув хонаси» деб ёзиб қўйилган эшик ёнида оёқ илди.

— Кир! — деди у пўнгиллаб. — Ўн минут вақт.

Кирдим. Ичкарида ранг-қути ўчган Тоштемир ака у ён-бу ён асабий юриниб турарди. Ўртада мактаб партасини эслатиб юборадиган стол, ёточ ўриндик.

— Қоржов! — деди Тоштемир ака истар-истамас мен билан қўл бериб қўришаркан. — Фирт тентак экансан-ку?! Шарманда қилдинг одамни. Ҳаммаси чинми ўзи?

Мен бош иргаб қўйдим.

Тоштемир ака ёточ ўриндикқа бўшашганича чўкди:

— Уф-ф... иш чатоқ. Шўргинанг қисди энди, ука! Дарров отангга хабар берамиз.

— Керакмас.

— Керак! — Тоштемир ака стол устига тарсиллатиб урди. — Олдини олиб гаплашмасак, қамоқда чирийсан. Ўвв, Бекқул Тўрақулович билан ҳазиллашма!

— Мен Бекқул Тўрақулович билан ҳазиллашганим йўқ.

Тоштемир ака фижинган кўйи ўрнидан туриб кетди:

— Сен серрига гап уқтирганнинг ўзи ахмоқ... Яхши... Сен қисибгина тур, ўзим ҳал қиласман ҳаммасини...

* * *

Иzzатим ошиб кетди-ёв... Қайга чакиртирса икки ходим ўртага олиб қўриқлаб боради-я?!

Тоштемир ака билан қизариб-бўзаришганимиздан сўнг, кўп ўтмай, терговчи хузурига чорлабди.

Жўнадик. Мени тағин узун йўлаклар бўйлаб етаклаб, обдон тинкамни қуритишиди.

Терговчининг қора дерматин қопламали эшиги қия

очиқ экан. Олдимга тушиб хардамхаёл бораётган қотмагина сержант ичкарига бош суқиб деди:

— Мумкинми, ўртоқ майор? Олиб келдик!

Ичкаридан Бақоевнинг таниш товуши эшитилди:

— Кирсин!

Эшик ланг очилди. Орқамдан ходим биқинимга нуқиди:

— Юр!

Ичкарига кирдиму юрагим темирчининг босқонидай турс-турс ура кетди: «Маржона!»

Ха, адашмагандим. Сап-сариқ, ялтироқ стол ёнидаги стулларнинг бирида Маржона қимтинибгина ўтиради. Сочлари ёйик, устида бир парчагина кофта-юбка, чарм сумкача билан яширишга бехуда уринаётган оппоқ сонлари бир-бирига қапишган.

Маржона мени кўрдию сапчиб ўрнидан турди. Тура-тура калта юбкасини пастроқ тортган бўлди, кўзлари пирпираганича ерга қадалди.

— Маржонахон, кўркманг, ўтиринг, — деди тиржайиб Бақоев.

Мен уни погонлари кирчил йилтиллаган хизмат мундирида илк бор кўришим эди. Терговчи хона тўрида, хар хил қофозу папкалар тахлаб қўйилган иш столи орқасида ястаниб сигарет чекар, қуюқ дудга кўмилган кўйи кўзларини кисиб қиз қоматига сук билан тикилар эди.

— Гражданка Тўракурова, ўтиринг, — деб такрорлади Бақоев қалин мўйлови остидан кинояномуз ўшшайиб. — Бу ерда ҳеч қанақа хавотирга ўрин ийўк.

Маржона қисиниб-қимтинибгина жойига ўтириди.

Мен гоҳ ярим-яланғоч қизга, гоҳ Бақоевнинг суқли, хирсли нигоҳларига кўз қиримни ташларканман, ҳалиги на ширин бир ҳаяжон, қувонч қоплаган юрак-бағримни беаёв фазаб, алам куйдира кетди. Қўлларим мушт бўлиб туғилди, тишларим ғижирлади.

Терговчи ичкарига бош суққанимдан бери менга қиёҳам бокмай, ўзича беэътибор ўтиради.

— ...хуллас, балиқ ови зўр бўлди, — деди у қизга, хойнахой, ташрифим туфайли узилиб қолган гурунгни давом эттириб. — Дадангиз ҳам, биз ҳам хурсанд...

Маржона гўё игна устида ўтиради. Хаёллари паришон, кўзлари хона бўйлаб кезмоқда. Терговчи эса тиржайиб, сузилиб қиздан суқли, хирсли кўзларини сира узмас эди.

Мен бир гувраниб қўйдим.

— Кечирасиз, — деди Маржона туйкус терговчининг хикоясини бўлиб. — Мен... кетишим керак.

Бақоев оғир сўлиш олиб сигаретини кулдонга босаркан, фудранди:

— Яхши... тезлаштирамиз.

Бақоев пишиллаб стол устидаги папкалардан бирини очди. Қош-қобоги уюлди.

— Ўвв, — деди у дабдурустдан менга ўқрайиб. — Гражданин... Толмасиф... Сен Тўрақурова Маржона Беккуловнанинг шикоят-аризасига кўра... жиноят кодексининг... та-ак, тегишли моддасига кўра зўрлаб номусга тегишда айбланасан. Мен шикоят-ариза эгасини, — терговчи қизга имо қилиб қўйди, — сен билан юзлаштириш учун чақиртирганман...

Мен ҳануз разаб ва аламдан бўғрикиб турадим. Қайтгургадир бош олиб, улоқиб кетгим келарди. Бир амаллаб хонадан чиқиб кетишим учун баҳоналар излардим. Ногоҳ, ўкув юртида ўқиб-ўрганганим — айбланувчининг хақ-хукуқлари фира-шира эсимга тушди.

— Ўртоқ терговчи, — дедим аранг титрофимни босиб, Бақоев папка титкилаб бир зум жим қолган пайт. — Ўзимни ноҳуш сезяпман, ҳозир ҳеч қандай савол-жавобга курбим йўқ.

Терговчи кинояли хириинглади:

— Нега? Бошқа нарсаларга қурбинг зўр эди-ку?

Шу пайт Маржона ҳам ўрнидан туриб кетди:

— Мен ҳам ҳозир ҳеч нарса хоҳламайман, — деди у энтикиб. — Тобим йўқ, кўнглим айнияпти.

Бақоев бир менга, бир Маржонага таажжуб билан тикилиб қолди. Маржона икковимизнинг ўртамиизда нафрат олови ёнаётганига, ҳатто, юзма-юз туришга-да тоқатимиз йўқлигига буткул ишонди шекилли, афт-ангорида мамнун бир ифода пайдо бўлди.

— Бемалол, — елка учирди терговчи, — адолатли қонунларимиз бунга йўл қўяди, — сўнг ясама норозилик билан тўнғиллади. — Хўш, қачон тобларингиз бўлади, азизларим! Ишни тезлатиш керак, вақт зик.

— Эртага, — пицирлади Маржона ерга тикилиб.

Бақоев менга кинояли тикилди:

— Сиз-чи, жаноб? Эртагача қурбингиз келиб қолар-а?

Мен бош иргаб қўйдим.

* * *

Пешиндан сўнг яна учрашувга олиб чиқишиди. Қўлимни кишанлашга чоғланган сержант таажжубланди:

— Нега мушт туғиб оляпсан? Қўлингни ёй, бўш қўй!
— Ишқилиб ўзини бир бало қилмоқчи эмасми бу?! —
деб тўнғиллади иккинчи милиционер камера ичини ха-
вотир билан кўздан кечираркан. — Авзойи бузук.

Сержант ҳиринглади:

— Ҳали эрталабки терговда Бақоев сал-пал думини
босиб қўйди-ёв.

Мен миқ этмасдим.

«Учрашув хона»сида Тоштемир ака чарм портфель
қўлтиқлаган бир боди билан кутиб турган экан.

— Бу киши сенинг адвокатинг, — деб таништириди
устозим. — Фирдавс Шамс. Еган-ичгани қонун, не-не
каллакесарларни хам сувдан қуруқ чиқарган.

Фирдавс Шамс қилпанглаб, менга таъзим қилиб
қўйди. Жилмайди. Ҳатто, бўялгандек қоп-қора қош-қўзла-
рини муқом билан ўйноқлатган бўлди.

— Шу улуг инсон вақти зиқлигига қарамай сенинг
химоянгга отланди, — деб қўшиб қўйди Тоштемир ака. —
Энди бу ёни ўзингта боғлиқ.

Адвокат ёғоч ўриндиқ устига, обдон «пуф-пуф»лаб
ташлагач, оҳиста чўқди. Жигар тусга бўяб қиялатиб-
қиялатиб таралган соchlарини назокат билан силаб қўйди.

— Полвонжон ука, — дея гап бошлади у алланечук
ингичка, майин овозда. — Сиз менга ҳамма-ҳаммасини
оқизмай-томизмай айтиб беришингиз керак.

Фирдавс Шамснинг афт-ангорию фалати товуши ғаш
кўнглимни баттар ғашлантириди.

— Нимасини айтаман, — деб тўнғилладим истар-
истамас. — Ҳаммаси чин... шундай бўлган.

— Ай-ай, укагинам, — деди адвокат таманно би-
лан. — Камина ҳамма тафсилотларни икир-чикиригача
эшитиши керак.

— Ўрлик қилма, гапириб бер, — тўнғиллади Тоште-
мир ака ҳам.

Ноилож, чуқур бир тин олгач, гап бошладим.

— Шу... кечки пайт домланинг қизи ўртоқларини
бошлаб...

— Бу ёғини биламиз, полвонжон ука-а, — гапимни
бўлди адвокат баттар тантиғланиб. — Сиз... сиз қизга

қандай ташландингиз, шулар ҳакида айтиб беринг... Шошилманг, томчилатиб-томчилатиб гапиринг...

- Озгина пиво ичгандим...
- Пиво-мивонгиз ҳам керакмас, нақадар жирканч...
- Эсам нимани гапирай, — энсам қотди менинг.

Фирдавс Шамс сип-силлиқ қиришланган иякларини кафтига тираб, қанд шимиб лаззатланаётган боладай қўзларини сузиб, юпқа лабларини ялаб-ялаб қўйди:

— Бирдан жунбушга келиб қизни тўшингизга тортдингизми? Ё-ё, аввал силла-аб... сийпаладингизми? О-о, поза қанақа эди, поза, бу жудда-а муҳим. Қиз тагингизда қийқириб юбордими, ё-ё... инқилладими-и...

Бирдан миямга қон тепиб, жаҳл билан ёғоч ўриндиқдан туриб кетдим.

— Ҳеч нарса айтмайман. — Тоштемир акага юзландим мен.— Менга бунича адвокат керакмас.

Тоштемир ака қўлларини пахса қилиб ўшқириди:

- Ишга зарил бўлгандан кейин сўрайди-да!

Мен ғазабимни аранг босиб эшик томон юрдим.

Фирдавс Шамс ҳануз тамшанган кўйи ортимдан қарафолди.

* * *

Тонгга яқин кўзим илашибди. Туш кўрдим чофи.

Тавба, шаҳарнинг қоқ қиндигидаги чорраҳада ўтовимиз тикилган эмиш. Тўрт тарафда машиналар серқатнов, Беккул Тўракулович, Фирдавс Шамс, Бақоев ва яна аллакимлар ёнбошлиб ётишибди. Хиринг-хиринг кулаётган Тоштемир соқийнинг қўлида шиша. Бироқ дастурхон йўқ. Ўргада мен қип-яланғоч ҳолда чўзилиб ётган эмишман. Тоштемир соқий гоҳ-гоҳо қўлидаги шишадан оғзимга ичкилик қуяди. Атрофимдаги тўда хиринглашиб, пичирлашиб мени томоша қиласмиш. Ногоҳ эрининг орқасидан Илмира янгам пайдо бўлди: «Маржона қани, яшшамагур?!» Мен ҳарчанд уринсан-да ҳеч ўрнимдан туролмас эмишман. Уятдан ғужанак бўлиб қолибман. Бир пайт ўтов эшиги ланг очилиб отам кириб келди. Бошида шляпа, бўйнида гулдор галстук, устида бекасам чопон. Ланг очик эшикдан қип-яланғоч Маржонага кўзим тушди! У ўтов ёнидаги кари итнинг бошини силаб эркалаторди. «Маржона! Қоч, буларнинг кўзига кўринма, қоч, жоним!» дея хайқирдим мен. Бироқ овозим шунчалар заиф, бўғиқ эдики, қичқириғимни ўзим-

дан бўлак ҳеч кас эшитмас эди. Бир пайт Фирдавс Шамс киндигимдан пастга чанг солди. Бақоев китоб билан бошимга урди...

Чўчиб кўзимни очдим. Камерадаги ёғоч сўридан қулабман. Бетон қопламасига теккан бошим зирқираб оғрирди. Шундоққина қорнимдан сидирилиб тушган кулранг қаламуш жон ҳолатида қочиб қолди.

Анча пайт ерда гангиган кўйи ўтиарканман, томокларим қуруқшаб, юрагим гурс-турс уриб ётганини сездим.

Тушга яқин мени яна терговчининг хонасига бошлаб кетишди.

«Маржона келган...» — ўйладим юрак-бағрим сирқираб.

Кўз ўнгимда лоп этиб қизга сукли-ҳирслли тикилаётган терговчи жонландию оёқларим чалишиб мункиб кетдим. Олдимдаги сержантни сузиб юборишимиға сал қолди.

— Шошма, улгурасан ўша ёқقا, — деди у менга қайрилиб.

Орқамдаги қоровул ҳиринглади.

Мендан миқ этган садо чиқмаган бўлса-да, хаёлан бақириб-чакириб борарадим:

«Ўртоқ терговчи, ҳаммасини бўйнимга оламан. Юзлаштириб овора бўлманг. Маржонани тинч қўйинг, нима гапингиз бўлса, ўзимга айтинг, қизга бақраймай, тушундингизми, Маржонага олайманг. Муштларимни кўряпсиз-а, энди ҳеч нарсадан қайтмайман...»

Сержант ўша таниш, қора дерматин қопламали эшик ёнида тўхтади. Мен бепарво, хотиржам бўлишга минг бир тиришсам-да барибир ҳаяжонлана бошладим. Ҳалигина миямда пишишиб, кира солиб терговчига тўкиб солишга чоғлаган даъволарим тумандай тарқаб кетди.

— Эй, кир! — деди сержант менга, ичкарига бош суқиб рухсат олгач.

Алланечук изтироб, интиқлик ичкарига итариб юборгандай бўлди мени. Бўсағадан довдир-совдир оёқ оширедиму кўз кирим билан уни изладим. Қани Маржона?! Наҳотки, енг-этаклари узун кўйлакка ўралашиб ўтирган анови қиз ўша?! Ана, илҳақ-илҳақ мен томон қаради, Маржона!

Маржона мени кўрдию ўрнидан турди. Сарғишга мояил юзлари гулгун қизариб худди кечагидек ерга тикилди. Узун-кенг, кўкиш кўйлаги унга боят ярашган эди.

«Кеча рашқдан қон ютганимни сезган экан-а?!» — шу хаёл онг-шууримга чақмоқдай урилди. Энтикдим. Ичичимдан қайнаб-тошаётган қувончимни яширолмай, кўзларим билан қизни эркалаб беихтиёр илжайдим.

— Тавба, бу қанақа туриш? — деди Бақоев бир менга, бир Маржонага норизо тикилиб. — Ўтилинг, Маржонахон. Ўвв, сен са-ал лаб-лунжингни йифишириб ол. Ҳали биргаллашиб куламиз.

Терговчи тажанг бир қиёфада иш-папкани олдига тортиб очишга тутинди.

Деразанинг кулранг пардаси ортида кондиционер ишлаб турганиданми, ҳар қалай, хона салқин эди. Ҳаяжону қувончнинг зўридан терлаб кетган белларимга муздек эпкин тегарди. Мен тез-тез, ихтиёrsиз равищда Маржонага кўз ташлардим: «Кўнглимдагимни топиби-я?! Мени тушунибди...»

Назаримда Маржона ҳам мен томон термилишни хоҳлардию, бироқ ботинолмасди.

— Хўшиш... — деди Бақоев томоқ қириб олиб. — Гражданин Толмасов Коржов Чоршанбиевич, адолатли қонунларимизга кўра, жиноят кодексининг тегишли моддаси билан сизга жиноий иш очилди. Сиз, Толмасов Коржов, жиноий зўравонликда, номусни булғашда айбланаисиз. — Асос — ҳурматли ва азиз фуқароларимиздан бирининг шикоят-аризаси. Бу ерда, ҳатто, баъзи бир гувоҳларнинг кўрсатмалари ҳам бор. Хўшиш... керак пайти уларни ҳам албатта чакирамиз. Мен ҳозир шикоят-аризани ўқиб, таништираман...

Бақоев сурранг, фижимтоб варакдаги битикни қироат билан ўқиш учун тағин томоқ қириб олди.

Шу пайт безовта ўтирган Маржона терговчи томон қўйл чўзди:

- Кечирасиз, шошманг...
- Хўшиш? — деди таажжубланиб Бақоев. — Тинчликми?
- Керакмас, ўқиманг...
- Нега?
- Керакмас, — деди Маржона лаблари титраб. — Мен... аризамни қайтиб оламан.

Бақоевнинг қош-қобоги уюлиб кетди. Курсисига бутун оғирлигини ташлаб қизга саволчан-синовчан тикилди.

— Ўйлаб гапиряпсизми, Маржонахон?! Бунинг оқибати нима бўлишини биласизми?

— Билишни ҳам истамайман.

Бақоев асабий тарзда сигарет тутатди.

— Оқибати сиз учун, оиласиз учун шармандалик, — деди терговчи захарханда билан. — Манави махлукқа эса яшил чирок. Сувдан қуруқ чиққач яна бирортасини бориб босади. Сизга шу керакми? Бунга ўшшаганларнинг кўзини жойига келтириб қўйиш сизу бизнинг бурчимиз эмасми?

— Мен аризами қайтиб оламан! — деб тақрорлади Маржона қатъий охангда. — Менга морал ўқиманг.

Бақоев аразлаган боладай тумшайди. Бош чайқаб «уф» тортди.

— Бу қарорингиздан дадангиз хабардормилар? — деб сўради у яна кинояли илжайиб. — Кейин пушаймон бўлиб юрманг-а.

— Ўзим шуни хоҳладим.

— Маржонахон... шошманг, мен дадангизнинг олдиларидан бир ўтай, кейин гаплашамиз, хўп?

Маржона ижирғаниб ўрнидан турди.

* * *

Ё, ҳазрат Хизр, тушимми, ўнгим?! Учрашув хонасида мени Роза аний кутиб турган экан. Онамни қўргандай севиниб кетдим. Бажонидил уни қучиб эркаланар эдиму кирланиб, анча-мунча кўланса хид анқиётган уст-бошимдан уялдим. Йўқ, Роза аний ҳеч бир ирганмай елкамдан енгилгина қучиб, пешонамдан ўпди, сўнг қулоғимдан тортиқилаб койинган бўлди:

— Ух, ты хулиган. Тез ўтири, томоқ совиб қолади.

Мен шундагина учрашув хонасининг ўша мактаб партасига ўхшаш столи чорбоғ дастурхонидай безатилганини пайқадим. Апил-тапил тўшалган газета устидаги оби нонлар, шириналликлар, айниқса, чинни косадаги буғи чиқиб турган димлама иштаҳани қитиқлаб юборди.

Ўтиридик.

— Овора бўлибсиз-да, — дедим астойдил, егуликларга интилиб. — Домилла билса сизни хафа қиласди.

— Не переживай, — кулди Роза аний, — ўзлари юбориши мени.

Чала чайнаб ютаётган ноним томоғимга тиқилиб қолаёзди. Оқсоқ аёлга анграйдим: «Йўғ-е?!».

Роза аний меҳрибонларча елкамга қоқиб қўйди:

— Ҳайрон бўлма, овқатингни еявер, ҳаммасини ту-шунтираман ҳозир.

Димлама ҳил-ҳил пишган экан. Ҳаш-паш дегунча чинни косани яримлатдим.

— Потише, тиқилиб қоласан, — деб кулди Роза аний, сўнг пичирлаб гап бошлади. — Ўша кеча...

Ўша тун мени милиция олиб кетгач, эру хотин роса типирчилаб қолишибди.

Қаҳру ғазаби анча мунча босилиб, эс-ҳушини йигиб олган Бекқул Тўракулович хотинига ташвишли тикилган эмиш:

«Бекор қилдик-да...»

«Ҳа, шошилдик, дадаси шошилдик!» — дебди ҳовуридан тушиб, ақли тиниқлашган Илмира янгам ҳам.

«Бу иш шов-шув бўлиб кетса...»

«Ва-ай, шўрим, шарманда бўламиз-ку?!»

«Шу ифлосни қаматиб нима наф топардик-а? !Кўчанинг йигитларига шипшиб қўйсан олам гулистон эди!»

«Сиз ҳам қонуний бўлсин, дедингиз-да, дадаси».

«Ҳа, тўғри, мен факт қонунни тан оламан, уфф...»

«Эртагаёқ дело очилади, тергов, суд... ва-ай, всё, ҳамманинг оғзида сакич бўламиз...»

«Қизингизга оғиз солиб юрган дўстларга нима деймиз?»

«Вахх...»

«Уф-ф...»

«Ишни тўхтаттиринг, дадажониси, ўлгур Бақоев билан эртагаёқ гаплашинг...».

«Шошма-чи... Маржонанинг ўзини юборсак... Қизинг аризасини қайтиб олса, тамом, ҳаммаси қонуний...»

«Тўғри... как раз эртага Маржонани юзлаштиришга чақиради...»

Ҳамма гап-сўзларни ётогида эшитиб турган оқсоч аёл сув ичиш баҳонасида залга чиқибди. Саросимаю таҳликада ўтирган эру хотин Роза анийдан ҳам маслаҳат сўраган эмиш.

«Роза, — дебди Бекқул Тўракулович болаларча мунфайиб. — Сен хаётда кўп машаққат кўрган, оқила аёлсан. Маслаҳат бер».

«Ҳа, йигитни милицияга топшириб хато қилдингиз, — дебди Роза аний. — Но, не поздно, биргина йўли бор».

Эру хотин оқсоч аёлнинг оғзига илҳақлик билан тикилишибди.

«Только, хафа бўлмасангиз айтаман», — дебди Роза аний.

Бекқул Тўракулович асабий қўл силтабди:

«Э, тезроқ гапирсанг-чи, қанақа хафагарчилик...»

«Жо-он, аний...» — мўлтирабди Илмира янгам ҳам.

«Шу йигитни қуёв қилингиз, всё. Ҳеч ким фиқ этмайди...»

Илмира янгам курсидан сапчиб туриб кетган эмиш:

«Как эта та-ак. Чўпонлар билан қуда бўламанми?!»

Лекин бека аёл бутун чорасизлигини хис этиб, тағин увв тортиб йиғлаганича ўтириб қолибди.

«Қўй, куйинма, — хотинини овуттан бўлибди Бекқул Тўракулович. — Одамларни камситиш яхшимас, мен ҳам оддий дехқон оиласидан чиққанман-а...»

Роза аний пайтдан фойдаланиб отга қамчи босган эмиш:

«Полвон бола, по моему ямон эмас... отличний йигит, свежий, здоровый...»

...Мен димламани паққос туширдим. Ялаб-юлқанган чинни коса ювандан зиёда ялтираб қолди. Ҳам лаззатли хўракдан, ҳам қулоққа хушёқар гаплардан маза қилдим.

— Кеча кечқурун чорбоққа Бақоев келди, — дея тағин пиҷирлашга тушди Роза аний. — Тажанг, сердитий...

Бекқул Тўракулович ўз шогирдини хушомад билан кутиб олган эмиш. Қуюққина зиёфат устидаги сухбат ҳам қуюққина кечибди.

«Энди-и... биз шундай нокулай ахволга тушиб қолдик, — деганиш Бекқул Тўракулович чайналиб. — Жаҳл келса ақл кетар, дегандай... сал-пал қизишиб наряд чақирибмиз. Энди-и... ўзингиздан қолар гап йўқ, шу ишни тинчитиб гум-турс қилинг... ортиқча ғавғога тоқатимиз йўқ...»

Бақоев улоқни олдирган чавандоздай сўнарибди:

«Ҳм-м... тушунарли. Бугун қизингиз аризани қайтиб оламан, деб ҳарҳаша қилганди... Бу сиздан чиккан фикр экан-да...»

«Ҳа... умуман... шундай, десак ҳам бўлади», — деб минғирлабди устоз шогирдига мўлтираб термилганича.

Терговчи Бекқул Тўракуловичга синчков-саволчан тикилиб тиржайган эмиш:

«Иҳтиёргиз, домла... ҳаммасини қонуний ҳал қилса бўлади, лекин... идорада баъзи бировлар бу ишдан

хабардор-да... ўшаларни тинчтиб, оғизларини ёпиш кепрак».

«Карракдай очилган оғизларни ёпинг, мана, биз харжатта тайёр. Қанча керак?»

Бақоев ўзича хижолатомуз қийшантлаб, қисилиб-кимтениб нарх айтиби.

Бекқул Тўрақулович «круглий» суммани эшитиб ранги кув ўчса-да, тақдирга тан берган эмиш:

«Бўпти, биз рози...»

Лекин шогирд норизо киёфада анча пайт тумшайиб ўтириби. Унинг дардини пайқаган устози секин пичирлаган эмиш.

«Хизматингиз қадрланади, ука... ҳалиги илтимосингизни бир ой ичида ҳал қиласман...»

Бақоевнинг бирдан қош-қовоги очилиб, қалин мўйлови остида кулги пайдо бўлган эмиш.

«Сиз доно, улуғ одамсиз, устоз, — дебди терговчи қадаҳларга ўзи ичкилик куйиб. — Сиз учун хизмат қилиш бизга бахт».

Устоз қадаҳни шунчаки лабига тегизиб қўйибди.

«Рахмат...»

Бақоев иштаҳа билан овқат кетидан овқат еб аллама-ҳалгача қолиб кетган эмиш шу кечा.

«Домла, — деб минғирлабди у кетар чоги кекира-кекира, — ҳаммаси сиз хоҳлагандай бўлади. Ну... анови тўнғиз яна ўн-ўн беш сутка таъзирини еб ётса яхши бўлар-да... шунчаки профилактика учун...»

Бекқул Тўрақулович сирли илжайибди.

«Ў-ў, укагинам, ҳақорат қилманг-а бировларни. Бу йигит сиз ўйлаганчалик ёмон эмас...»

Бақоев бақадай бақрайиб қолибди.

...Мен термосдаги аччиққина чойдан бир пиёла ичгач, ширинликларга ташландим.

Роза аний юзларимга меҳр билан тикилиб кўз қисиб қўйди.

— Қалай? Совчиларинг тайёрми?

Мен лаззатли таомдай бутун вужудимни яйратиб ётган қувончни яширишга ўлиб-тирилардим.

— Э-э, бизга йўл бўлсин, — деб ўзимча тўнғилладим, бир бўлак шоколадни томоғимга ташлаб. — Ота-онаси қўнсаям, барибир Маржона менга тегмайди.

— Нега?

— Мени севмайди. Ёмон кўради...

Роза аний шарақлаб кулиб юборди. Мен чўчиб учрашув хонасининг темир эшиги томон юзландим. Йўқ, коровул резина таёқ ўйноқлатиб кириб келмади.

— Успокойся, — деди Роза аний кулгудан аранг тутилиб. — Охрана ўзимиздан, гаплашганман.

— Нега куляпсиз, аний? — деб сўрадим ўзимча ўйчан, жиддий. Кўзларим хона деразаси ортидаги темир панжарага ўйноқлаб келиб қўнган бир жуфт мусиҷада эди.

— Кулмай бўладими? Эҳ, сиз — молодёжъ... қўл ушлашиб кинога киришни, сайр этишини любовь деб ўйлайсиз.

— Нима, бу севги эмасми?

— Йў-ў... бу шунчаки детский эрмак, ҳавас.— Роза аний тағин туйқус шарақлатиб кулиб юборди.

— Севги нима эса? — сўрадим мен ҳам беихтиёр ҳиринглаб.

— Кўз очиб кўрганини аёл зоти бир умр унутмайди, вот... бу севги! Ҳамма гап шунда, уқдингми?

Роза аний елкаларимга шўхчан турткилаб, яна баралла қах-қах уришга тушди.

Хуркиб учган мусичалар чарх уриб ўйноқлай кетишди.

* * *

Камеранинг оғир темир эшиги орқамдан одатдагидек гумбурлаб ёпилгач, Роза аний ҳалигина кула-кула чўнтағимга солиб қўйган, қат-қат буқлоғлик варақни қўлимга олдим. Хат экан.

«Қоржов ака, ҳаммаси учун мени кечиринг. Бугун аризани қайтиб олдим. Кўрқманг, эвазига сиздан ҳеч қачон, ҳеч нарса талаб қилмайман. Ҳеч қанақа даъвомим, эътиrozим йўқ. Сизга факат севинч тилайман. Маржона».

...Хатни тонг отгунча қайта-қайта ўқидим. Гўё Маржона шундоккина қучоқларимда шивирлаётгандек эди. Нописанд чимирилган ингичка қошлар, эҳтиросга лиммо-лим юпқа лаблар, эркалика, инжиқлика мойил қуралай кўзлар тонг отгунча корачифимда котиб турди. Юрак-бағрим соғинчу интизорлиқдан ўртаниб-ўртаниб кетди. Тонгга яқин хатни чайнаб-чайнаб ютиб юбордим.

* * *

Бақоев ўзи истаганидек «ўн-ўн беш сутка профилактика учун» мени камерада сақлай олмади. (Қонун барыбир қонун-да!) Орадан уч кун ўтиб навбатчи ходим аллақантча расмиятчиликлардан сўнг мени идора эшигидан чиқариб юборди.

Дарвоза ёнида Тоштемир ака машинасини ўнгариб кутиб турган экан. Устида жинси қўйлак-чалвор, оғзида сақич, қўллари белда.

— Ў-ў, Коржовбой укам! — дея хитоб қилди у, мен томон қулоч ёйиб келаркан. — Сенинг Хизр қўрганинг чин, полвон!

Биз бағирлашиб кўришдик.

Шу пайт машина ёнида илжайиб турган қўй қумолоғидеккина қоп-қора, юм-юмалоқ, тиканак соч дўстим Хусанга кўзим тушди. Юрагим алланечук орзиқиб унга ташландим.

— Айтганча, отанг ҳам келган, — деди Тоштемир ака машинага ўтирарканмиз.

Юрагим яна орзиқиб, сирқираб кетди:

— Қани отам?

— Бизникида... Аччиққина кўк чой ичи-иб ўтирибдилар. Бовани сарсон қилиб юриш ноқулай-ку, тўғрими, ука?

Йўқ, отам аччиққина ўйларга чўмганча қуюқ оқ ораглан соқолларини тутамлаб ўтирган экан. Устарада киртишланган бошида ола дўппи, устида енглари узун шалвираган сарғиш қўйлак, фижим шим.

Отам бизни кўрдию каловланганича ўрнидан кўзголди.

— Ота... — дедим аранг, бўғзимга бир хўрлик данақдек тикилиб.

Отам бўйнимга беҳол осилган кўйи ҳирқираб йиғлаб юборди:

— Болам...

Тоштемир ака ҳам ҳоли забунимиздан бир зум музтар тортиб, сақич чайнамай, мунғайибгина қараб турди.

Энтиқиб, эмраниб фотиҳа тортдик, ҳол-аҳвол сўрашдик.

— Ота, қачон келдингиз? — деб сўрадим ичим туз қуйгандай ачишиб.

Тоштемир ака бизларни бир зум ҳоли қолдиргиси келди, шекилли, алланималарни баҳона қилганича Хусани ҳам етаклаб меҳмонхонадан чиқиб кетди.

Отам дастрўмолига юз-кўзларини артди:

- Тўрт кун бўлди, болам. Тоштемирбойнинг одамидан хабарни эшитиб... Ҳусанбой билан жўнай бердик-да.
- Тўрт кундан бери шу ерда ўтирибсизми?
- Ҳа, Тоштемирбой барака топсин. Мен бечорани судракламай, сен учун кечаю кундуз ўзи чопиб юрибди. Худога шукур, ишингни ҳал қилди.
- Кечаю кундуз чопди, дейсизми?
- Ҳа. Тингани йўқ, кўпайгур. Терговчи, оқловчи, деганлари билан тиллашди, шуларнинг кўнглини топди... Биламан, берган уч-тўрт сўмим гўрам бўлгани йўқ. Барака топгур, ўз ёнидан харажат қилиб...

Бақоев не сабаб «профилактика учун» мени сақлаб тургиси келганини эндинга англаб етгандай бўлдим. «Улар отамни кутишган!» — шу хаёл бутун борлигимни тифдай тилиб ўтди.

Ногоҳ бостириб келган ғазаб-нафротдан кўз ўнгим коронилашди.

— Ота... — дедим аранг, бор ҳақиқатни айтиш илинжида оғиз жуфтлаб.

Шу пайт меҳмонхонага Тоштемир ака қайтиб кирди.

— Коржовбой, — деди у кафтларини бир-бирига ишқалаб. — Ванна тайёр. Би-ир мириқиб чўмилиб, кийимларни алмаштиринг. Кеча сиз учун Ҳусанбой билан бошадоқ сарупо опкелдик. Аттанг, сизни янгангиз кўрмадида, болаларни олиб қишлоққа кетганди. Янгангизнинг ҳам сизга атаган совғалари бор эди.

— Ҳеч нарса керакмас, — пўнғилладим унга зимдан ўқрайиб.

Тоштемир ака хохолаб, елкамдан қучиб қўйган бўлди:

— Нозланманг, куёв бола. Қани, тезроқ чиқиб кетинг-а бу ердан, биз бова билан би-ир маслаҳат қилайлик. Сиз эшиитманг, уят бўлади-я?!

«Ҳаммасидан хабардор-ку бу тулки?!» — ярқ этуба хәйлимдан ўтди менинг. Беихтиёр иргиб ўрнимдан турдим. Ҳалигина қонимни қайнатган ғазаб, алам ўрнини алланечуқ ҳаяжон, қувонч қоплади.

* * *

Бекқул Тўрақуловичнинг чорбоғига совчиликка кетган отам билан Тоштемир ака кечга яқин шоду хандон қайтишди! Қайғурдандир Бақоев ҳам қош-мўйловлари табассумдан ёйилиб уларга илашибди.

Отам! Ҳалигина қайғудан мунғайибина ўтирган қария, дўпписини дол қўйиб, кўлларини белига бодиларча тираб, чапдаст йигитлардек чақнаб турар, бир гапириб ўн кулар эди.

Хусан иккимиз хонадон йўлагида довдираганча туриб қолдик.

Отам бир зум юзларимга меҳр билан термилди-да, манглайимдан енгилгина ўпиб қўйди. Шундагина унинг оғзидан ароқ хиди келаётганини пайқадим: «Ичиришибиди-да...»

— Ў-ў, Коржовжон! — дея хитоб қилди Бақоев мени кучофига тортаркан. — Табриклаймиз, ука, табриклаймиз.

Тоштемир ака ҳам елкамга осилиб чўли-чўли ўпа кетди:

— Чин кўнгилдан қутлайман, менинг асл укагинам. Иш битди, улоқ сенда.

— Қанақа улоқ? Нима билан табриклаяпсизлар, тушунмадим? — дея тўнфилладим, шилимшиқ қучоқлардан қутулишга уринарканман.

Акахонларим бир-бирига ялт этиб тикилишди:

— Ҳали бехабар-ку, а? — илжайди Бақоев.

— Сюрприз! — хиринглади Тоштемир ака.

Сўнг иккови ҳам баббаравар яна менга ёпишиб ялаб-юлқашга тушишди.

— Сен Бекқул Тўрақуловичнинг суюкли куёвисан энди! — хитоб қилди Тоштемир ака ҳаяжондан ял-ял ёниб. — Чин юракдан табриклайман!

Бақоев жиддий эътиroz билдирган бўлди:

— Ўғиллари деяверинг, ўғиллари! Яхши кўёв любой ўғилдан азиз, тўғрими, бова? — терговчи ҳансираф отамга юзланди.

— Тўғри! — баралла ҳайқирди отам. У мастона довдираганича меҳмонхонага кириб борарди. — Коржовни домилла-арбобга топширдим!

Бақоев кўзларимга эҳтиром билан тикилди:

— Ана, айтмадимми? Домлага чин ўғиллик муборак, Коржовжон!

Мен зўраки илжайиб бош ирғаб кўйдим.

Тўрт хонали, данғиллама уй қувноқ қийқиригу фала-фовурдан данғиллаб кетди.

Меҳмонхона тўрига ястаниб, дунёни забт этган жаҳонгирдай ёнбошлиб ётган отам ахён-ахён менга мамнун ва мағрур тикилиб кўяр эди.

— Энди-и, укажонлар, би-ир маслаҳат, — дея викор билан гап бошлади у, икки ёнида икки вазирдек қўр тўккан Бақоев ва Тоштемир акага бир-бир қўз ташлаб. — Шахарнинг урф-одатини билмадиму... бизнинг овулларда унаштириш ҳам ярим тўй. Мен эртага сахарлаб жўнаб кетаман. Тараддудни ка-атта қилиб, насиб бўлса, жума куни яна қайтаман. Домилланикига тўй хайдаб борамиз, би-ир зиёфат берамиз. Қалай? Сизлар менга зарил нарсаларни рўйхат қилиб беринглар. Мен ҳаммасини етказиб келаман. Қалай?

Отамнинг ҳар бир сўзини бетиним бош иргаб маъкуллаб ўтирган терговчи ва тренер (мени жер!) баббара-вар қийқириб юбориши:

- Гап йўқ, бова!
- Ҳимматингизга қойилмиз!

— Энди-и, гап бундай, бова, — деди Тоштемир ака эшилиб-тўлғаниб. — Бугун оламшумул воқеадан ярим шаҳар хабардор бўлди. Бекқул Тўракулович билан қуда бўлганингиз не-не қўзурларнинг қулоғига бориб етди! Ҳозир бир гуруҳ казо-казо оғайниларимиз шу ерга етиб келади. Биз аллақачон телефонлашиб қўйганмиз. Биргалишиб анави хиёбондаги ресторанга чиқамиз. Бу зиёфат мендан! Йў-йў-ў, бош чайқаманг, бова, Қоржовбой, менинг энг қадрли укам-а, уят бўлади! Ҳамма харажат ўзимдан.

Бақоев ҳам қўлинини кўксига қўйиб гапни илиб кетди:

— Нима?! Қоржовжон менга бегонами? Харажат мендан!

Шу пайт эшик қўнғироги устма-уст, шўх-шўх жиринглади.

— Ана, айтдим-ку, ҳозир етиб келишади, деб! — Тоштемир ака иргиб турдию йўлакка отилди. Бақоев ҳам инқ-синқ билан ўрнидан қўзғолди.

Дарҳақиқат, эшик очилар-очилмас бир тўп шўх-шофон мөхмонлар ичкарига ёприлди. Улар орасидаги баъзи бирорлар қўзимга гира-шира танишдек туюлмоқда эди. Айниқса, хувв, ўша куни чорбоғда мөхмон бўлган тепакал, қабоқлари қалин, «саҳроий» шаҳарлик экани яққол қўриниб турган нусхани дарров танидим.

— Об-бо, сизлар йўлдан қочинг! — дея ҳайқирди у, пешвоз чиқсан терговчи ва тренерни ёлғондакам пўписа билан икки ёнга суриб. — Бизнинг Олломиши қани? Юлдузни бенаарвон урган жиянни бир кўрай...

Интизор «тоға» мени эхтиром ила түшига тортди.

— Табриклаймиз, жиян, — деди у тобора тўлкинланиб. — Муваффакиятлар билан табриклаймиз. Беккүл Тўракуловичдек одамнинг назарига тушиш осонмас...

«Беккүл Тўракуловичга совчи бормаганди, шекилли», лип этиб хаёлимдан ўтди менинг.

Шу орада димоғимга урилган таниш атир-упа ҳиди табриковчилар тўпида Фирдавс Шамс ҳам борлигидан дарак берар эди. Афсуски, у қўлтифидаги ўша ялтироқ портфели касридан мени қучоқлаб ўполмади.

— О-о, қутлуғ бўлсин, қутлуғ, — дея хиринглади Фирдавс Шамс хийла вакт қўлимни силкилаб тураркан. — Улуғ оиласа қариндошлиқ муборак. Камина сизни буюк келажак билан қутлайди.

Тағин талай тилакларга кўмилиб йўлакда гангиганча туриб қолдим.

Негадир бозордан қайтган отасининг қўлида ўзи истаган ўйинчоқни кўрмаган боладай ўксиндим. Шундагина уй тўла одамлардан бутун вужудим ташна бўлиб турган бир сўзни илҳақ кутаётганини пайқадим.

Мехмонхона фала-ғовурга кўмилди. Бақоев ва Тоштемир aka бири қўйиб-бири олиб совчилик тафсилотлари ни кўпиртириб-кўпиртириб гапиришга киришган, йигилганлар эса ҳайрату ҳаяжон билан уларнинг оғзига тикилишган эди.

Үй тўрини эгаллаган отам меҳмонларнинг олқишу қутловларига мамнун-мамнун илжайган кўйи бош иргаб, гоҳгоҳо ўзи ҳам алланималар, дея мақтаниб ўтиради.

— Аммо-лекин, — дея тилга кирди меҳмонлардан бири. — Беккүл Тўракулович жуда мардлар. Ҳувв, катта қизининг сепига яп-янги «Жигули» кўшганига, мана, ўзим гувоҳ.

— Бу куёвларига бутун бисотларини хатлаб бермокчилар, — дея қийқирди Тоштемир aka.

Бақоев тағин жиддий эътиroz билдири:

— Ўғилларига, денг, ўғилларига.

Шу орада ўша қалин қобоқ «тоғам» Беккүл Тўракуловичнинг қайсиdir куёвими, қариндошими аллақандай амал курсисини оппа-осон эгаллагани ҳақида андак ҳасад, андак ҳавас билан гапиришга тушди.

«Ва-ай...», «Я, худойим», — деган ҳаяжонли хитоблар ила Фирдавс Шамс уни қўллаб-қувватлар эди.

Мен пойгақда ичимни ит тирнаб омонатгина ўтирадим. Барибир мен кутган воқеа содир бўлмади!

Юрагимга шилимшиқ бир ғашлик оралаб ўрнимдан турдиму йўлак томон юрдим. Меҳмонхонада ғала-ғовур тобора кучаймоқда эди.

Бир пайт кимдир кўйлагимдан тортқилаётгандай бўлди. Дўстгинам Хусан экан.

— Бир соатдан бери туртқилайман, — деди у астойдил ўпка-гина билан. — Бир қараб қўяй, демайсан-а, ҳалитдан...

— Кечирасан... меҳмонларга чалғиб... нима дейсан?

Хусан юзларимга ғалати бир мутеълик, хокисорлик билан термилди:

— Коржов, чин дўстмиз-а?

— Ҳа.

— Бурнинг кўтарилиб кетмайди-я, бизни унутмайсан-а энди?

— Йў-ўқ, — дедим тобора энсам қотиб.

— Биласан-ку... ҳеч омадим чопмаяпти, ҳалигача ўқишига илашганим йўқ, — деди Хусан эҳтиром билан қўлларимдан тутиб. — Жо-он, жўра, шу сезон ҳам қолиб кетмай. Сен бир оғиз айтсанг...

Қадрдон дўстнинг қоқ оғзига қулочкашлаб туширгим келиб кетди. Хайрият, шу пайт йўлакда узиб-узиб жиринглаб қолган телефон эс-хушимни ўзига тортди.

Шашт билан гўшакни кўтардим.

— Алло... эшитаман, ал-ло...

Бир оздан сўнг телефон гўшагидан энтиккан, титроқли бир товуш келди.

— Коржов ака... Овозингиздан дарров танидим. Трубкани ўзингиз олишингизни юрагим сезганди...

«Маржона! Менинг Маржонам!» — бутун онг-шувуримда чақноқ чаққандай бўлди.

— Маржона! — дедим юрагим тошиб. — Менга... менга жуда-жуда кераксан. Ҳозироқ кўрмасам бўлмайди сени...

Маржона эркаланиб кулди:

— Келинг... кутаман сизни, умрим бўйи кутаман. «Бахт» боғининг дарвозаси ёнида турибман. Қаердалигини биласиз-а?

— Биламан...

* * *

Мен йўлак бўйлаб ҳансираганча югургилаб борардим. Дов-дарахтлар, парча-парча осмон кўз ўнгимда лоплоп чайқалар, онг-шууримда бир хайқириқ, бир ўкирик чарх уриб айланар эди.

«Маржона меники бўлди, эрка, мағрур қиз меники! Севганимга етдим-ку, ахир, одамлар?! Нега Қоржовни шундай баҳт билан кутламайсиз, биродарлар? Ў-ў, Кенгсой, ў-ў, сирли, қадрдан дашт, ўша учрашув учун сенга ташаккур! Эй, мулла Мирза боважоним, ўша тилак-дуолар учун минг-минг қуллук сизга! Бошқа ҳеч касдан бундай тилак, бундай қутлов эшигтан эмасман ҳали. Бугун суйганим бағримда, мулла боважон, насиб этса, никоҳни ҳам ўзингизга ўқитаман, ўзингизга. Бошқа ҳеч кимга ишонч қолмади, мулла боважон! Мени яна дуо қилиб туринг, менга мадад сўраб туринг. Энди бу ёфи, ё, Оллоҳ...»

Мен шашқатор қуяилаётган кўз ёшларимни артиб-артиб олдим.

СИРЛИ МУАЛЛИМ

*Муаллим ҳақида сўзим ушбуудир:
Муаллим камолот ичра кўзгудир.*

Абдулла Орипов

Нажот Файбулла деганлари ҳақидаги миши-миш бизнинг таҳририятга ҳам етиб келди.

— Эртагаёқ сафарга чиқасиз, — деди бош мұхаррир мени хузурига чорлаб. — Бориб билинг-чи, нима гап? Қаламга илашгулик ҳоли бўлса шартта бирор нарса қоралаб келинг. У ёқларни сиз яхши биласиз.

Ха, ҳа, каминага у тарафлар тузуккина таниш. Ропароса икки йил аввал овлоқ чўл қўйнидаги ўша харобги на 41-посёлкада бўлганман. Бу ҳарбийлиқда ҳалок бўлган қаҳрамон аскар — Умрзоқов Ўроқ туғилиб-ўсган маскан-да; маҳаллий мактаб шу жасур ўёлон номи билан аталади. Ҳатто, қаҳрамонга ёдгорлик-бюст ўрнатишган экан.

Хуллас, қадрдан дўстим, шоир ва ёзувчи, журналист (ва ҳоказо). Шункор Ҳобилнинг кутқусига учиб Умрзоқов Ўроқ ҳақида очерк битиш илинжида ўша овлоқ посёлкага бориб келганман.

Ўшанда баҳорнинг илиқ кунлари эди. Ўнгу сўлда экин-тикинга ҳозирланган жигартус пайкаллар ястаниб ётиди. Ўйдим-чуқур йўл бўйлаб тизилиб кетган довдараҳтлар қийғос япроқлай бошлаган. Осмон ҳозиргина бўшатилган шишадай топ-тоза, кўм-кўқ.

Посёлканинг сертупроқ, қингир-қийшиқ кўчаларида одам сийрак. У ер-бу ерда ўзиничувокда топлаб ўтирган қари-қартанглар, кий-чув билан ўйнашаётган болакайлар кўзга ташланади. Ҳойнахой, хамма кўклам ташвишлари билан андармон, дала-даштга сочилиб кетган.

Ҳамроҳим, туман ҳокимиятининг масъул ходими машинасини ярми панжара, ярми бетон девор билан ўралган мактаб ҳовлисига тақаб тўхтатди.

— Етиб келдик, — деди у енгил тин олиб. — Ана, мактаб директорининг ўзлари, Қалқонов муаллим.

Рост, мактаб ҳовлисида ёши олтмишларни қоралаган киши паришон тураг эди. У машинани кўрди-ю дархол хушёр тортиб биз томон илдам юрди. Ялпок юзлари хавотири ҳадикдан баттар ялпайган, митти, қийик кўзлари пир-пир учади, қуюқ оқ оралаган соchlари тўзгин, эгнидаги кулранг костюми, дудама ханжардай галстуги шалвирабгина туриби.

— Ассалому алайкум, оғажонлар. — Қалқонов муаллим биз билан бирма-бир қўшқўллаб кўришиди. — Чарчамайгина етиб келдиларингизми?

— Домилла, танишинг, — дея масъул ходим мен томон ишора қилди. — ...пойтахтдан келган журналист. Шунқор Ҳобилнинг ошнаси. Ўроқ бечора ҳақида асар ёзмоқчи.

— Яхши, яхши, — дея бош иргади Қалқонов муаллим. — Қани, ичкарига кирамиз.

Мактаб ҳовлиси кенг ва озода эди. Ҳайҳотдек майдонда кўр тўкиб турган ўқув биноси анчайин таъмиртаб бўлса-да, файзли ва шинамгина кўринади. Иморат пештоқида иссиғу совуқдан ранги униқан байроқ мағрут хилпираб туриби. Ҳовлидаги дараҳт шоҳ-бутоқларида чумчуклар чуғурлашади.

— Дарслар қизғинми дейман-а, — деди масъул ходим у ён-бу ён аланглаб. — Ҳаммаёқ жим-жит. Зоф учмайди.

Қалқонов муаллим бош иргади:

— Ҳа, ҳозиргина учинчи дарс бошланди, — сўнг мен томон юзланиб эҳтиром билан мавзуга кўчди. — Умрзоков Ўроқ ўзимиздан, буғалтер бованинг ўғли. Аскарликда Ватан учун ҳалок бўлган. Сўнг... биз идорама-идора елиб-югуриб номини мактабимизга қўйдик.

— Домилла, — деди масъул ходим вазиятга жиддий ва расмий тус беришга уриниб. — Анъанамизни тарк этмаймиз. Ишни қаҳрамоннинг ёдгорлигини зиёрат қилишдан бошлайлик, ҳайкал ёнида беш-олти минут сукут саклайлик.

Мактаб директори туйқус такқа тўхтади. Ранг-қути ўчганча бир менга бир ҳамроҳимга жонсарак тикилди.

— Ҳа, тинчликми? — деб сўради масъул ходим таажжубланиб.

— Йў-ў, ўзим...

Қалқонов муаллим фудранганича ўқув биноси рўпа-расидаги майдонча томон бошлади.

Дарҳақиқат, улкан қайрағоч ёнига қизғиши фиштдан баландгина устун қурилган экан. Бироқ... пойтахтда Шун-кор Хобил, йўл-йўлакай масъул ходим фаҳр билан тилга олган ёдгорлик – бюстдан ном-нишон йўқ.

– Ҳайкалча қани? – сўрадим ҳайрону лол.

Хижолатдан ияқ қашлаб турган Қалқонов муаллим дудуқланди.

– Бор эди... ўрнатганмиз... Бир хафтача илгари ўғирлаб кетишибди.

– Ўғирлаб?! – беихтиёр чинқириб юборди масъул ходим. – Ким?! Кимга керак экан шу... бюст-калла?

– Билмадим... мисми, алюминми, ишқилиб, шундай қимматбаҳо нарсадан ясалган экан ўша бюст. Ўғрилар қўпориб кетишибди.

Масъул ходим баттар тутокди:

– Дарров органга хабар бермадиларингми? А?!

– Бердик, участковойга айтгандик...

– Хўш-ш...

– Кулди. Қўйинглар-е, уят бўлади, деди. Бир ясама калла учун тўрт-беш тирик каллани кундага қўйишни истамас эмиш.

– Участкани назорат қилиш ўрнига каллаларнинг ғамини еб юрган қанақа мелиса ўзи?

– Ҳалим Норбўта ўғли.

– Ия, ўшами?! Отаси зўр мелиса эди-ку, суяқ сурмабди-да, ярамас.

Қалқонов муаллим туйқус участка назоратчисини сотиб қўйганидан баттар каловланган эди. Масъул ходим эса асабий тарзда бош чайқаб, кўл силтаб тағин хийла вақт жаврагач, мен томон хижолатли юзланди.

– Узр. Кутимаган муаммо...

– Ҳечқиси йўқ, – дедим уларни юпатган бўлиб. – Бўп туради. Янги бюст заказ қиласизлар.

Хуллас, аллақандай қароқчиларнинг фитнасига учмай ўша сафардан ватанпарварлик, фидойилик тараннум этилган тупшашузук очерк ёзиб қайтдим. Бош муҳарриримиз хўб мактади.

Мана, нон-насиба чорлаб яна ўша ёқларга чоғланиб турибман.

– Ҷўлма-ҷўл санғиб юрманг, – дея бот-бот тайинлади бош муҳарриримиз. – Ҳойнахой, Нажот Файбулла

деганларига жиноят иши очилган. Тўппа-тўғри бориб аввал терговчига учрашинг, кейин вазиятга қарайсиз...

* * *

Идорама-идора кириб-чиқиб, сўраб-суриштириб, охири керакли терговчига дуч бўлдим.

— Ҳа, — деди у олдимга устига «Дело» деб ёзилган папкани суриб. — Ўша нусханинг иши менда. Икки-уч марта посёлкага бориб келдим. Мактаб жамоаси билан учрашдим. Баъзи бирлари тушунтириш хати ёзиб берган, марҳамат, истасангиз танишиб чиқинг.

— Раҳмат.

Терговчи шоша-пиша қўл соатига кўз ташлаб олди.

— Зарил ишим бор эди-да, бир ерга бориб келсан майлими? Дарров қайтаман.

— Хўп, бемалол.

— Сиз ишни бемалол ўқиб чиқаверинг, — деди терговчи эшик томон юаркан. — Сиздан яширадиган сиримиз йўқ.

Мен қалингина папкани очиб шошилмай ўқишга тушдим.

* * *

(*Мактаб директори К. Қалқоновнинг тушунтириш хати*)

Суягим мактабда қотди. Йигирма ёшимдан бери муаллимлик қиласман. Болаларнинг қий-чувини эшитиб турмасам бошим оғрийдиган бўлиб қолган. Бир пайлар жомадон кўтариб ўқишга отланган чофим учувчиликни орзу қилганман. (Орзу-истаклар қанотида хўб учеб-кўниб юрган пайларимиз экан-да!) Йўқ, тақдир тақозосига кўра рус тили мутахассиси бўлдик. Ишладик. Мана, ишляяпмиз. Ўқитувчиликнинг этагидан тутганимиз учун хеч ким бизни ёмонотлиғ қилган эмас. Давраларнинг тўрини беришмаса-да, ҳар нечук пойгакка тушириб ташлашмайди. Ҳозирги ўшларга қараб ҳайрон бўламан, муаллимликдан ор қилишадими-еъ... Айниқса, ўғил болалар.

Қай бир кун олтинчи синфда ўқийдиган уч-тўрт боланинг гурунги тасодифан қулоғимга чалиниб қолди.

«Келажакда прокурор бўламан, — дерди улардан бири виқор билан, — ҳамма мендан қўрқади, хурмат қиласди. Бойликка кўмилиб яшайман».

«Прокурор кўп ойлик оладими?» — деб сўради тағин бир соддароги.

Дўсти аввал мириқиб кулди, сўнг ишонч билан деди:

«Йў-ўқ, гап ойликдамас. Жиноятчилар қамалиб кетмаслиги учун чўнтағингта жараклатиб солиб қўяди».

«Мен мафия бўламан!» — дея тантанали хайкирди болалардан бири.

Ҳалиги соддароги яна сўради:

«Мафия?! Нима у?»

Тантанали овоз эгаси, ҳойнаҳој мафия нималигини тузукроқ англамаса керак, бир оз тараддуланиб аранг тилга кирди:

«Мафияни киноларда кўрмаганмисан? Улардан керак бўлса прокурорлар ҳам кўрқишади».

«Мен кўркмайман!» — қонун химоячиси бўлиш орзусидаги ўқувчи дик этиб ўрнидан турди. — Мен ҳамма мафияни зириллатаман!»

«Мафия» у томон хезланди.

«Ўчири овозингни қўлингдан хеч нарса келмайди».

Улар бир-бирининг ёқаларига чанг солишли. Шу орада томок қириб панадан чиқдим. Болакайлар олишувни бас қилиб, жой-жойига ўтиришли. Ўзларича узун-қисқа салом беришган ҳам бўлишли.

Мен уларни бир зум қузатиб турдим. Ич-ичимдан алланечук изтироб, фусса қўзғалди.

Болалар ҳануз ҳансирашган қўйи бир-бирига ўқрашишар эди. Мафия орзусидаги бола — участка назоратчисининг ўғли Зокир. Ўқишилари аъло, хулқи ҳам бинойигина. Шахсан мен унинг келажагига катта умид боғланман. Шу сабаб болалар тўпидан уни имлаб чақирдим. Довдирағина ёнимга келди.

«Зокирбой, — дедим қўлидан тутиб, — нима у мафия-пафия? Унақа бемаъни гапларни қўйинг, болам. Сиз аълочи ўқувчисиз-ку, келажакда олимми, билимдон ўқитувчими бўласиз, деган умиддамиз».

Орқада шумшайиб-шумшайиб турган болалар пик-пик кула бошлашди.

Зокир қўлимдан юлқиниб чиқди.

«Барибир мафия бўламан!»

Шу воқеадан сўнг бирор ҳафта ўтар-ўтмас Зокирнинг онаси Моҳигул, ҳув, Сафармурод чавандознинг кизи мактабга бостириб келди:

«Ўв, ўртоқ Қалқонип, нега менинг боламга муаллим бўласан дедингиз? Ўғлим бечора неча кундан бери қақшаб ийғлаб юрибди».

Мен ҳангу манг қотиб қолган эдим. Тилим аранг калимага айланди.

«Нега йиғлайди?! Нима, ёмон тилак билдирибманми?»

«Жўралари устидан кулиб юришибди экан. Нега ундай дедингиз? Болам кимдан кам, нега у муаллим бўлар экан?!»

Мен жўяли бир жавоб тонгунимча Моҳигул қарғана-карғана хонамдан чиқиб кетди.

Юрак-бағрим зирқираганча хийла вақт ўтириб қолдим. Ҳаёлларим алғов-далғов бўлиб кетди.

Ё, худо, ўқитувчи бўласан дейиш ҳақоратми?! Нега шундай табаррук касбдан ор қилишади? Муаллим қачон уларнинг арпасини хом ўрди, қачон бирорнинг оштобоғига қўл чўзди? Ё, ўқитувчи отнинг калласидай маош олиб, булар куруқ қолишидими? Ўқитувчи данғиллама уйлар қуриб, гижинглаган машинада юрибдими? Ахир, ҳамма-ҳаммаси эл қатори-ку, йўғини яшириб, борини ошириб кун кўряпти-ку?! Ё, худо, ё, Фуломхон пирим, бу қандай нафрат, бу қандай кўргилик?

Ўша куни кечгача идорада биқиниб, шундай оғир ўйларга ем бўлиб ўтиредим. Умуман, мен мактабдан кеч қайтаман. Иложи бўлса, шу ерда ётиб қолсан, ҳувулланган уйимга бормасам, дейман. Сўққабошнинг ҳаёти шу экан-да. Кизларим уй-жойли бўлиб кетишган. Кичик қизим кўшни. Шу бечора рўзгоримга қараб туради. Ну... барibir раҳматли хотинимнинг ўрнини ҳеч ким, ҳеч нарса босолмас экан.

Йўқ, мен нолимайман, мен йиғламайман. Аллақандай синтиментал кайфият бизга ёт. Мингта моҳигуллар айю-ҳаннос солиб, шанғиллаб келишса-да, касбимга бўлган меҳримни сўндиrolмайди. Ҳа, мен ўқитувчиман, муаллимман, бу касбим билан фахрланаман! Қолаверса, неча бир моҳигуллар ҳақорат деб биладиган, неча бир тўралар менсимай қарайдиган хизматда бўлишнинг ўзи жасорат-ку?!

Лекин қувончли кунларимиз ҳам кўп. Ўқитувчи ўз меҳнатининг мевасини кўрганда ўн ёшга яшаради, балкийди. «Мехнатнинг меваси» деганда, ҳойнаҳой, уч-тўрт ойда аранг қўлга етиб келадиган маошни ўйласангиз,

адашасиз. Муаллим меҳнатининг меваси бу — тиришқоқ, омадли ўқувчилар! Ўз ўқувчисининг камолини, обрў-эътиборини кўрган қайси муаллим лоқайд қўл силтаб қўя қолади? Ҳеч қандай. Мен шундай азамат кадрлар бизнинг мактабдан ҳам етишиб чиққанини мамнуният билан қайд этишим мумкин. Масалан, Коржов полвон. Ҳозир у Коржов Чоршанбиевич бўлиб кетган. Пойтахтда яшайди. Баъзи бирорлар полвон шаҳарлик хотинининг орқасидан кўтарилиб кетди, деган сассиқ гап тарқатиб юришибди. Лекин бу фирт ёлғон. Коржовжон ўзи омадли йигит, Хизр кўрганлардан. Яна бир фахрли шогирдимиз — Дўланов Самад. У ҳам зўр бир илмий-текшириш институтида ишлайди ҳозир. Колаверса, Ватан учун ҳалок бўлган Умрзоқов Ўроқ ҳам бизнинг мактабда таълим олган. У ҳақда Улаш агроном-шоир достон битишга чоғланиб, баъзи бир сабабларга кўра режалари барбод бўлган эди. Улашбойни танисангиз керак-а? Кўзингиз тушгандир: хумкалла, тиканак соч, япаски бурун, қоп-кора киши. Ҳув, аробий биродарларни эслатиб юборади. У киши совхозимизнинг кичик агрономи, лекин катта шоири. Мен ҳазиллашиб «чўллик Пушкин» деб атайман. Ҳозирги кунда бу ижодкор Коржов Чоршанбиевич ҳаётидан бир эпик асар ёзиш тарафдудида. Ҳуллас, ҳайёт-фаолияти минг бир достон бўладиган шогирдларимиз талайгина. Яна бир такрорлайман, улар билан фахрланамиз, кўринганга мақтанамиз.

Хурматли терговчи, энди сизни қизиқтирган масалага ўтсак. Бу ёфи бир тушга ўхшайди.

Роппа-роса тўрт ойча аввал эди. Уч ойлик пахта ҳашаридан қайтиб эндиғина ўқишини бошлаган кунлар. Дарсга кўнғироқ чалиниб, мактабнинг ичу ташида шовқин-сурон андак босилган бир пайт.

Мен хонамнинг эшигини ланг очиб, ўз ёзув столимда ишлаб ўтирибман. Пастки синфлар учун грамматикадан кўргазма тайёрлаётган эдим. Синфхоналарда дарс ўтаётган муаллимларнинг паст-баланд товушлари эшитилиб турибди. Қай бир синфда мусиқа сабоби бўлса керак, рубобнинг тинғиллаган саси қулоққа чалинади. Мен кўргазма билан банд бўлсам-да, мактабнинг йўлагини хушёр кузатиб турибман. Эшикни ҳам шунинг учун атай ланг очиб қўйган эдим. Тўғриси, дарс пайти беҳуда сангифиб юрган ўқувчи-ю ўқитувчини жиним сўймайди. Шунақаларга кўзим тушса, дарров тўхтатиб сўраб-суринти-

раман, жўяли баҳонаси бўлмаса озгина койиб, озгина эркала барса киргизиб юбораман.

Бир пайт бўсағамга бир шарпа кўндаланг бўлди. Шартта бош кўтариб қарадим. Қарадиму беихтиёр ўрнимдан туриб кетдим.

«Тафтишчи-ёв?! — лип этиб ўтди хаёлимдан. Бундай ўй калламга бехуда урилмади. Ахир, бўсағада баланд бўйли, келишган, яп-янги, қимматбаҳо костюм-шим, оп-пок кўйлак кийган йигит турар эди. Юз-кўзларидан алланечук нур ёғилади.

— Ассалому алайкум, домла, — деди у қироат билан. — Киришга мумкини?

— Келинг, келинг...

Кўзларимни нотаниш йигитдан узолмай қолдим. Ҳалиги... Ҳолливудми-ей, Голливудми-ей, деган жойларнинг киноартистларига ўхшайди. Кўзлари чақнаб турибди, лабларида нимтабассум. Ёши нари борса ўттизларда. Мени хаёл қурғур ҳар ёқларга олиб қочади.

Ишқилиб, тинчлик бўлсин-да! Ким экан бу? Чет элликми дейман? Бизнинг овлоқ посёлкамизда нима қилиб юрибди? Ё ижарага жой излаб юрган тадбиркормикан? Бирор кичик корхона очмоқидир? Ана, туман марказидаги қайсиdir мактаб шундай ишбилармонларга ўқув корпусининг бир бўлагини ижарага топшириб мазза қилиб юришибди-ку! Раҳбарият ҳам ўшаларни мақтайди. Худо бизга ҳам «ол, қулим» деб юбордимикан?!

Йигит мен ишора килган стулга ўтириб, қўлини кўксига кўйди.

— Узр, домла, безовта килдим. Сиз директор бўлсангиз кераг-а?

Мен хаяжон билан бош ирғаб, ўзимни таништирдим.

— Мен Нажот Файбулламан, — дея гап бошлади йигит. — Туман марказидан келдим.

— Хуш келибсиз, хуш кўрдик.

— Мен... — Нажот Файбулла бир оз каловланиб ерга қаради. — Мен иш излаб келдим. Ўқитувчиман.

«Фу-у...» — шу лаҳзадаёқ ҳафсалам пир бўлди-қолди; эс-хушим дарров жойига қайтиб, ҳадик-ҳаяжонлар тарқади-кетди.

— Мутахассислик қанақа, ука? — сўрадим раҳбарларга хос совуқёнлик билан.

— Жуғрофия.

— Маълумот олийми?

- Олий.
- Илгари қаерда ишлагансиз?
- Икки йил пойтахтда ишладим. Сўнг оиласвий шароитга кўра ўзимизнинг туманга қайтиб келдим. Бир йилдан ошди, бекорчиман.
- Нима, марказда иш тополмадингизми?
- Сўраб-суриштирдим, — Нажот Файбулла бир зум саросималаниб қолди. — Икки-уч мактабга кириб чиқдим. Жуғрофия ўқитувчиси керак эмас экан. Маориф бўлимидагилар шу ёққа юборишди.

Биламан, маорифдагилар йигитни беҳуда бу ёққа юборишмаган. Улар бизнинг бош оғриқдан анча-мунча хабардор. Кўпдан бери жуғрофия муаллимига ялчимай юрганимизни жуда яхши билишади. Илгари бу фандан Райхон муаллима сабоқ берарди. Ўрта-маҳсус мълумотли бу қизимизнинг сулувлиги-ю хулқ-атвори ҳам ўртагина. Совчиларни ўпоқ-сўпок, дея-дея охири қари қиз бўлиб ўтириб қолган. Ана шу муаллимамизни малака оширишга юбордигу ундан айрилдик-қолдик. Вилоят марказидан қайтмади. Бирор билан суюшиб қолиб кетди. Ота-онаси ими-жимида тўй қилиб берди. Шу-шу жуғрофия ўқитувчисига зор-интизор эдик. Мана, ниҳоят кўнглимиздаги кадр ўз оёғи билан келди. Ишқилиб, Райхоннинг ҳам, бизнинг ҳам баҳтимиз очилгани чин бўлсин-да, билимдон йигитга ўхшайди.

Шундай ўйлар билан Нажот Файбуллага синчков кўз ташладим.

- Уйланганмисиз?
- Ҳа, — қимтинибгина жавоб берди йигит. — Яқинда фарзандли бўлдик.

Жавобдан кейин енгил тортдим. Бироқ ич-ичимдан фалати бир ишончсизлик ғимирлаб туар эди. Бу ишончсизлик Нажот Файбулланинг пўрим уст-бошига, келишган қадди-бастига, ирова ва виқор ёғилиб турган юз-кўзига тикилиб-тикилиб қараганим сайин кучаяр эди. Охири, чидаёлмай яна сўрадим.

- Чини билан муаллиммисиз, ука?

Нажот Файбулла костюмининг ён чўнтағидан ҳужжатларини чиқариб ёзув столим устига қўйди: паспорт, диплом, меҳнат дафтарчаси.

Хужжатларни бир-бир кўлга олиб, синчиклаб-синчиклаб кўздан кечирдим. Ҳаммаси рисоладагидек. Факат фамилияси бир оз фалати туюлди: Файбулла. Фай-

буллаев бўлиши керак эди шекилли? Ё, бу ҳам ёзувчи шоирларга ўхшаб «ов», «ев» қўшимчалардан воз кечдимикан.

— Биз мустакил миллатмиз, — деб қолди йигит дабдурустдан. Ҳойнаҳой, таажжуланганимни пайқаб. — Миллий мустакиллик энг аввал исм-шарифимизда бўлиши керак.

— Тўғри, — бош иргадим мен ҳам.

Хуллас, Нажот Файбуллани ишга олмаслигим учун хеч бир асос қолмаган эди.

— Марказдан қатнаб ишламоқчимисиз?

— Ҳозирча. Кейинроқ кўрамиз, шу атрофдан бирор бир бошпана топилиб қолар.

— Агар ниятингиз холис бўлса, — дедим мен унинг хужжатларини кўлига тутқазиб. — Ишга оламиз. Лекин майнавозчилик билан бошни қотираётган бўлсангиз...

— Эс-хушим жойида, домилла, — деди Нажот Файбулла алланечук ҳаяжондан энтикиб. — Ишонинг менга.

— Ўқитувчиликка қаттиқ кизиқасизми дейман?

Нажот Файбулла иргиб ўрнидан туриб кетди.

— Муаллимлик жону дилим. Болалар орасида бўлишини жуда-жуда ёқтираман. Ишонинг, домла. Мана шу орзу мени бу ёққа бошлаб келди. Болаларсиз ҳаётимни тасаввур ҳам қилолмайман. Болалар менинг тақдирим. Улар билан юз соатлаб шуғуллансан ҳам чарчамайман. Ишонинг, домла.

Йигит ҳаяжон билан гапиаркан, назаримда, унинг хушбичим юз-кўзидан чиндан-да нур ёғилаётгандек эди. Баландпарвоз гап-сўзлар ҳам унга алланечук ярашиб турарди.

Шундай қилиб, Нажот Файбуллани ишга олдик. Журрофия ўқитувчиси. Навбатдан ташқари педкенгаш чакириб, янги муаллимни мактаб жамоасига таништирдим. Нажот Файбуллани кўрган ўқитувчилар мендан баттар ҳайратланишиди. Кўркам йигит эса қувончдан ял-ял товланиб, гоҳ бош иргаб, гоҳ қўл бериб ҳамма билан саломлашиб, сўрашиб чиқди.

Ҳа, зўр кадрли бўлдик деган хаёлда эдим. Нажот Файбулла бир ҳафта ичидәёқ ўқувчиларнинг кўнглига кирди. Ўқитувчилар жамоаси унга ҳавасманд қарашарди. Янги муаллимни кўринганга мақтаб юрадик. Оқибати бундай бўлишини қайдан билибман?! Атиги бир кунда ҳамма ишнинг пачаваси чиқди. Устига-устак, худди атай-

лагандай, ҳужжатлари яна ўз қўлига тушиб қолгани-чи? Бунда анави тарихчи муаллимимизнинг ҳам айби бор. Анқов, ҳовлиқма. Мана, энди... қўлимизда Нажот Файбулланинг ҳеч бир ҳужжати йўқ. Афт-башарасини хоҳлаганингида таърифлаб беришим мумкин холос. Тавба, ҳаммаси тушдагидай.

Хурматли терговчи, билиб турибсиз, бу ерда менинг ҳеч қандай айбим йўқ. Холисман. Ҳамма-ҳаммасини мактаб учун, ўқувчилар учун қилдим.

* * *

(Улаш агроном-шоирнинг тушунтириш хати)

Узр, «Портвейн» виносидан қофозга икки томчигина томиб кетди. Мени танисангиз керак-а? Шу совхознинг атоқли шоириман. Ёзганларимнинг хатоси бўлса, кечи-ринг, резинка билан ўчиринг. А, қалай?

Хурматли терговчи, бир неча қундан бери мактабимизга қатнаб юрганингиздан хабарим бор. Ташириғизнинг сабаблари ҳам каминага маълум. Шу нуқтаи назардан олиб қарасам, ҳақиқат қарор топишига ҳисса кўшишни ўз шарафли бурчим деб биламан. Ҳойнаҳой, каминанинг камтарин қораламаси бир гуруҳ муттаҳам муаллимларнинг тушунтириш хатлари орасига қандай тушиб қолганига қизиқаётган бўлсангиз керак. Э, сира сўраманг, бу ҳам бир ташвиш, юз грамм оқига чиқимдор бўлдик. Эрталаб мактабга келдиму Қалқонов муаллимга жиндек-жиндек қўйиб бериб, гапга овунтириб, ёзув столи устига тахлаб қўйилган тушунтириш хатлари орасига ўзимнини тикиштириб қўйдим. Эс-дарди ичкиликда бўлган директор сезмай қолди. Ишончим комилки, битикларим сизнинг муборак кўлингизга етиб бора-ди.

Хурматли терговчи, сизга қўйидагиларни баён қилмоқчиман. Аввало, манави муттаҳам Қалқонов муаллимнинг дийдиёларига ишонманг. Фирт ичкиликбоз. Нечанеча йиллардан бери директорлик лавозимидан тушмай, мактабни еб ётибди. Бунга керагидан ортиқ далилларим бор. Ўзимни улфат кўрсатиб қўп сирларини билиб олганман. Қалқонов муаллим — хотинбоз. Тўғрироғи, анча илгари шундай эди. Унинг ишқий саргузаштларга ишқибозлигини исботлаш учун бундан беш-олти йил аввал бўлиб ўтган бир воқеани айтиб берай. Зоро, ҳақиқат

эскирмайди. (Хурматли терговчи, каминанинг қаламига мансуб ушбу ҳикматни ён дафтарчангизга кўчириб олишингизга қарши эмасман.)

Хуллас, воқеа бундай бўлганди ўшанда.

Домла икковимиз баъзи бир ташвишлар билан туман марказига отландик. Ўша кунлар марказдан қатнайдиган автобус дом-дараксиз эди. Кутиш бефойда. Домла, давай, катта трассагача пиёда борамиз, у ердан бирор бир кўликка илашиб кетамиз, деб қолди. Жўнадик секин-секин, гурунглости-иб. Катта йўлга етай-етай деганимизда олдимииздан бир аёл чиқиб қолса бўладими?! Ана аёлу мана аёл! Унинг таърифини фақат шоирларгина келтира олади: сап-сариқ соchlари шалоладай қўйилган, кўм-кўк кўзлар, қалам қошлар хорғин-хорғин уюлган. Кўйлаги кўйлакмас, бир парча латта, кесиб ташланган тиззадан шартта, оппоқ билак, оппоқ болдиrlар, юракларга қутқу солдилар...

Хуллас, аёл «привет» деди бизга жилмайиб. Қўлида катта бир сумка. Сўнг яна русчалаб бу ердан геологлар қўнағасига қандай бориш мумкин, деб сўради. Тушуниб турибман. Лекин тил қурғур ҳеч айланмайди-да, армия хизматидаги ҳам бир баталён ўзбек эдик, рус тили кўп керак бўлмаган-да. Ана, энди хўп зарил-да! Қани энди булбулигўё бўлиб кетсанг! Шу пайт ёнгинамда рус тили ўқитувчиси қаққайиб тургани лоп этиб эсимга тушиб қолди. Ўртоқ Қалқоновнинг бикинига секин туртдим, «домилла, икки оғиз бир нима деворинг», деб шипшидим. «Нима, сенга бу ер синфхонами», деб тўнғиллаб берди домла, қарангки, унинг ҳам ранги оқариб кетган. Лекин без бўлиб жим туриш ҳам мумкин эмас. Анови сулув жилмайибгина жавоб кутяпти. Охири Қалқонов ҳам тиржайиб «привет» деди. Сўнг қўлларини гоҳ геологлар томон, гоҳ посёлка ёққа пахса қилиб, силкита-силкита, оғзидан тупук сачратиб, тегирмондай гулдираб ўзича русчалаб алламбалолар дея кетди. Ҳалиги жувон эса андак чўчиб, андак ажабланиб домланинг оғзига анграйиб турар эди. Бир пайт домла гапини тугатар-тугатмас, «теперь, по русски обесни, пожалуйста», деб қолса бўладими?! Қалқонов оғзини каппа-каппа очиб қолди. Бечора нажот излаб менга тикилди. Уялмасин деб гапни тўғриладим, «домла қўяверинг, ўзи гўзал бўлсаям, қулоғи кар экан», дедим. Ҳалиги аёл гапимни эшитиб турган экан, қах-қах уриб кулиб юборса бўладими?! «Ве-ей,

биласизми ўзбекча, гапиринг ўзбекча», деб колди-я бир маҳал! Курғур, тилимизда булбулдай сайрап экан. Сўнг ҳаммаси маълум бўлди.

Маълумки, трасса ёқасидан қараганда геологлар посёлкамиз тубида жойлашгандай кўринади. Домлани анчамунча қийнаб кўйган анави аёл ҳам автобус деразасидан караб кела-кела, посёлкамиз бикинидаги узун-узун темир курилмаларни кўриб, етиб келдим, деб ўйлаб, посёлка муюлишида автобусдан тушиб қолибди. Автобусда бирортасидан сўрамабди ҳам. Қараса, посёлка ҳам, геологлар кўналғаси ҳам жуда-жуда олис, адашдим, деб кўркибди. Шу пайт посёлка йўлида биз кўриниб қолганимиз. Тўғриси, курғур, шўх-шадодгина экан! Айтганлари чинми, ё шунчаки ҳазилми, билмадим. Хуллас, шошапиша бизга пешвоз юрган. Қараса, икки йўловчи ҳам туппа-тузук кийинган, ҳатто, бирининг қўлтифида қалин чарм папка ҳам бор. «Сизларни геолог қидирувда ишловчи чет элликлардан, деб севиниб кетдим», деди аёл. Курғур, домлани корейсга ўхшатибди, каминани эса... ҳа, майли бунинг аҳамияти йўқ. Хуллас, ўшанда Қалқонов муаллим ҳалиги аёлни етаклаб, ўз ишини ҳам унубтиб, геологлар ёққа йўл олди. Шу-шу ўша тараф кунора қатнайдиган одат чиқарди. Бу ҳақда посёлкамизда хийла шов-шув бўлди. Ҳатто, уларнинг Кенгсой даштида ачомлашиб юришганини кўрганлар бор.

Мана, сизга исбот. Мана, хотинбоз мактаб директорининг ҳақиқий башараси. У ҳозир ҳам қариб қуйилмаганлардан. Сезаман-да...

Мен сизга айтсан, ҳурматли терговчи, ушбу мактаб жамоасининг ҳаммаси ҳам бир гўр. Барчаси маънавий бузук, порахўр. Масалан, мактаб илмий мудири Норхол Хушбоқовани олайлик. Анави юзида «индийский» холи бор, дўмбоққина аёл-да, танийсиз-а? Эри икки йил аввал Россияга кетиб қолган. «Тирикчилик курсин, хўжайиним пул топиш дардидা сарсонгарчиликни бўйнига олди», деган гап қилиб юрибди Норхолой. Аслида-чи, эри ундан безиб кетган. Энди қайтмайди, айтишларича ўша ёқда бир гўзалга уйланиб олган эмиш. Ҳаммасига шу илмий мудирнинг ўзи сабабчи. Ҳар хил мажлисларни баҳона қилиб марказга кунора қатнайди, уйига кеч қайтади. Ёш бошига беҳуда илмий мудира бўлиб қолмаган бу, биламан-да.

Масалан, директор ўринбосари Боймурод серрига на-

зар ташлайлик. Худо сал кам икки метрлик бўй берган, хунар-пунар деган нарсалардан ҳам қисмаган, лекин айнан муаллимлик уқувини бермаган-да. Лекин бу кишим ўқитувчилар. Алгебра, физика каби энг жиддий фанларни эгаллаб олган. Давлатнинг ойлигини қуртдек санаб олиб ётиби.

Умуман, ҳурматли терговчи, мактабда носоғлом мухит бор. Қалқонов, Норхол, Боймуродлар ўзаро жиноий гурух. Ўқитувчи кадрлар етишмайди, деган баҳона остида дарс соатларини бўлиб олишган. Ҳали она сути оғзидан кетмаган, қай гўрдаги колледж-моллежни амал-тақал билан битириб келган қизларни ҳам ишга қабул қилган. Ҳаммаси шу учтовининг кариндоши, ҳаммаси кўрсавод.

Домла Ҳуррамович ҳакида ҳеч нарса деёлмайман. У анақа... маҳсус идораларнинг хуфёна хизматида. Кўрқаман. Уни танийсиз-а: ёши элликдан ҳатлаб ўтган, сочлари меникидек сийрак, кирвутс. Вазиятга қараб гоҳо шляпа, гоҳо дўппи кияди ва лек ҳеч қачон яланѓбош юрмайди. Ҳойнаҳой, бор-йўғ эс-ақли бош кийимида, эсам гарангсиб қолади. Кўзлари тарғил. Ранги унниқкан ёқаларидан қоп-кора галстуги ҳеч ечилмайди. Ўлсаям бир кун шу бўйинбокқа осилиб ўлишни ният қилган, шекилли. Бироқ домла ҳозирча дадил, ҳаётта ҳушёр қарайди. Саломат бўлсинлар.

Анчагина алжираб юбордим-ов, ўртоқ терговчи. Лекин мени маст деб ўйламанг. Илҳом учун аҳён-аҳён, қиттак-қиттак олишимиз ҳисобламасак, мутлақо ичмайман. Шу сабаб ёзганларимга дикқат қилишингизни элтинос қиласман.

Хўш-ш, устига-устак мактабда дарслилар етишмайди. Умуман, йўқ десам ҳам хато қилмайман. Бу кўргиликларнинг бошида совхозимиз директори Чинор Тоштемирович туришини сизга рўй-рост айтмоқчиман. (Узр, тағин уч-тўрт томчи вино қоғозга томиб кетди, минг бор узр) Чинор Тоштемирович — мутлоқ ҳоким, лекин кўрқоқ, кассоб одам. Кўрқоқ одам ёвуз бўлади! ((Каминанинг қаламига мансуб ушбу ҳикматни ҳам кўчириб олишингизга розиман.) Чинор Тоштемирович шунчаки золим, жоҳил. Ўз ҳукмидаги элдан кўрқади, кирдикорлари бир кун очилиб қолишидан чўччиди. Шу сабаб ҳеч кимни кўз очиргани кўймайди. Гапга етарман, каллали одамларни бадном қиласди, қаматади, керак бўлса, ўлдириб юборишдан ҳам тоймайди. Чунончи, Умрзоков

Ўроқ аскарлик пайти одам ёллаб уни саранжомлатган. Чунки Ўроқбой катта институт талабаси, оқ-корани ажрата бошлаган зукко йигит эди. Афсус, орамиздан эрта кетди. (Ўртоқ терговчи, қаҳрамон ўғлонимизнинг пок хотираси учун жиндек хўплаб юборсам... Мана, сизнинг номингиздан ҳам яна қиттак.)

Хўш-ш, мана шу баттол раҳбар дарслик китоблар келтиришга ими-жимида қаршилик қилади. Болаларнинг ўқимишли, зукко бўлиб кетишини истамайди. Бир кун келиб ёшлар совхоз раҳбарлигига даъвогар бўлмасин, дейди-да. Шунинг учун мактабни қаттиқ назоратда сақлайди. Юқорининг буйруғи деган баҳона остида болаларни пахта теришга ҳайдаб чиқади. Болалар икки-уч ойлаб далаларда қолиб кетади, мактаб бетини кўрмайди. Муаллимларни атай овора килиб қўяди. Финг деганнинг бошига маломат ёғаверади. Қалқонов муаллимга ўҳшаганлар эса «оч қорним — тинч қулогим» қабилида иш юритади. Шунинг касридан ўқув ишлари ўрта сарсон. Ана шундай пайт Нажот Файбуллага ўҳшаганларнинг куни туғади. Жамоа орасига суқилиб кириб билган номаъкулчилигини қилади. Ўртоқ терговчи, Қалқонов ва унинг ҳамтовоқлари албатта сизга ўзларини оппоқ кўрсатиб ёзиб беришлари тайин. Аммо мен гарантия бериб айтаманки, ишкан ишга шулар юз фоиз айбдор. Масалан, Қалқонов муаллим Нажот Файбуллани пора эвазига ишга жойлаган. Исбот шулки, нотаниш йигит пайдо бўлган куннинг эртасига қувонч билан шаталоқ отиб кетаётган Қалқоновни учратиб қолдим. «Улашвой, юринг, би-ир эрийман, кеча зўр ўқитувчилик бўлдик», деди. Ҳолбуки, қайси кундир чўнтағида ҳемири йўқлигидан, кимдан қарз ундиришини билмай, гарангсиб юрган эди. Энди эса эримоқчи! Демак, қайдандир тушим тушган. Неажабки, Нажот Файбулла химмат қилган бўлса?

Нажот Файбулла деганлари балои азим экан. Тўғриси, уни кўриб менинг ҳам оғзим очилиб қолди. Пўрим уст-боши, викорли юриш-туриши қойил қолди. Марказдан мактабга яп-янги «Нексия»да қатнашига нима дейсиз? Зарранинг заррасича бизнинг муаллимларга ўҳшамайди.

Хатто посёлка эли ҳам янги ўқитувчини томоша қилгани ҳар хил баҳоналар билан мактаб теварагида ўрала-шадиган бўлиб қолди. Мактаб жамоасини-ку, қўяверинг. Муаллимчалар пардоз-андоздан бўшамай қолишди, у ён

ўтса ҳам, бу ён ўтса ҳам «Нажот ака, Нажот ака»лаб энтикишади. Дуппа-дуруст ўқитувчиларимиз ҳам онаси ортидан атак-чечак одимлашни ўрганаётган бўталоқлардек Нажот Файбуллага тақлид қилишга тушишди. Аммо йўл бўлсин! Чўнгагида тилла червон ўйнаётган кишигига на янги муаллимга тақлид килса арзиди.

Мен эмоцияга берилмайдиган, воқеаларни холис, со-вукқон таҳлил қиласиган одамман. Шу сабаб янги ўқитувчига бошқалардек анграйган кўйи қолиб кетмадим. Нажот Файбуллани обдон кузатиб, у ҳақда ўзимга холосалар ясадим.

Нажот Файбулла қандайдир бойваччанинг тўклика шўхлик қилиб юрган арзандаси. Авантюрист. Бунақаларни кино ва романларда кўп учратамиз. Улар отаоналарининг бойликлариға қаноат қилмай ҳар хил саргузаштлар иштиёқида юришади. Нажот Файбулла ҳам худди шундай. Муаллимликка кўнгилчалари суст кетган. Шу йўл билан ёш ўқувчи қизларнинг бокира юрагини забт этиб, ишкӣ майнавозчиликлар қилмоқчи бўлган.

Мана, нақадар тўғри холосага келганимни ҳаётнинг ўзи кўрсатди! Яхшиям катта фалокатларнинг олди ўз вақтида олиб қолинди.

Хурматли терговчи, каминаи камтариннинг битиклари сизга асқотиб қолса фоят мамнун бўлардим. Гапларим тухмату бўхтондан, ёлғон-яшиқдан холи. Эс-хушим ўзимда. Кўзим тиниб бошим айланайётгани, қўлимнинг қалтираши ҳаяжоннинг зўридан, холос. Бошқа хаёлларга борманг тағин. Мабодо зарурат чиқса бемалол чақириринг. Камина учеб боражак. Сизнинг чорлашингизга умид боғлаб ҳозирча ёзганларимга имзо чекмай тураман. Узр.

Дарвоқе, икки оғиз ўпка-тина қилишга рухсат берсангиз. Мен бундан хийла илгари мактабимиз муаллимлари Норхол ва Боймуроднинг гайриахлоқий саргузаштлари ҳақида идорангизга тўрт энлик хат ташлаган эдим. Негадир ҳали-хануз жавоб бўлмади. Анови ўқитувчилар сўроқ-терговга тортилмади. Ё фурсат тополмадиларингизми? Мана, ўз оёғингиз билан мактабимизга келиб қолибсиз, балки ушбу долзарб масала юзасидан ҳам текширув ўтказарсиз? Умидларим катта. Қимматли вақтингизни ўғирлаганим учун яна бир карра узр сўрайман.

* * *

(Мактаб илмий мудираси Норхол
Хушбоқованинг тушунтириш хати)

Уф-ф, бир камим тушунтириш хати ёзиш эди. Хўш, нимани тушунтирай? Ҳали ўзимга ҳам тушунуксиз, чигал турмушим, касби-корим хақида нима ҳам дейишим мумкин? Бир пайтлар отам раҳматлик пединститут қошига етаклаб бориб, «Қизим, муаллимчиликка ўқий қол, аёлларбоп иш, тўртта болани алдаб юраверасан», деган эди. Афсуски, «тўртта ўқувчини алдаш» билан иш битмас экан. Мана, ёзув столим устида уюм-уюм юмуш кутиб ётибди: дарслар тақсимотини кайта кўриб, жадвални ўзгартиришим керак, туман ҳокимииятига, маориф бўлимига алоҳида алоҳида хисобот тайёрлашим зарур. Хисоботда ўтган чорак якунлари, янгисининг режалари икир-чикирларигача акс этиши талаб этилган. Бундан ташқари, шу ой ичида қабул қилинган ҳукumat Қарорлари асосида деворий газета тайёрлаб мактаб залига осишми керак. (Иложи бўлса ёнига ўзимниям.) Булар бугундан қолдирмай қилишим зарур бўлган юмушлар. Эртага яна қанча қофозбозликлар кутаётганини айтсан, ручкамнинг сиёҳи тугаб, қофозларим адо бўлади.

Йўқ, мен тушунтириш хати ёзмайман. Дабдурустдан шундай қарорга келдим. Шоир айтгандай, юрагимни юлиб шундоққина қофоз устига қўя қоламан. «Мактабнинг обрўсини ўйланглар, ўзларингни эҳтиёт қилинглар», деб устоз Қалқонов неча-нечча марта тайинлаган бўлсалар-да, барибир кўнглимдагини ёзмасам чидаёлмайман.

Устига-устак, хурматли терговчи, ўзингиз мени бир чеккага тортиб: «Хушбоқова, устингиздан шикоят хати тушган» дедингиз. Шикоят мазмуни билан қисқача таништирдингиз. Аъзои баданим музлаб кетди. Сиз аҳволимни пайқаб, ўзингизча юпаттган бўлдингиз, аммо юмшоқлик билан қўшиб қўйдингиз: «Узр, шу масала хусусида ҳам алоҳида тушунтириш ёзиб беринг».

Йўқ! Бунақа масалалар юзасидан алоҳида ҳеч нарса деёлмайман. Шу ёзганларим етарли бўлар, ҳойнаҳой.

Нажот Файбулла ишга қабул қилингач, бир ҳафта ичидаёқ мактабни сеҳр-жодуга қўмиб ташлагандай бўлди.

Устида ҳамиша опшоқ қўйлагу қоп-қора костюм, гулдор галстук. Қуюқ соchlари ювиб, орасталанган. Юзларида викор, лабларида ниматабассум. Аввал бошида

ўқитувчиларимиз Нажот Файбуллага иописанд, масхарамуз муомалада бўлдилар. «Худди тўйга келгандай киинишини-чи» дейишарди энсалари қотиб. Кейинчалик ҳамма-ҳаммалари янги муаллимга қизиқсиниб-қизиқси-ниб, андак ҳасаду андак хавас, андак қўркув ва андак ҳайрат билан қарайдиган бўлишиди.

Нажот Файбулла дарсларга ўз вақтида етиб келар эди. У ичкари кираётган чоғ, назаримда, «Ўқитувчилар хона»сининг ёғсираб қолган эшиги одатдагидек аянчли фийқилламас, у қадам босган пайт, эски пол одатдагидек фичирламас эди.

— Ассалому алайкум!

Нажот Файбулланинг қироатли саломи давлат маддиясидай жаранглаганиданми хонадаги ўқитувчилар бе-ихтиёр ўринларидан қўзгалиб, қўл бериб кўришишга чоғланишарди. Нажот Файбулла гўё йўқсилларга эҳсон улашгандай, ҳар бир ҳамкасабанинг илкини эҳтиром билан бир-бир ушлаб, самимий сўрашиб чиқар, сўнг устидаги кимматбаҳо, чарм камзулини бурчақдаги илтакка иларди-ю кўзгу ёнида апил-тапил соchlарини тараб, у ёқ-бу ёғини саришталаб оларди. Узундан-узоқ телесериални хормай-толмай мухокама қилаётган ўқитувчиларнинг ўз-ўзидан саси ўчиб, гоҳ ошкора, гоҳ пинхона янги муаллимни кузатишар, гўёки қизиқарли, ҳаяжонли томошанинг галдаги қисми шундокқина кўз ўнгларида давом этар эди.

Бир куни Нажот Файбулла дарсга анча кечикиб қолди. У сабоқ бериши керак бўлган синф болалари одатдагидек қий-чув кўтармай синфхона эшигидан умидвор-умидвор қараб қўйишар эди. Қалқонов муаллим ҳам безовталаниб мактаб ховлисига чиқди. Мен янги муаллимни боплаб койишга баҳона топилганидан хурсанд. Бир пайт Нажот Файбулла ўз «Нексия»сида тўппа-тўғри ховлига кириб келди.

— Кечирасизлар, кечикиб кетдим, — деди у машинасидан шоша-пиша тушиб.

Эндинина аччиқ-тизиқ гапларга оғиз жуфтлаган мактаб директори ҳанг манг қолди. Унинг кўзи туйқус машина салонига даста-даста тахланган китобларга тушган эди.

— Нима опкелдингиз? — сўради у аранг.

Нажот Файбулла кулиб машина багажини ҳам очиб юборди. Багаж ҳам китобларга лиқ тўла эди.

— Дарсликлар, устоз, — деди янги муаллим мамнун. — Ҳаммаси ўзимизга.

Мен ўқитувчини бетоқат кутаётган болалардан учтүрттасини ховлиқканча ховлига бошлаб чиқдим.

Қалқонов муаллим ҳам ҳаяжондан, ҳам ҳадикдан энтикиб деди:

— Буларни хозирча менинг хонамга киргизайлик. Кейин... кейин гаплашамиз.

Директорнинг кабинети китобга тўлиб кетди.

Нажот Файбулла ўқувчилар изидан синфхонага ошикаркан шоша-пиша тушунтирган бўлди.

— Вилоят марказидан опкелдим. Шунаقا маҳсус фонд бор.

Директор иккимиз гоҳ бир-биримизга, гоҳ уюм-уюм китобларга тикилганча қолавердик. Икковимиз ҳам таажжубдан танг қотганмиз.

— Қизиқ, — деб фудранди Қалқонов муаллим. — Қанақа маҳсус фонд? Ҳеч эшитмаган эканман, ё сенинг хабаринг борми, Норхол?

Мен ҳам бош чайқаб елка қисдим. Ўқув йили бошида туман маориф бўлимидағилар ҳар бир синф учун атиги беш-олтига дарслик ва беш-олти оғиз пўписа берганди: «Улушларинг шу. Финг-шинг билан шикоят қилиб юрганларингни эшитмайлик. Фонд тамом. Қолганини бозор-мозордан сотиб оласизлар».

Биз икки ўт орасида қолдик. Хўш, эрта-индин мукаррап келадиган тафтишчилар, дарсликларни қайдан олдинглар, деб сўрашса нима деб жавоб берамиз.

Танаффус пайти Нажот Файбуллани директор иккевимиз яна ўртага олдик. Мен ўтиб-қайтаётган ўқитувчиларнинг китобларга кўзи тушмаслиги учун эшикни зичлаб ёпиб қўйдим.

— Тўғрисини айт, болам. Қаердан опкелдинг буларни? — деб сўради Қалқонов муаллим.

Нажот Файбулла хотиржамлик билан ўша гапларини қайтарди.

— Айтдим-ку...

— Туман раҳбариятидан бирор-ярим сўраб қолса, бундай деёлмаймиз.

— Нега, устоз? Болалар дарсликли бўлганини эшишиб хурсанд бўлишади-ку?

— Йў-ўқ... Бошимизда ёнғоқ чақишади. Вилоятга арз қилиб боргансанлар, дейишади.

Мен хам ўзимча фикр билдирган бўлдим.

— Яххиси, пул йигиб бозордан опкелдик, деймиз.

— Йўқ, — директор жаҳл билан ёзув столига муштлади. — Бўлмайди. Ҳар бир ўқувчи, ҳар бир муаллимга қандай тушунтириб чиқасан буни? Бирортаси оғзидан гуллаб кўйса, тамом.

Нажот Файбулла гуноҳкорона тарзда китобларга термилиб ўтиради.

— Бирорта тадбиркор ҳадя қилди, деган қофоз тўғрисасак-чи? — деди Қалконов муаллим чехраси андак ёришиб. У қисик кўзларини пирпиратиб бир менга, бир янги муаллимга тикилди.

Охири шу карорга келдик. Ўша куниёқ катта танафус пайти ўқитувчилар ўртасида савобталаб бир тадбиркор мактабимиз учун дарслик китоблар ҳадя этгани ҳақида гапирдим.

— Эҳ, отасига раҳмат, — деб юборди Эшболта ака, кекса бошланғич синф муаллимаси. — Болажонлар жуда қийналиб юрганди-да.

Тагин бир бошланғич синф муаллимаси — Нозима чинқириб ўрнидан туриб кетди.

— Дарсликлар?! Энди дарсликлар бўйича ўқитамизми?

— Э, чинқирма-е, — дея жеркди уни Боймурод ака. — Нима, ҳалиям ойнага қараб-қараб ўқитмоқчимисан?

Боплади. Мен Боймурод акага миннатдорона бош иргадим. У киши жилмайиб кўйди. Тўғриси, шу қиз менга ҳам сира ёқмайди. Балки илмий мудирга бунақа гап но-жоизидир. Лекин барибир кўнгилга буйруқ бериб бўлмайди-да!

Унинг семиз, дум-думалоқ бичимиға қарасам нафасим бўғилиб кетаверади.

Нозима бундан атиги икки йилча илгари шу мактабни аранг битириб кетган эди. Онаси тилли-жағли, шатта аёл. Бизда фаррош. У ёққа чопди, бу ёққа чопди, охири қизини аллақаердаги педколлежга ўқишга киритди. Сўнг яна зир-зир югуриб, гоҳ ҳокимиятга, гоҳ прокуратурага арз қила-қила Нозимани тагин қўлимизга эсон-омон топширди. Бошланғич синф муаллималигини беришга мажбур бўлдик. Мен бир гал онасига алам билан юзланиб: «Нозима фирт саводсиз-ку? Болаларнинг уволига қоласиз-а?!» дедим.

Фаррош аёл пинагини ҳам бузмади: «Яхши-да, қайта ўқиб олади, ўргилай...»

Хуллас ўша катта танаффус пайти тадбиркорнинг ҳадаси тузуккина мухокама килинди. Факатгина домла Хуррамович гап-сўзларга аралашмай, тиришган башараси баттар тиришиб, Нажот Файбуллани синчков-синчков кузатиб ўтиради. Ўқитувчиларнинг кўписи дарсликларга ёлчиб қолганимиздан қувониб, номаълум саховатиешами астойдил алқашди.

— Курумсоқкина бойвачча экан-да, — деди кимё муаллимимиз Салимахон мухокамага якун ясаркан. — Пулгинасини қўлимизга бериб қўйса, ўзимиз олардикда, шу китоб-питобни.

Салимахон кўйинчак, талабчан муаллима-ю, лекин «кимё» деганда қўпинча соч-тирноқ бўяшни тушуниши чатоқ. (Аёл-да) Билими ҳам ёмон эмас. Пойтахтда ўқиган, қип-қизил диплом эгаси. Баъзи бир мақтанишларига қаранганди, амалиётни «Гўзаллик салон»ларида ўтаган. Энг ёмони, иш юзасидан озгина койисак, Салимахон дарров маориф мудирига югуриб боради. Шу боис фаол, интилувчан муаллима сифатида раҳбариятда ҳам уни жуда яхши танишади.

Хуллас, ҳадя дарсликлар шу куниёқ ўқувчиларга имижимида тарқатилди. Сабоқлардан бўшанқилигига китоб ўйқлигини баҳона қилиб юрган болаларнинг пешаналари тиришиб кетди.

Бироқ китоб тўла машинани қўрганимиздаёқ ичимизга кириб олган ваҳима барibir бизни тарқ этмади. Ди-ректор ҳам, мен ҳам гўёки игна устида юрардик. Хаёлларимиз бесаранжом. Йўқ, беҳуда азият чеккан эканмиз. Ўша ҳафта туман марказидан келган тафтишчилар тўпи туйқус ўқувчилар қўлида пайдо бўлиб қолган дарсликларга эътибор ҳам бермади. Хавотирдан терлаб турган Қалқонов муаллим бекордан-бекор уч шиша арокка, уч коса шўрвага чиқимдор бўлди. Дарсликларнинг қайдан, қандай пайдо бўлгани эса жумбоқлигича қолаверди. Ди-ректорни билмадиму мен шу сиру синоат ҳакида тинимсиз ўйлардим. Икки-уч марта Нажот Файбуллани чеккага тортиб gox жиддий, gox ҳазил-хузил билан сўраб-суриштиришларим ҳам ҳеч наф бермади. Янги муаллим ўзига ярашиқли ҳамишаги табассумлар билан тағин ўша гапида туриб олди: «Вилоятдаги маҳсус фонддан келтирдим...»

Йўқ, дарсликлардан сўнг ҳам «максус фонд» машмашаси ҳали тугамаган экан!

Нажот Файбулла бир куни баҳайбат телевизор, алламбало видео ашқол-дашқоллар келтириди. Бунгача ҳам у жуғрофия кабинетини мисоли музей ясантирган, жиҳозлаган эди. Деворларда турли-туман ҳарита-ю кўргазмали плакатлар. Стол устида селитрага бўккан улкан тарвуздай глобус. Ҳар бир партада иккитадан семиз, рангли китоб. Китобни варакласангиз дунёнинг бу чеккасидан кириб нариги тарафидан чиқасиз. Хонанинг у ер-бу ерига улкан кема ва самолёт макети қўйилганки, гўё шу транспортларда саёҳатга чоғлангандек ҳис қиласиз ўзингизни.

Мана, шунча сехру жодуси етишмагандай Нажот Файбулла тағин ҳаммамизни ҳанг манг қолдириб телепаратуралар келтириди. У ғаройиботларини жуғрофия кабинетига жойлаштиаркан, ҳаяжону қувончдан энтикарди.

— Ҳаммаси болаларга! Ана энди дарс-дарсдай бўлади-да.

«Дарс-дарсдай бўларканми?! — ўйлардим мен гангиб. — Шу пайттacha унинг дарслари қанақа эди?».

Биз — мактаб раҳбарияти янги муаллим ишга келгандан бери унинг сабоқларини тез-тез кузатиб туардик. Бир гал ўзим расмий текширувчи сифатида синфхонага кириб орқа партага жойлашдим.

Ўқувчилар ўз ўринларида учишга шайланган қушлардек сергак ўтиришибди. Ҳамма Нажот Файбуллага хурмату эъзоз билан тикилган. Синфхонада пашша учса билинади.

— Тинч океани дунёдаги энг катта уммон.

Нажот Файбулла қўлидаги синф журнали-ю китобдафтарларини стол устига қўяр-қўймас дабдурустдан, томдан тараşa тушгандай дарс бошлаб юборди.

Одатда биз ўқитувчилар синфхонага киргач, ўн-ўн беш дақиқа фала-ғовур, пичир-пичирларни тинчтиши билан овора бўламиз. Сўнг синф журналини очиб узундан-узун йўқлама ичida хийла вақт йўқолиб кетамиз. Кейин ўтган сабоқ юзасидан сўрок-тергов бошланади. Тайин гапки, дарс тайёрламай келган ўқувчи унча-мунича партизандан баттар миқ этмай тураверади. Хуноб бўлиб уни койиб-жеркамиз. Икки-уч шунака қайсарлар билан олишувдан сўнг ўзимизнинг тинкамиз қуриб, асабларимиз

қақшайди. Буёғи танаффусга яқин. Шоша-пиша янги дарсни бошлаймиз. Ўқувчиларнинг беадоқ шивир-шивир, пичир-пичирига қориштириб конспект қилиб келганларимизни амал-такал билан айтиб берамиз.

— Тинч океани дунёдаги энг катта уммон!

Нажот Файбулланинг сокин, соҳир овози синфона бўйлаб сирли-сирли кезинади. Ҳаммаёқ тинч уммонига фарқ бўлгандай жим-жит. Янги муаллим ахён-ахён доскага зарур рақаму атамаларни ёзиб қўяди, гоҳ стол устидаги глобуснинг керакли нуқталарига ишора қиласди. Ўқувчилар аллақачон синфонадан «учиб» кетишган. Улар устозларига қўшилиб олис-олис оролларда, сув дунёсининг гаройиботлари ичидагай сайдар итиб юришибди.

Қўққис танаффусга қўнфироқ чалинди. Қўнфироқнинг беаёв чинқириги ҳамма-ҳаммани олис чўл посёлкасининг овлоқ қўйнига яна қайтариб келди. Шундагина мен ҳам ўқувчилар сафида эканимни пайқаб қолдим. Ҳатто қулоқларим остида хийла вақт палма дарахти шовуллаб турди, уммон сувининг шўр таъми томоқларимни куйдириб ўтгандай бўлди. Бунақа аччиқ таъм одатда ич-ичимдан ўксисб ӣифлаганим чоғ пайдо бўлади.

Наҳотки мен ўксидим? Нега?! Янги муаллимдай дарс беролмаслигимни англаб етдимми?

Текширувдан дилгир ва асабий кайфиятда чиқдим. Қалқонов муаллим дарров ҳузурига чорлади.

- Қалай?
- Ёмон.
- Нега?
- Ростданам дарс ўтаркан.

Қалқонов муаллим ерга қаради. Мен дераза ортида ястанган тип-тиник осмонга тикилдим.

— Хафа бўлма, — деб гап бошлади директор чуқур бир тин олгач. — Сизлар ҳам яхши муаллим. Баҳоли кудрат ўқитяпсизлар-ку?

— Бу бошқача-да.

— Нажотнинг шароити тузук шекилли. Кўриб турибиз, моддий жиҳатдан ҳам бақувват. Бунақа бўлгандан кейин факат дарсни ўйлайди-да. Ўз устида ишлайди. Сизлар ҳам...

Қалқонов муаллим гапини ичига ютиб яна ерга айбдорларча тикилди.

Мен томоқларимда тағин денгиз ўйранин туйдиму беихтиёр ташқарига отилдим.

Шундай килиб, Нажот Файбулланинг телеаппарату-
ралари яна бизни таҳлиқага ташлади. Гоҳ директор, гоҳ
мен янги муаллимни сўроққа тутдик.

— Қаердан олдингиз бунака қиммат нарсаларни?

Жавоб яна одатдагидай бўлди:

— Вилоят марказидан. Махсус фонд.

— Ўв-в... — Кўккис пайдо бўлган домла Хуррамо-
вич терговга аралашди. — Сен бола нега майнавозчилик
қиляпсан? Қанақа махсус фонд? — азбаройи жаҳлдан
Хуррамовичнинг сарик қопламали тишлари орасидан ту-
пук сачради. — Хат-пати борми бу матоҳларнинг?

Нажот Файбулла хотиржам кулди.

— Устозлар, кечирасизлару... лекин фирт дунё бе-
хабар экансизлар. У ерда хеч қанақа қоғозбозлик йўқ.
Шундай борасизу мактаб номидан ариза берасиз. Улар
дарров компютер орқали текширишади. Ростданам мак-
табимизга шу нарсалар берилмагани аниқланса, тамом.
Узр сўрашиб, икки соат ичида аризангизни ижобий ҳал
қилиб беришади. Керакли ҳужжатларни ўзлари тўғри-
лаб қўйишаверади. Улар ўқитувчиларнинг вақтини
ўғирлаб, сарсон қилиб қўйишни жиноят деб ҳисобла-
шади.

— Текширамиз ҳали, — деб тўнфиллади домла Хур-
рамович чиқиб кетаркан. — Эртак-чўпчагингни катта
холангта айт.

Қалқонов муаллим ботинолмайгина деди:

— У ёқларга боришдан аввал сал-пал маслаҳат қилинг-
да.

Нажот Файбулла бош чайқай-чайқай жилмайиб дарс-
га кетди.

Директор ва мен яна бир-биримизга таажжуб билан
тиклидик.

— Чинмикин-а?..

— Билмадим...

— Чинга ўхшайди, — Қалқонов муаллим кўпни
кўрган қарияларга хос мулоҳаза қила бошлади. — Ўз
пулига сотиб олиб келса дарров кўкрагига уради, мак-
таб учун ундоқ қилдим, мундоқ қилдим, деб дунёни
бошига кўтарарди. Йў-ўқ сотиб олмаган. Ё, ўғрилаб кел-
димикин-а? Йў-ўқ, мактаб учун жонини хатарга қўйиб
зарилми унга?! Норхол, шу боланинг гапи рост.

Нихоят, Нажот Файбулла бизни енгди. Аллақаерда
мактабларнинг хизматига ҳозиру нозир, ўқитувчиларни

сарсон қилишни жиноят деб биладиган маҳсус жамғарма борлигига ноилож ишондик.

Кунлардан бир кун янги муаллимнинг ишлари туман раҳбариятининг назарига тушди. Совхоздаги маънавий-маданий тадбирлар режаси билан танишиш учун келган ҳокимият вакили маънавий-маданий обьект сифатида мактабимизга ҳам бош суқиб ўтган эди. Биз анчагина шошиб қолдик. Лекин вакилга Нажот Файбулла ясантириб қўйган кабинетни мамнуният билан кўрсатдик. Текширувчи бу ерда хийла вақт ивирасиб қолиб кетди. Янги муаллим қай гўрлардан топиб келтирилган антиқа-антиқа жиҳозларни қизиқиб-қизиқиб томоша қилди. «Зўр дам олиш хонаси бўпти-да», — деб хулоса ясади охири бизни тарк этаркан.

Ҳокимият вакили келиб кетгач, уч-тўрт кун ўтиб директор икковимизни туман маориф идорасига чорлашди. Бу чорловнинг бир балоси борлигини пайқаган тажрибали педагог Қалқонов бетоблигини баҳона қилиб марказга бормади. Ноилож Боймурод ака билан кетдик.

Маориф мудири Эркабоев бетоқат кутиб турган экан.

— Бу нима гап, ҳамкаслар?! — дея айюҳаннос солди у стол муштлаб. — Нега мен билишим, шахсан бошида туришим керак бўлган ишларга ҳокимият вакили аралашиб юрибди?

Кундоши кийиб ўзи қуруқ қолган аёлдай куйиб-ёнаётган маориф мудирининг ёзғиришларидан алланеларни дир фира-шира англаб етгандай бўлдик.

Ҳокимият вакили ўша куниёқ ўзини ҳайратга солган жуғрофия кабинети хақида шахсан туман ҳокимига маълумот берибди. Албатта, маълумотда ушбу ҳайратланарли ишларда ўзини бош-кош ташкилотчи деб камтарлик билан кўрсатиб ўтган. Ҳоким эса маънавий-маданий тадбирлар юзасидан вилоят ҳокимиятига тайёрлаб ўтирган ҳисботига жонкуяр вакилнинг маълумотномасини ҳам қистириб юборибди. У ёқда маънавий-маданий тадбирлар, мактаб ишлари бўйича жонкуяр кадрга зор бўлиб туришган экан, шекилли, жуғрофия кабинети учун фидойилик кўрсатган вакилни дарҳол чақириб олишибди. Карабсизки, уч-тўрт кун аввал аллақандай тадбирлар режаси деб овлоқ посёлкада сарсон юрган вакил вилоят ҳокимиятида бир бошқарма бошлиғи!

— Соткинлар! Ичи қоралар! — деб хануз ох-воҳ чекарди Эркабоев. Охири у улокни олдирган чавандоз-

дай курсисига бехол суюниб қолди. Уф кетидан уфлар тортди. Бир оз ўзига келгач менга ўпка-гинали термилди.

— Ўртоқ Хушбокова, нега хисботларда манави янгилик ишлар хақида лом-мим демагансиз?

Мен ҳам, Боймурод ака ҳам худди никоҳ ўқилаётган-дек ерга тикилдик. Нажот Файбулланинг ибратли ишларини кўз-кўз қиласидиган хисбот тайёрламаганимизнинг сабаблари ўзимизга аён. Сирли муаллимга биз келган кунидан бери шубхаланиб қаардик. Унинг афт-ангорида, уст-бошида, иш фаолиятида алланечук бегоналик бор эди. Ана шу бегоналик бизни хуркитиб турарди. Биз Нажот Файбуллага ишонмасдик! Масалан, мен ҳаммаси туш, хозир уйғонаману барча машмашалар тугайди, ниҳоят, енгил тортаман, деб ўйлардим. Ҳатто Қалқонов муаллим ўзини бир-икки дўхтирга кўрсатиб келди. Йўқ, ҳаммаси жойида экан. Ҳеч қанақа савдоийлик аломатларини пайқашмабди. Лекин тан олиш керак, Нажот Файбулланинг ҳайратомуз иш фаолияти бутун дунёга жар согуллик эди. Биз директор билан келишиб, ҳис-ҳаяжонга берилмасликка, янги муаллимга нисбатан бир оз совуқкон бўлиб туришга қарор қилдик. Шу сабаб унинг кўрган кўзни, эшитган қулоқни қувонтирадиган иш фаолияти тўғрисида хисботда лом-мим демаган эдим.

Хуллас ўша куни маориф мудири таъзиrimизни берди. Судракланиб ташқари чиққанимизда хийла кеч бўлиб қолган эди. Кун совуқ. Гоҳ у, гоҳ бу йўловчи машинага илашиб амал-такал билан посёлкага етиб келдик. Анчагина йўлни яёв ҳам босдик. Коронфилик қуюқлашиб борарди. Мен кўрқанимдан Боймурод аканинг иссиқ қўлларидан ушлаб олганман. Хийла яёв юрганимизданми ё алланечук ҳаяжонданми, тобора исиб кетмоқда эдим.

Боймурод ака кутганимдек ҳамишаги гапини бошлади.

— Норхол, — деди у товуши титраб. — Юр, бу ерлардан бош олиб кетамиз. Сени бошимда кўтариб юраман. Биз баҳтли бўламиз. Мана, кўрасан...

Мен у кишини ҳамишагидек койдидим:

— Кўйинг, бунақа гапларни, Боймурод ака. Икковимиз ҳам оилали, бола-чақалимиз. Янгам бошингизда парвона, яна нима керак сизга? Кўйинг, мени қийнаманг. Бизларга ярашмайди бунақа гаплар. Ўқитувчи номимиз бор-а. Кўйинг.

— Қўймайман, — деб энтиқди Боймурод ака. — Нима, бола-чақали одамга севиш-севилиш мумкин эмасми? Ўқитувчининг юраги йўқми, муҳаббатга ҳаққи йўқми унинг! Норхол, қўрқма, маломатлардан чўчима, одамлар учун яшамаймиз-ку, ахир?! Икковимиз кетамиз, Норхол. Эринг барибир энди қайтмайди. Менинг... менинг болаларим дастёр бўлиб қолган. Оналарини ёлғизлатиб қўйишмас. Бир кун мени тушунишар...

Мен Боймурод аканинг иссиқ қўлларидан силтаниб чиқдим. Қоронғилик қўйнига чопиб кетдим. Алланарса денгиз шўридай томоқларимни куйдириб-куйдириб келарди.

Хурматли терговчи, сизни қизиқтирган ўша юмалок хат юзасидан ёзганларим шу. Алоҳида ҳеч нарса деёлмайман. Мени тушунасиз деган умиддаман. Янги муаллим билан боғлиқ машмашалар юзасидан эса истаганингизча ёзаман.

Хуллас, бизни чақириб адабимизни берган куннинг индинига Эркабоевнинг ўзи бир неча мулоғимлари билан етиб келди. Янги муаллим ясантирган хона унда ҳам чуқур таассурот қолдириди.

— Бу кабинетни кўз қорачиғидек асранглар, — деди у йиғилиш ўтказиб. — Раёнога комиссия келса намунали ўқув хонаси сифатида шуни қўрсатамиз.

Мен гап орасида Нажот Файбулланинг дарс услубини мақтаб, мудирни кузатувчиликка таклиф этдим. Бироқ ўша кунги алам-изтироби ҳануз тарқамаган Эркабоев қайнаб кетди.

— Қуруқ гап керак эмас, Хушбоқова. Ҳисоботда қўрсатинг, ҳисоботда. Ўқитувчингиз ўз дарс режалари асосида методикасини ишлаб чиқиб раёнога тақдим этсин. Албатта, бисмиллосиям, фотиҳасиям кадрлар тайёрлаш миллий дастуридан бўлсин. Хуллас, шу қофозларни тайёрламасдан мени ҳеч қанақа мўъжизага ишонтиролмайсиз. Тушунарлими, ўртоқ Хушбоқова?

Тушундим. Эркабоев жўнаб кетгач, мудирнинг талаб ва хоҳишини Нажот Файбуллага етказдим. Бир пайт янги муаллимнинг ранг-рўйи бўзариб тўрга тушган балиқдек типирчилаб қолди. Гулдираб-гулдираб тушуниришидан англадимки, ҳаммани ҳайратлантириб юрган бу сирли муаллим на ҳисобот ёзиши, на режа тузишни биларкан. Мен ниҳоят унинг камчилигини топганимдан қувониб кетдим.

— Кадрлар тайёрлаш миллий дастуридан хабардормисиз ўзи? — сўрадим қизиқсини.

Нажот Файбулла бўшашибина ерга қаради. Мен ачифимни аранг босиб яна ҳужумга ўтдим.

— Таълим бўйича чиққан кейинги икки қарор билан танишмисиз?

Нажот Файбулла гоҳ қизариб, гоҳ бўзариб бош чайқади: тамом бехабар.

— Ҳисобот ёзишни билмасангиз, — деб гапга аралашди Қалқонов муаллим меҳрибончилик билан, — ишинингиз кўринмайди болам. Анави ҳужжатларни ҳам ўрганиб чиқинг. Эсам бирон текширувчининг олдида уялтириб қўясиз.

Мен янги муаллимнинг қусурини топганимдан қанча қувонган бўлсан, унинг фавқулодда ростгўйлигидан шунча жигибийрон бўлдим: «Нега ҳаммасидан хабардорман деб қўя қолмади?! Ким текшириб ўтирибди унинг билар билмаслигини? Менми? Қалқоновми ё Эркабоевми? Умуман, шунақа долзарб ҳужжатни бекаму қўст ўрганиб, ҳузурланган кас борми? Нега ҳеч қайсимизга ўхшамайди Нажот Файбулла, ўлгур? Қанақа сирли муаллим бу?»

Йўқ, нихоят, Нажот Файбулланинг сири очилди. Бир ҳафтача аввал «Ўқитувчилар хона»сига домла Хуррамович ўқдек отилиб кирдию, ҳаммаси тамом бўлди.

— Ўқитувчиларни йиғинг! — деб ўшқирди у, гўё ҳаммасига мен айбордрай. — Анави муттаҳамнинг сирини фош қилдим, тез бўлинг. Унинг ўзиниям етаклаб келинг.

Сўнг ҳаммамизга маълум воқеалар бўлиб ўтди. Нажот Файбулла ичимиздаги бегона эди. Бегоналигича даф бўлди. Биз қутулдик... Билгандарим шу. Мен кўнглимдагини очик-ойдин ёздим. Чўчидиган жойим йўқ. Олишса шу ўқитувчилигимни олишар. Узр. Томоғимни денгиз шўридай бир нима куйдириб келяпти.

* * *

(*Мактаб директорининг ўринбосари
Б.Б.Боймуроднинг тушунтириши хати*)

Ёшим қирқдан ўтиб қолди. Беш болам, бир хотиним бор. Хотин касалманд: ошқозон ярасими-ей. Ҳар куни инқ-синқ. Болалар улғайган сайин қувониш ўрнига ҳавотирга тушяпман. Ҳаммасининг яхши еб-ичгиси, чирой-

ли кийингиси келади. Ҳали тузукроқ институтларда ўқитиш, уйли-жойли қилиш деган орзулар ҳам бор. Икки йилча аввал Устоз Қалқонов қўярда қўймай ўзига муовин қилиб олди. Рад этолмадим. Кекса одам, ишонч билан мўлтираб тургандан кейин... Ойлигимга арзимас чой чака, бир ташвишинга минг ташвиш қўшилди. Йўқ, мен ишдан нолимайман. Ўқитувчилик ҳам жону дилим. Юрагим, бутун ақлу фикримни бериб ишласам дейман. Лекин... ҳаммаёқда чигаллик.

Алгебра ўқитувчимиз — Хайрулла, жингалак соч, хушсурат, қувноққина йигит ишдан кетди. Жуда билимдон, хисоб-китоб илмини чуқур ўзлаштирган муаллим эди.

— Ака, — деди у бир кун уйимга келиб. — Бир қўшма корхона ишга чақиряпти. Кетсаммикан-а? Кўряпсиз иқтисод чатоқ. Рўзгоримиз катта.

— Қанча ойлик беришмоқчи улар?

Хайрулла ўзига ваъда қилинган маошни тилга олди. Зўр! Лекин мен дабдурустдан оқ йўл тилаёлмайман. Мактабни ҳам ўйлашим керак-да, директор ўринбосари номим бор.

— Устоз Қалқонов билан би-ир маслаҳат қилиш керак-да, — деб масъулиятдан ўзимни опқочдим.

Хайрулла чайналди. Афтидан унинг мактабдан кетгиси йўқ.

— Ака, тўғриси, муаллимчилик ёқади ўзимга, — деди у ўйланиб. — Раёно мудири билан гаплашиб қўрсақ-чи, балки қандайдир имкониятлар бордир. Балки, зарур кадр сифатида менинг ойликларимни ошириб қўйишар. Тинчгина шу ерда ишлайверардим.

Содда муаллимнинг хаёлларига кулибгина қўйдим. Ахир, ҳаммаёқда бир хил хўроз қичкирган, қанақа имконият? Шундай бўлса-да, эртаси куни Хайрулла иккимиз Эркабоевнинг қабулига кирдик.

Арзу ҳолимизни эшитиб мудирнинг фифони фалакка чиқди.

— Кетсанг кетавер! Қани унақа жойга мени ҳам чақиришсаю жўнаворсам. Ёғли жойдан қолма, боравер!

Эркабоевнинг кесатиқлардан Хайрулла икковимиз мулзам тортиб қолдик. Мудир яхна чойдан бир хўплаб тағин хужумга ўтди.

— Мактабда ҳар ким ишлаёлмайди, ука! Аввало ватан туйфуси керак, фидойилик зарур.

— Мен чет элга қочиб кетмоқчи эмасман, домла, — деди Хайрулла сал бош кўтариб.

Маориф мудири эътирозга эътибор бермай, ўз фикрини шеър билан якунлаган бўлди.

— Эмас осон бу майдон ичра турмак, шер панжасига панжа урмак. Ана, вассалом!

Ана, вассалом. Хайрулла ишдан кетди. Унинг «алгебра»си менга қолди.

— Боймуроджон, ўзинг бир амаллаб тур, — деб ялинди Қалқонов. — Худо меҳрибон, бирор математикни бериб қолар.

Кўндиндим. Умуман, дарс соатларининг қўплиги яхшию, бироқ имконият деганларининг хам чегараси бор-да. Кўрпага қараб оёқ узатиш керак. Алгебра — мураккаб фан. Айниқса сўнгти йилларда у баттар мураккаблашгандай. Алоҳида билим, тажриба талаб килади. Лекин ноилож, виждонга хилоф бир тарзда, устоз айтгандай амал-тақал қилишга киришдим.

Отам қурувчи уста эди. Кон тортдими, ишқилиб шу ҳунардан менга ҳам юқсан. Унча-мунча иморатларни пой-деворидан тортиб томигача қуриш қўлимдан келади. Тўғриси шу отамерос қасб тирикчиликка асқотиб турибди. Таътил пайти асбоб-ускуна орқалаб мардикорчиликка кетаман. Албатта, узоқ-узоқ жойларга. Тирикчиликкага айби йўқ дейишадиу, бироқ мен бу ҳунаримни сир сақлашга ҳаракат қиласман. Ўқувчиларим билмасин дейман. Ўзимни узоқ-узоқларга саёҳат қилиб, дам олиб келгандай кўрсатаман. Туман марказида бир-иккита уста йигитлар бор. Шерикмиз. Топишимиш ёмон эмас. Лекин ҳамиша кўнглім хира, хаёлларим паришон.

Ўтган кишининг адори эди. Ёғин йўғу бироқ, ҳаво совуқ. Кечки пайт қўй-қўзилар даштдан қайтди. Ҳисоблаб, текшириб кўрсам — бўғоз эчкимиз йўқ. Дарров ўша куни навбати бўйича чўпонлик қилган кишига учрашдим. У ҳам бош қашлаб тайинли жавоб айттолмади. Афтидан, эчки болалаб даштда қолиб кетган! Дарҳол Кенгсойга югурдим. Бормаган жойим, сўрамаган кишим қолмади. Лекин эчкидан ном-нишон йўқ. Охири, тун ярмига яқин таъбим тирриқ бўлганича уйта келдим. Ҳамишагидек электр узиб қўйилган. Бутун посёлка зим-зиё. Бола-чака ҳам ухлаб қолган. Тимрскиланиб шам ёқдим. Лекин ичимга минг бир чироқ ёқилса-да ёришмайди. «Бутун бошли эчкидан ажралдим-а?!» — деб ўйлайман юрак-бағрим

ўртаниб. Тунов куни меҳмонлардан қолган ярим шиша ароқни топиб ичдим. Газагига чакки яладим. Бир зум алам-изтиробларим босилиб, чарчоқларим тарқалгандай бўлди. Эртанги дарсларга тараддуд кўришим, конспект ёзишим керак эди. Ноилож, китоб-дафтарларимни хонтахта устига олдим. Бироқ на китоб варақлагим, на қофоз қоралагим келади. Кўнглімнинг ярмида манави китобдафтар, ярмида йўқолган эчки. Ақл-шууримнинг ярмида эртанги дарслар ташвиши, ярмида эса молу жон қайғуси. Эчкимисан эчки эди-я ўзиям, қай бир иили устачиликдан орттирган пулимга олгандим. Нуқул эгиз туғарди, омон бўлгур. Дод солиб йиғласам дейман.

Бир пайт дарвоза тақиллагандай бўлди. Бирдан ҳушёр тортдим. «Бирортаси эчкини топиб келдимикан?! Ё, пирам...»

Елкамга чопонимни елвагай ташлаб ташқарига отилдим.

Дарвоза ёнида Норхол турган экан. Эгнида апилтапил кийилган халат, дуррачаси сирғалиб бўйнига тушган.

— Ака, — деди у хик-хик йиғлаб. — Ёрдам беринг, қизим ўлиб қолади, иситмаси баланд.

Ховлиққанимча яна ичкари отилдим. Яхшиям хотин касалманд, яхшиям унинг дори-дармон қутичаси бор. Ишқилиб ичидан бирон-ярим таблетка топса бўлади. Кўни-қўшнилар ҳам шунга ўрганиб қолишган, вақт-бевакт у-бу малҳам сўраб чиқиб туришади.

Ўзимча зарур деб ўйлаган дориларни олдиму тағин ташқарига отилдим.

— Юр, Норхол, қўрқма. Ҳаммаси яхши бўлади.

Норхолнинг уйи бизникidan анча узокда. Посёлканинг нариги чеккасида деса ҳам бўлаверади. Аслини суриштирганда, бу чала ҳовли Норхолнинг эрининг бир узоқ қариндошига тегишли. Узоқ қариндош ҳовлини бутлашга кучи етмай, ижарага топшириб кўя қолган. Норхолнинг эри эса икки йилдан бери бедарак. Иш излаб Россия томонларга кетганича қайтмади. Аёл икки нафар гўдаги билан қолиб кетди. Хайрият, тўнғичи бу йил биринчи синфга чиқди. Ҳар холда онасининг кўз олдида бўлади. Қизчаси эндигина икки ёшдан ошди. Норхол уни гоҳ онасига, гоҳ синглисига ташлаб мактабга чопади. Иш-да. Ҳар нечук шу ердан топгани ўзига ва болаларига етиб турибди. У она тили ва адабиётдан дарс

беради. Бир йилча аввал Норхолни илмий мудирликка кўттардик. Чунки бунақа ишга хуснихати чиройли, имло-да қусури йўқ, сариштали, хушмуомала кадр керак. Анча ёш бўлишига қарамай, жамоамиз бир овоздан шу аёлни маъқул топишди.

Ўша тунда Норхолда ҳеч бир илмий мудиралик нуқси йўқ эди. Теваракка телбавор-телбавор аланглаб, пик-пик, шўрқ-шўрқ йиғлаганича қокила-сурила борар эди.

Нихоят, уникига етиб келдик. Икки хонали лойсувоқ уй. Ичкари муздек. Ўргадаги хонтахта устида бир бўлак шам тириша-буриша ёниб турибди. Унинг лип-лип ёруни хона ичини фира-шира ёритади. Чаласувоқ девор бетига каттагина гилам осилган, бурчакда бир сандик. Сандин ёнида кийим жовон. Хона тўрига тўшалган ўринда икки боласи ётибди. Шарпамизни пайқаб қизча йиғлаганича ўрнидан турди. Чиндан-да иситмаси баланд.

Норхол икковимиз қизчанинг хархашасига қарамай дори ичирдик. Мен шиша тубида қолган ароқни ҳам олиб келган эдим. Шуни дарров гўдакнинг баданига суртиб ташладим. Сўнг кўрпачага ўраб ётқиздик.

— Нега печ ёқмагансан? — деб сўрадим ҳануз болалари билан андармон Норхолдан.

— Чалма соб бўлибди.

Мен яна ташқарига отилдим. Коронфиликда тимирскиланиб хас-чўп йиғишга киришдим. Кўча бошида тарвакайлаб ўсган дарахтнинг курук шохларидан синдириб-синдириб олдим. Шунга ҳам анчагина вакт кетди. Ҳуллас, бир амаллаб печ ёқдим. Аввалига тутаб-тутаб турган ўтин, охири гуриллаб ёнишга тушди.

Норхол гоҳ болаларига, гоҳ хонтахта устида сочиликан китоб-дафтарларига ҳорғин термилиб ўтиради.

— Иситмаси тушдими? — сўрадим ундан.

— Ҳа, — хира бир товушда жавоб берди Норхол. — Озгина терлади. Кечирасиз, Боймурод ака, сизни ҳам ташвишга қўйдим.

Теварагимга секин разм солдим. Худди менинг уйимдек шип-шийдам, тўзғиган хона, сочқин китоб-дафтарлар беихтиёр ўз дарду ташвишларимни яна миямга урди. Ич-ичимда тағин алам-изтироб кўзғалди. Айни чоғда кўнглимдаги алғов-далғовлар Норхолнинг ҳам юрак-бағрини ўртаб турганини чукур хис этдим.

Аёлнинг хушбичим юзида, маъюс кўзларида шамнинг

лип-лип шуълалари ўйнокларди. Беихтиёр уни қучиб эркалагим, овутгим келиб кетди.

— Норхол, — дедим оҳиста унинг қўлидан тутиб.— Куйинма. Бизга хам боққан баҳтли кунлар бордир, ахир.

Норхол беадоқ алам-изтироб билан кўзларимга тикилди. Ҳа, бу алам-изтироб менга жуда-жуда таниш эди. Нимадир томогимга тикилиб келди.

— Норхол, ўзимнинг жоним, — дедим уни оҳиста бағримга тортиб.

Аёл қўккис хўнграб кўксимга бошини қўйди.

Ўша тун тонгта яқин уйга қайтдим. Юрагимда бир ўт ёнар эди, бу муҳаббат ўти эканини сал кейинроқ англадим. Мен Норхолнинг ўзимницидек дард-гусса қалққан юз-кўзларини севиб қолдим. Ёш бир ерга бориб етганда ногоҳ бунака туйғуга дуч келиш... Аввалига уялдим, ўз-ўзимни койидим, сўқдим. Одоб-ахлоқнинг бутун авлиёлари номидан ўз-ўзимга насиҳатлар қилдим. Бироқ бари бефойда. Норхолнинг юз-кўзларидаги ўша таниш изтироб-қайфу мени ўзига оҳанграбодек тортар эди.

Хурматли терговчи, мени бир чеккага тортиб, аллақандай юмалоқ хат юзасидан сўраганларингизга жавобим шу. Сиз истагандай алоҳида тушунтириш хати ёзмайман. Тўғрироғи, ёзлумайман. Анови Нажот Файбулла ҳақида эса истаганингизча сўранг. Керагидан ортиқ қилиб ёзиб бераман.

Худди ўша телбавор хисларга қоришиб юрган кунларим Нажот Файбулла пайдо бўлди. Унинг пўрим устбоши, мағрур ва сипо юриш-туришлари аввалига менинг ҳам энсамни қотирди. Сўнг янги муаллимга ҳавас қила бошладим. Бу ҳавас, чукур ўйлаб қарасам, кейинчалик беаёв ҳасадга айланиб қолган экан. Нажот Файбулла икки-уч ҳафта ичидаёқ мактаб жамоасининг қалбига, руҳига кириб олди. Ўқитувчилар бир-биридан яшириб-яшириб, тортиниб-тортиниб беихтиёр унга тақлид қила бошлашиди. Ҳафталааб соқол қиришламайдиган баъзи бир муаллимлар кунора қиришлаб, соchlарини орасталаб, ҳатто енгил-елпи хушбўйлар сепиб келар бўлишди. Айрим ҳазилкаш, хушчақчақ ҳамкаслар виқор ва салобат илинжида қоп-қовоқ уйиб юришга тиришардилар. (Муаллима хотинларнинг пардоз-андозлари қуюқлашгандан-қуюқлашганини айтмай қўя қолди.) Бироқ буларнинг бари беҳуда эди, беҳуда! Минг тараниб-минг ясансак-да, минг ёўддайиб — минг чимрилсак-да, барибир бизда ни-

мадир етишмасди. Ҳатто бир гал Нажот Файбулла соқоллари ўsicк, одмигина, фижимтоб кийимда ишга келди. Ҳайҳотки шугина аҳволда ҳам у барчамиздан ўқтам, барчамиздан хушсурат кўринар эди. Ҳа, бизларда мактабга ярашиқиз аллақандай қусур борлигини тобора англаб борардим. Гўё суд курсисига тизилишган айборлардек «Ўқитувчилар хона»сида паришон ўтирган ҳамкасларимга қараб кўпинча ўша қусурларини излаб қоламан.

Ўқувчилар ҳам ўзгариб қолишгандек эди назаримда. Айниқса, Нажот Файбулла дарс ўтадиган синф болалари. Унча-мунча муаллимларни туртиб-суртиб кетадиган, ерга урсанг кўкка сапчидиган безори ўқувчилар ҳам Нажот Файбулла кўрингандан ипакдек майинлашиб одоб сақлашар эди.

Бир гал катта танаффус пайти биология муаллими Ҳасанов билан ҳовлида сухбатлашиб туардик. Нажот Файбулла ҳам ёнимизга келди.

— Кече телевизорда футболни томоша қилдингизми? — дея Ҳасанов янги муаллимни сухбат мавзусига тортди.

Нажот Файбулла бош ирғади:

— Ҳа, роса зўр ўйин бўлди.

Ҳасанов ўйинда ютқазган жамоанинг хайриҳоҳи экан. Асабийлашган кўйи бўшанг футболчиларни бирин-кетин сўкиб, танқид қила кетди. Шу орада тўққизинчи синфнинг безори ўқувчиларидан бири ёнгинамиздан ўтиб қолди.

— Эй, Жумаеп! — дея Ҳасанов муаллим ўқувчини тўхтатди. — Носвойингдан бир отим бер-чи! Миянинг қатиги чиқиб кетди.

Тиржайганча чўнтак ковлашга чоғланган ўқувчи ногоҳ орамизда турган Нажот Файбуллани пайқаб қолди-ю тек қотди. Сўнг жиддий қиёфада биология муаллимига юзланди:

— Кечирасиз, устоз. Мен унақа нарса чекмайман. Бошقا бирорвга ўхшатдингиз.

Ўқувчи минг бир хижолат билан биздан узоқлашди.

Нажот Файбулла бизга эл бўлолмади. Лекин у ўқувчилар тутгул ўқитувчиларнинг ҳам кўнглини топишга астойдил интилар эди. Ҳатто, бир гал муаллимларни ўзининг жуғрофия кабинетига йиғиб, дунё гаройиботларига оид кассеталарни қўйиб берди. Ҳужжатли фильмларнинг кўпи инглиз тилида экан. Янги муаллимнинг ўзи илҳом

билин шархлаб, тушунтириб турди. Икки соат мириқиб экранга тикилган жамоа, ниҳоят, Мексика сериалларидан-да ажойиб томошалар борлигига икрор бўлишди.

Февралнинг бошларида фанлар бўйича туман олимпиадаси бошланди. Сараланган ўқувчиларни марказга олиб боришим керак эди.

— Устоз, менинг машинамда борамиз, — деб қолди Нажот Файбулла.

Бу таклиф менга ҳам маъқул тушди. Қалқонов муаллим ташаббускор янги муаллимнинг дуои жонини қилиб чарчамади.

Эрталаб йўлга тушдик. Яп-янги «Нексия»нинг орқа ўринидигига ястанишган болаларнинг қувончига таъриф йўқ. Гёё билимларига билим, иқтидорларига иқтидор қўшилгандай. Ҳаво совуқ. Тун бўйи ёмғир аралаш ёғиб ўтган қор дала-даштда ола-қуроқ тўшалган. Машина по-сёлканинг ўйдим-чуқур йўлидан оҳиста елиб катта трас-сага чиқиб олди. Нажот Файбулланинг жағи-жағига тегмай, иқлим, тупрок ҳақида болаларга алланималарни астойдил тушунтириб бораради. Болалар ҳам завқ-шавқ билан кулоқ солишган. Бироқ менинг негадир кўнглим ғаш, тъబим тирриқ эди. Назаримда ўқувчилар мен ва Нажот Файбуллани зимдан-зимдан таққослаб баҳслашаётгандай: Нажот «Нексия» ҳайдаб боряпти, мен эса тиришибгина ўтирибман. Кундуз телпак, чарм камзул уники, бөғичи шалвираган қуён тери телпак, эскигина плаш менини, Нажотнинг болаларга айтар гапи жуда кўп, мен эса ҳатто дарсда керакли сўзни тополмай гангийман.

Туман марказига етиб келдик. Олимпиада ўтказила-диган мактаб ховлиси гавжум. Болалар, ота-оналар, ўқитувчилар. Машинадан тушиб бир чеккада уймалашиб турдик. Нажот Файбулла йўлнинг нариги бетидаги сомсапазни кўзлаб кетди. «Яхшилаб овқатланиб олишларинг керак, — деганди у йўлда болаларга, — эсам каллаларинг ишламай қолади». Янги муаллимни кута бошладик. Шу пайт пўрим кийинган йўғон бир киши ўтиб қолди. Ёnidаги қизи шекилли. Кўзимга жуда иссиқ кўринди. Тикилиб турганимни пайқади хойнаҳой, йўғон киши мен томон қаради. Қаради-ю жойида таққа тўхтади. Мен ҳам уни дарров танидим. Туманнинг донғи кетган бойла-ридан бири. Ёзда данғиллама уйининг томини ёпиб берган эдик. Гап орасида у менинг ўқитувчилигимни билиб

қолиб алоҳида хурмат-эъзоз кўрсатган. Ҳатто келишилган хизмат ҳақига анчагина қўшиб ҳам берган эди.

— Ҳа, домла, ўзларими, — деди йўғон кимса мен томон юриб. Семиз башараси тўла истехзо. — Какраз сиз керак эдингиз менга.

Шоша-пиша салом бериб қўл узатдим.

— Бу... томдан чакки ўтиб кетди-ку, уста домилла, — деди у истар-истамас қўришаркан. — Ҳақни ҳалоллаб олиш керак-да. Сизга ишонгандик.

Назаримда унинг товуши гулдираб бутун теваракка эшитиларди. Шу сабаб беихтиёр ўшқириб юбордим.

— Бақирманг, ака! Кар...

Гапим бўғзимда қолди. Таниш мижоз бир интилиб ёқамга чанг солди.

— Ия, жаҳлимиз ҳам борми ҳали?! Ўх, кўрнамак!

Йўғон кимса бир силтаб тортди-ю, муз қатрон ерга чўккалаб қолдим. Қуён тери телпак бошимдан учиб кетди.

— Мактабдаги болаларни алдайсан, менимас! — хануз ўшқиради эски мижоз. — Сендан бошқа уста мардикорларни ҳам кўрганмиз. Ҳеч бири нонкўрлик қилмаган! Тағин домилла эмиш бу...

Хайриятки, шу пайт Нажот Файбулла ўқдек учиб келди. Келди-ю йўғон кимсанинг нақ қаншаримга йўллаган турзидек муштини ҳавода тутиб қолди.

— Нима гап? Кўйворинг! — халоскор ҳамкасбимнинг товуши босиқ, бироқ алланечук амрона эди.

Эски мижоз орқага тисарила-тисарила Нажот Файбуллани бир қур кўздан кечириб чиқди.

— Кечирасиз, катта бува, — деди беўхшов илжайиб. — Озгина қизишиб кетдик. Манави нонкўр, асабимни бузди.

Эски мижоз Нажот Файбуллани аллақандай амалдор хаёл қилди, шекилли, узр кетидан узр сўраб биздан узоқлашди.

Мактаб майдонида йифилганлар ҳангуманг қараб туришарди. Уяту аламдан юзим мисдек қизиб, кўзларим хира тортиб кетди. Ўқувчиларимдан бири сал нарида ерпарчин бўлиб ётган телпагимни олиб узатди.

Ўша куни олимпиадани қандай ўтказиб, қандай уйга қайтганимизни эслайлмайман. Кун бўйи уяту алам алангасида алаҳсиб юрдим. Устига-устак, Нажот Файбулла жанжал ҳақида бир оғиз ҳам сўрамади, гўё ҳеч нарса

бўлмагандай, хамишагидек болалар билан завқ-шавқла сухбатини давом эттиарди. Мен уни буткул ёмон кўриб қолдим. Кўнглимдаги ҳавас аллақачон ҳасадга айланиб ултурган эди!

Хаёлларим алғов-далғов бўлиб кетди. Эски мижознинг истеҳзоли юзи, муаллақ қолган мушти мени кечаю кундуз таъкиб қилиб юрарди. Юрсам ҳам, турсам ҳам у ҳақида ўйлардим. Ўйлаганим сайин ўзимни ўша бойвачча олдида гуноҳкор санайман. Чин-да, иззат-икром кўрсатиб, қўйин-қўнжимни тўлдириб жўнатганди-ку?! Бир ойлик меҳнатимга берган ҳаки рўзғоримнинг бир йиллик каму кўстини бутлади-ку, бола-чака бир қур яйради-ку? Лекин астойдил ишлагандик. Нима жин тегди экан томга?

Шундай алғов-далғов хаёллар исканжасида уч кун ўтди. Пайшабадан жумага ўтар кечаси ёмғир ёға бошлиди. Жума куни эрталаб, ёмғир корга айлана бошлиган бир пайтда мен саккизинчи синфда эдим. Физика дарси. Синфхона хийла совук. Ўқувчилар устки кийимларига бурканиб, бесаранжом ўтиришибди: ўзаро пичирлашган, шарақлатиб китоб-дафтар варақлашган, алланималарни талашган... Айниқса, қай бир бурчакда ўтирган ўқувчининг қув-қув йўтали асабларимни баттар эговлади.

Бир амаллаб йўқлама килиб бўлгач, дераза тараф хомуш тикилиб ўтирган қизни чорладим:

— Болтаева, ўтган дарс қанақа мавзуни ўргангандик?

Киз норизо чимрилганича ўрнидан турди.

— Ньютоннинг биринчи қонуни.

— Ўтири. Искандарова! — шивир-шивири хеч ҳам тугамаётган, озфингина ўқувчини чорладим. — Доскага кел. Ўтган мавзу бўйича би-ир сўйлаб бер-чи.

Искандарова қунишибгина доска ёнига келди.

— Ньютоннинг биринчи қонуни — ҳар қандай жисм унга бошқа жисмлар таъсир килиб...

Мен дераза ортида чарх уриб ёғаётган қор учкунларига термилганча хаёлга чўмдим: «Анавининг томидан роса чакка ўтган бўлса керак...»

Бир пайт ҳушёр тортиб ўгирилсан, ўқувчи киз жишибгина ҳукмимни кутиб турибди. Қулокларимнинг шанғиллаб туришига қараганда тузук жавоб берганга ўхшайди.

— Яхши. Ўтири, Искандарова, — дедим хижолатланиб.

Сўнг синф журналига қараб, анчадан бери баҳоланмаган Хўжамов Нурматни чорладим. Аммо, бу ўқувчимнинг ҳам жавоблари қулоғимга кирмади, ҳисоб. Бетизгин хаёллар беихтиёр олиб қочарди: «...ҳақни ҳалоллаб олиш керак... тешиб чиқади...»

Охири, чидаёлмадим. Ўқувчиларга навбатдаги сабонини шоша-пиша тушунтирган бўлдиму мақсадга кўчдим.

— Болалар! — овозим алланечук титраб чиқди. — Илтимос, тўполон кўтармай, жимгина ўтириб туринглар. Зарил бир ишми бор, бормасам бўлмайди...

Шунда мен... шунда мен кўзимга ҳамдардлик билан термилиб турган йигирма жуфт бегубор содда кўзларни кўрдим!

Эскигина пальтога бурканиб ўтирган синфбоши Алишер ўрнидан турди.

— Устоз, — деди у суяклари бўртган, серқадоқ қўлларини кўксига қўйиб. — Сиз бемалол. Биз жимгина дарс килиб ўтирамиз. Ишонинг.

Томоғимга алланима тиқилиб ташқарига отилдим.

Аҳдим қатъий эди. Ўша чиқишида тўппа-тўғри уйга бордиму асбоб-ускунани орқалаб туман марказига кетдим. Эски мижознинг уйини топиш осон эди. Чошгоҳга яқин ёмғир-қорда ивиган кўйи данғиллама ҳовлига кириб бордим.

«Ҳаққимни ҳалоллагани келдим» — дедим ҳангуманг қотган ўша йўғон кимсага.

У хижолатланиб мени меҳмонхонага бошлаб кирди. «Э, домилла, аллақачон тузаттирганман уни, — деди, — бекор овора бўлибсиз-да».

Ўша куни азиз меҳмон бўлдим. Бойвачча кун пешиндан оққан бир пайт ўз машинасида мени мактабгача олиб келиб қўйди. «Домилла, шугинани олиб қўйинг, — деди йўл-йўлакай чўнтағимга пул тиқишириб. — Узр, озгина бўп қолди, биз ҳукумат эмас-да, кўп-кўп узатгани». Кувноқ хайрлашдик. Рухим енгил, димофим чоғэди. Дарслар тугаб қий-чув билан қайтаётган ўқувчилар орасидан синфбоши Алишерни топиб вазият ҳақида сўраб-суриштиридим. Ҳаммаси жойида. Асбоб-ускуна солинглан қопни ўғлимдан бериб юборгач, мактабга кирдим.

«Ўқитувчилар хонаси»да Қалқонов муаллим, Нор-

хол ва Нажот Файбулла ўтиришган экан. Норхол мен томон ташвишланиб кўз ташлади-ю, димоғим чоғлигини кўриб чехраси ёришиб кетди. Жилмайди.

Нажот Файбулла алланималар ҳақида куйиб-пишиб гапирав эди. Унинг эҳтиросли гап-сўзларидан англадимики, у Самарқанду Бухоро томонларга саёҳат уюштирмоқчи экан. Улов масаласи ҳал бўлар эмиш.

— Яна пул йигарканмиз-да? — деда ҳуркибгина сўради директор.

Нажот Файбулла енгил кулиб, елка учирди:

— Нега энди? Махсус фонд.

— Нажотжон, — беихтиёр зорланиб юборди Қалқонов муаллим. — Тинч кўяйлик шу ғамхўр фондни! Билдик, кўрдик, жуда меҳрибон, таълим-тарбияга жонкуяр экан! Илтимос, болам, оч қорнимиз, тинч қулогимиз. Шу Самарқандни худо хоҳласа, бир кун томоша қиласармиз.

Енгилгина кулишдик. Нажот Файбулла ўйчан тўнғиллади:

— Болаларга ваъда берганман-да.

Орадан бир ҳафта ўтиб хушхабар олдик. Физика бўйича олимпиадага борган ўқувчи биринчи ўринни олибди!

— Табриклайман, устоз, — деда ҳаяжон билан қўлимни қисди Нажот Файбулла. — Бу сизнинг меҳнатингиз! Кам бўлманг.

Қалқонов муаллимнинг ҳам қувончлари чексиз эди.

— Боймуродбой, насиб бўлса, райононинг навбатдаги фахрий ёслиги сизники! Қани, қарз бўлиб тураверингчи, кейинроқ юварсиз.

Мен... мен аввалига жуда қувондим. Шундай тиришқоқ, илмсевар, машакқатларга қарамай, ўз устида ишлайдиган ўқувчиларимиз борлигидан бошим осмонга етди. Сўнг туйкус кўнглим ғашланди: «Устозман деб керилишга ҳақим борми? Шу ўқувчининг камолига қанча ҳисса қўшганман ўзи? Синфхонага кириб-чикиб туриш, мавзуни бир амаллаб тушунтириш етарлимикан?..»

Ўша куни Нажот Файбулла қувончдан ял-ял ёниб, бикининдан нари кетмади. Унинг бирорвлар ютуғидан бунчалар ҳаяжонланиши жуда фалати туюлди менга. Гоҳ ажабланиб, гоҳ энсам қотди.

— Устоз, насиб бўлса, вилоят мусобақасига ҳам бирга борамиз, — деди у яна қўлимни қисиб.

Йўқ, Нажот Файбулла билан вилоятга бориш насиб этмаган экан. Кўп ўтмай, домла Хуррамовичнинг фидокорона меҳнати туфайли янги муаллимнинг сирлари фош бўлди. Ниҳоят, ундан қутилиб енгил тортдик!

Нажот Файбулла бизга бегона эди. Биз-чи?! Бу ёғини ўйласам, тўғриси тубсиз жар лабида тургандек хис қила-ман ўзимни. Бироқ айнан шу савол хаёлимда тегирмон тошидек бот-бот айланаверади. «Биз-чи?! Ишқилиб, биз мактабга бегона эмасми?..»

Ўз кўлим билан ёзганларим шу. Кўнглимдаги туйкус шаррос қувилиб кетганидан ўзим ҳам хайрону лолман. Мана, битикларимни яна бир карра ўқиб чиқдим. Бироқ кўнглимда на кўркув, на севинч, на афсус, на-да умид. Юрагим, хаёлларим алланечук бўм-бўш.

* * *

*(Домла Х.Хуррамовичнинг
тушунтириши хати)*

Олий тоифали ўқитувчиман. Тарих, ҳуқуқ каминанинг қўлида. «Тарих қўлингдами, демак келажак ҳам сеники», деган пурмаъно ҳикмат бор. Раҳмат, доноларнинг юксак ишончи учун, раҳмат. Халқ номидан, юрт номидан қўлимдан келганини қиласман.

Текширувчилар, қузатувчилар кўп келади мактабимизга. Ҳаммалари каминанинг камтарона фаолиятига юксак баҳо беришган. Тарих, ҳуқуқшунослик ўта мураккаб, ўта масъулиятли. Бу фанлардан сабоқ бериш учун нафақат билим, нафақат тажриба, балки талант ҳам кепрак экан. Минг шукрлар бўлсинки, бу хислатларнинг ҳеч биридан каминани қисмаган. Менинг ҳар бир дарсим — санъат. Мана, ўқувчиларим гувоҳ. Улар сабоқларимни парталарга қапишиб, нафас олмай тинглашади. Ўзим ҳам беихтиёр дарс дунёсига шўнгиб кетаман-да: гоҳ мисли Темур бобо, гоҳ ҳазрати Жорж Вашингтон бўлиб хайкираман. Зарбу зўримдан баъзан доска, баъзан стол-стул шикаст топган пайтлар ҳам талайгина. Менинг сабоқларим таъсиридан жуда кўп ўқувчилар ҳуқуқшунос, қонуншунос бўлмоқни орзу этишади. Бунга ҳам мисоллар кўп.

Мактабимизда пайдо бўлган Нажот Файбулла биргал жуғрофия кабинетида видеокассета қўйиб берди. Аллақайси мамлакатнинг маориф тизими ҳақида экан. Кў-

риб-эшитиб на куларимни, на йиғларимни билмай қолдим. Ўша мамлакатда болаларни ўн саккиз ёшигача қора меҳнатга жалб этиш жиноят экан. Мактаблари нақ жа-хонгирларнинг қасридай. Егулик, ичкилиқ мухайё. Ҳатто бемалол уйқуни урадиган хобхоналари бор, гўё у ерга ўқишгамас, дам олишга боришади бу арзандалар. Болаларни кўрдик. Ҳаммаси қофозга ўралган попук қанддек.

«Йўқ, — дедим ич-ичимда, — бунақа йўл-йўриқ бизга тўғри келмайди». Чин-да, унақа тайёрга айёр, инжик болалардан худо сақласин. Биз соғлом авлод учун курашяпмиз. Анавиларнига ўхшаш шарт-шароитларда болаларимиз мўрт, иродасиз, заиф бир тўдага айланиб қолади. Шунинг учун уларни гўдаклигиданоқ ҳаёт хўрликларида, қора-оқ меҳнатларда чиниқтириш зарур. (Бу борада пахта пайкалларимиз хўб кўл келади-да!) Оғир меҳнатдан, очлик-муҳтоҷликдан ҳали ҳеч ким ўлмаган. Мана, масалан биз. Шўро даврининг барча кўргиликлирини кўрдик. Бошимизда қилич ўйнаб туради-я?! Йўқ, ўсиб-улғайдик, ҳеч кимдан камимиз ўйқ. Муҳтоҷлик фаровонликнинг, меҳнат роҳатнинг қадрига этишга ўргатди. Машаққатлар ёшларни курашга чорлайди, иродали, интилувчан авлодга айлантиради. Мана, мисол учун кўп узоққа бормай, куни кеча олимпиада мусобақасида биринчи ўринни эгаллаган ўқувчини олайлик. Шугина ҳам пахта пайкалидан декабрнинг бошларида қайтди. Бутун бошли синф уч-тўрт дарсликни галма-гал ўқишиди. Усттига-устак посёлкада кечаси соат тўққиздан сўнг электр узиб қўйилади. Қадрдон шам, лампа чироқ ишга тушади. Шундай қийинчиликлар ҳалиги ғолиб ўқувчимизни букиб-енгиб қўймаган-ку?! У илм учун интилди, тиришиди. Натижа эса аъло. Мана, сизга соғлом авлод!

Менким, олий тоифали ўқитувчи, Тарих, хуқуқ ил-кида бўлган зот қатъий айтаманки, турмушимизда учраб турган айрим камчилик ва қийинчиликлар эрта-индин барҳам топади. Арзимас хато, арзимас машаққат деб дунёга айюҳаннос солиш марднинг иши эмас. Майда-чуйда қусурларга чалғимай кўзимизни каттароқ очайлик, хушёр ва огоҳ бўлайлик, бошимизда бошқа жиддий хавф-хатарлар айланмоқда. Мустақиллигимизнинг ҳар хил ёвлари теварагимизда изғиб қолган. Динни қалқон қилган ёт унсурлар ўз фояларига ёшларимизни эргаштириб кетишияти. Ана ўшаларнинг фоясига қарши фоя билан кура-

шиб, пешонасидан дарча очиб қўйишимиз керак. Юрагида ватан туйғуси бор ҳар бир фуқаронинг шарафли бурчи бу. Бунақа туйғу каминага ҳам ёт эмас, албатта. Дарсда ва дарсдан бўш вактларимда жамоат ишлари билан фаол шуғулланаман. Шу сабаб нафақат мактаб аҳли, балки маҳалла-кўйдагилар ҳам мен яқинлашган дам огоҳ ва ҳушёр бўлиб қолишади. Кўзларида душманга нисбатан нафрат ва газаб учқунлари порлайди, теваракка безовта-безовта аланглашади. Мен эса тинчлик-хотиржамлик учун камтарона улуш қўшаётганимдан қувонаман.

Шундай кунларнинг бирида Нажот Файбулла – янги муаллим пайдо бўлди. Кўриниб турибди – бирорта бойваччанинг инжик эркатойи. Тагида машина, саруоси қимматбаҳо, юз-кўзида бойваччаларга хос фурур, ўзига ишонч. Бунақа қиёфа мактабдек камтар-камсуқумлар масканига мутлақо ёт. Сирли ва хатарли нусха пайдо бўлганини юраккинам дарҳол сезди. Янги муаллим ҳақида зудлик билан совхозимиз хўжайини Чинор Тоштемировични огоҳлантиридим. «Эринмасангиз кузатаверинг уни», – деди хўжайин ижирганиб. Албатта, бунақа шубҳали нусхалар ҳақида эшитганда ул зот ижирганади-да. Хуллас, Чинор Тоштемировичдан фатво олиб, енг шимарив ишга киришдим. Нажот Файбулланинг ҳар босган қадамини қўздан қочирмай, ҳар айтган сўзини ҳижжалаб мулоҳаза қилдим. Аҳён-аҳён ўзини илмокли-сиртмоқли сухбатларга тортиб кўрдим. Йўқ, бу ҳам тулки экан. Осонликча ён берадиганларга ўхшамайди. Кузатиб, тусмоллаб билдимки бошқа муаллимлар ҳам Нажот Файбуллага бегонасираб-бегонасираб қарашяпти. Фурсатни бой бермай, дуч келган ҳамкасабани чеккага тортаман: «Хушёр бўлайлик... жипсликни қўлдан бермайлик, салғалати йигит экан-да, а?!»

Ҳамкасабалар хушёrlик билан хуркиб кетишади. Кўрқоқлар.

Аммо тан олиш керак, Нажот Файбулла болаларга жонкуяр, дарс ўтишга устаси фаранг экан. Ҳеч қайсизмизга ўхшамайди-я?! Менким, олий таълимли ўқитувчи ҳам янги муаллимга беихтиёр қойил бўлиб қолган кезларим ҳам топилади. Лекин дарҳол ўз муқаддас бурчими эслаб, хушёrlик калимасини бот-бот қайтардим.

Учинчи дарс қизғин бораётгандай пайт эди. Тўққизинчи синф билан шуғулланяпман. Зерикиб деразадан мундок қарасам, Нажот Файбулла ҳовлида. Кўлларини белига

тираб мактаб биносини синчков-синчков қўздан кечиряпти. «Бомбага жой мўлжаллашти-ёв» — лип этиб ўтди хаёлимдан. Бош оғрифини баҳона қилиб ташқарига чиқдим.

Нажот Файбулла таажжуб билан қўл соатига кўз ташлади:

- Ия, танаффус бўлдими, устоз?
- Йўғ-е, сал кўнглим айниятни, безовта бўлдим.
- Бирор ёмон нарса егандирсиз-да.
- Қайдам, — дедим илмоқли гап қилиб. — Уйда тишга босгулик нарса йўғ-у.

Нажот Файбулла жавоб бермай мактаб пештоқига тикилиб қолди. Мен ҳам зимдан ўша ёққа кўз ташладим.

— Устоз, — деди у пештоқдаги байроққа имо қилиб. — Байроқни алмаштириш керак, ҳилвираб қолибди.

Яна гапни илмоқ қилиб отдим:

— Э, хаёл жойидами, ука? Байроқ ҳадеб алмаштирилаверадиган нарсами?

— Ия, эскирса ҳам алмаштирмайсизми? — Нажот Файбулла юзимга таажжуб билан тикилди. — Топилмас матоҳ эмас-ку, ана, ҳаммаёқда сотилади. Арзимас пул туради ўзи.

Шу пайт танаффусга қўнфироқ чалинди. Ноилож синфхонага югардим. Нажот Файбулла сиртмокларимдан кутулиб қолди, аммо шу-шу эл қатори мендан ҳуркиб, ҳурматимни сақлаб юрадиган бўлди. Илк зарбаданоқ ёмон натижага эришмадим.

Нажот Файбуллага бу овлоқ чўл қўйнидаги овлоқ мактабда пишириб қўйибдими? Мақсади нима унинг? Шунчалар муаллимликни севаркан, ана, катта-катта шаҳарларда, чин бўлмаса, туман марказида мактаб қуридими? Қизиқ, нега айнан хилват жойни танлаган у? Дарвоқе, икки йилча пойтахтда ҳам ишлаган экан-ку, нега ишдан кетган, қувилганми, қочганми?

Шундай беадоқ шода-шода саволлардан бошим ғовлаб кетади. Тунлари уйқум қочиб юриб чиқаман. Ниҳоят, чукур-чукур мулоҳазалардан сўнг ўзимча жумбокларга ечим топгандай бўлдим.

Нажот Файбулла ашаддий напафуруш! Уни чақмоқдай қилиб қўйган бойлиги ҳам шунинг орқасидан. Қай бир кун телевизорда кўрсатишган эди. Россияда «кора дори» савдоси билан шуғулланадиган тўда қўлга олинибди. Энг даҳшати, улар заҳри қотилни болалар ора-

сида тарқатар экан. Аввалига татиб кўриш учун бепул, сўнг арzonроқ, охир-оқибат, чинакамига пуллашга тушишган. Бангиликка мубтало бўлган болалар зифирдеккина заҳри қотил сотиб олиш учун ота-оналарининг кимматбаҳо нарсаларини оғуфурушларга келтириб беришган, ўғриликлар қилишган.

Нажот Файбулламиз ҳам ўшандай ёвуз тўдадан бўлса ажабмас. Ўзини болапарвар, илмпарвар кўрсатиб, мактаб жамоасининг ишончини қозонишга астойдил бел боғлаган! Ҳатто, қай гўрданdir дарсликлар олиб келди, кеинроқ аллақандай телеаппаратуралар келтириди. Биламан, буларнинг барчаси ўз харажатидан. Ишонадики, бу арзимас сарф-харажатлари бир куни жарак-жарақ тилла танга бўлиб қайтади. Аллақандай маҳсус фонд ҳақидаги гаплари чўпчак. Ҳатто, унинг айнан шу уйдирмаси менда шубҳа уйғотди. Нажот Файбулла телеаппаратуралар келтирган куннинг индинига, «маҳсус фонд» ҳақида сўраб-сuriштиргани туман маориф бўлимига бордим.

Домла Эркабоев мени жуда илиқ кутиб олди. Хийла вақт у ёқ-бу ёқдан ҳангомалашиб ўтиридик. Сўнг секинаста мақсадга кўчдим.

— Домла, шу... вилоят марказида мактаблар учун аллақандай маҳсус фонд бор экан-а? Эшитишимча, муаллимларга жуда фамхўр эмиш. Нима камчилик, нима зарурат бўлса дарров ҳал қилиб берармиш...

Мен маориф мудирининг хохолаб кулиб юборишини кутиб турардим. Эркабоев дам қизариб, дам бўзариб жаҳл билан ўрнидан туриб кетди.

— Домла Хуррамович! Нима етмаяптими сизга, а, нима?! Энди вилоятга шикоят қилмоқчимисиз?! Олий тоифа дедингиз, бердик, икки-уч марта мукофот дедингиз, тўғриладик, икки марта Чортокқа йўлланма қилиб бердик! Мен сизни сира тушунмадим, домла. Нима керак тағин, жаноби олийлари, а, нима?!

Кутилмаган зарбадан эсанкираб қолдим. Ўзимни оқлаш учун, асл мақсадимни англатиш учун қилган уринишларим бехуда кетди, бехуда! Эркабоев гапирганим сайин тутокиб, оғзидан боди кириб, шоди чиқиб, мени кўз очиргани қўймади. Охири, бир амаллаб қочиб кутилдим.

Ана шунаقا! Лоқайдлик ва кўрқоқлик касридан «маҳсус фонд» сирини очолмай қолдим. Лекин руҳан тушганим йўқ. Арқонни узун ташлаб, кузатув-текширувларни

давом эттиридим. Дарс пайтлари ахён-ахён мактаб йўла-гига чиқиб, Нажот Файбулла шуғулланаётган синфхона-нинг тирқишидан мўралаб келаман. Очифи, янги муаллимнинг дарс ўтиш услугини кўриб, соҳир овозини эши-тиб, ҳузурланган кўйи беш-олти дақиқа эшик ёнида қолиб кетаман. Ҳатто бир гал мени шу ҳолда Қалқонов муаллим кўриб қолди. Бироқ ҳеч бир шубҳага бормай тағин кабинетига кириб кетди.

Айтидан у ўқитувчиларнинг Нажот Файбулла эшиги ёнида тез-тез пайдо бўлишига ўрганиб қолган эди.

Мен баъзи бир баҳоналар билан юқори синф ўқувчи-ларининг папкаларини текшириб чиқишга ҳам муваффақ бўлдим. Бироқ қотган нон ушоқларидан бўлак ҳеч қанақа шубҳали қуқун тополмай ҳафсалам пир бўлди. Ҳатто айрим ўқувчиларни алдаб-сулдаб гапга солиб кўрдим. Еса, чекса сархуш қиласидиган моддаларни татиб кўришга қизиқтирган-қизиқтиргмагани ҳақида усталик билан сўраб-сuriштиридим. Болалар аввалига ҳеч вақога тушунмай анграйиб туришди, сўнг кескин бош чайқашди.

«Ҳечқиси йўқ, — деб ўйладим мен бўшашибмай, — ҳали улгурмаган, ё болаларни кўрқитган».

Бир куни синфхона эшигининг тирқишидан кузатар-канман, Нажот Файбулла ўқувчиларга алланималарни-дир тарқатиб чиқаётганини илғаб қолдим! Муаллим ула-шаётган нарсаларни айрим ўқувчилар ажабсиниб, ай-римлари қувона-кувона олишарди. Бутун вужудимга се-винч ва хаяжон ўрмалади. «Ниҳоят...!»

Мен синфхонага қўқкис бостириб киришни мўлжал-ладиму бироқ дарҳол фикримдан қайтдим. Бунақа олам-шумул тафтишда раҳбарлардан бирор-ярим бўлиши ке-рак-да. Конун шунақа, ҳуқуқ шунақа!

Мен Қалқонов муаллим бақира-чакира дарс ўтаётган синфхона эшигини бориб тақиллатдим. Ҳаял ўтмай, ди-ректор пайдо бўлди.

— Чў, такой? — деди у норизо чимирилиб, ҳойнаҳой, рус тили дарснинг белига тепганимни уқтириб қўймокчи бўлди у. Мен шоша-пиша вазиятни тушунтиридим.

Директорнинг қийик кўзларига таҳлика оралади.

— Норхолниям чакирайлик, — деди у ботинмайгина.

Илмий мудира «Ўқитувчилар хонаси»да асабийлаш-ган кўйи Вазирлар маҳкамасининг якинда чиқкан Қаро-ри бўйича ўқув режаси тайёrlаб ўтирган экан. Вокеа ҳақида эшитиб ҳовлиққанича ўрнидан туриб кетди.

— Қани, кўрайлик-чи.

Узун-қисқа Нажот Файбулланинг жуғрофия кабинетига яқинлашдик. Аввал мен, сўнг раҳбарлар эшик тиркишидан ичкари мўралади.

Янги муаллим сокин, ширали бир товушда, жуғрофий бир мавзу ҳақида гапирмоқда. Ўқувчилар эса алланималарнидир хузур билан чайнаб, дарс тинглашяпти.

— Чин, бир гап бор-ов, — деб шивирлади директор, — болаларнинг оғзи тўла.

Норхол қатъий имо қилди:

— Кирамиз.

Туйқус синфхонага бостириб кирдик.

Янги муаллимнинг уни ўчиб, бизга ҳанг манг тикилиб қолди. Ўқувчилар чала чайнаган нарсаларини шопашпиша ютиб юборишиди.

Вазиятни дархол қўлга олдим.

— Болаларнинг оғзида нима бор?! Билсак бўладими?

Нажот Файбулла қимтиниб-қимтиниб сас берди:

— Банан.

— Банан?! Нима у? — сўради Қалқонов парталар оралаб юраркан.

— Тропик мева, — деб илжайди Нажот Файбулла. — Бугунги дарсимиз тропик мамлакатлар ҳақида, устоз. Болалар мавзуни чукурроқ хис қилсин, деб банан улашиб чиққандим. Бу ҳам бир тажриба-да.

— Кўрсак бўладими? — деб сўрадим мен, сир бой бермай.

Нажот Файбулла дераза токчасидаги қофоз қутига интилди.

— Марҳамат. Роппа-роса уч дона қолган. Сизларнинг насибангиз, устозлар.

— Кечирасиз, ҳамкасаба, — дея ўнғайсизликни ҳайдаган бўлди Норхол. — Ҳамма синфларни текшириб юрибмиз. Юқоридан шундай буйруқ келди.

Синфхонадан чиқарканман, чув туширган бўлсам-да ўзимни мардона тутдим. Раҳбарлар муқаррар берадиган танбеҳларга ҳаёлан жавоб ҳозирладим. Йўқ, хуштаъм мева жонимга оро кирди.

— Раҳмат сизга, домла Хуррамович, — деди Қалқонов муаллим хузурланиб банан чайнаркан. — Тез-тез кузатувда давом этинг. Япон сакесидан ҳам куруқ қолмайлик тағин.

Норхол пиқиллаб кулиб юборди.

Майли масхара қилса қилаверишсин, мен барибир бўш келмайман. Аллақандай кўнгилсизлик, англашилмовчилик олдида чекинаверсак, юрт тинчлик-хотиржамлиги, болалар ҳимояси учун ким курашади, ким?!

Кузатув-текширувларда яна давом этдим. Аммо Нажот Файбулла хам илоннинг ёғини ялаганлардан экан. Ҳеч тутқич бермади. Қайтанга обрёси ошиб, жустрофия кабинетининг шов-шуви юқори идораларгача бориб етди. Такдирнинг бундай аччиқ ҳазилига ортиқ чидаб бўлмас эди. Чора-тадбирлар кетидан чора-тадбирлар излаб то-пишдан чарчамадим. Қани энди қурғур заҳри қотилнинг кукунидан уч-тўрт чимдим топиб келсангу анавининг чўнтағига солиб қўйсанг, дарров қўлига киshan кийгизсанг?! Хайрли ишнинг эртароқ битгани яхши-да!

Тунларнинг бирида бедор уйғониб ётар эканман, илохий бир сас қулогимга эштилгандаи бўлди: «Хужжатларини текшир, хужжатларини...» Худди шу сас тонгга қадар калламда, юрагимда акс-садо бериб турди.

Эртаси куниёқ Қалқонов муаллимни бир чеккага тортдим. Гапни дунёнинг нотинчлигидан бошлаб Россияда кўлга олинган нашафурушлар тўдаси ҳақида айтдим. Қарангки, рус тили муалими бўлса-да, жаноб директор Россиядаги воқеалардан бехабар экан.

— Янги муаллимдан шубҳам бор, — дедим, ниҳоят, мақсадга ўтиб. — Ўшанақа гуруҳлардан бўлса ажабмас.

— Яхшигина ишлаб юрибди-ю, — деб тўнгиллади директор истамайгина.

- Кўза кунда эмас, кунида синади, домилла.
- Нима қилишим керак, ахир?
- Хужжатларини текшириш зарур.
- Синчилаб қараганман, ҳаммаси бинойидеккина.
- Э, махсус текширув керак, масалан, дипломи ҳақиқийми? Ростданам ўқиганми ё сотиб олганми?

Қалқонов муаллимнинг энсаси қотиб тўнгиллади:

— Домла Хуррамович, кимга зарил ортиқча ташвиш. Ана, зўр ишлаб юрибди-ку?!

- Сиз, хушёрликни бой беряпсиз. Бирор кор-ҳол бўлса бошингиз кетади-я?!

Катор ижтимоий-сиёсий кўрсатмаларни пеш қилиб дадил-дадил талаб қилганимдан сўнг, ниҳоят, Қалқонов кўнди. Нажот Файбулланинг хужжатларини бир ҳафталик муддат билан қўлимга топширадиган бўлди.

— Домла Хуррамович, сизга ишондик, — деб зорланди директор. — Мени сарсон қилмай, ўзингиз текширираверинг. Қари одамман...

Албатта-да. Кексаларимиз хурмат-иззатда бўлиши кепрак. Бу ёғини ўзимиз тўғрилаймиз.

Нажот Файбулланинг ҳужжатлари солинган сарғиши папка қўлга теккач, гўё унинг ўзи чангалимга тушган-дек бошгинам мағурур кўтарилиди. Кучимга куч, ақлимга акл қўшилди. Ичимда бир сас текширувни дипломдан бошлаш кераклигини тинмай уқтиради. Охири қалбимга қулоқ солдим. Бироқ мен ҳужжатни маҳсус идоралар орқали текшириши ниятидан воз кечдим. Бирламчидан, улар жуда банд, фурсат топиб сўровнома, талабнома килгунларича хийла вақт ўтади. Иккинчидан, янги муаллимнинг дипломидан қусур топилмаса шов-шув кўтарилиб, шарманда бўламан. Керак бўлса, асоссиз даъволовар билан масъул кишиларни чалғитиб, вақтини ўғирлаганим учун бошимда ёнғоқ чақишиади.

Мен пойтахтга ўзим бориб келишга қарор қилдим. Атиги беш-олти соатлик йўл. Шу баҳона ҳаво алмаштириб, у ёқ-бу ёқни томоша килиб келаман. Жўнадим.

Вой-бўй! Ана шахару мана шахар! Ана пойтахту мана пойтахт! Кўчаларда одам қайнайди. Кенг, текис йўлларда машиналар қатор-қатор, чинқириб елишади. Бозору дўёнолар, идора-ю маҳаллалар бир-биридан серҳашам, гўзал. Йишқилиб, пойтахти азим камина кўрмагандан бери жуда ўзгариб, серфайз, жозибадор бўлиб кетибди.

Мен ўтирган автобус кун пешиндан оққан бир пайтда етиб келди. Сон-саноқсиз киракашларнинг ҳай-ҳайлашига қарамай тушасолиб ўзимни метрога урдим. Нажот Файбулланинг дипломида кўрсатилган институтнинг қаерда жойлашганини яхши биламан. Қийналмай топишга кўзим етади. Чин бўлмаса, бирор-яримдан сўраб суришираман. Қолган юмушлар осон. Институт раҳбариятига кирамиз. Керакли маълумотларни текшириб оламан. Мабодо, баҳтга қарши, ҳаммаси жойида бўлса, гулдир-гуп. Қайтиб бораману директорга ҳужжатни қайтиб бераман. «Ҳозирча текширувчининг имкони йўқ экан», деб баҳона қиласман қўяман. Қолганини вақт кўрсатади.

Шундай таскинбахш хаёллар оғушида, одамлар издиҳомига аралашиб метро йўлагига кирган пайтим ким-

дир елкамга нукиди. Карасам, юз-кўзлари хушёрлик, салобат балқиб турган милиционер!

— Ака, ҳужжатларингизни бир қўриб қўяйлик, — деди у эҳтиром кўрсатиб.

— Хўп, командир, хўп.

Чўнгтагимдан паспортимни чиқариб узатдим.

Милиционер ҳужжатимни очиб қўриб:

— Ортимдан юринг-чи, — деди. Ҳайрону лол ахволда посбонга эргашдим. Стол-стуллар қўйилган, электр чироғидан чароғон бир ҳужрага кирдик. Ичкарида яна бир милиционер алланималарнидир ёзиб-чизиб ўтирибди.

— Мана, яна бигтаси!

Мен бошлаб борган посбон қўлидаги паспортимни шеригининг олдига ташлади.

Кўп ўтмай икки милиционер бири қўйиб бири олиб сўроққа тута кетди. Сўрок-тергов жону дилим бўлса-да, айни чоғ посбонларга малолланиб-малолланиб жавоб бердим.

— Каердан келдингиз?

— 41-посёлкадан.

— Нима иш қиласиз?

— Ўқитувчиман.

— Нима мақсадда келдингиз пойтахтга?

— Зарил бир иш. Вазирликка маслаҳатга чақирган!

— Вазирликка?! Маслаҳатга! Шикоят билан келганиман, деб тўғрисини айтиб қўя қолсангиз-чи. Ҳозир ҳеч ким осонликча пойтахтга оёқ босмайди. Ё бирорвонинг дастидан дод солиб келади, ё ўладиган касал, дўхтурга кўрсатиш керак.

— Мен тўғрисини айтдим.

— Яхши... А, пойтахтда пропискасиз юриш мумкин эмаслигини биласизми?

— Билмайман. Чет эллик эмасман-ку, мумкиндир-е?

— Чет вилоятдансиз-ку?! Хуллас, гап бундай, биз сизни уч кунлик хибсда тутамиз. Яшаш жойингизга сўровнома жўнатамиз. Жавоб келгунча панжара ичida ўтириб турасиз. Мабодо ҳаммаси яхши бўлса, сизни шахардан чиқариб юборамиз. Кетаверасиз юртингизга.

Карасам, посбонларнинг юз-кўзида ҳеч бир ҳазилхузул аломати йўқ. Бири дарров қофоз-қалам олиб аллақандай ҳужжат тўлдиришга киришди.

Беихтиёр қўлига ёпишдим.

— Укалар, ҳозироқ қайтиб кетаман! Илтимос, қофоз-погоз тўлдириб ўтиранглар.

— Қаршилик қилинмасин ўртоқ! — ёнимда тик турган милиционер қўлларимни силтаб ташлади. — Органга қаршилик қўлмоқчимисиз?

Шу пайт эшикдан тағин бир қоп-қора милиционер кириб келди. Унга кўзим тушди-ю қувончдан ирғишлаб туриб кетдим.

— Абрай?! Ўзингмисан, ука?

Ха, бу чиндан ҳам Қобил тракторчининг ўели Абрай! Ўзимнинг шогирдларимдан. Мактабни амал-тақал битиргач, прокурор бўлиш орзусида пойтахтга бош олиб кетган эди. Мана учрашдик. Бошланиши чаккимас — резина таёғи ярашиб турибди, димоги ҳам баланд.

— Ха, домилла, — деб кўришди Абрай мен билан. — Нима қилиб юрибсиз бу ёқларда.

Узок ҳол-аҳвол сўрашгач, шогирдимга вазиятни тушунтиридим, аммо сир бой бермай, унга ҳам вазирликка келганимни айтдим.

Абрай норизо чимирилиб турган шерикларидан паспортимни олиб қўлимга тутқазаркан:

— Буларниям хизматчилик-да, домилла, — деди. — Совуқни совуқ, иссиқни иссиқ демай қўриқчилик қилишади. Иш оғир, масъулиятли. Сиздай тушунган, жонкуяр бирор-ярим фуқаролар қўярда-қўймай уч-тўрт танга тамаки пули ташлаб кетишади, меҳнатимизни қадрлашади-да. Баъзи бирорлар эса...

— Албатта, албатта, — деб ўз ихтиёrim билан чўнтак ковлашга тушдим. — Биз баъзи бирорлардан эмас, ука. Тинчлик-осойишталик учун қилинган хизмат тақдирланниши керак.

Абрай ва унинг шериклари мен узатган чойчақани олишдан қатъий бош тортишди. Бир амаллаб кўндиридим.

Собиқ шогирд билан қуюқ хайрлашдик. У мени метро поездигача кузатиб қўйди.

Ишимнинг бу ёғи осон ва силлиқ кечди. Нажот Файбулланинг дипломида қўрсатилган институтни қийналмай топдим. Ҳойнахой фаришта-ю малойикалар мени етаклаб юришган экан. Институтнинг ўкув ишлари бўйича проректори мени илиқ кутиб олди.

Максадимни тушунтиридим:

— ...шуйтиб, дипломни би-ир текшириб келинг, деб

мени бу ёкка жўнатиши. Ўзингизга маълум, замон қалтис, дунё нотинч.

Сочу қош-кипприклиари оппок проректор мен узатган дипломни қўлига олар-олмас бош чайқади:

— Бунингиз қалбаки, ясама, домла. Юз фоиз ишонч билан айта оламан, қалбаки диплом. Бунақасини илгари ҳам кўрганмиз.

Кувончу ҳаяжонда қулоқларим шанғиллаб, томоқларим қуруқшаб қолди.

— Йўғ-е... наҳотки... — дея оламан зўрға.

Проректор ёрдамчи ходимини чақириб, каминанинг илтимосига кўра, Нажот Файбуллага тегишли дипломнинг қалбаки, ясама эканлиги тўғрисида ёзма маълумот тайёрлашни тайинлади.

Бир соатлар чамаси вақт ичида иш битди! Чўнтағимда маълумотнома! Ҳовлиққанимдан пул бетига бормай киракаш ёллаб вокзалга ошиқдим. Хайрият, биз томонга юрар поезд ҳали кетиб улгурмаган экан. Шартта вагонларнинг бирига чиқиб олдим.

Поезд вилоят марказига эртаси куни чошгоҳ маҳали етиб келди. Хуллас тўппа-тўғри мактаб ҳовлисига кириб келганимда катта танаффусга атиги ўн дақиқача вақт қолган экан.

Шижаат билан «Ўқитувчилар хонаси»га кирдим. Хона тўридаги иш столида аллақандай ҳисботлар билан овора Норхол Хушбоқова менга ҳангуманг тикилиб қолди.

— Тезда ўқитувчиларни йиғинг! — дедим тантана билан. — Анави Нажот Файбулланинг сири очилди! Фирт муттаҳам экан.

Мен ҳаяжону қувонч ичида Норхолнинг, нелар сўраганини, нелар деб жавоб берганимни эслай олмайман. Фақат бир оздан сўнг катта хатога йўл қўйганимни англаб етдим. Мен биратўла орган ходимларини бошлаб келиб, анави муттаҳамнинг қўлига киshan урдиришим керак эди. Ана шу ҳовлиқмалигимнинг оқибатидан Нажот Файбуллани қочириб қўйдик. У сири фош бўлганини сезди-ю, ими-жимида «Нексия»сига ўтириб жўнаб кетди. Шу-шу мактабимиздан унинг қораси учди. Эртаси куниёқ бўлиб ўтган воқеалар юзасидан тегишли идораларга ёзма маълумот бердим. Нажот Файбулла устидан жиноий иш қўзғашларини талаб қилдим. Ҳақиқат бор, истак ва талаблар инобатга олиниди. Мактабимизга икки марта терговчи келиб-кетди. Охирги ташрифида «тушун-

тириш хати» ёзишимиизни буюриб кетган эканлар. Мана, бажону дил битиб қўйдик. Озгина нокамтарлик қилган ўринларимиз бўлса, узр. Мен ўз бурчимни ўтадим, холос. Бир қаллобликни фош қилганимдан, катта фалокатларнинг олдини олиб қолганимдан мамнунман, албатта. Тўғри, ҳамкасабалар орасида бирор-ярим менга ғижиниб, ўқрайиб қараётганлари ҳам учрайди. Бунинг ҳаммаси кўролмаслик, ичиқоралик оқибати. Шундай шарафли вазифани ёлғиз уддалаганим, машаққатларидан чўчимаганим ёқмаяпти уларга. Бирор бошим баланд, кўқрагим тоб, гайрли нигоҳларни назар-писанд қилмайман. Чунки мен ўз ишмдан фахрланаман. Чунки мен тарих, ҳукуқ дарслари, машойихлар таъкидлаганидек, келажак дарслари қўлида бўлган олий тоифали ўқитувчиман.

* * *

(Бошлиғич синф ўқитувчиси Эшболта аканинг тушиунириши хати)

Мен бир кекса ўқитувчиман. Тавба, нимани ҳам тушиуниришим мумкин? Ҳаммаси тушдагидек, ё, ширин бир хаёлдагидек. Нажот Файбулла деган янги муаллим мактабимизда пайдо бўлди. Тушпа-тузук йигит, одоб-ахлоқи ҳам жойида. Сал кейинроқ ўқитувчиликни ҳам қоийилмақом дўндиришини кўрдик. Масалан, мен унинг қаллоблигидан сира хабарим йўқ. Хув, бир гал дарсликлар топиб келтирганда роса хурсанд бўлганман. Кўп ҳамкасабалар шу йигитнинг дуои жонини қилганимиз. У ташкил этган жустрофия кабинетини айтмайсизми? Маориф мудири Эркабоев мактабимизга ташриф буорганида янги муаллим ясантирган хонани кўриб оғзи очилиб қолган. «Эҳтиёт қилинглар, бизга жуда зарур бунақа кабинетлар», — деди. Шунинг учун ҳам мактаб директори жустрофия кабинетига калладай кулф остирди. Жустрофия дарслари бошқа синфхоналарда ўтиладиган бўлди. Нажот Файбулла маҳсус жиҳозлаган хонани ундан тортиб олиб қўйганига бир оз таажжубланди, холос.

«Мехнатингизни юксак қадрляпмиз», дея уни овунтирган бўлди Қалқонов муаллим. Янги муаллим бошқа синфхоналарда ҳам бинойигина дарс ўта бошлади.

Эртаси куни, домла Хуррамович тарихий тўнтириш ясаган ўша кун директорнинг хонасида Қалқонов муаллим ва Норхол сұхбатлашиб ўтиришган экан.

— Эшболта ака, бу ёкқа киринг, — деб чакириб қолди илмий мудира менга кўзи тушиб.

Кирдик. Ўтирик.

— Домилла, — деб гап бошлиди Қалқонов муаллим. — Озгина маслаҳатингиз керак. Нажот Файбуллага беш-олти соат биология дарси берсак, нима дейсиз? Шу баҳона биология кабинетини ҳам ясатиб олардик-да!

Норхол ҳам директорни қўллаб-куватлади.

— Кўриб турибсиз, раҳбарларнинг кабинетларга эътибори кучли.

Уларнинг фикри менга ҳам ёқди. Оқ фотиха бердим.

Афсус, режалар барбод бўлди. Катта танаффус пайти Норхол ранги кути ўчганча ўқитувчиларни шошилинч мажлисга йиғиб юрган экан. Мен андак кечикиб кирдим.

«Ўқитувчилар хонаси» ҳамкасабалар билан лиқ тўла. Кимдир ўтирган, кимдир тик турган кўйи ҳангуманг қотиб қолган. Дераза ёнида Нажот Файбулла бўшашибигина турибди. Ўртада домла Хуррамович, мағрур, тантанавор қиёфада, бир қўлини белига тираб, бир қўлини гоҳ-гоҳо ҳавода қиличдек сермаяпти.

— Қани, тушунтириб беринг-чи бизга, нега қалбаки диплом билан юрибсиз? Ҳукуматни, соддагина жамоамизни лақиллатишга ким ҳуқук берди сизга, ким?! Асл ниятингизни айтинг. Қанака жиноий гуруҳ билан ҳамкорсиз. Мақсад нима, мақсад?!

Домла Хуррамовичнинг қаҳрли ҳайқириғидан мактабнинг бетон деворлари ҳам зириллаб кетди. Йиғилганларнинг дами ичида. Хона ўртаси томон юраркан Нажот Файбулла чуқур-чуқур тин олди.

— Ҳа, менинг дипломим қалбаки, — дея гап бошлиди у ўйчан қиёфада. — Мен бу ҳақда ҳеч кимга айтольмасдим. Аввалии иш жойимда виждоним қийналиб сиримни директорга очиб қўйгандим. Балки мени тушунар, деган хаёлда эдим. Йўқ, айюҳаннос солиб ишдан қувиб юборишиди. Лекин, мен... лекин мен мактабсиз туролмайман, болаларсиз яшай олмайман. Биламан, ишонмайсиз, аммо ҳакиқат шундай. Болалар кулгисининг жарангидан завқ оламан, уларнинг кўзлари, сўзлари беғубор. Илмдан болаларгина ҳайратланишади. Мурғак онгига, ўй-хаёлига кириб келган озгина янгилик ҳам жажжиларни чинакамига қувонтиради, чинакамига ҳаяжонлантиради. Уларнинг севинчига севинч, ҳайрати-

га хайрат қўшишдан-да ортиқ қандай баҳт бор? Болаларнинг беғубор қалбидаги янгидан-янги дунё очувчи, кўнглига илм сехрини солувчи инсон — бу муаллимдир. Шу сабаб бу қутлуғ касб менинг эс-хушимни ўғрилаган. Шу сабаб ўқитувчилар сафига интилдим. Афсуски, ҳеч омадим юришмади. Уч-тўрт карра пединститут остонасидан қайтдим. Бошқа соҳа бўйича ўқишига мажбур бўлдим. Лекин барибир муаллимликнинг сехрли дунёси мени чорлайверди, охири, қалбаки дипломга куним қолди. Азиз устозлар — Нажот Файбулла қўлини кўксига қўйиб ҳанг мотиб турган ҳамкасабаларга юзланди, унинг кўзларида жиққа-жиққа ёш айланар эди. — Азиз муаллимлар! Қисқагина фурсат бўлсада сизлар билан ёнма-ён ишлаганимдан, сизлар билан бир ҳаводан нафас олганимдан хурсандман. Сизлардан кўп нарсаларни ўргандим. Ирода, сабр-тоқат нелигини шу ерда билдим. Муаллим ҳаёти батамом жасорат, фидойилик экан! Шунча ташвишу таҳликага қўйганим учун ҳаммаларингиздан узр сўрайман.

Нажот Файбулла хона бурчагидаги илгакдан чарм камзулини, қундуз телпагини олиб кийди-да, эшик томон югуруди.

— Насиб бўлса мен ҳали қайтаман, — деди у бўсағада тўхтаб, юз-кўзига синик бир табассум ёйилди. — Хужжатларимни тўғрилаб яна сафингизга қайтаман. Мени кутинг, азиз биродарлар!

Нажот Файбулла шаҳд билан чиқиб кетди. «Ўқитувчилар хонаси»га оғир жимлик чўқди. Домла Хуррамович ҳануз ўртада керилиб турар, алланеларнидир зўр бериб режалаштираси.

— Об-бо, — дея пешонасига шапатилади у бир пайт. — Туллакни қочириб қўйдинг-ку?! Ҳаммамизни авраб кетди-я!! Мен ҳам бақадек қотиб колибман!

Хона тўридаги стулида буқчайибгина ўтирган Қалқонов муаллим ҳам зўрға тилга кирди.

— Қочиб гўрга борармиди, домилла Хуррамович. Қани, унинг ҳужжатларини бу ёққа беринг.

Бир пайт домилла Хуррамович типирчилаб қолди. Дераза токчаларига, стол устига жонсарак-жонсарак аланглади.

— Ия, қани унинг ҳужжатлари?! Ҳозиргина стол устида турганди-ку?! Ким кўрди сариқ жилдли папкани?

Ўқитувчилар орасига ғала-ғовур, безовталик оралади.

— Нажот Файбулла олиб чиқиб кетди-ку! — овоз берди қай бир муаллим. — Рост, кўрдим. Ўзининг папкасидир деб ўйлабман.

Домла Хуррамович гоҳ манглайига, гоҳ сонларига шапатилаб ҳануз хона бўйлаб чарх уради.

— Ах, туллак! Ҳужжатларини опқочиб кетибди-ку?! Энди нима қиласиз-а? Қочиб қутилиб кетди-я! Из қолдирмай кетди-я!

— Домла, — дея уни жеркиб ташлади Норхол. — Ўзингизни босинг. Ана, қўлингизда дипломи қолибди-ку, намунча чирқиллайсиз?

Чиндан-да Нажот Файбулланинг сохта дипломи домла Хуррамовичнинг қўлида. Домла бир зум айюҳаниндан тийилиб, ўзича алланималарни чамалади-да, қалбаки ҳужжатни шоша-пиша чўнтағига солиб қўйди. Теварагига сирли бир кўз ташлаб тиржайди.

— Бўлари бўлди, бўёғи қўчди, — деб яна тилга кирди Қалқонов муаллим. — Шармандамиз чиқди. Энди у ер-бу ерда гапириб юрманглар бу воқеаларни. Бирор-ярим қизиқсиниб сўраса, янги муаллимга иш ёқмади, бошқа соҳага ўтиб кетди, деб қўяверинглар.

Ҳеч кимсадан садо чиқмади. Навбатчи шоша-пиша дарсга қўнғироқ chalди-ю ўқитувчилар бирин-кетин тарқашди.

Аммо домилла Хуррамович чидаёлмай барибир органга хабар берган экан. Мана шу баҳона тушунтириш хати ҳам ёздиқ. Бор гап шу. Ҳаммаси тушдагидек, ҳаммаси хаёлдек...

* * *

— Қалай, Дело билан танишиб чиқдингизми? — деб сўради терговчи шоша-пиша хонага киаркан.

— Ҳа, фирт қаллоб экан-ку, бу Нажот Файбулла деганлари.

— Э, нимасини гапирасиз, ҳаммани боплаб лақиллатган. Давлат ҳужжатини қалбакилаштиргани учун унга жиноят иши қўзғадик. Ким билади, тағин қанча ҳунари бор, аста-секин очилаверади-да. Менимча ҳам у бирор бир жиной тўда одами, беҳуда бу ерларга санғиб келмаган.

— Ҳали ўзи топилмадими?

— Ҳозирча йўқ. Анави муаллимларнинг лақмалиги-дан фойдаланиб, хужжатларини ҳам гум қилган. Жуда айёр экан, қойил. Оғзаки маълумотлар бўйича излаб юрибмиз хозирча. Кошиб қаерга ҳам борарди, барибир топамиз.

— Балки унинг паспорти ҳам қалбакидир? Балки Нажот Файбулла умуман бу ернинг одами эмасдир?

Терговчининг кўзига хавотир оралади.

— Йўғ-е, нафасингизни иссиқроқ қилинг-е, у ҳолда иш тоза чигаллашади.

* * *

Пойтахтга қайтдим. Бутун шууримни ғалати бир кайфият чулғаб олган эди.

«Нажот Файбулла қайтади, — деб ўйлардим нафасимни иссиқроқ қилиб. — Хужжатларини тўғрилаб, албатта қайтади. Ахир, у болаларсиз, болалар шундай муаллимсиз яшаёлмайди!..»

Мен автобус ўриндифига ястаниб, ҳорғин қўз юмдим.

ҚИДИРУВДАГИ ҚИЗ

Бўйдоқларга хос турмуш тарзи уфуриб турган тўзгин хона. Хона деворларига катта-кичик, ранг-баранг фотосуратлар илиб ташланган. Бурчакдаги стол устида ҳам сураткашлик анжомлари сочилиб ётибди. Стол биқинидаги стул суянчигига (апил-тапил ечинилган, шекилли) устки кийимлар тўзгин ташлаб қўйилган. Уй тўридаги дераза ёнидаги каравотда оқ чойшабга бурканиб, бўйдоқларга хос хаёл билан ёстиқ қучганича Малик ётибди. Ҳойнахой, уйғоқ — чойшаб тагида бел-биқинлари, сон-оёклари қимиirlab-қимиirlab турибди.

Туйкус эшик кўнгироги жиринглади. Малик сергак тортди: «Катиқчи-патиқчи, шекилли». У йўлакма-йўлак, уйма-уй юриб сут, қатиқ сотадиган семиз, қоп-қора аёлни ногоҳ, эслади.

Бир гал фалати бўлган. Ўша хотин сут-қатиқ тўла идишларини кўтарганча, юқори қаватга аранг ўрлаб борар эди. Кўчада бадантарбия қилиб қайтаётган, майкачан, калта шортик кийган Малик уни зимдан кузата бошлади. Аёлнинг қалқиб бораётган кенг-дўнг орқалари беихтиёр йигит хаёlinи олиб қочди. Қизиқиши-ей, орзиқиши-ей, ишқилиб, шундай бир ажиб туйфу бутун вужудини қамраб олди унинг.

— Эй, кеннойи!

Катиқчи оғир бурилиб, пастки қават майдончасида турган, сапча юз, яrim-яланғоч қоматлари чайир йигитга каради.

— Ҳа-а.

Малик сирли илжайган кўйи икки-уч хатлаб унга етиб олди.

— Кечирасиз, сут-қатиғингиз... ҳаммаси неча пул бўлади?

— Шу... — қатиқчи хануз хансираб тураркан идишларга бир-бир кўз ташлаб чамасидаги нархни айтди.

— Яхши. Ҳаммасини сотиб оламан. Бўпти, сут-қатиғингиз ҳам ёнингизга қолади.

Аёл ҳануз сирли илжайган кўйи савдолашаётган йигитнинг юзига ажабланиб тикилди.

— Нима истайсиз ўзи, ука?

— Бўйдоқ йигитлар нимани истаса шуни-да.

Катиқфуруш хотин йигитни бош-оёқ синчков кўздан кечирди-да, алланечук қувлик билан илжайди, сўнг бутун йўлакни тўлдириб хохолади.

— Об-бо-о, укагинам-е, жа шўхсиз-ку, а?

Малик зил-замбил идишларни кўтариб аранг ҳужрасига киргунча кафтлари қийилиб, пай-мускуллари узилиб кеттудек бўлди.

— Вой-бу-уй, — дея хона ичига аланглади аёл, Маликнинг ортидан бамайлихотир кириб келаркан. — Сураткашмисиз дейман-а?

— Ҳа, — зўрга сас берди йигит, оғир идишларни бир чеккага қўйиб.

Катиқфуруш аёл йўлакда солланганича туриб қолди.

— Қани, укагинам, аввал келишилган пулни чўзинг.

Малик унга саросима билан кўз ташлади. Оғир юк азобиданми, ё қатиқчининг безбетларча туришиданми, ишқилиб, ҳалигина товонидан тепасигача чулғаган ёлқин сўнибгина қолган эди. «Бикқилигини қара-я, — ўйлади у енгил ижирғаниб. — Қайгўрданам илакишдим... Оббо, энди қайтиш йўқ, бир амалларман».

— Нега бўшашиб қолдингиз, йигит? — сирли кўз кисди аёл.

— Қани, марҳамат, — дея сас берди Малик, зўраки илжайиб. — Ичкари киринг-чи, ўша гапим гап, айтганингизни бераман.

— Йў-ў, аввал беринг, шер йигит.

Малик ноилож ичкари кирди-ю кийим жавонида титкиланба бошлади.

— Тезроқ қимирланг-да, ўргилай, — дея минфирилаб кўйди аёл, йигит томон мўраларкан. — Тор жойда нафасим қайтади.

Малик ҳануз зўраки илжайган кўйи қайтиб чиқди. Катиқфуруш унинг қўлидаги пулни деярли юлқиб оларкан, ҳафсала билан санади. Сўнг кўйлаги ёқасидан аллақайгадир тикиб юборди.

— Кўнглингиз жойига тушдими? — Малик қувноқлик билан аёлни бағрига тортган бўлди.

— Қочинг-е, — силтаб ташлади уни аёл, гўштдор

қош-қобоқлари уюлиб.— Тезроқ идишларни бўшатиб беринг. Бўғилиб кетяпман бу каталакда.

Малик ҳангуманг қотди.

— Ахир... менга сут-қатиғингиз керакмас, ахир, бошқача келишган эдик-ку?

— Қани, — деди аёл бепарво ичкарига интиларкан. — Ошхонага бошланг-чи, ўзим бўшатиб оламан.

Қатиқфурушнинг хатти-ҳаракати шу қадар қатъий ва жиддий эдики, саросима ичидаги Малик ортиқ қаршилик қилолмай қолди.

Кўп ўтмай ошхонадаги бор-йўғ идиш-товоқдан тортиб, турли ичимликлардан бўшаган елим «бакалашка»-ларгача сут-қатиққа тўлиб кетди. Қатиқфуруш филдек ҳайбатли бўлса-да, кийикдек чаққон экан. Бир зум ичидаги бўшаган идишларини ювиб-чайиб олишга ҳам улгурди. Ҳатто, ҳужранинг у ёқ-бу ёғини саришталаган ҳам бўлди. Аҳён-аҳён кенг-дўнг думбаларини атай билқиллатиб, уй эгасига маккорона илжайиб қўяр эди. Унинг goҳ, у, goҳ бу ёнида типирчилааб турган Малик аёлнинг тағин билагидан тутишга ботиномади.

— Яхши қолинг, — дея ҳиринглади хотин, ҳужрани тарк этаркан. — Тағин сут-қатиқ тусаб қолсангиз, бемалол, хизматга тайёрмиз.

Малик тобора узоклашиб бораётган қадам товушларини, бир-бирига урилаётган бўм-бўш идишларнинг тақир-туқурини хийла вақт эшитиб турди. Сўнг сут-қатиққа лиммо-лим идиш-товоқларга термилди. Бир кўнгли ҳамма-ҳаммасини деразадан пастга тўкиб юбормоқчи ҳам бўлди. Бироқ пулига ичи ачидими, ё, кўпиргина турган оппоқ сут, оппоқ аёл баданини эслатдими, ишқилиб, ботиномади. Ботинмагани яхши бўлган экан — уч-тўрт кун бошқа егуликка чиқимдор бўлмай, сут-қатиққа бўкли. Шунчалар бўклини, шу-шу кўчакўйда сут-қатиққа кўзи тушса, кўнгли айнийдиган бўлди. Қатиқфуруш аёллардан-ку филга йўлиққандай хуркиб қочишини одат қилди.

Эшик кўнфироғи тағин устма-уст жириングлади. Малик каравотини ғижирлатганича ўрнидан турди-ю апил-тапил шимини кийди, кўйлагини эгнига ташлади.

— Хозир.

Эшик ортида гулдор галстук таққан, пўримгина костюм-шимли, қуюқ соchlари ораста таралган, хушбичим, хушсурат бир йигит туарар эди.

— Санъаткор сураткашга саломлар бердик, — деди у эшикни таажжуб билан қия очган Маликка. Алланечук амалдорларга хос салобат қалқан юз-кўзларида нимтабассум ўйноқлади.

— Ўў-ў, — Малик ҳам эшикни, ҳам қучоғини кенг очди, — Нусратбек, чандаст чиновник! Азиз дўстим!

Улар бир-бирларини бағриларига босиб, кўришишди. Сўнг ҳиринглаганча бир-бирларини турткилашган бўлди.

— Қани, бисмилло, — деди Нусратбек илтифотларни кутмай ичкари киаркан.

— Узр, чиновник, ҳаммаёқ ивирсиб кетган, бўйдоқчилик курсин.

Нусратбек дўстининг гапларига бепарво, аланглага-нича девордаги суратларни бир-бир томоша қилишга тушиб кетди.

— Суратга олишни ҳам қийворасан-да, а, Мак, — деб кўйди у қойил қолганнамо бош чайқаб.

Улар ҳар хил фотоанжомлар сочилиб ётган стол ёнидаги стулларни нари-вери суриб, ўтиришди. Ўзларича юзларига енгилгина фотиха тортган бўлишди. Бир-бирларига термилиб илжайдилар.

— Хуш келибсиз, жаноб Нусратбек, қанақа шамоллар учирди?

— Шамолмас, бўрон, соғинч бўрони.

— Ў-ў, шоирона гап қилдинг-ку, сал пастга туш, амалдорлик ҳам етади сенга.

— Рост, жўра, соғиндим. Нега бизникига бормай қолдинг? Дадам ҳам кўп сўрайдилар.

— Кўриб турибсан-ку, — деди Малик сураткашлик анжомларига енгилгина имо қилиб. — Иш кўп, вақт тифиз. Аммо икки-уч марта ишхонангта борганиман. Қайтўргадир йўқолган экансан, тополмадим сени.

Нусратбек айбдорона елка учирив кўйди.

— Балки... У ёқ-бу ёққа иш билан чиққандирман.

Малик дўсти кириб келгандан бери уч-тўрт марта кўйл соатига ўғринча қараб олганини пайқади. «Вақти зик, зарил иш бор, шекилли, эсам келармиди» — лип этиб ўтди унинг хаёлидан.

— Мак, сени тўйга айтгани келдим, — дея мақсадга кўчди Нусратбек, тарин анча пайт лақиллашгандан сўнг. — Лекин таклифнома қозозим йўқ.

— Тўйга?!

— Ҳа, тўйга, уйланаяпман, — деди Нусратбек алланечук ўйчан.

Маликни саросима босди. Ахир, бу Нусратбекнинг иккинчи бор уйланиши-ку?! Дўстининг олдинги хотини — Феруза бир йил аввал аллақандай дард туфайли туйкус ўлиб қолганидан ҳам хабардор. Ҳўш, тўй хабарига жавобан энди нима десин? Дўстини қутласинми, ё...

— Э, шунақами, — дея минғирлади Малик ияқ қашлаб. — Тузук, тузук...

— Тўйга курсдошлардан яна Карим билан Баҳодирни айтдим. Уччовлашиб ўтказиб берасизлар. Тушунасан-ку, Мак, ортиқча шов-шув бўлмасин деб, ўртоқлардан бошқа ҳеч кимга хабар бермадим, ўзинг тушунасан-ку...

— Тушундим, Нус, тушундим, — дея қизғин бош иргади Малик. — Даbdабага ҳожат йўқ.

Ҳа, Малик дўстининг паришон чайналишини ўзича тушунган эди: «Ферузасини унуголмаяпти... Балки бу гал ота-онасининг қийин-қистови билан уйланётгандир...»

Малик Нусратбекни ортиқ сўрок-саволга тутишга қисинди. Кейинчалик, ҳамма-ҳаммасини бафуржга гаплашиб олишни дилига тугиб қўйди.

— Тўй қачон, Нус? — деб сўради у оҳиста.

— Индин. Кеч соат олтида. Хув, «Нур» ресторанини биласан-ку, ўша ерда ўтказамиз.

— «Нур» ресторанида?

— Ҳа, — деди Нусратбек тағин паришон, алланечук безовта хаёлларга чулғанар экан. — Даbdабали, тўғрими? Нима қилай, келин тараф шуни хоҳлади. Энди... уларники ҳам орзу-ҳавас-да, ўзинг тушунасан... Менга қўйиб берса-ку...

Нусратбек оғир сўлиш олиб бош чайқаб қўйди.

* * *

Тағин бир оз ўтиргач, Нусратбек чиқиб кетди. Бироқ унинг маъюс, ўйчан қиёфаси Маликнинг кўз ўнгидага туриб қолди.

Улар бир пайтлар жуда яқин, сирдош дўст эди. Бир майизни тенг бўлиб ейишмаган бўлса-да, ҳар нечук талабаликнинг тотли ва тахир дамларини бирга баҳам кўришган. Ўша кезлар кўпчилик уларни бир маҳаллада туғилиб-ўсган қариндошлар деб, ўйлашарди. Аслида Нус-

ратбек шахри азимнинг Оқтепа маҳалласидан, Малик эса Сирдарё бўйидаги Қоратепа қишлоғидан эди.

Қоратепалик йигирма яшар йигитча техника университетига кириш имтиҳонларини топшириб, натижасини илҳақ кутиб юрган кезлар эди. Кун иссиқ. Йигитча юрагидаги орзулар олови ундан-да иссиқ. Бу олов, айниқса, у ён-бу ён ўтиб-қайтаётган қизларни кўрганда баттар аланга олади.

Хуллас, шундай ҳароратли қунлардан бирида, университет биқинидаги хиёбонда қоратепалик абитуриент жўшқин хаёллар суриб ўтирас эди. Туйкус унинг ёнидан сарвқомат, қош-кўзлари попукдеккина бир қиз та-манно билан ўтиб қолди. Қизнинг енг-ёқасиз, калтагина кўйлаги баъзи бир нозик жойларини аранг-аранг яшириб турар эди. Малик унинг оппоқ, силлиқ сонларига суқланиб тикиларкан, бутун борлигини лаззатли бир ҳаяжон чулғади. Қулт-қулт ютинди. Сўнг ўз завқ-шавқини баҳам кўрмоқقا шерик излагандек беихтиёр ёнверига кўз ташлади. Ажабки, андак нарида тағин бир йигитча қизни анграйганча кузатар эди. У ҳам туйкус Малик томонга ўгирилди. Эҳтирос, завқ-шавққа тўла кўзлар бир лаҳзагина тўқнашиб икковлари ҳам баб-бара-вар жилмайишди. Баб-бара-вар лаб қимтиб, баб-бара-вар бош чайқашди. Сўнг баб-бара-вар ўринларидан туриб бир-бирига яқинлашдилар.

- Зўр-а!
- Зўр!

Икковлоннинг ilk салом-алиги, такаллуфлари ана шу биргина сўз қатига жо бўлди. Қиз кўздан йўқолиб, эҳтирослар андак босилгач, танишдилар.

- Малик,
- Нусратбек.

Ажабки, Нусратбек ҳам Маликни илҳақ қилиб турган ўша факультетта абитуриент экан! У ҳам имтиҳон натижаларини билиш илинжида куймаланиб юрган экан.

Ўша куни уларнинг ичу ташидан завқу шавқ, қувончу ҳаяжон аримади. Ахир, имтиҳон жавобларига кўра иккиси ҳам университет талабасига айланган эди-да! Ҳойнаҳой, хиёбонда ёнларидан шунчаки гўзал хилқат эмас, омад фариштаси табассум қилиб ўтган экан.

Малик ва Нусратбек, юлдузлари тўғри келган қаллиелардек, ilk учрашувдаёқ фикри зикрлари бир-бирига

мос-монанд бўлганиданми, ҳар қалай, шу-шу дўстлашиб кетишиди. Малик Нусратбекларниги, Оқтепа маҳалласидаги шинамгина ҳовлига тез-тез бориб туарар эди. Биророк дўстининг ота-онаси қанчалар қийин-қистовга олиш масин, ётоқхонани ташлаб, уларниги қўчиб ўтишга унамади. Тўғрироғи, тенг-тўшларининг шовқин-суронига, қақажон кизларнинг қахқаҳаларига тўла талабалар шаҳарчасини кўзи қиймади.

Нусратбек ҳам Қоратепа қишлоғида кўп бўлган. Қишлоқ этагидаги дарёда чўмилиб, балиқ овлашлар, ширкат хўжалиги боғига кириб мева-чева ўғирлашлар унда унтилмас хотиралар қолдирган. Шу алфозда, гоҳо қиқириқиқир кулгилар, гоҳо маъюс-маҳзун хаёллар билан талабалик ўтди-кетди. Сўнгти курснинг охирларида Нусратбек уйланди.

Ўқиши битиргач, Малик қишлоғига қайтди, Янги йўлдаги консерва заводида бир оз ишлагач, тағин шаҳарга келди. Ижарага мана шу хужрани топди. Ҳар ким ўз ташвиши билан бўлиб қолгани учунми, ҳар қалай, икки дўст бир-биридан тобора узоқлаб боришаётганини пайқамадилар. Аҳён-аҳёндагина дийдорлашар бўлиб қолишиди. Дийдорлашган чоғларда ҳам гап-гапга қовушмай, сохта такаллуфларга кўмилишар, бирор-бир баҳона топиб, хайрлашин пайига тушишар эди.

Мана, бугун ҳам Нусратбек амал-тақал килиб қутублиб кетди.

«Хўш, ўзим-чи, — дея ўйлади Малик, енгил-елини нонуштадан сўнг кўчалик кийимларини кияркан, — унинг тезроқ чиқиб кетишини истамаганмидим? Ахир, шошиб тургандим-ку?!»

Малик стол устидаги қўнфироқли соатга кўз ташлади. Соат сураткашнинг зарур учрашувга аллақачон кечикканига имо қилаётганидан пушаймондай, «чук-чук»лаб, миллиари титрабгина туарар эди.

Жинси шим, енгил чарм камзул кийган Малик елкасига фотоанжомларини осганича хужрасидан чиқди.

* * *

Шаҳар марказидаги хиёбон ҳамиша гавжум. У ён-бу ён ўтиб-қайтаётган одамлар оқими бир зум ҳам тинмайди; ёшлар-кексалар, аёллар-эркаклар, бирор қайларгадир шошилади, бирор бепарво, шунчаки томошаталаб, писта чақиб, тамаки тутатиб ивирисиди.

Малик анча енгил тортди. Кенг, сершовқин кўчалар, иссиқ-совуқ чехралар овутдими, ҳарқалай, ҳалигина тор, ҳувиллаган ҳужрасида сиқувга олган маъюс-маҳзун кайфият тарқалиб кетди. У фотоаппаратини чоғлаб, ҳамишаги иш жойи — хиёбон ёнида туаркан, ҳамишаги кувноқ сўзамол сураткашга айланди-қолди.

— Кеп қолинг, суратга тушиб қолинг. Ҳуснингизга хусн қўшилишини истасангиз, марҳамат, кеп қолинг. Бизнинг фотоаппарат сизни ўн ёшга яшартириб юборади.

Ўтиб-қайтувчилик гоҳ чинқириб, гоҳ минғирлаб чорлаётган Маликка деярли эътибор беришмас эди. Баъзиларгина унинг афтига ажаблангандек анграйиб қўйишиди, холос.

— Кеп қолинг...

Қўлтиқлашиб бораётган икки хушрўйгина қиз маҳмадана сураткашга кўз қири билан қараб, жилмайиб қўйишиди. Чақира-чақирдан чарчаб зерика бошлаган Маликка жон кирди.

— Йў-ў, — деди у қизларга қаратса, — сизларни суратга туширмайман. Бунақа хусн, бунақа табассум билан юрак-бағримни кул қилганинг етмагандай, плёнкани хам куйдириб юборасизлар.

Сураткашнинг гапира-гапира эргашганини пайқашган қизлар чопқиллашди. Маликнинг шундоққина биқинидан ўтиб бораётган тўнг бир кампир унинг сўзамоллигидан энсаси қотдими, сураткашга зардали-зардали кўз ташлади. Малик ҳам кампирга ёлғондакам чақчайиб фотоаппаратини қаратди.

— Бир зум сабр қислинлар, хоним. Бизнинг анжомтиришган башараларни силликлаб қўйишда устаси фаранг.

Кампир алланима дея гудранганича узоқлашди.

Малик ҳам толиқиб, бир зум чакаги ўчди. Негадир бугун омади чопмаяпти. Одатда куннинг бу маҳалигача ҳечқурса беш-олти кадр сурат олар эди.

У сал наридаги бўёқлари кўчиб қолган ёғоч ўриндиққа бориб ўтирди. Ўтиб-қайтаётганларга хаёлчан тикилди.

Малик Янгийўлдаги заводдан кетгач, мутахассислиги бўйича ишламади. Яқин бир танишининг кутқусига учеб ўзини сураткашликка урди.

«Инженерликни қўй, ука, — деганди ўша меҳрибон акахон. — Бу соҳада коса оқармайди. Оти улуғу супра-

си қурук. Сен яххиси кўпчилик назар-писанд қилмайдиган ишнинг бошини тут...»

Акахон фотографиянинг афзалликлари ҳақида, айнан шу соҳада тер тўкиб афсонавий бойликка эришганилар ҳақида тағин хийла вақт жавради. Малик унинг гапларини анчайин бепарво, кинояномуз тинглаган бўлсада, бу қизғин маслаҳатда ҳархолда жон борлигини пайқади. Қолаверса, ўзи ҳам болалик чоғларидан бери сураткашликка қизиқар эди. Талабаликнинг илк қунлариёқ ихчамгина фотоаппарат сотиб олди. Дўстининг бу харидидан аввал энсаси қотган Нусратбек, кейинчалик кадрдан нари кетмай қолди. Малик укувлигина эди. Тез орада сураткашликнинг анча-мунча ҳадисини олди. Ҳатто, фотоаппаратни бўлаклаб, унча-мунча носозликлари ни ўзи эпақага келтирадиган бўлди. «Устоз қўрмаган уста», — деб хирингларди Нусратбек.

Ўша яқин танишнинг оқ фотиҳасидан сўнг, Малик бу ишга қатъий киришди, бироқ керакли фотоанжомларни тайёрлагунича, маъмурият билан тил топшишиб, хиёбонда илдиз отгунича хийла чиқимдор бўлди. Лекин чидам ва қунт билан ишлади. Ўша акахон башорат қилгандек, чиндан ҳам тузуккина пул топа бошлади, ҳатто доимий мижозлар ортириди. Кўпчилик Маликни тўй-ҳашамларга атاي-тўтай олиб кетадиган бўлишди. Бироқ куртурнинг топган-тутганида барака йўқ эди. Ахён-ахён отасига узатганинни айтмаса, бор-йўғини ишратга соvuриб қўяди. Бирор бир таннозга илакишган тунлари, эрталаб туллаган мушукдеккина бўлади-қолади. Ҳатто, айрим чоғлар, арзимас йўлкирага ҳам зориққанини айтмайсизми?

— Кечирасиз, уч қун аввал суратга тушгандик.

Малик хаёлдан ҷалғиб, илкис ўгирилди. Ёнгинасида бақалоккина бир йигит унга саволчан тикилиб турарди. Андак нарида одмигина кийинган, сарғиш сочли қиз. Малик уларни танигандек бўлди.

— Қани, тўлов қофозини беринг-чи.

Йигит бир парча варакни сураткашга узатди. Малик варакқа бир кўз ташлаб олгач, ёнидаги чарм сумкани титкилаб бир даста сурат чиқарди.

— Мана, марҳамат, — деди у йигит ва қиз ёнма-ён тушган расмни топиб узатаркан. — Жанжаллашиб қолганда шу суратга қаранглар, тағин Лайли-Мажнунга айланасизлар. Биз шунақа сехрли суратлар ишлаймиз.

Расм мижозларга ёққани шундоққина юз-кўзларидан сезилиб турарди. Улар Маликка бот-бот миннатдорчилик билдиришгач, одамлар орасига сингиб кетишиди.

Малик эринибина у ён-бу ён юра бошлади.

— Кеп қолинг, лаҳзаларни мангуликка муҳрланг!

Сўзларга тўн кийгизиб гапиришига, гоҳо Маликнинг ўзи ҳам қойил қолар эди. Бу хислат, ҳар нечук, отасидан юқсан бўлса керак.

Отаси — тақа мўйлови остидан ҳеч кулги аримайдиган, ҳангомаю латифалари билан давраларга жон киргизадиган одам. Кувноқлиги боисми, ёши етмишни қорашиб қолган бўлса-да, ҳали тетик, дўпписини дол қўйиб, жундор тўшларини ялангочлаб юради. Онаси Маликни уйлантириш ҳақида бот-бот куйиниб гап бошласа, отаси ўзича бенарво, эснаб қўяди. «Шошма-чи, кампир, ана, уч ўғилни эрта уйлантириб нима топдинг, кунора гавро жанжал...»

Бироқ отаси овлоқ-овлоқда Маликни гап билан чимчилаб-чимчилаб олади.

«Тўй қачон, болам, бизлар бехабар қолмайлик-да? Бирортасининг қўйнига қўл солиб қўрдингизми, ишқилиб?»

Малик отасининг қочиримларига жўяли жавоб тополмай чайналади. Отаси эса баттар буровга олади:

«Кўзингизга қаранг, болам, вақтида уйланмаган йигитни, кейин, эрга бериш керак бўлади».

Малик отасидан бир амаллаб қочиб кутулади.

Уйланиш, рўзгор, деган тушунчалар унинг кўнглига фулғу солади, алланечук қўркув қўзғайди. «Йўқ, ҳали эрта, — деб ўйлайди Малик юраги орқага тортиб. — Нима зарил...»

Унингча уйланиш, рўзгор тузаш — қариликни бўйнига олиш, ўйин-кулги, серзавқ эркинлиқдан буткул ажралиш, эътибордан қолиш билан баробар.

Малик ҳаммасидан кўра киз-жувонларнинг эътиборидан қолишдан чўчир эди. У қизларнинг келишган, хуббичим йигитларга айрича интиқлик билан боқишини жуда яхши билади. Эҳ, бу сирли-сирли нигоҳларда қанчалар лаззат, қанчалар ҳаловат бор! Гўзал жононлар орқасидан «бу хушсурат йигит кимга насиб қиларкан?», дея пичирлашаётганини яққол эшитиб тургандай бўлади Малик. Бу орзуманд шивир-шивир, бу сирли энтиқишлиар,

хамма-ҳаммаси уники! Лоп этиб уйланиб қўйса, давраларнинг гули бўлиб юриш қайда? Каталакдек уйида ўтиради-да, хотиннинг қош-қовоғига қараб! Ундан кўра ўйнаб-кулгани, кизларнинг кўзини кўйдириб юргани маъқул эмасми?! Колаверса, ҳали чинданам кўнгилдаги қизни учратгани йўқ. У уйланадиган, жуфти ҳалоли бўладиган хилқат алланечук сирли, алланечук жозибали бўлиши керак. Малик унга қараб тўймасин, ҳар ўйлаганида юрак-бағри сел бўлиб, уйга қараб чопсин. Бироқ қани ўша малика? Қани ўша паризод?

Сураткаш хиёбон йўлаги бўйлаб юраркан теварагига маъюс қўз ташлаб қўйди.

— Кеп қолинг, суратга тушиб қолинг. Лаҳзаларни мангаликка муҳрланг.

* * *

Малик хиёбондан андак наридаги ошхонада апил-тапил тушлик қилиб қайтди. Чиндан ҳам бугун негадир омади юришмаётир. Эртадан бери атиги уч кадр сурат олибди-я?!

Хиёбон одатдагидек гавжум. Теварак куз офтобининг алланечук хира, илик нурларига чулғанган. Андак наридаги йўлда автоуловлар у ён-бу ён физ-физ елиб ўтмоқда.

Малик тили билан тиш ораларини тозалай-тозалай тагин фотоаппаратини шайлади.

Шу пайт телефон буткаси ёнида ўзига ўқтин-ўқтин қўз ташлаб қўяётган кизни пайқаб қолди. Негадир Маликнинг юраги «шув» этиб пастга тушиб кетгандай бўлди.

Кизнинг тўлкин-тўлкин, кўнғиртурс соchlари нозик ел-каларида чулғаниб турар эди. Енгил, кузлик костюми, сарғиш узун кўйлаги ўзига ярапсан. Оппок, лўппи юзларида алланечук хаёл, саросима.

— Суратга тушмоқчимисиз? — деб сўради Малик унга яқинлашиб. Овози ҳеч кутилмаганда алланечук титраб, бўғиқ чиқди.

Киз хижолатли жилмайиб, ерга қаради. Қуюқ қошлари туташиб, узун-узун киприклари пир-пир учди.

— Кечирасиз, манави матоҳ қанақа ишлатилади? Озгина ўргатворинг, илтимос.

Малик шундагина қизнинг қўлида жажжигина фотоаппарат борлигини пайқади.

— Қани, беринг-чи, янги экан-ку?

— Ҳа, хозиргина дугоналарим билан сотиб олдим.

— Бу ер жуда сершовкин, — деди Малик ботинмайгина, — илтимос са-ал нарироқ чиқайлик.

Улар хиёбон ўртаси томон юришди.

— Узр, сизни ҳам безовта қилдим, — деди киз баттар хижолатланиб.

— Ҳечкиси йўқ. Ўзим ҳам бекорчилиқдан зерикиб тургандим.

Улар баҳайбат бир чинор панасида тўхташди. Ўзига бор-йўғи беш қўлидек аён бўлса-да, вақтни чўзиш илинжида Малик жажжи фотоаппаратни обдон кўздан кечирган бўлди.

— Фотографияга қизиқасизми, дейман-а?

— Оз-моз... Бугун бир дугонамизникида қиз базми бор, эсадалик суратларга тушмоқчи эдик.

— Тушунарли... Демак, дугонангиз турмушга чиқяпти.

— Ҳа, эртага тўйи.

Малик шошилмасдан, ҳижжалаб-ҳижжалаб фотоаппаратга плёнка, батарейка жойлашни, ишлатиш тартибини тушунтира бошлади. У ора-чора қизнинг тиниқ юзига, алланечук фусса қалқиб турган кўзларига маҳлиё маҳлиё термилар эди.

— Тушундингиз-а?

Қиз маъюс жилмайиб бош иргаб қўйди.

— Мана, қизил чироқчаси ёнди, — деди Малик фотоаппаратни қизга тутқазиб. — Энди манави шиша ичига қараб, кадрни тўғри мўлжалга оласиз-да, манави кнопкани босасиз, вассалом. Қани, бир синаб кўринг-чи...

Малик қиздан икки-уч қадам йироклашиб, ўзини суратга тушишга чоғлади. Қиз қисиниб-қимтиниб уни расмга олди.

— Энг муҳими, — деди йигит илжайганча яна қизга яқинлашаркан. — Квитанция ёзиб беришни унумаслик.

Улар енгилгина қулиб олишди.

— Энди танишсак ҳам бўлар, исмингиз нима?

— Ҳабиба.

Малик одатда қизлар билан танишган чоғлари исмлари ёқса-ёқмаса ўзича ҳайратланган бўларди: «О-о, нақадар фусунко-ор...» Бироқ кўкламги япроқдеккина мана бу қизга негадир сўзамоллик қилолмади.

— Исмим Малик, — деди у қўлинни кўксига қўйиб. — Сиз билан танишганимдан жуда хурсандман.

Ҳабиба жилмайиб, бош иргаб қўйди.

— Талаба бўлсангиз керак-а? — деб сўради Малик сухбатни чўзиш пайида.

— Йўғ-е, ўқиши битирганимга икки йил бўлди.

— Қайси институтни битирдингиз?

— Миллый университетни, фалсафа бўйича...

Улар беихтиёр ёнма-ён юра бошлишди.

— Ҳали ишга кирмадингизми?

— Ишлайман.

— Қаерда ишлайсиз?

Ҳабиба сураткашга норизо бир чимирилиб қўйди.

— Ҳозирча сир.

Малик қовун тушириб қўйган бўлса-да, чимирилган чоғи қиз янада сулув бўлиб кетишини пайқади. «Зўр кадр чиқади-да», — хаёлидан ўтказди у уста сураткашлардек чамалаб.

— Ҳабибахон, — деди у фотоаппаратини зимдан шайлаб. — Сураткаш энг аввал ўзи суратга туша билиши керак. Қани...

Киз йигитнинг ниятини пайқаб улгургунча Малик бир ҳатлаб олдинга ўтди-ю, Ҳабибани суратга олди.

— Э, қўйинг-э, керакмас, — дея эътиroz билдиришга уринди қиз.

Бироқ шу орада Малик қизнинг тоҳ у ёнидан, тоҳ бу ёнидан тағин икки-уч бор суратга олди. Сураткашнинг ўз бошига қуйиб-пишиб типирчилапи Ҳабибанинг завқини келтириди шекилли, шарақлатиб кулиб юборди. Маликка айнан шу лаҳза керак эди. У бутун ҳунарини ишга солиб, яна устма-уст фотоаппаратини шифиллатди.

Ҳабиба гўё алланима ёдига тушиб қолгандай, туйқус жиддий тортди. Теварагига хуррак кўз ташлаб оларкан:

— Бўлди етар, — деди чимирилиб.

Малик ҳам анчагина суюлиб кетганини пайқади.

— Кечирасиз, Ҳабибахон. Мен шунчаки, — йигит жўяли гап тополмай чайналаркан, ногоҳ қизнинг чарм сумкаласидан пул чиқарганини кўриб қолди. — Ия, нима қилмоқчисиз?

— Ҳархолда квитанция ёзib беришни унутмассиз?

Малик кулиб юборди.

— Койил, ўйтларни дарров қулоғингизга қуйиб оларкансиз, сиздан жуда яхши шогирд чиқади.

— Рост, ҳаққини олингу квитанция ёзib беринг, мен суратларимни албатта олишим керак. Агар... агар ило-

жи бўлса негативни ҳам. Кўркманг, ҳаммаси учун тўлайман.

— Кўрқаман. Демак менга эсдалик қолдирмас экансииз-да?

Ҳабиба жилмайишга ҳаракат қилди.

— Кечирасиз, мен... мен суратларнинг негативлари ни коллекция қиласман, шунинг учун.

— Яхши, — деди Малик негадир кўнгли фашланиб. — Келишдик. Агар малол келмаса, менга телефоннингизни қолдирсангиз, суратлар тайёр бўлди дегунча сизга хабар қиласман. Бехуда овора бўлиб юрмайсиз.

Ҳабиба бир зум саросимада қолди. Йўлак чеккасида ўсган чечаклар атрофида чарх ураётган капалакка ўйчан тикилди. Сўнг, бир қарорга келди, шекилли, чарм сумкасидан бир парча қофоз, ручка чиқарди.

— Мана, — деди қиз телефон рақамлари битилган қофозни узатаркан. — Уч-тўрт кун ичида қўнғироқ қиласиз.

— Яхши, ҳозирча пулингизни чўнтагингизга солиб қўйинг, суратларга келган кунингиз берарсиз.

— Раҳмат, Малик ака, — деб жилмайди Ҳабиба. — Энди мен борай, дугоналарим кутиб қолишиди. Сизни безовта қилганим учун яна бир карра узр.

— Қўйсангиз-чи, Ҳабибахон.

Малик учишга шайлланган ҳуркак қушчадек бу қизга ўғринча тикилди.

* * *

Тун ярмидан оққан бўлса-да, ҳали Маликнинг ҳужрасида чироқ ўчмаган эди. Хона одатдагидан баттар тўзгиб кетган. Қуюқ тамаки дуди ҳужра бўйлаб бўғоз булутлардек сузиб юрибди.

Нихоят, ҳув, шомда бошланган иш охирлади. Торгина кулба Ҳабибанинг ҳар хил ҳолатда тушган, Малик бор-йўқ маҳоратини қўллаб ишлаган суратларига тўлиб кетди. Майкачан, соchlари тўзгин йигит стулга ҳорғин чўқаркан, расмларга завқ билан тикилди: «Ҳабиба!»

У қошлари қундуз, кўзлари юлдуз қизларни кўп кўрган. Неч-иначасини кучиб-ўпиб, керак бўлса, тўшакка тортган. Бироқ, ҳеч бири мана шу баҳорги чечакдеккина қизчалик юрагига титроқ сололмаган, ҳеч бирини ўйлаганда, мана шу ҳуркак кабутар монанд қизчалик ичу ташини нурга тўлдиролмаган. Қизик, туйкус учраб

қолган бу сулувнинг нимаси унга бунчалик ёкиб қолди экан? Ё севги деганлари шуми?

Малик илгари ишқ-муҳаббат деган нарсани тан олмас эди. Ўзларича ошиқ-маъшук, Лайли-Мажнун бўлиб юрганларни учратса энсаси қотиб, ғаши келар эди. Ҳатто дўсти Нусратбек талабаликнинг сўнгти йилида, Миллий университетнинг филология факультетида ўқийдиган қизни севиб қолганда, унинг устидан хўп қулган. Ўша тўладан келган, бўшангтоб қиз Феруза эди. Нусратбек унга канадек ёпишди-қолди. Ҳатто Малик билан баъзи бир хуфёна ҳарамларга бориб туришни ташлаб, оғир-вазмин, мулоҳазакор йигитта айланди. Кўп ўтмай, ўша Ферузага уйланди. Ферузанинг отаси қўли узун амалдорлардан экан. Эндинга дипломини қўлига олган куёвни «Электр жиҳозлари» заводига, туппа-тузук ишга жойлаб қўйди. Тез орада Нусратбек завод директорининг таъминот ишлари бўйича ўринбосарига айланди. Дўстининг ишдан ишга, амалдан-амалга читтакдек учеб-қўнишини кўриб-билиб турган Малик ўзича дохиёна фикрга келди: «Севги эмиш... Жа-а, ҳаммасини ҳисоб-китоб қилиб қўйган экан-ку, бу шаҳарлик тулки?! Қизимас, отасига уйланган экан-да...»

Аммо Нусратбек дўстини ҳар гал учратганида ҳамишагидек дўстона муносабатда бўлишга уринар, ўз ёнига ишга таклиф қиласар эди. Бироқ дўстининг мулозаматларидан негадир Маликнинг кўнгли ғаш тортар, назарида, Нусратбек устидан кулаётгандек туюлар эди. Шу сабабли, ҳар нечук, Малик «шахарлик тулки»нинг таклифларини рад этиб келган. Бироқ тез-тез хуруж қилиб турадиган ўша таниш ғашлик, хиралик дастидан ҳеч кутуломмади. Кунларнинг бирида кечки пайт Нусратбекларникидан қайтаркан ич-ичида чарх ураётган ўша таниш алам-изтироб сабабларини англаб етгандай бўлди. Ҳув, илк танишган кунларидан бўён ўзича дўсти билан зимдан пойгага киришган экан! Ўқишда, ишда, севгида...

Севги деганда Малик, албатта, кизларнинг кўзини куйдириб, орқасидан умидвор-умидвор қаратиб юришни назарда тутади. Бу масалада у Нусратбекдан анча ўзиб кетганини ҳис этар, бу хиссиётдан ичи илиб, ўз-ўзича қувониб юрар эди. Нусратбек хушсурат-хушбичим, чин шаҳарликларга хос дид-фаросатли йигит бўлса ҳам, негадир қизларни ўзига кераклича мафтун этолмасди. (Ҳархолда Маликка шундай туюлган.) Ўқиш бўйича, хойна-

хой, дуранг. Бироқ иш масаласи чатоқ, бу соҳада шубҳасиз Нусратбек икки ҳатлаб ўзиб кетди. Малик энди уч ҳатлаб уни доғда қолдириши керак! Аммо қандай қилиб? Албатта, Нусратбекнинг кўмагисиз, битниңг оёғига, итниңг қуйругига илашиб бўлса-да, бу пойгани ҳам ўз фойдасига ўнгламоғи шарт.

Ўша тун дўстиникидан қайтаркан, Малик ўзича шундай қарорга келди. Келди-ю яна ўз-ўзидан уялиб кетди. Назарида кўча чироқларининг ёғдуси кўксини тифдек ёриб ўтиб, бор-йўгини баралла ёритиб юборгандек, барча-барча унинг хиёнаткор ўй-хаёлларини кўриб-билиб турган-дек туюлди. «Ҳечқиси йўқ, — хаёлан ўз-ўзини овутган бўлди Малик, теварагига олазарак қараб оларкан, — одоблигина кўриниб юрган билан Нусратбекда ҳам шундай ҳисоб-китоб бор».

Ўша кунлари ошиги олчи Нусратбек кўкрак керган сайнин хотини Ферузахон аллақандай хасталикдан қуриб борар эди. Ана шу дард ёшгина жувоннинг жонига зомин бўлди. Малик мархуманинг маъракасида қатнашаркан, дўст бошига тушган айрилиқдан чинакам фам-қайгу чекиб, ўкириб йиғлашни истади. Бироқ Нусратбекни шунчаки бағрига босишдан, қуп-қуруқ кўзларига рўмолчани теккизиб-теккизиб кўйишдан нари ўтмади. Бу ҳол учун у уч-тўрт кун ўз-ўзидан нафратланиб юрди. Ўша кунлари Нусратбек озиб-тўзиб, кўзлари киртайибгина қолган эди. «Ростдакам севаркан-да», хаёлидан ўтказди Малик, дўстини зимдан кузатаркан.

Шу-шу «ростакам севги» ҳакида тез-тез ўйладиган бўлиб қолди. Кўча-кўйда бир-бирини қўлтиқлаб юрган жуфтларга, гоҳо, бир-бирига эркаланиб суратга тушаётган йигит-қизларга кизиқсиниб-кизиқсиниб қарайдиган бўлди. Бироқ ҳеч бирида хаёлидаги «ростакам севги»ни тополмади. Ҳатто, бир гал хужрасига бошлиб келган кўча қизини дабдурустдан саволга тутди: «Мени севсанми?»

Қиз аввал кулди, сўнг йигит кўксига юзларини яшириб пи chirлади: «Кўйинг, пок сўзларни тилга олмайлик...»

Мана, бугун хиёбонда Ҳабибани учратди-ю, юрагида ғалати бир ҳислар уйғонди. Кунбўйи ўша сирли туйфулар туғёнида жўшиб, қувониб юрди. Хужрасига қайтаркан тезроқ қизнинг суратларини ишлаб, унинг чехрасига тагин тўйиб-тўйиб боқишига ошиқди.

Малик Ҳабибанинг турли ҳолатларда тушган суратларини хона деворининг кўримли-кўримли жойларига осиб чиқди. Атай катта ҳажмда ишлагани – қизнинг кулиб тушган расмини эса нақшинкор рамкага солиб, каравот тепасига – дераза токчасига қўйди.

Тонг яқин эди. Маликнинг руҳи тетик, жисми енгил. Улуғвор бир ишни қойиллатиб қўйгандай, алланечук хуш кайфиятда ўрнига чўзилди. Ҳабиба ҳақида ўйлай-ўйлай уйқуга кетаркан, жилмайди: «Қарияпман, шекилли...»

Йигитнинг юзида табассум қотиб қолди.

* * *

Малик «Нур» ресторани ёнида шоша-пиша таксидан тушди. Устида хипча сумбатига ярашиб тушган оҳорлигина костюм-шим, ҳаворанг галстук, соchlари орасталанган. Елкасида эса сураткашлик анжомлари.

У аслида эртагироқ Нусратбекларнигида ўтиб, тўй хизматига бел боғламоқчи эди-ю, бироқ улгурмади. Хиёбонда эски бир мижоз учраб, қўярда-қўймай тоғасининг мучал тўйига етаклаб кетди. «Маликжон, уч-тўрт кадр оласиз, тамом, сўнг айтган жойингизга элтиб қўйман», – дея тантанали ваъда берди мижоз, дўстининг тўйига бориши кераклигини айтиб, тайсаллаётган сураткашни кўлтиқлаб. Малик ноилож кўнди. Бироқ уни ҳар хил баҳоналар билан кечгача қўйиб юбормади.

«Ишқилиб, тўй бошланиб кетмаган бўлсин-да» – хаёлидан ўтказди Малик, ресторан томон аланглаб юраркан.

Қатор-қатор неон чироқларининг ёғдусидан теварак сутдек ёришиб тураг эди. Ресторан майдончасига тизигина қўйилган машиналар бойвачча меҳмонларниң кўплигидан дарак бермоқда.

Серҳашам ресторанинг қўш табақа, нақшинкор эшиги ланг очиқ. Ичкарида у ён-бу ён жонсарак юргургилаб юрган хизматчилар кўзга ташланади. Малик туйқус Нусратбекка кўзи тушиб, таққа тўхтади. Дўсти ресторан биносининг бикингинасида, пештоқдаги чироф нуридан ола-чалпоқ ёришган дарахт соясида асабий юриб, сигарет тутатар эди. «Наҳотки мени бетоқат кутиб турган бўлса, хаёлидан лип этиб ўтди сураткашнинг. – Намунча безовта?!»

– Нусратбек, – дея сас берди Малик.

Дараҳт тагидаги шарпа «ялт» этиб ўгирилди. Паришон юзига енгил табассум ёйилди.

— Ҳа, сенми Мак. Хуш келибсан.

Улар қучоқлашиб кўришган бўлишиди.

— Табриклиман, — деди Малик ботинмайгина. — Ишқилиб, баҳти бўлинглар.

Нусратбек туйкус дўстини итариб ташлаб, елкасидағи фотоанжомларига нуқиди.

— Ўв, галварс, нега манави матоҳларингни кўтариб юрибсан? Нима ташвиш бу?

Малик тўппа-тўғри бир мижозникидан келаётганини, бу дардисар ашқол-дашқолни уйга ташлаб чиқишига ултurmаганини айтиш учун оғиз жуфтлади-ю, сўнг шаштидан қайтди.

— Нима, тўйингда қўл қовуштириб ўтираманми? — деди у гёё аразлаган қиёфада. — Ҳечкурса, эсдалик учун уч-тўрт кадр оларман. Тўйингда би-ир хизмат қилаётин-да.

— Мен сени хизматга чақирганим йўқ, Мак. Ебичиб, дам олибгина ўтири. Агар фотоаппарат билан ўралашаётганингни кўрсам, адабингни бераман.

— Ў-ў, шунаقا гўзал пўписа учун бир кадр олай-а, — деди Малик фотоаппаратини шайлашга тушди.

Шу пайт ресторон ичкарисидан Миролим ака — Нусратбекнинг отаси лапанглаб, хавотирли бир қиёфада чиқиб келди.

— Нусрат, бу ерда нима қилиб турибайлар?

— Чеккани чиққандим, — деб тўнғиллади Нусратбек.

— Қани, ичкари кир, сени анави янгалар чирқиллаб излашяпти. Бора қол, келин тайёр бўпти.

Малик бошига омонатгина дўппи кўндириган, қовоқёноклари салқи Миролим ака томон юзланди.

— Ассалому алайкум.

— Ия, Маликжон, ўзингми болам? — Миролим ака сураткашни қувонч билан бағрига тортди. — Сизни ҳам кўрар кун бор экан-ку, қочоқ.

Юзларга енгилгина тортилган фотихадан сўнг, Малик ҳам узук-юлук ҳол-ахвол сўраган бўлди. Миролим ака эса баттар авжланди.

— Қалайиз энди, ўғлим, соғлиқларингиз яхшими? Коратепага ҳам тез-тез бориб турибизми? Ота-онангиз ҳам бардамгинами? Илоё, эсон-омон бўлишсин...

— Дада, мен кирай, — деди Нусратбек отасининг гапини бўлиб. — Маликни қўйворарсиз.

Миролим ўғлини жеркиган бўлди.

— Сен киравер, Маликжонни ўзим бошлаб кираман. Бор, боравер.

— Э-э, ҳозир, — деди Малик фотоаппаратини чоғлаб. — Бир минут. Бир чиқиллатиб олай.

Нусратбек алланима деб астойдил эътиroz билдиримоқчи бўлди-ю, бироқ улгурмади. Дўсти уста сураткашларга хос чақконлик билан ота-болани расмга олди. Нусратбек ўзича норизо тўнғиллаб ичкари кириб кетди.

— Қани, Маликжон, — деди Миролим ака сураткашга кулимсираб тикилганича. — Бизниги ҳеч бормай қўйдингиз, ё, биздан хафамисиз.

Малик шоша-пиша бош чайқади.

— Йў-ў, нималар деяпсиз, Миролим ака. Турмуш шунчаки ҳаммамизни ҳар томонга сочиб ташлади. Ўзингиз яхши тушунасиз-ку, ҳозир ҳамма ўзи билан ўзи овора. Бош қашлашга қўл тегмайди. Мен ҳам сизлардан би-ир хабарлашиб чиқай дейману, аммо ҳеч фурсат тополмаяпман-да.

— Тушунаман, ўғлим. Ҳозир ҳаммага қийин. — Миролим ака Маликнинг елкасига ҳазиломуз қоқди. — Ҳойнаҳой, ҳозир ҳаммага қийин, деб бизларни тўйга чакирмай уйланиб ҳам олган бўлсангиз керак-а, а?

— Йўғ-е, ўлибмизми сизларни тўйга таклиф этмай. Тўғриси, хали уйланмадим.

— Ия, нега? Ёш ҳам ўттизга қоралаб қолди-ку?!

— Пешона шундай экан-да, — хижолатли елка қисди Малик. — Ҳали қўнгилдагини учратмадим.

Миролим ака пихиллаб кулди.

— Э, ўзимизга са-ал шипшиб қўймапсиз-да, нафакат қўнглингизга, биратўла қўйнингизга ҳам солиб қўярдик.

— Худо хоҳласа, яқинда бўлиб қолар. У ёфда қариндошлар ҳам ҳоли жонимга қўйишмаяпти. Сизларни албатта тўйга айтаман.

— Ило-ё, қўшгани билан қўша қаринг, болам.

Миролим ака ўйчан қиёфага кириб, чуқур тин олди. Малик ҳам ресторон боғининг қоронги бир бурчагига тикилди.

— Нусратбекнинг са-ал кайфияти бузукқа ўхшайди-я, — деди у орага тушган жимликни бузиб. — Тинчликми, ишқилиб.

Миролим ака Маликни қўлтиқлаб қоронғилик қуюқроқ томонга бошлади.

— Билмадим, Маликжон, билмадим, негадир дўстингизнинг беш-олти ойдан бери қовоғи очилмайди. Устигаустак, бу келинимизга, Нафисахонга кўнгли йўқдай. Нафисахон раҳматли Ферузахонга жиян, шундан хабарингиз борми?

— Йўқ, — дея бош чайқади Малик — хабарим йўқ. Аммо Нусратбек хужрамга борганида Нафисахон билан бирга ишлашларини айтган эди.

— Ҳа, шунақа, Нафисахон ҳам ўша зовудда ишлайди. Раҳматлик Ферузахоннинг дадалари билан маслаҳатлашиб, Нусратбек билан Нафисахонни қовуштиришга келишгандик. Биласиз, Маликжон, марҳума келинимиздан бир қизча ёдгор қолган. Қудаларим ҳам, ҳойнаҳой, неваралари бегона аёлнинг қўлига караб қолмасин, дейишган, Нафисахон учун ҳам ўзлари совчи бўлишди.

— Яхши тадбир, яхши, — деб қўйди Малик ўзича кўпни кўрган кайвонилардай. — Ишқилиб, Нусратбек индамай кўна қолдими?

— Ҳа, биласиз-ку, дўстингиз жа кўнгилчан, бўйни бўш. Ўзларингиз биласизлар, деб қўя қолди.

Шу асно ичкаридан бўғиқ карнай-сурнай садолари эшитила бошлади.

* * *

Малик бир зум анграйиб қолди. Баҳайбат-баҳайбат қандиллар осилган ҳайҳотдек емак залиниг ҳашамидан кўз қамашар эди. Оппоқ дастурхонлар ёйилган узундан-узун столлар усти турли-туман нозу неъматларга лиммо-лим. Дастурхон атрофида турнақатор тизилиб ўтирган меҳмонлар бетоқат, карнай-сурнай шовқини тезроқ тиниб, келин-куёв тезроқ ўз ўринларига ўтиришса-ю, базми жамшид бошланса.

Малик созу ногоралар суронида қулоқлари батанг бўлган қўйи бамайлихотир ён-верини суратга ола бошлади. Шу пайт янгаю дугоналар даврасида келин-куёв кириб келди. Күёвлик сарупоси ўзига ярашган Нусратбекнинг юз-кўзида алланечук саросима. Оппоқ фатасига бурканиб оппоқ булутдек сузиб келаётган келин ён-веридаги дугоналарига аҳён-аҳён жилмайиб қўяди. Малик шоша-пиша уларни суратга ола кетди. Суратга ола-ола ногоҳ келин дугоналари орасидаги Ҳабибага кўзи тушди.

Юраги алланечук орзиқиб, беихтиёр гурс-гурс ура кетди. Бу орада сураткашни Ҳабиба ҳам илғаб-таниган шекилли, йигит томон енгил бош ирғаб, табассум қилган бўлди.

Туйкус хаёллари алғов-далғов бўлиб кетган Малик карнай-сурнай садолари қачон тиниб, келин-куёв қай тарзда ўз ўринларини эгаллашганини пайқамай қолди. Малик бир амаллаб, киши билмас, Ҳабибанинг қаршисидағи жойни эгаллаш дардида эди.

— Ассалому алайкум, азиз меҳмонлар, — дея сўз бошлади новча, олифтагина даврабоши микрофонни у ён-бу ён судраклаб. — Бугунги шодиёнамизга хуш келибсиз. Бугун Нусратбек ва Нафисахонларнинг никоҳ тўйи... Фурсатдан фойдаланиб базм кечасини очиқ деб эълон киласман. Қани, дастурхонга марҳамат.

Давра бўйлаб енгил-елпи қарсаклар чалинди. Малик пайтдан фойдаланиб дастурхоннинг нариги тарафида, шундоққина рўпарасига хижолатомуз ўрнашган Ҳабиба гап отди.

— Салом, Ҳабибахон, сизни кўриб турганимдан хурсандман.

— Ассалом, — деди қиз манглайидаги тўзгин сочларини орасталаган бўлиб. — Сизни бу ерда учратаман, деб сира ўйламагандим.

— Қисматдан қочиб қутулиш қийин-да.

Ҳабибанинг у ён-бу ёнига жойлашган дугоналари иккаласининг гап-сўзларидан сергакланиб, гоҳ қизга, гоҳ йигитга қизиқсиниб, синовчан-синовчан кўз юргутирди. Дугоналарининг маъноли қарашларини пайқаган Ҳабиба баттар хижолатланди.

— Малик ака, булар дугоналарим, Гули... Нури.

— Танишганимдан хурсандман, — деди сураткаш қизлар томон енгил бош ирғаб. — Менинг исмим Малик.

Гули соchlари қизғиши тусга бўялган, озғингина қиз гапни илиб кетди.

— Сизни таниймиз, хиёбонда ишлайсиз-а?

— Ҳа, очиқ ҳавода.

Ҳаммалари енгилгина қулиб олишди. Аллакимнинг-дир табригидан сўнг, ресторанинг жажжигина саҳнаси ни эгаллаган созандою хонандалар куй-қўшиқ бошлаб юборишиди.

*Олов экан боқишиларинг,
Билурсанми ёқишиларинг...*

Малик чақконгина интилиб шампан виносини очдида қадаҳларга ичкилик қуиб чиқди. Кизларга мулозаматлар қилди.

— Қани, дугонажонлар, мархамат. Ҳеч бир тортишиш, уялиш бўлмасин.

Кизлар ортиқча тихирликсиз қадаҳларни бўшатишди. Дастурхон устидаги салатлардан газак қилишган бўлишди.

— Узр, — деди Малик ўрнидан қўзфала-қўзфала бўйнидаги фотоаппаратига ишора килиб. — Мен буни икки-уч чиқиллатиб келай.

Кизлар енгилгина бош иргаб қўйишиди.

Оппоқ костюм-шим кийган, қизлардек нозик-нихол хонанда йигит ҳануз чираниб хониш қилар эди.

*Олов экан боқишиларинг,
Билурсанми ёқишиларинг...*

Малик гоҳ еб-ичиб ўтирган меҳмонларни, гоҳ давра ўртасида чарх ураётган раққосани, гоҳ келин-куёвни ўз майлича суратга олди. Нусратбек худди азага келгандек, хомуш ва паришон ўтирибди. Ҳатто, рўпарасида қиллаётган сураткашга икки-уч ўқрайиб қўйгандай бўлди. Келин — Нафисахон ёнидаги дугонасининг алланелар дея пицирлашларига қулоқ тутиб, қўзларини пирпиратар эди.

Малик жойига қайта бошлади. Шу пайт елкасига видеокамера қўйиб олган барзангি сураткашни қўполллик билан туртиб юборди. Малик унга аччиғланиб бир қўз ташладио, бироқ тезгина хушмуомалага ўтди.

— Кечирасиз, — деди илжайиб.

Бироқ видеотасвири қалин қошлари остидан Маликка нафратомуз тикилди.

— Жа хирапашшадай ўралашдинг-да оёғим остида. Тўйга келган бўлсанг, тинчгина ўтирсанг-чи жойингда.

Ўз айбини ҳануз англаёлмаган Малик ҳангу манг қотди. Шу пайт туйкус видеокамера бикинидаги миттигина чироқча қизил тусда ёниб-ўчаётганини пайқаб қолди. Бу матоҳнинг ҳам сиру синоатини туппа-тузук била-диган Малик чироқчага ишора қилди.

— Ёниб қолибди-ку, менга ўшқиргунча видеони тузатиб олинг, акагинам. Йўқса, бирорта ҳам тасвир тиник чиқмайди.

— Маслаҳатингга зормасман. Обрўйинг борида жо-йингга ўтири.

— Об-бо, — деди Малик масхарабозларча илжа-

йиб, — сизни суратга олмаганимдан хафасиз чофи, а? Кечирасиз, эътибор бермабман, мана...

Видеочи қаршилик кўрсатишга улгурмади. Малик уни чаққонгина суратга олди-кўйди.

— Ҳали гаплашаман сен билан, — тўнғиллади барзанги тиш қайраганча рақибидан узоқлашаркан.

Малик зимдан теварагига кўз ташлаб олди. Хайрият, куй-қўшиқнинг шовқин-суронида ҳеч ким даҳанаки жангни сезмади. Барча еб-ичиш, фала-ғовур билан овора эди. Икки-уч ширакайф меҳмон даврага чиқиб, раққосанинг теварагида шох ташлаб ўйноқлай бошлади.

— Қалай, зерикмадиларингизми? — деб сўради қизлардан Малик, жойига ўтиаркан.

— Зерикдик, — деди Гули қақажонлик билан. — Айниқса Ҳабиба.

Ҳабиба чимирилганича дугонасини туртиб қўйди. Хийлагина тўзғиб қолган дастурхон усти қизларнинг иштаҳаси чакки эмаслигидан дарак берар эди. Аллақачон бўшатилган шекилли, хизматчи аёл шампан виноси шиасини олиб, ўрнига конъяқ қўйиб кетди.

Малик зимдан Ҳабибага кўз ташлади. Қизнинг ёноқлари дугоналариники каби ичкиликдан қизариб турган бўлса-да, негадир хомуш ва ўйчан ўтиарди.

— Айтганча, қиз базми қандай бўлди? — деб уни гапга тутган бўлди Малик, қадаҳларга конъяқ қуяркан. — Плёнкаларни ҳам тўлғизиб ташлагандирсиз?

Дугоналар пик-пик кулиб юборишиди.

Малик таажжубланди:

— Ҳа, тинчликми?

— Ўша куни кўзингиз тегди, — деди Ҳабиба.

— Нега? Қанақа килиб?

— Йўлда фотоаппарат тушиб кетиб, чил-чил синди.

Қизлар яна қиқир-қиқир кулишди.

— Бунинг хаёlinи кимдир ўғирлаган, — деб гап ташлади Нури — юзларига қуюқ бўёқ чаплаган, тўлаганина қиз. — Паришонлик қурсин.

Малик қизларнинг қочиримларини ўзича тушуниб алланечук қувонч ҳисларига чулғанди.

— Об-бо, чакки бўпти-да, — деди у афсусланганинамо бош чайқаб. — Ҳа, майли, кўзим теккан бўлса, айборман. Демак, янги бир фотоаппарат мендан. Аммо... — Малик шўх кўз қисди, — факат менинг суратимни олиб юрасиз, шартим шу.

Ҳабиба нозли чимирилиб қўйди.

— Бир марта олдим-ку суратингизни, етар.

Гули ва Нури қийқириб кулишди. Малик ичу таши тобора қувончга тўлиб қадаҳларни қўлига олди.

— Қани, шундай ажойиб гаплар, шундай дилкаш дугоналар учун!

Сал-пал қийин-қистовдан сўнг қизлар бирин-кетин қадаҳларини бўшатиши. Шу аснода дастурхонга норин тортилди. Барчалари сукут билан овқатга интилишди.

Ҳаммаёкни бир-бирига урилаётган идиш-товоқларнинг, санчқи ва қошиқларнинг жаранг-журунг саслари босиб кетди.

— Келин якин дугоналаринг экан-да, — деб гап ташлади Малик, жимликни бузиб.

— Ҳа, — енгил чайналганича бош иргади Ҳабиба. — Институтда бирга ўқиганмиз. Жуда ажойиб қиз, афсуски, сафимизни тарқ этяпти.

Малик сирли илжайди.

— Сиз ҳали сафни бузишни ният қилганингиз йўқми?

— Йўғ-э, — уялганинмо чимирилди Ҳабиба.

Шу чоғ бўш идиш-товоқларни йигиштириб юрган хизматчи сураткаш томон энгашди.

— Сизни ошхонада Миролим акам чақириятилар.

— Хўп, ҳозир бораман, — деди Малик, сўнг Ҳабибага юзланди. — Бир минут. Дарров қайтаман.

— Тезроқ қайтинг, ҳали бизни суратга туширмадингиз, — деда гап ташлади Гули қақажонларча.

Шу орада дурраchasини танинзларча қия қўндиранг янга дугоналарга яқинлашди.

— Қани, қизлар, би-ир шўх-шўх ўйнаб берингларчи, келин бола илтимос қиляпти.

Дугоналар чуғур-чуғур ва кулгилар билан ўринларидан силжиши.

* * *

Тўй қизигандан-қизиб борар эди. Куй-қўшиқ садола-рига мастона қийқириқлар, гулдурос кулгию чапаклар аралаш-қуралаш бўлиб кетди.

Миролим аканинг илтимосига кўра хизматчилар тўпини ҳам суратга олган Малик тағин зал томон шошилди. Бироқ ошхона йўлагига қўйилган стол устидаги шиша-лардан бирини қўлга олган Миролим ака жажжи қадаҳларга ичкилик қўйди.

— Қани Маликжон, икковимиз жиндек-жиндек, а, лаббай.

— Бажону дил Миролим ака, сиз билан албатта ичаман.

Улар қадаҳларни бўшатиб, газак тишлашди.

— Нусратбекнинг бу тўйи аввалгидан ҳам данғилла-ма бўлиб кетди-ку, а? — деди Малик зал томон имо қилиб.

Миролим ака лоқайд қўл силтади.

— Келин тараф шуни талаб қилишди. Менга қолса-ку, ховлида ими-жимида ўтказардим.

— Ҳа, энди... уларники ҳам орзу-ҳавас-да.

— Маликжон, — деди Миролим ака тагин қадаҳларга ичкилик қуиб, — тўйдан кейин уйга келинг, ҳўп? Бир яйраб ҳангомалашамиз. Буниси ҳисобмас, ҳе-ҳе...

Улар кулишганча қадаҳларни чўқиширишди. Ичкилик ортидан шоша-пиша шўр бодринг чайнаркан Малик зал томон бетоқат қўз ташлади. Афтидан, кетишга баҳона қидиради.

— Амаки, залдан ҳам бир-икки кадр олай, айни тўйнинг қизиган пайти.

— Биламан, болам, биламан. Илоё, барака топинг. Нусратбекка ҳам сизнинг тўйингизда хизмат қилиш насиб этсин. Малик сархуш, енгилгина чайқалганича тантана қизиб турган зал томон юрди. Созу чилдирмаларнинг гумбур-гумбури, мастона қийқириқлар ресторон томини қўпоргудек эди.

Нимқоронфи йўлакдан чиққан сураткаш, залнинг ёруғидан қўзи қамашиб бир зум тўхтади. Шу пайт дугоналари билан диркиллаб рақс тушаётган Ҳабибани қўриб қолди. Қиз ахён-ахён бўй чўзиб, аланглаб кимнидир нигоҳлари билан излар эди. Маликнинг юрагига ажиб бир қувонч, ҳаяжон ёпирилиб кирди: «Мени қидиряпти, мени!..»

У завқ-шавқ қўйнида Ҳабибага бир зум термилиб тургач, даврада ўйноқлаб юрган ширакайф меҳмонлар тўпини оралаб қиз томон ошиқди. Худди сураткашга далда бергандай хонанда чираниб куйлар эди:

*Кел, кел, келақол,
Юрагимни олақол...*

— Жуда чиройли рақс тушаркансиз, — деди туйқус қизга яқинлашган Малик. — Чарчамадингизми?

Ҳабиба сураткашга худди чўчиб кетгандек кўз ташладио рақсдан тўхтади:

— Кўйинг-е.

Малик пайтдан фойдаланиб кизнинг билагидан тутди-да, дастурхон томон бошлади.

— Юринг, бир оз дам оламиз.

— Хў-ўп.

Шу чоғ сураткаш манглайини қоплаган тўзгин сочлари остидан хўмрайганча тикилиб турган Нусратбекка кўзи тушди.

— Зерикмайгина ўтирибсанми, чиновник?

— Чидаса бўлади, — деди куёвтўра зўраки илжайиб.

— Ўзинг-чи, адашмасам, зерикишга сира вақтинг йўқ, шекилли.

Малик Ҳабиба билан етаклашиб ўтаркан интилиб Нусратбекни елкасига дўстона нуқиб қўйди-да, сирли кўз қисди.

— Сенинг шарофатингдан, жўра.

Гули ва Нури қандайдир йигитлар билан жуфт-жуфт бўлиб ҳамон рақс тушишмоқда. Улардан андак нарида ўша барзангি видеокамерачи ивирсиб турибди. Куй-қўшиқ, тала-тўп авжида.

— Куёв-почча дўстингиз экан-да? — деди Ҳабиба жойига ўтираркан.

Малик ҳам ичимликдан қўйиб қизга узатди.

— Ха, эски қадрдон курсдош.

— Ўҳ-ў, билмаган эканман.

— Ҳабиба, — деди Малик ботинмайгина. — Тўйдан кейин сизни кузатиб қўйсам майлими?

— Йў-ў... Илтифот учун раҳмат, Малик ака. Узр, ҳозир акам келиб олиб кетади мени.

— Эсам... — баттар чайналди сураткаш. — Эртага бир учрашсак қалай, айтганча, суратларингизни тайёрлаб қўйгандим.

— Ўйлаб кўрай-чи, дарров бирор нима дейиш қийин.

Малик темирни қизигида босгиси келди.

— Ҳабиба, эртага кечки соат бешда сизни Анҳор бўйидаги «Чинор» ошхонаси ёнида кутаман. Келасиз-а?

Ҳабиба мужмал елка учириб, жилмайди.

— Ҳаракат қиласман.

— Ана бу бошқа гап, — дея шодон кафт ишқалади Малик, гўё, қиздан қатъий ваъда олгандай. Сўнг қадаҳ-

ларга конъяк қуя бошлади. — Илтимосимни рад этмаганингиз учун раҳмат.

— Қойил, ичклиликка бесуяк экансиз.

— Келинг, шу мақтовингиз учун ичайлик.

Малик авраб-авраб қиз қўлига қадаҳ тутқазди.

Иккиси бир-бирига термилиб бир зум жим қолишиди.

* * *

Ярим тун. Кўча бўйлаб тизилиб кетган неон чироқларининг ёғдуси алланечук хира. Машиналар қатнови сийрак. Малик хийлагина сархуш, ширакайф. Келинкуёвга эзмаланиб бахту иқбол, тагин алламбалолар тилагач ресторандан чиқиб кетди. Барибир тўй охирлаб қолган эди.

Малик фотоаппаратлари солинган чарм сумкасини gox елкалаб, gox орқалаб, гандираклаганича катта йўл бўйлаб юра бошлади. Димофи чоғ, лабида хиргойи. Аҳён-аҳён физиллаб ўтиб қолган машиналар томон шоша-пиша қўл чўзиб ўзича тўхташга ундан қўяди. Шу аснода ресторан ичидан отилиб чиқсан икки шарпа сураткаш томон илдам-илдам юришди. Кўзлари аланг-жаланг. Бирининг кўлидаги узун тиғли пичоқ чироқ ёруғида ярқираб кетди.

— Тезроқ, — бўғиқ ғулдиради иккинчиси, — кетиб қолади.

Бироқ улгуришмади, йўл бўйида қўл силкиётган Маликнинг ёнида милиция-патрул машинаси тўхтади.

— Ўтилинг, ўртоқ, — деди олд ўриндиқда ўтирган, лейтенант мундиридаги барваста милиционер.

Малик бир зум саросималаниб тургач, уловнинг орқа эшигини очиб ўзини салонга урди. Машина шитоб билан олға интилди.

Маликни таъкиб қилиб чиқсан шарпалар кўча бўйида депсинганча тўхташди.

— Ах, лаънати, қўлдан чиқардик-ку?!

— Тфу-у...

— Давай, машина тут! Орқасидан пойлаб бораверамиз. Тез бўл, барибир уйининг олдида тушиб қолади, шартта ишни саранжомлаймиз.

— Эсинг жойидами, ким айтди сенга, патруль уни уйигача элтиб қўяди, деб?

— Ну?..

— Энди уни шаҳарнинг бирорта хушёрхонасидан излаш керак.

- Ҳа-а, тфу-у...
- Кетдик, боссга вазиятни тезроқ айтайлик.
- Юр.

Машина елиб борарди.

Лейтенант орқага бош буриб ўйловчига синчков-синчков тикилди.

- Тўйдан чиқибсиз шекилли, а?
- Худди шундай, командир, — деб кулди Малик. Машина ёнида тўхтагандан бери ичидан қиринди ўтаётган бўлса-да сир бой бермасликка ҳаракат киларди.
- Ҳужжатлар жойидами, ишқилиб? — сўради лейтенант ўйловчининг чарм сумкасини сиртдан пайпаслаб кўраркан. — Қаерда яшайсиз?
- Олатўн кўчаси, 15-уй, 3-хонадонда. 2-қават чап томондаги эшик.
- Ўхў-ў, кайфингиз ҳам оби-тобига келибди-ю, а?
- Ҳа, ўртоқ командир. Лекин мен кўпроқ муҳаббат майдан мастман.

Лейтенант Маликнинг башарасига бир зум таажжубланиб тикилиб тургач, ҳайдовчи шеригига юзланди.

- Эй, энди нима қилдик?
- Нима қилардик, Олатўнга ташлаб қўямиз, — деди ҳайдовчи милиционер ўйлдан кўз узмай. — Мен уни танийман, кунбўйи хиёбонда кўкаради, сураткаш. Зарилман шахс.
- Милиционерлар қувноқ кулишди. Малик ҳам илжайиб жўр бўлди.
- Ҳамиша хизматларингизга шайман, акалар.

* * *

Фира-шира шом пайти. Сокин, хаёлчан оқаётган анҳор қирғоидаги ўриндиқда ўтирган Малик қўл соатига яна бир карра кўз ташлади. Келишилган вақтдан тағин роппа-роса бир соатча ўтди, бироқ Ҳабибадан дарак ўйк!

Йигитни кунбўйи ҳаволатиб юрган ҳаяжон, қувончдан асар ҳам қолмади. Ич-ичида алланечук изтироб, гусса кўзгалди. Теваракка маъюс-маҳзун кўз ташлади.

Анҳор эшилиб-тўлғониб оқмоқда. Қирғоқ бўйлаб ястаниб кетган сийрак дарахтзор сарғиш қизғиши хазонларга бурканган. Шоҳдан-шоҳга учиб-қўниб ўйноқлаётган кушлар чукури бир зум тинмайди.

Малик охиста ўрнидан турди. Андак нарида, «Чинор» қаҳвахонасида ҳаёт қайнайди. Ошпазу хизматчилар у ён-бу ён зир-зир қатнамоқда. Хўрандалар мўл.

Талабалик чоғлари Малик Нусратбек билан бу ерга тез-тез келиб туришар эди. Сув бўйида, сўлим дараҳтзор қўйнида мириқиб овқатланишга нима етсин?! Аммо бир гал хўб гаройиб саргузашт бўлган.

Худди шундай илиқ куз кечларидан бири эди. Сти-пендиядан чўнтаклари қаппайган икки дўст «Чинор»-нинг хўракларини қўмсаб келиб қолишиди. Иштахаларни баттар қитиқловчи хидлар анқиб турган кенгтина залда одам сийрак экан. Жимир-жимир оқиб ётган анхор яққол кўзга ташланадиган жойга ўтиришиди.

Бир пайт қаҳвахонада икки хурлиқо пайдо бўлди. Тор кофта, калта юбка қадди-қоматларини сириб туриди. Юз-кўзлари тўла табассум, нозу карашма. Улар шундоққина икки дўстнинг ёнидаги столга минг бир таманно билан жойлашишиди.

Маликнинг тили танглайида котди. Нусратбек ҳам ўқтин-ўқтин қизларга анграйиб қолар эди. Малик секин дўстининг биқинига туртди. Ҳайрату ҳаяжонга тўла кўзлари бир зум тўқнашиди.

- «Зўр-a!»
- «Зўр!»

Қизлар гўё ҳеч нарса пайқамагандай ўзаро чақчаклашиб гоҳ оёқ чалиштириб, гоҳ эгилиб-букилиб бутун гўзалликларини намойиш этишар эди. Нусратбек сулувларга суқланиб термилиш беҳудалигини англади, шекили, ҳалигина хизматчи келтириб стол устига қўйган шўрвага ташланди. Малик ҳам ноумид қошиқни қўлига олди. Шўрва мазалигина экан. Талабалар гўзалларни бир зум унугандай бўлишиди. Бироқ энди қизлар улар томон ишвали-ишвали кўз ташламоқда эди. Ҳатто, ўзаро шивирлашиб пик-пик кулиб ҳам олишиди.

— Эй, йигитлар, соат неча бўлди, билмайсизларми? — дея туйқус гап ташлади гўзаллардан бири.

Йигитлар баб-баравар, ялт этиб қизларга карашди. Баб-баравар қўл соатларига кўз ташлаб, баб-баравар вақтни айтишиди. Сўнг ҳаммалари баб-баравар кулиб юбордилар.

Кўзлари катта-катта, қорамағиз қизнинг номи Надя экан. (Кейинчалик аслида Норхол экани маълум бўлди.) Бодомқовок, соchlари калта кесилган қизнинг исми Са-

нам экан. (Кейинчалик аслида Светлана экани аниқланди.)

Қисқа танишувдан сўнг Надя-Норхол Маликнинг, Санам-Светлана Нусратбекнинг биқинига кўчиб ўтди. Кутимаган омаддан талабалар аввалига хўп довдирашибди, сўнгра, бир-бир қадаҳ ароқ сипкоришгач, тил жағлари чархланиб, кўллар югуриккина бўлиб қолди. Айниқса Нусратбек Надя-Норхолга канадек ёпишиб олди. Ҳаш-паш дегунча қизнинг ярим яланғоч сонларидан тортиб, бўлиқ сийналаригача бир-бир силаб чиқди. Ютоқди.

Улар шу алфозда еб-ичиб, ялашиб-юлқашиб аллама-халгача ўтиришиди.

— Энди турамиз, кеч бўлиб кетди, — деб қолди бир маҳал Надя-Норхол, Маликнинг кўмагида ўрнидан тураркан.

Санам-Светлана ишва билан Нусратбекнинг бўйнига осилди.

— Балки жентелменлар кузатиб қўйишар.

Йўқ, йигитлар кузатиб қўйишмади. Такси ёллаб қизларни уйларигача элтиб қўйишга аҳд қилишди.

Кизлар аэропорт томондаги эскигина ҳовлида ижарагир экан. Киракаш «Жигули» уларни бир зумда еткашиб қўйди.

— Энди бизнинг бир пиёла чойимизга марҳамат, — дея артистларча қулоч ёди Санам-Светлана.

Надя-Норхол ҳиринглаганича пастаккина дарвоза эшигини очишга киришди.

Теварак тун чодирасига бурканган. Тахта деворлар билан амал-тақал ўралган, айқаш-уйқаш, ташландикнамо уйлар алланечук хурпайиб, вахимали кўринади. Тор, қинғир-қийшиқ кўчадан қандайдир қўланса анқийди.

— Қани, марҳамат, йигитлар, — деди Надя-Норхол, бир амаллаб темир эшикни очаркан.

Теваракнинг тунги манзараларидан туйқус ҳушёр тортиди шекилли, Нусратбек қизлар билан секингина хайрхўшлапшиб, қайтиб кетиш пайига тушиб қолди.

— Бошқа сафар, бошқа... — дея ғулдиради у, тиргалганча ичкарига қистаётган қизнинг қучогидан чиқишга уннаб.

Уй бир даҳлиз, бир ошхона ва икки пастаккина ҳужрадан иборат экан. Ҳаммаёқ исқирт, тўзғин. Хирагина олтмишлиқ лампочка, чанг-ғубордан баттар хира тортиб.

ган. Ошхонада ювуқсиз идиш-товоқлар қалашиб ётибди. Атир-упанинг ўткир иси зах ва қандайдир қиринди исига қоришиб кеттган.

Кўлга тушган тутқундай қунишибгина ўтирган Нусратбекни Надя-Норхол тағин қистовга олди.

— Нусрат ака, орқа тугмамни бўшатворинг, жа-а қадаляпти, — деди у йигитни хужралардан бирига бошларкан.

Нусратбек дўсти томон нажот сўрагандай ҳасратли кўз ташладио ноилож қизга эргашди. Малик ўз гўзали билан овора эди. Санам-Светлана йигитнинг тиззасига ўтириб олиб, гоҳ ўниб, гоҳ нозик бармоқлари билан сочларини тароқлаб хирингларди.

— Сизни орқа тугма қийнамаяптими? — сўради Малик аллақандай ҳислардан тобора жўшаркан.

Санам-Светлана йигитта кўксини тутди.

— Йў-ў, мани кофтам қийнайти.

Улар чойшаблари кирланиб кеттган ётоқ-диван устида ўтиришган эди. Икковлари ҳам алланечук энтикканча бир-бирларини ечинтира бошлашди.

— Сизга ёқаманми? — сирли шивирлади қиз, оппок бўлиқ сийналарини йигит юзига тегизаркан.

Малик эҳтиросдан бўғриқиб аранг сас берди.

— Ҳа.

Икки ташна вужуд бир-бирига чирмашди...

...Малик илкис кўзини очганда дабдурустдан қаерда ётганини англаёлмади. Даҳлиз чироғининг ёғусидан гирашира ёришиб турган хона, ерда сочилиб ётган кийимлари аста-секин йигит хаёlinи жойига келтирди. Диваннинг бир четида шир яланғоч Санам-Светлана қунишибгина ухлаб ётар эди. Малик оёқ учидаги кўк жилдли адёлни қиз устига ташлаб қўйди. Шу пайт қўшни хужрадан ғўнғир-ғўнғир сас қулоғига чалинди. Сергак тортиб ўрнидан турдио оҳиста даҳлизига чиқди. Ошхона ёқда тимирскиланиб юрган сичқон шувиллаб ўтиб, ўзини йўлакка урди. Малик чўчиб тушди. Сўнг ҳануз ғўнғир-ғўнғир товуш келаётган хужра эшигидан мўралади.

Ярим яланғоч, сочлари тўзғин, аразлаган боладек қошқовоқлари уюлган Нусратбек ётоқ-диваннынг бир четида паришон ўтиради.

— Кўрқманг, ҳечқиси йўқ, — дея меҳрибон онадек уни овутарди Надя-Норхол, полга тиз чўккан кўйи йигитнинг сонларини уқаларкан. — Биринчи марта кўпин-

ча шунақа бўлади. Озгина суст босди сизни, қаттиқ ҳаяжондасиз. Кўрқманг, қани, яна бир ҳаракат қилиб кўринг-чи...

Малик ўзини шартта панага олди. Охиста изига қайди.

Эрталаб тунги ҳамма саргузаштлар, муҳаббатли боқишилару, эҳтиросли ўпишишлар шунчаки тушга ўхшаб қолди. Қизлар худди банк хизматчилариdek совуқкон ва жиддий қиёфада бўсафада туриб олишди.

— Бизларниям тирикчилик, — деди Санам-Светлана хурпайиб. — Ҳисоб-китобни тўғрилаб қўйинглар. — Сўнг соч тараётган Надя-Норхолга шикоятомуз мингирлади. — Тағин нақ эрталабгача-я?! Ўлар бўлсам ўлиб бўлдим.

Икки дўст баб-баравар бир-бирига тикилишди. Баб-баравар бош чайқашиб, баб-баравар чўнтакларини қоқиштира бошлишди. Хайрият, буларда ҳам талабалар учун ҷегирма бор экан! Бир амаллаб қутулишди.

Атиги ўн-ўн беш дақиқадан сўнг икки дўст автобус бекати томон шалвирабгина келишар эди.

Малик хаёлчан одимлаётган Нусратбекнинг елкасидан дўстона тутди.

— Қалай! Зўр-а!
— Зўр!

Бироқ анхор бўйида нақ икки соат беҳуда ивирсиган Маликни бундай ғаройиб хотиралар ҳам овутолмади. Таъби тирриқ, ичига чироқ ёқса ёришмайди.

У бўшашганча зим-зиё йўлак зинапоясида ўз хужраси томон хорғин кўтарила бошлиди. Шу асно унинг эшиги ёнида ивирсиб турган аллақандай шарпа қадам товушларини эшилдию, лип этиб юқориги қаватга чикиб кетди. Бироқ уни Малик пайқамади. У ҳувиллаб ётган хужрасига кириб, чироқни ёқди. Хонада ўнлаб Ҳабибалар миийифида кулиб, йигитга айборона тикилиб турар эди. Айниқса, дераза токчасига қўйилган каттакон сурат яққол кўзга ташланади. Малик ўртаниблар кетди. Асабий бир тарзда ўзини каравотга ташлади: «Нега келмади, нега?!»

Йигит юзига ёстиқ босганича хийла вақт сулайиб ётаркан, ногоҳ, Ҳабибани соғиниб кетганиданмас, беҳуда қизни кутиб, иззат-нафси топталганидан изтироб чекаётганини англаб етди. Ахир, не-не қизлар унинг изидан соядай эргашган! Малик шунчаки, ҳазиллашиб учрашувга таклиф этган чоғлар, йигитдан олдин келишилган жойга

ҳозири нозир бўлишган. Малик атай ўзини панага олиб, бетоқат кутаётган гўзалларнинг интиқ-интиқ алланглашини ҳузур билан қузатган. Хўш, бу ёғи неча пулдан тушди энди? Ҳабиба нега келмай қолди? Наҳотки, уни писанд қилмаган бўлса?! Ё...

Малик ёстиқни бир чеккага улоқтириб, иргиб ўрнидан турди. Стол устидаги телефон аппаратига хаёлчан тикилди. Телефон гўё ҳаммаси учун хижолат чекаётгандай, алланечук гужанак тортиб турар эди.

«Қани, бир сим қоқиб кўрай-чи» — ниҳоят бир қарорга келди йигит, девордаги сурат чеккасига ёзиб қўйилган Ҳабибанинг телефон рақамларига синчков кўз ташларкан.

Сураткаш шашт билан аппарат гўшагини кўтардию, бироқ анҷайин ботинолмайгина рақам терди. Сўнг гўшакдаги узун-узун чақирув гудогига тек қотган кўйи қулоқ солди. Қулоқ сола-сола беихтиёр яна алоқани узиб қўйди: «Э, нима зарил менга?!»

Малик хона бўйлаб у ён-бу ён асабий бир тарзда юрина бошлади. Бир оздан сўнг лабларини қатъий қимтиб тағин телефонга ташланди: «Еб қўймас, қани, нима гаплигини билай-чи?»

Бу сафар илк узун гудок таралар-таралмас у тарафда гўшак кўтарилди.

— Алло-о, алло-о, ким бу? Алло-о, кимсиз, эшитаман сизни! — деди аллақандай эркак ҳовлиқиб.

Алланечук асабий, ҳаяжонли товушдан чўчиб кетган Малик беихтиёр трубкани жойига қўйди. «Бошқа ёкка тушиб қолдим, шекилли?» — ўйлади у фижиниб. Тағин бир оз хаёлчан, бўшашиб тургач, яна рақам терди. Бу сафар у тарафдан аёл кишининг баттар асабий, йиғлоки товуши эшитилди.

— Алло-а, эшитаман. Гапирсангиз-чи?!

— Алло, бу... бу Ҳабибаларнинг уйими? — дея аранг сўради Малик. Сўради ўзининг алланечук бўғиқ, титроқли товушидан фашланиб, тарақлатганча трубкани жойига қўйди. У тарафда ҳовлиқма аёл «ҳа» дейишга зўрга улгурди. Бироқ ўз хаёллари билан андармон йигит бунга эътибор бермади. Депсиниб, фудраниб ўрнидан турдию ечинишга тутинди. «Би-ир, ювиниб олай, енгил тортман, тупурдим ҳаммасига», — хаёлидан ўтказди у.

Малик тизиллаб отилаётган душ тагида ҳузурланиб узоқ чўмилди. Дарҳақиқат, енгил тортгандай бўлди.

Юмшоқ патли сочиққа обдон артинаркан, кўз ташлаб, ўзининг чайир, бақувват қоматидан, аллақан-дай ўқтамлик, қатъият ёғилиб турган хушбичим юз-кўзидан фууруланди. Илжайди. Сўнг ивирисиб, енгил уй кийимларини кийди. Хонанинг у ёқ-бу ёғини йифиштирган бўлди.

Бир пайт эшик қўнфироғи устма-уст жириングлади. Ҳар хил олди-қочди хабарлар, ялангоч аёлларнинг суратла-ри босиладиган газетани эндиғина қўлига олган Малик чўчиб тушди.

Кўнфироқ тагин устма-уст жириングлади.

«Ким экан бемаҳалда?» — ўйлади сураткаш, у ёқ-бу ёғини орасталаган кўйи бўсаға томон юаркан.

Жаҳл билан эшикни қия очди. Шу пайт тўшпонча ўқталган чарм қамзулли уч барваста киши баб-баравар ичкарига интилди.

— Кимирилама! Милиция! — дея қичқирди калта сочлари тиканакдек, ялпоқ юз киши, Маликни бурчакка кисаркан.

Шерикларидан бири ванинанинг, бири ошхонанинг эшигини тепиб очди. Ҳанг манг қотган Маликнинг юраги қинидан чиқкудек бежо ураг, тиззалари қалт-қалт тит-рар эди.

— Ўртоқ капитан, — дея ичкаридан бўғиқ овоз берди улардан бири, — объект топ-тоза, хеч ким йўқ.

Тиканак соч Маликнинг биқинидан тўппончасини олди.

— Қани, қўлни туширинг, ичкарига марш!

Малик довдир-совдир ётоқ томон юрди. Ёнма-ён, эҳтиёткорона одимлаётган тиканак соч, девордаги суратлару токчадаги портретга синчков-синчков тикилди.

— Тинчликми, ўртоқлар? — сўради аранг гулдираб Малик.

— Капитан Акромов, — деди тиканак соч, хизмат гувоҳномасини чиқариб, йигиттга нуқиркан. — Жиноят кидириув бўлимиданмиз.

Изқуварлардан бири — сап-сариқ, қирғийбурун йигит дераза ёнида, мўйловлари қалин, дўнгпешона шериги эса йўлакда тек қотган эди.

— Тинчликми, ўртоқлар? — тагин фудраниб сўради Малик, бошқа гапга тили айланмай.

— Нотинчлик, — деб пўнгиллади капитан, сўнг ка-работга ишора қилди. — Қани, ўтиринг-чи.

Малик довдираган кўйи каравотнинг бир чеккасига омонат чўқди. Капитан фотоанжомлар сочилиб ётган стол ёнидаги стулни фижирлатиб ўтири.

— Исли шарифлари? Иш жойингиз?

— Мен... Ҳасаниф Малик. Сураткашман, оддий. Иш жойим хиёбон.

Капитан девордаги суратларга ишора қилди.

— Бу қиз ким?

— Танишим... Ҳабибаҳон.

— Жуда яхши танийсизми уни?

— Тўғриси... — хижолат билан чайналди Малик. —

Тўғриси... жуда яхши танишни истайман. У билан атиги икки марта учрашганмиз. Биринч гал, шанба куни хиёбонда. Ўшанда сал-пал танишдик. Сўнг кеча «Нур» ресторанида... бир дўстимнинг тўйида учрашиб қолдик. Бор-йўғи шу.

Капитан шубҳаланган бир киёфада хонанинг у ён-бу ёнига ҳануз кўз югуртирас экан, телефон аппаратига имо қилди.

— Бундан бир соатча аввал бирор ерга қўнғироқ қилмадингизми, мабодо?

— Ҳа, — кўзларини пирпиратди Малик. — Қўнғироқ қилдим.

— Қаерга?

Малик тик қотишган кўйи ўзига синчков-синчков тикилиб турган изқуварларга уялганнамо кўз ташлаб олди.

— Шу... Ҳабибаҳонларникига.

Капитан ўзича бепарво стол устидаги суратларни тит-килай бошлади

— Нима мақсадда?

— Нима десам экан... ҳалиги... Ҳабибаҳон билан бугун учрашмоқчи эдик. У... у келмади. Сўнг хонамга келдиму хавотирланиб уларникига қўнғироқ қилдим. Трубкани аввал бир эрқак, кейин... бир аёл олди. Уялиб гаплашолмадим. Шу... А, тинчликми, командир?

— Айтдим-ку, нотинчлик! — деди капитан столни асабий чертганча сураткашга синовчан тикиларкан. — Бу қиз ўтган тунда, ўша «Нур» ресторанидаги тўйда йўқолиб қолган.

Малик беихтиёр ўрнидан иргиб турди.

— Йўғ-е?! Қандай қилиб?!

— Ҳа, ахвол шунаقا, — деди капитан ўрнидан ту-

аркан. Излайпмиз. Сизнинг қўнғироғингиз қизнинг ота-онасида шубҳа уйғотиб дарҳол бизга хабар қилди. Мана, учрашиб турибмиз.

* * *

Малик кунни аранг кеч қилди. Кўча-кўйни ёритиб юборган катта-кичик, хира-ёруғ чироқлар, гўё бутун зулматни унинг ичига қувиб, қамагандек эди. Юраги фаш, эзғин. У бугун одатдаги қувноқ, бегам қиёфага киролмади, одатдагидек сўзамоллик билан мижозларни чорлаётлади. Аҳён-аҳён минғирлабгина хиёбоннинг бир четида бўшашиб турди. Иттифоқо, бир пайт ёнгинасидан хув, ўша кунги тажанг, тўнг кампир ўтиб қолди.

— Ҳа, болам, — деди у сураткашга киноали кўз ташлаб, — бугун чакагинг ўчган? Нима жин тегди сенга? Қани, ўзингни-ўзинг би-ир суратга опкўй-чи, зора, буришган апting сип-силлиқ бўлиб қолса.

Малик ўша кунги ҳазили учун кампир боплаб ўч олганидан яйраб-яйраб қулди. Бироқ барибир бу шилемшиқ фашлик, алланечук безовталиқдан қутуломлади. Ҳатто уч-тўрт мижозни у-бу баҳона билан суратга туширмай, қуруқ қайтарди.

Унинг жуда-жуда ичгиси келар эди. Ароқ ичидаги бор-йўғ аламни ювиб кетадигандек туюлди. Шу сабаб хиёбон биқинидаги таниш қаҳвахонага кирди. Қаҳвахона ёруғ, шинам. Хўрандалар сийрак. Аллақандай майин, маҳзун мусика таралиб турибди. Зал пештоқидаги сонсаноқсиз, ранг-баранг митти чирокчалар жозибали-жозибали жимиirlайди.

Малик оқ, қизил ичимликларга лиммо-лим, катта-кичик шишалар териб қўйилган, баланд пештахтали бўлма томон юрди. Пештахта ортида сураткашга тузуккина таниш бўлган Рашидхон куймаланиб турибди. Рашидхон жуда ғалати нусха, қизларга ўхшаб қош учириб, кўз ўйноқлатиб, муқом билан гапиради. Бироқ қўли очик, хушмуомала йигит. Бир-икки марта Маликка ҳам яхшигина қарз бериб қўнглини топган. Мана, кутилгандек, сураткашни тағин очиқ чехра билан қарши олди.

— Ассалому алайкум, Маликжон акажон! Намунча шаштингиз паст? Соғликлар жойидами?

— Э, нимасини айтасиз, — сураткаш пештахтага хорғин суюнди. — Чарчадим. Ўзларинг қалай? Савдо авжими?

— Тузук, акажон!

Малик фотоанжомлар солинган сумкасини пештахта устига қўйди.

— Рашидхон, мана шу ашқол-дошкол эрталабгача сизда тура турсин, хўпми?

— Бемалол, Маликжон акажон. Ву-уй, намунча оғир бу ўлгур.

— Сураткашликка тегишли ҳамма нарсани кўтариб юрибман. Бу ҳам бир лўличилик-да.

— Ҳечкиси йўқ. Хоҳласангиз, ҳар куни ташлаб кетинг. Шу ерда тураверади, шкафчамга солиб қўяман. Хоҳласангиз, — Рашидхон қош қоқиб, илжайди, — ўзингизга ҳам жой топилади, ҳе-ҳе...

Хизматчининг завқ билан кулишидан Маликнинг бир зум энсаси қотиб турди.

— Раҳмат, Рашидхон. Тўғрисини айтсам, бугун бирип тўйиб ичмоқчиман. Ичволиб манавиларни судраклаб юриш малол келади-да.

— Вой, ичмоқчимисиз? — беадоқ таажжуб билан кўз пирпиратди Рашидхон. — Қўйинг-е, Маликжон акажон, сизга ярашмайди.

— Озгина, хўпми?

— Озгина бўлса, хўп. Аммо-лекин ҳаддингиздан ошмайсиз, мен буни истамайман.

Дарҳақиқат, ичкилик Маликнинг дард-ғуборини ювиб кетгандай бўлди. У залнинг бир чеккасидаги столга бағрлаб ўтиаркан, иккинчи қадаҳдан сўнг, ҳалигина хизматчи аёл келтириб қўйган овқатга иштаха билан ташланди. Ақл-идроқи алланечук тиниқлашиб, ўтган тунги ташриф тафсилотлари тағин бир-бир хаёлида жонлана бошлади.

Қизиқ, тиканак соч изқувардан Ҳабибанинг йўқолиб қолганини эшитдию туйқус севиниб кетди. Ҳатто, қувончдан қийқириб юборишига сал қолди. «А-ҳа-а, сабаби бу ёғда экан-да, — лип этиб хаёлидан ўтди унинг, — атай келмай, масхара қилди, деб юрибман-а?!»

Бироқ унинг афт-ангорида бир дамгина ярқ этиб ўтган қувонч шарпаси зийрак изқуварларнинг нигоҳидан четда колмади.

— Ия, — деб луқма ташлади дераза ёнида турган ходим. — Бирор ўламан, деса, сиз куламан дейсиз-ку?! Тинчликми?

Малик жўяли жавоб тополмай талмовсираб қолди.

Шу баҳона бўлдию тиканак соч изқувар уни аёвсиз сўроққа тута кетди. Сураткаш ўша кун патрул машинасиға илашиб қолганидан тагин бир карра хурсанд бўлди. Изқуварлар олдида ўзини оқлаб олди. Нихоят, улар жўнаб қолишли.

— Шаҳардан уч-тўрт кун чиқиб кетмай туриңг, — деб тўнғиллади тиканак соч, хануз шубҳа билан хонани тарк этаркан. — Керак бўлсангиз чакирирамиз.

Изқуварлар кетишли. Бироқ алланечук таҳлика, таҳдид хужра бўйлаб изғиб қолди. Малик хийла вақт гангиб, ивирсиб ўтиргач, қўркув ва ваҳима билан тўшакка кирди. Ана шу шилимшиқ қўркув ва ваҳима уни бугун кунбўйи таъқиб қилиб юрди.

Малик чуқур тин олиб, галдаги қадаҳни бўшатди.

* * *

У тун чироқлари хира бўзарган кўчалар бўйлаб узок тентигач, ниҳоят, ўзи яшайдиган кварталга бурилди. Кўп қаватли уйлар сархуш йигитга жавдирабгина тикилиб тургандек тумолар эди. Шу дам Ҳабибанинг мъсум юзи, пирпираётган кўзлари Маликнинг яна бир карра хаёлида жонландиу юрак-бағри ғалати сирқираб кетди. Ана шу сирқирап, ширин изтироб узок-узоқ чўзилишини истар эди у. Шу сабаб илк ҳомла шарпасидан энтиккан аёлдай, бетон ариқ лабидаги дараҳт танаисига беҳол суюнди. Фарид бир қувонч оғушида беихтиёр пичирлади: «Ҳабиба...»

Малик Ҳабибани чиндан ҳам севиб қолганига шу дамдагина рўй-рост ишонди. Ҳув, хиёбондаги илк учрашувдаёқ юрагига силқиб чиқсан илиқлиқ, тобора қайнок хисларга айланиб келаётганини яққол ҳис этди. Беихтиёр ўкириб-ўкириб йиғлагиси келди.

Малик яна довдир-совдир юриб кетди. Тун салқин. Енгил эсаётган куз эпкими дараҳтларнинг қовжироқ баргларини шитирлатади. Сураткаш қадрдон тўрт қаватли уй биқинига етган жойда тахтадай қотди. Ҳатто бутун сархушлиги ҳам тарқаб кетгандай бўлди. Кўзларини ишқалаб яна сергак-сергак тикилди. Йўқ, аник, иккинчи қаватдаги, ўзига тегишли деразада лип-лип ёғду ўйноклар эди. Хужра ичидан таралаётган бу тарам-тарам нур шубҳасиз кўл фонариники.

«Ичкарида кимдир тимирскиланиб юрибди!» — ваҳима билан ўйлади Малик, жон-жаҳди билан уй йўлаги

томон югуаркан. Йўлак зим-зиё эди. У ҳансираб, пай-
пасланиб иккинчи қаватга кўтарилиди. Чиндан-да, хужра-
сининг эшиги қия очик!

— Кимсан?! Жилма жойингдан! — бўғиқ овоз берди
Малик, қўрқа-писа уйга кириб бораркан.

Тимирскиланиб юрган шарпа шашт билан қад рост-
лаб, қўл фонарининг ўткир нурларини Маликнинг юзи-
га қаратди. Малик кўзлари қамашиб, довдираганича кафт-
ларини юзига босди. Шарпа пайт пойлаб, йўлак томон
отилди. Малик илкис интилиб унинг кийимининг алла-
қаеригадир чанг солди. Бироқ туйкус гарданига тушган
муштдан ихраб қулади.

Шарпа аввал йўлакни, сўнг зинапояларни тарақлатиб
қочдио кетди. Малик оғриқ ва аламдан тўлғониб бир-
амаллаб ўрнидан турди. Пайпасланганича чирокни ёқди.
Ёқдию ичкаридаги алғов-далғовни кўриб ҳангу манг қот-
ди. Ерда рўзгор буюмларию ҳар хил фотоанжомлар,
тайёр суратлар сочилиб ётар эди. Девордаги, дераза
токрасидаги Ҳабибанинг расмлари ҳам юлқиб ташлан-
ган. Малик юрагининг гурс-гурс уришига қулоқ соглан-
ча, деворга беҳол суюниб қолди. Шундагина чап қўлини
ҳануз мунт қилиб турганини пайқаб, бўшашибгина кафт-
тини ёйди. Ҳойнаҳой, ҳалигина шарнага ташланган чоғ,
юлқиб олган бўлса керак, кафтида бир дона йирик туг-
ма бор эди. «Қизиқ, ким бўлди бу?! Ўғрими?» — ҳаё-
лидан ўтказди Малик, тугмани чўнтағига солиб қўяр
экан. Сўнг кийим жавонининг ичини титкилашга тушди.
Йўқ, бир даста пул яшириб қўйган жойида турибди.
Сўнг уй ичини, иш столининг тортмаларини бир-бир
қўздан кечиришга тушди. Кўп ўтмай у дўсти Нусратбек-
нинг тўйида кадрлар билан тўлдирилган плёнка ўрами
йўқолганини пайқади. «Об-бо, чатоқ бўлди-ку» — лип
этиб ҳаёлидан ўтказди Малик, стул устига ҳоргин ўти-
риб қоларкан.

Бир пайт эшик қўнфироғи устма-уст жиirlingлади. Ма-
лик сапчиб жойидан туриб кетди. Юз-кўзига тахлика,
ҳаяжон оралади. У йўлакка чиқди. Шундагина эшик
ҳануз ланг очиқлигини, бўсағада ўзига таниш уч ғўдай-
ган қиёфа — ўша изкуварлар турганини кўрди.

— Киришга мумкинми, ўртоқ сураткаш, — деди ўша
тиканак соч, ялпоқ юз капитан, ичкарига бош сукиб. —
Мехмон келишини билибсиз-да, а, эшикни ланг очиб
қўйибсиз.

— Ассалому алайкум, кир... кирингизлар, — деб ғулдиради Малик, ранг-кути ўчиб.

Изқуварлар сипогарчилик билан ичкари киришди. Киришдиу хужрадаги алғов-далғов манзарани кўриб дархол сергак тортишди.

— Нима гап? — Маликка таажжубли тикилди капитан. — Кўчиб кетяпсизми?

— Йў-ў, ишдан қайтсан, эшик очик, ичкарида аҳвол бу... ўғри тушибди.

— Ўғри?! Ўғри тушганини қаердан билдингиз? Бирор кимматбаҳо нарсангиз йўқолибдими?

— Йў-ў, — тағин чайналди Малик, — пулим, нарсаларим жойида, лекин...

— Хўш, нима, «лекин?» — бетоқатланди капитан.

— Кечаги... дўстимнинг тўйида кадрлар туширилган плёнка ўрами йўқолибди.

— Плёнка?!

Изқуварлар тезгина кўз уриштириб олишди.

— Ҳа, плёнка, — бўшашибгина такрорлади Малик.

Тиканак соч сураткашни синчковлик билан бош-оёқ кузатаркан.

— Ўша плёнка бизга ҳам керак, — деб пўнғиллади, — шунинг учун бу ерга келдик.

— Рост... айнан ўша плёнка ўрами гум бўлибди. Адашаётганим йўқ, устига Нусратбекнинг тўйи, деб ёзиб қўйгандим.

Шу пайт хужра ичини синчилаб текшириб юрган дўнгпешона изқувар қичкириб юборди.

— Ўртоқ капитан, буни қаранг!

Зийрак изқувар имо қилган жойда, каравот чеккасидаги ёстиқ устида узун соч толаси ястаниб ётар эди.

— Аёл кишининг сочи, — деб қўйди изқувар, топилдикини рўмолчаси билан йигиб оларкан.

Буткул ҳангуманг Малик гангиганича изқуварларга бир-бир анграяр эди.

— Тушунарли, — пўнғиллади капитан, — соч толасини текширувга олинг. Бошқа нарсаларга тегмай туринглар. — Сиз эса... — у Маликка кинояли илжайди, — биз билан юринг.

Малик беихтиёр орқага тисарилди.

— Қаёққа?! Мен...

— Ҳозирча тушунтиришга хожат йўқ, — тиканак соч сураткашнинг тирсагидан тутди, — шундоқ ҳам анча-

мунча масала ойдин. Кетдик, ўша ерда бафуржга гаплашамиз.

Малик илкис силтаниб изқуварнинг тутимидан қутулию ташкарига отилди. Саросимада колган тиканак сочқочоқниң ортидан ташланди.

— Тўхта! Отаман!

Бирок Малик зинапоялардан фавқулодда эпчиллик билан сакраб-сакраб тушиб кўздан йўқолди.

* * *

Бир кечада ғижимланган қофоздай бўлиб қолибди: соқоллар ўsicк, қовоқлар салки, кўз киртайган.

«Ўн ёшга кариб кетдим-ов» — вахима билан ўйлади Малик, йўл чеккасида турган машина ойнасига ўзини солиб кўраркан.

У тунни бир амаллаб Рашидхонникида ўтказган эди. Рашидхон кеча ичкилик илинжида кирган сураткашга қош қоқиб, «ўзингизга ҳам жой топилади» дея лутф этган пайт, хойнахой, фаришталар «омин» дейишган экан. У ташвишу таҳликада титраб-қақшаб, ахён-ахён теваракка олазарак кўз ташлаб қўяётган Маликни ортиқча саволга тутиб ўтиргади. «Қўшнимизникида тўй бўлаётган экан, биласиз-ку, чарчаганман, ортиқча шовқин-суронга тобим йўқ...» — дея фудраниб, илжайиб сир бой бермасликка харакат қилди Малик.

Сураткаш ҳансираган кўйи етиб борганида эндиғина кетишга шайланиб турган Рашидхон:

«Марҳамат, — деди машина эшигини очиб. — Одам фанимат, азиз меҳмоним бўласиз, Маликжон акажон».

Малик ўзини «Жигули»нинг олд ўринидигига ташлади. Ич-ичидан силқиб келаётган титрок, таҳлика ҳануз-ҳануз босилмаган эди. Шу боис Рашидхоннинг гоҳ хириинглаб, гоҳ шангиллаб гап чайнашларини лоқайд ва паришон тинглади.

«Хитойликлардан тибет массажини ўрганганман, — дея мақтанарди сертакаллуф мезбон. — Ўн беш дақиқада чарчоғингиз тарқаб, тоғ такасидай ирғишлийдиган бўп қоласиз, Маликжон акажон, ҳе-ҳе...»

Шу тун уйкунинг тайини бўлмади. Устига-устак, алоқчалоқ тушлар кўриб чиқди. Эрталаб кечагидан-да зиёд завқ-шавққа тўлган, хушхандон Рашидхоннинг бепарда латифалари қуюнида тағин хиёбонга етиб келди. Омонатга қўйган фотоанжомларини олиб, елкасига осди. Би-

роқ одатдагидек хиёбон оралаб, мижоз чорламай, ўғри мушукдек теваракка аланглай-аланглай хилватроқ жойдаги узун ёғоч ўриндиқقا бориб ўтирди. Рашидхоннинг жон бериб-жон олиб кўнглини топишга уннашлариданми, ё чаракълаб чиққан қуёш тафтиданми, ё тобора гавжумланаётган хиёбон файзиданми, ҳар нечук, унинг тунги таҳликалари хийла босилгандек эди.

Малик қизгиш-сарғиши хазонлар тўшалиб қолган дарахт пойига ўйчан термиларкан, тунда туйқус қочиб бекор қилганини чуқур англади. Қочиб гўрга борармиди, барибир, топиб олишади-ку?! Аммо энди бари бефойда, то қиз топилиб, ҳақиқат ойдинлашгунча пусиб юриши керак. Агар кўлга тушгудек бўлса...

Малик тор, қўланса ислар анқиган бетон камерани хаёлига келтириду юраги орқага тортиб кетди.

«Йў-ўқ, бирор чорасини топишим керак, — тиззала-рига тирсак тираб, бош чангллаганича ўйлади сураткаш. — Ё... таваккал қилиб ўзимни топширсамми кан органга? Йў-ўқ, барибир ишонишмайди, дарров тикибгина қўйишади. Эҳ, нима қилсан экан-а? Маслаҳатгўйим борми менинг? Ия, Нусратбек-чи?! Кайвони йигит, бирор маслаҳат берар...»

Малик бир кўнглида Нусратбекка бош уриб боришни истамаётган бўлса-да, бироқ бошқа иложи йўқлигини чуқур англади. У оғир кўзгалиб, ўрнидан турди.

* * *

Малик кенг кириш йўлаги ойнабанд, тевараги ба-ландағи шитин девор билан ўралган «Электр жихозлари заводи»га етиб борганида қуёш тик келиб қолган эди. У автобусдан тушиб, елкасига осиб олган ҳамишаги чарм сумкасининг боячидан сикимлаганича серқатнов йўлни кесиб ўтди. Завод қаршисидаги кенг, текис майдончада турли-туман автоуловлар қантариб қўйилган эди. Малик улар орасидаги Нусратбекка тегишли яшил «Жигули»ни таниб, кувониб кетди: «Ростданам шу ерда экан».

У хиёбондан дўстининг уйига сим қоққанида майнинг аёл товуши (хойнахой, келин) Нусратбекнинг ишхонада эканини айтди. Бироқ Малик ишонқирамади, ўзича ҳазиллашган бўлди: «Чиллалик қуёвга ишда бало борми?» Бироқ майн товуш сохибасининг ҳазилга хуши йўқ шекилли, индамай гўшакни қўйиб қўйди.

Малик аланглаганича завод йўлагига кирди. Ҳар тарафи ойнабанд, кичкина туйнукли бўлмада хурпайиб ўтирган қоровул кампир сураткашга нохуш кўз ташлади.

— Товариш, пропуск.

— Я из редакции, — мингирилади Малик имо-ишора билан. — Нусратбек Миролимович чақирирганлар.

Кампир йигитнинг фотоанжомларига синчков-синчков кўз югуртириб, ишонч ҳосил қилди, шекилли, ичкарига имо қилди.

— Второй этаж, третий кабинет.

— Спасибо.

Малик чаққонгина иккинчи қаватга чиқиб, аллақандай бўёқлар ҳиди анқиган узун, тор каридор бўйлаб ўараркан, Нусратбекка тегишли хонани қийналмай топди.

— Юлдузни бенарвон урадиганларга саломлар!

Малик кабинет эшигини бетакаллуфлик билан очиб, ўзича дўстона, ўзича қувноқ қийқирди.

Кентгина хона тўрида, ўз иш столи тортмасини тит-килаб турган Нусратбек чўчиб бош кўтарди. Бўйинларини сириб турган кўк «водолазка» устидан кийган кулранг пиджаги ўзига хўб ярашиб турарди. Бироқ кўзлари киртайиб, ранг-рўйи синицкан.

— Малик? Ўзингми, нима қилиб юрибсан бу ерда?

— Мен-ку бир саёқ, ўзинг-чи, икки кунлик күёв, чимилидиқда ўтириш ўрнига... бу ерда бало борми сенга?

Икки дўст енгилгина бағирлашиб кўришган бўлишиди.

— Э, сўрама, — деб қўл силтади Нусратбек, жойига бўшашибгина қайтиб ўтиаркан, — чақиририб олишди, завода ишкал...

— Ишкал?!

— Ха, буюртмамиз бўйича немис биродарлар ноёб ускуналар юборишган экан. Бир хафта олдин темир йўл базасига келиб тушганди. Ана шу қимматбаҳо молимиздан айрилиб қолдик. Нак юз миллион сўмлиг-а?!

— Йўғ-е, қандай қилиб йўқолади?

— Э, — фижинганнамо қўл силтади Нусратбек, курси суянчигига ясталиб. — Сохта ҳужжат билан юк машинасига босишгану гум қилишган-да. Ўзларини завод вакилларидай тутишган.

У ўзини бемалол, хушхандон тутишга уринаётган бўлсада, тез-тез гапдан чалғиб паришон ияқ қашлаб қолар, ўқтин-ўқтин қўрқув билан эшик томон кўз ташлар эди.

— Хўш, ўзларини қанақа шамол учирди бу ёқка? — савол назари билан тикилди Нусратбек дўстига.

Малик гапни нимадан бошлишни билмай чайналиб қолди. Ахир, йиғлаб борсам ўкириб чиқди, деганларидай, дўстининг ташвиши ҳам ўзиникидан камга ўхшамаяпти.

— Ўзим шунчаки, — минғиллади сураткаш, — йўлим тушиб қолди, қоровулдан сўрасам, шу ерда экансан, бири, ҳол-аҳвол сўраб қўйяй дедим-да.

Нусратбек дўстининг гапларини деярли эшитмади, у ялтироқ стол устидаги тахлам-тахлам қофозларга паришон тикилиб қолган эди. Туйқус Маликни электр тўқ ургандай, бутун аъзои бадани нохуш жимиirlаб кетди. Қошлари чимирилиб, тили танглайида қотди. Дўсти кийганд қулранг пиджакнинг пастки тутгаси йўқ эди! Тутгма ўрнидачувалиб турган иплар унинг қўпполларча юлқиб олинганидан дарак бериб турибди.

— Нус... — аранг сас берди Малик.

— Нима?! — чўчиб унга юзланди Нусратбек, бироқ дўстининг ўқрайиб турганини кўриб, беихтиёр яна кўзини олиб қочди.

— Нус... — тағин дўстини чорлади Малик. — Нега типирчилайсан?

— Қўйсанг-чи, нималар деяпсан?

— Нус, пиджагинг чиройли экан-а?

— Ҳа-а, тоза турецкий... хоҳласанг, сенга ҳам топилади.

— Нус, — Малик ўрнидан туриб дўстининг тепасига келди. — Бунақа зўр пиджакни эҳтиёт қилиш керак. Қарагин-а, бегона аёлнинг соч толаси илашиб қолмасин, келиндан нақ таъзиiringни ейсан-а?

Стол қиррасига қўл тираб, кинояомуз тикилиб турган дўстига Нусратбек қўрқа-писа кўз ташлаб, илжайди.

— Нималар деяпсан Малик? Қанақа аёл, қанақа соч?

— Шунчаки айтдим-да. Ну, тутгларингта эҳтиёт бўл, дўстим. Ана, қара, ҳалитдан битта тутманг тушиб қолибди.

Нусратбек баттар ранг-кути ўчиб, аввал тутгма ўрнига, сўнг пастдан юкорига — дўстининг юзига анқайиб тикилди.

— Нега бақадек бақрайиб қолдинг? — кинояомуз хиринглади Малик. — Жа-а ноёб тутгма эдими? Истасанг, менда битта бор, шуни қадаб ол.

Сураткаш жинси камзули чўнтағидан, хув, тунда кафтида қолган тугмани чиқариб дўстига кўз-кўз қилди, сўнг тағин ҳавога бир иргитиб илиб олдию тағин жойига солиб қўйди.

— Макс, — қулт-култ ютинганича аранг сас берди Нусратбек. — Сенга... сенга ҳали ҳаммасини тушунтираман. Олдингда заррача айбим йўқ.

— Биламан, фариштасан, қулфбузар, — дея аччиқ ҳиринглади Малик эшик томон йўналаркан.

Шу аснода у бўсағада қўлларини кўксида чалиштирганча сақич чайнаб турган ҳайбатли, қоракўзойнак таққан нусхага кўзи тушди. Бу тўй оқшомидаги ўша бароқ-кош видеотасвири эди. Бироқ Малик ўзини танимаганга олиб унинг ёнидан сирпанибгина ўтиб кетди. Туйқус юз берган учрапувдан юраги гурс-турс уриб ётганини эшикни чала ёпиб, йўлак бўйлаб юргурилаб кетгандан сўнггина пайқади.

* * *

У ўлгудек очиққан эди. Ахир, кечадан бери томоғига урвоқ ҳам солмаган, гўё ичига ўт тушгандек гоҳ у, гоҳ бу ерда коса-коса сув сипқориб юрган эди-да. Ҳойнаҳой, кутилмаган воқеа нафақат жиноят илдизини, балки сураткашнинг бўғилган иштаҳасини ҳам очиб юборди.

«Худо хоҳласа кутулдим, — хозироқ органга хабар бераман» — дея хаёлидан ўтказди Малик, йўлнинг нариги тарафидаги ошхонага кириб бораркан.

Ошхона заводга қарашли, шекилли, ичкари ишчи, хизматчи коржомасидаги эркагу аёл хўрандалар билан тирбанд. Малик қулт-култ ютинганича навбатда тизилиб овқат олди. Дераза тубидаги стол атрофидан аранг бўш жой топиб ўтирди. Бу ердан заводнинг ойнабанд кириш даҳлизи, машиналар қантарилган майдонча тузуккина кўриниб туарар экан.

Малик иштаҳа билан хўракка ташланди.

Дўсти унинг кўзига чўп сукди. Насихаттўй ахли қаламлар ўғитига кўра, бу ҳолдан у юрак чанглаб йиқилиши, бевафо дўст жабридан чун абру навбаҳор йиғлаши керак эди. Бироқ Маликнинг димоги чоғ. Бирламчидан, орган таъкибидан кутулар бўлди, иккиласмчидан, дўсти билан пинхона пойгага киришиб, андак-андак ҳасадга берилиб юрганидан ўзини алланечук гунохкор ҳисоблаб юрган эди, билдики, Нусратбек ҳам фаришта эмас...

— Кечирасиз, ёнингиздаги бўш жойга ўтирсам майлими?

Туйкус чиннидек жаранглаган қиз товушидан хаёллари бўлиниб, сураткаш илкис бош кўтарди. Патнис тутган, семиз юзлари, қошу кўзлари сербўёқ қиз кўзига иссиқ-иссиқ кўринди: «Бу тўйдаги ҳалиги... Нури-ку?!»

— Марҳамат, — дея илжайди Малик, тантанавор хўрак чайнашдан бир зум тўхтаб.

Киз патнисни апил-тапил стол устига қўяркан, сураткашни таниб, таажжубланган бўлди.

— Ву-уй, Малик ака, ўзингизми? Нима қилиб юрибсиз биз томонларда?

— Сизни соғиндим, би-ир суратингизни олай деб...

— Кўйинг-е, ҳазиллашманг, — дея қўл силтади Нури, бетакаллуплик билан овқатлана бошларкан, — сизнинг кўзингиз бор, қўрқаман.

— Нега? Ҳеч кимга кўзим тегмаган ҳали.

— Бекор. Ана, Ҳабибаҳон-чи?

— Ҳабиба?!

Бу исм йигит юрагининг қайбир ёғ босган торларини чертиб, аъзои баданини жимирлатиб ўтди. Шундагина у тунги таҳликалар титрофида бу қиз хаёлидан хийла узоклашиб ишқ изтироблари тумандек тарқаб кетганини англади.

— Ҳа, нега анқайиб қолдингиз? — деб сўради Нури босиб-босиб шарбат ҳўпларкан.

— Ҳўш, Ҳабибаҳонга нима қилибди?

— Вуй, ҳали бехабармисиз? — дея шивирлади Нури, семиз юзига сирли тус бериб. — Дугонам ўша тўйда йўқолиб қолди-ку?!

Малик ўзини ҳайратланганга солди.

— Йўғ-е?!

— Ҳа, терговчилар бизларни ҳам роса оббориб-опкелишиди.

— Об-бо, чакки бўпти-ку, — минғирлаб қўйди Малик, ўзича бош чайқаб.

— Тўй охирида туйкус кўринмай қолганини сездик. Лекин... одатда бирор ерда йигилишсак, Ҳабибани ҳамиша акаси олиб кетади, тўйда ҳам шунака бўлган, деб ўйлабмиз-да, қайдан билибмиз йўқолиб қолишини.

Дарҳақиқат, Малик ҳам қизнинг тўй охирларида кўринмай қолганини эслади. Ўшанда у ҳам «акаси олиб кетди, шекилли» деган хаёлга борган эди.

— Тўйининг видеотасвирини кўриш керак, — дея эҳтиёткорона гап ташлади Малик, қўқис бароққош нусхани эсларкан. — Бирор шубҳали одам топилиб қолар.

— Э, уни терговчилар аллақачон текшириб бўлишган. Айтишларича ола-чалпоқ, чанг босгандай хира эмиш... Ана, дугонам Нафисахон ҳам соч юлиб йиғлаб ётибди, тўйимдан эсадалик қолмади, деб

— Қизиқ... балки атай шундай қилишгандир?

— Балки, — қиз овқатдан бош кўтармай елка учирив қўйди. Афтидан, дугонасининг кулфатидан кўп ҳам қай-турмаёттан кўринади.

— Сиз ҳам шу заводда ишлайсизми?

— Ҳа, — Нури сураткашга ажабланиб кўз ташлади. — Билмасмидингиз? Биз ҳаммамиз шу ерда ишлайсиз-ку, Гули ҳам, Ҳаби ҳам.

— Сиз нима иш қиласиз?

— Оператор. Гули бошлиқнинг котибаси, Ҳаби кадрлар бўлимида ишларди.

— Ҳабибаҳоннинг хонадонидан хабарлашиб қўйиш керак, — ўзича насиҳат қилган бўлди Малик.

— Гули билан икки марта бордик. Ойисининг қон босими ошиб, тўшакда ётибди. Дадаси куну тун телефонга коровул.

— Бирор шубҳали қўнфироқ бўлмабдими?

Қиз аввал елка учирив қўйди, сўнг оғзидағи хўракни шоша-пиша ютиб, теваракка олазарак кўз ташлаб, шивирлади.

— Биламан, бу мафиянинг иши, Ҳабибанинг дадаси ким, биласизми?

— Йўқ, — деди Малик ошкора қизиқсиниб. — Ким?

— Қозоғистон чегарасидаги З-постнинг бошлиги. Жа-а қаттиққўл, анақа... анақа ҳалол одам. Қінғирликларга йўл қўймайди, деб эшитганман. Бирор бойвачча бизнесменнинг жигига теккан бўлиши мумкин.

Малик овқатдан бўшаган косани бир чеккага суриб қўйиб, шарбат хўплашга тушди.

— Заводда тинчликми, ишқилиб?

Қиз овқатдан бўшамай бош иргаб қўйди. Афтидан, ноёб ускуна машмашасидан бехабар. Сўнг туйқус сўради.

— Сиз Нусратбек акамларнинг ўртоғими?

— Ҳа, — бажону дил бош иргади Малик. Сўнг минифирлаганча дўстлик тарихини қисқача айтиб берди.

Бироқ Нури унинг ҳикоясини фавқулодда қизиқиши

билан, ҳатто чайналмай тинглади. Ҳойнаҳой, Нусратбекка эҳтироми баланд эди.

— У киши жа-а зўр инсон, — деди қиз шарбатдан хўплаб. — Заводдаги ҳамма қизларга ёқади.

— Биламан, — деб кулган бўлди Малик, — қизлар бойваччаларни ёқтиришади.

Нури сураткашга ажабсиниб тикилди.

— Нусратбек акамлар бойвачча эмас. Ҳатто, бўйинларида ка-атта қарзлари бор.

— Йўғ-е?!

— Ву-уй, сиз қанақа ўртоқ, бехабар бўлсангиз? Сизни биласиз, деб оғзимдан гуллаб ўтирибман-а?!

— Энди... менга айтмаган-да, — деб чайналди Малик. — Ўзи шунақа... мағрур йигит... осонликча бирорга ёрилмайди.

Худди ўзини мақтагандай Нурининг кўзлари чақнаб кетди.

— Рост, жа-а мағрурлар. Тўғриси, ўша қарзни ҳам мендан бошқа ҳеч ким билмаса керак. Мен ҳам... тўсатдан билиб қолганман...

Қиз иккиланана-иккиланана, бир ойча аввал туйқус гувоҳи бўлган жанжални узук-юлук айтиб берди. У маъмурият йўллагидан ўтиб кета туриб, ногоҳ Нусратбекнинг кабинетидаги тўс-тўполонни пайқаб қолиб беихтиёр эшикни кия очибдию ичкарига мўралабди. Уч барзангি Нусратбекни ўртага олиб, дўшослашашётган экан! Узук-юлук гап сўзларидан англабдики, Нусратбек ёғоч олди-соттиси учун қачонлардир улардан катта қарз олган, Россияга қатнайдиган шеригичув тушириб кетибди. Анови нусхалар ўша қарзни фоизлари билан талаб қилишашётган экан. Нури сўнг нима воқеа содир бўлганидан бехабар, у ўтакаси ёрилиб, эшикни ҳам ёпмай, ура қочган.

— Тағин бу гапларни бирорларга айтиб юрманг, — дея астойдил ялинди Нури, Маликка жавдираб. — Худоҳақи, сиздан бошқа ҳеч кимга айтмаганман.

Қиз беихтиёр катта сирни очиб қўйгандай чинакамига қизариб-бўзарди. Малик уни овутган бўлди.

— Хотиржам бўлинг, Нури.

* * *

Ҳам кўнгли, ҳам қорни тўқ Малик ошхонадан бамайлихотир чиқди. «Яхшиси таксида бора қолай, хийла узоқ-ку», — ўйлади у шаҳар ички ишлар бошқармаси-

нинг манзилини хаёлан чамаларкан. Худди сураткашнинг фикру ўйини уқишигандай йўл бўйида машиналари тизилибгина турган киракашлар унга қизиқсиниб-қизиқсиниб, умидвор-умидвор тикилишиди.

— Йўл бўлсин, ука? — деб сўради бақ-бақалоқ, қопкора киши нописанд писта чақиб «Тико» автомашинаси га суюниб тураркан.

Малик жавоб беришга улгурмади. Йўлнинг нариги тарафига ойнабанд завод дахлизидан шоша-пиша чикканларга анграйиб қолди. «Нусратбек билан анави-ку?! — лип этиб хаёлидан ўтди сураткашнинг. — Қизик, қаёқка отланиб қолишиди улар?!»

Анави — ўша қора кўзойнак таққан бароққош, афтидан, Нусратбекни қийин-қистовга олиб, зимдан таҳдид кўрсатиб келар, Нусратбек эса зорланганча алланеларнидир тушунтира-тушунтира, довдир-совдир қадам ташлар эди.

— Такси керакми ука? — бетоқат сўради тагин ўша бақ-бақалоқ киракаш.

— Ҳа, — бош иргади Малик.

— Марҳамат, ўтиринг, қаёққа юрамиз?

Малик завод майдончасида қантарилган автоуловлар сафидан тисарилиб чиқаётган Нусратбекнинг машинаси га ишора қилди.

— Ҳув, яшил «Жигули»ни кўряпсизми? Шунинг орқасидан юришимиз керак. Ҳақига гап йўқ, ака.

Ҳайдовчи ҳам олди-қочди киноларни хўб томоша қилса керак, туппа-тузук саргузашт талаб чиқиб қолди.

— Қувиб ўтайми? Ё, бирор ерга қисиб тўхтаттирайми?

— Йў-ў... орқасидан қолмай юрсангиз бўлди.

Ҳайдовчи илҳом билан ўз жойини эгаллади.

— Ё, бисмилло-о...

* * *

Киракаш бир қоп қуруқ ёнғоқдай шалдир-шулдур экан. Йўл-йўлакай гоҳ ҳангома, гоҳ латифа айтиб шеригидан ҳам кўра ўзи қотиб-қотиб кулди. Таъқибдаги «Жигули» шаҳарни тарқ этиб, дала йўлига бурилдию қувноқ киракашнинг дами чиқмай қолди.

— Укагинам, — деди у анчадан сўнг, теваракка ха вотирли аланглаб. — Жа-а юрвордик-ку, а?! Ҳадемай З-постга етамиз, нарёғи Қозоғистон.

Малик Нусратбекнинг машинасидан қўз узмай мин-фирлади.

— Кўрқманг. Қанча кўп юрсангиз, шунча кўп ҳақ оласиз.

Йўлнинг ҳар икки тарафида катта-кичик экин пай-каллари, қуюқ-сийрак боф-роғлар ястаниб кетган. У ербу ерда, тўп-тўп қишлоқ үйлари кўзга ташланади. Йўлда қатнов хийла сийрак.

— Энди бу ёғлари жа-а хилват... — мингирилаб қўйди ҳайдовчи, тобора ташвиш-таҳликаси ошиб.

— Хилват бўлса, нима, бизни бўри ермиди?

— Анави «Жигули»дагилар бўридан баттарга ўхшапти, бекорга кузатиб юрмагандирсиз, ахир?!

Малик ҳайдовчининг елкасига ҳазиллашиб қоқиб қўйган бўлди.

— Кўрқманг, иккимиз ҳам тарашадай озғинмиз. Бўри-нинг тиши ўтмайди.

Дарҳақиқат, йўл тобора хилват ва сирли гўшага кириб борар эди. Нихоят, яккам-дуккам дала ҳовлилар учрай бошлади. Шарқираб оқиб ётган канал қўпригидан ўтишгач, яшил «Жигули» туйқус сертупроқ, торгина йўлга бурилди. Йўл бошида қуюқ дарахтзорга бурканган чорбоғ кўзга ташланар эди.

— Сиз қайрилманг, — дея ҳайдовчига қўрсатма берди. Малик, «Жигули» ёнига бориб тўхтаган чорбоғ дарвозасидан кўз узмай. — Секин-секи-ин ўтиб кетаверинг.

Ҳайдовчи ҳам «Жигули» ортидан қизиқсиниб-қизиқсиниб аланглаганича «Тико»га енгилгина газ берди.

Кўп ўтмай чорбоғ дарвозаси очилиб, «Жигули» ичкари кириб кетди.

— Пана жой топиб тўхтанг, — деб пўнгиллади Малик.

Ҳайдовчи муюлишдаги дарахтзор оралатиб машинани тўхтатди.

— Бу ҳозирча... — Малик унга бир сиқим пул узатиб. — Мени бир... ўн-ўн беш дақиқа кутиб турасиз.

Афтидан узатилган ҳақ чамадагидан кўпроқ бўлса керак, киракаш мамнун бош иргади.

* * *

Малик бутун сураткашлик уқувини ишга солди. Аввал дала йўлини, чорбоғнинг умумий кўринишини шошилмай суратга олди. Сўнг ёвқур ҳиндулардай дарахтдан-дарахтга, бутадан-бутага паналаб, дала ҳовлига яқин борди. Чорбоғ баланд пахса девор билан ўралган эди. Малик бир зум саросималаниб қолди. Ўзича ичкарига

ошиб ўтиш мумкин бўлган жойни чамалади. Сўнг шу илинжда чорбоғнинг орқа томонига айланиб ўтди. Хайрият, орқа девор бикинида тарвақайлаб ўсган чинор бор экан. Малик юраги гурс-гурс урганича дараҳт тана-сига тирмашиб, амал-тақал билан йўғон шохлардан би-рига чиқиб олди. Бу ердан чорбоғ ичи хийла кўзга таш-ланиб турар эди. Ҳатто, шохдан-шохга осилиб, сирпа-ниб бемалол девор ошиб ўтса ҳам бўлади. Бироқ Малик ичкари киришга ботинмади. Шохга кулайроқ ўрнашиб олиб, чорбоғ ховлисини кузата бошлади. Кузата-кузата фотоаппаратга керакли мосламаларни ўрнатди.

Чорбоғ хийла кенг. Баланд-паст дараҳтлараро ҳув, этакда баланд пойдеворли, серсавлат уй фира-шира кўзга ташланади. Ховлининг ўнг бикинида ҳалигина Нусратбекнинг машинаси кириб кетган баланд, кенг дарвоза. Дарвоза ёнида ўша «Жигули», тағин бир «Волга» ва бир «Нексия» қантариб қўйилган. Улардан андак нарида улкан юк машинаси савлат тўкиб турибди. Ҳовли жим-жит. Малик шоша-пиша кўрган манзараларини суратга олди. Шу пайт уй эшигидан уч қора чиқиб юк машинаси томон юришди. Малик Нусратбек ва бароқ-кошни дарров таниди. Бироқ улар икки тарафида тавозе билан турган нусхани танимади. Баланд бўйли, серсавлат, устига чарм камзул кийган бу кимсада алланечук амалдорлик аломатлари сезилар эди.

Бароқкош чакконлик билан юк машинасининг орқа томонини қоплаб турган брезент матони кўтарди. Автолов усти аллақандай юкка лиқ тўла эди.

— ...Гаплашдим, рози, — ўша амалдорнамо кимсанинг сўзлари сураткашга фира-шира эшитилди, — роппароса, соат тўртда пост ёнида кутади. Энди бу ёғига ўзи бош-кош бўлади-да, ҳе-ҳе...

Унга жавобан бароқкош ҳам алланималардир деди. Кулишди. Нусратбек ахён-ахён ҳозиргина чиқишган иморат томон кўз ташлаб кўяр эди.

Малик ҳамма-ҳаммасини шошилмай суратга олдию дараҳтдан сидирилиб тушиб, ортига қайтди.

Киракаш уни бетоқат кутиб турган экан.

— Келдингизми-ей, — деди у енгил тортиб. — Жа-а кеч бўлиб кетди-ю.

— Шошилманг, — деб тўнфиллади Малик машинага ўтириб. Сўнг қўлига бир парча қофоз ва ручка олдию, чуқур-чуқур мулоҳазаларга чўмиб, кўрган-билганларини

қисқача ёзиб чиқди. Сўнг ҳалигина фотоаппаратдан чиқариб олган плёнка ўрамини ўша қофозга ўради.

— Нима бу, ишқий хатми? — сўради уни энсаси қотганча кузатиб турган ҳайдовчи.

— Ҳа, буни ҳозироқ шаҳар ички ишлар бошқармасига етказасиз.

— Йў-ў, — дея кескин бош чайқаб, гапни бўлди киракаш.— Қайғургадир ҳайда дедингиз, ҳайдадим, кут, дедингиз, кутдим, йў-ў... энди бир камим мелисаҳонама-мелисаҳона юришми, йў-ў...

Малик чўнтакларини қоқишириб хийлагина пул йиғди.

— Мана, буни олинг, кам бўлмади. Сиз ҳали қандай тарихий воқеа олдида турганингизни тасаввур ҳам қилолмайсиз. Бугунги саргузашт учун сизни катта мукофот кутяпти.

— Йў-ў, гап пулда эмас, — дея ожизгина қаршилик қилган бўлди киракаш, сураткаш узатган хизмат ҳақини тезгина санаб чўнтағига тиқаркан. — Просто... ҳа йўқ, бе йўқ балчиққа ботмай, дейман-да.

Нихоят ҳайдовчи кўнди. Малик унга керакли кўрсатмаларни қайта-қайта тайинлади.

— Айтганларимни қилинг, — дея зорланди у, нихоят, гап охирида. — Эсам бу ерда мени чиндан ҳам бўри еб кетади.

* * *

Күёш ўз ётогига ҳорғин бош қўйди. Қип-қизил шафак осмон этагига қип-қизил қондай сачраб кетди. Чоратрофдаги дараҳтзору бутазорларда қушлар кечки нафмаларини авжи пардасига кўтарган.

Куюқ буталар панасида ўйчан хас чайнаганича ёнбошлигар Маликнинг юраги тошар эди. Ахир, ҳазил гапми, тонг отгунча қўрқоқ қочоқдан фидойи қаҳрамонга айланади қолади! Ҳамма иш пишган. Энди анави киракаш панд бермай, хат ва плёнкани керакли жойга етказса, тамом.

Малик илгари бунака саргузаштлар фақатгина олди-қочди китобу киноларда юз беради, деган хайлда эди. Ишонмасди. Мана, ўзининг рангсиз ва зерикарли ҳётида ҳам антиқа ҳодисалар содир бўлди.

У кўргану билгандарини ўз-ўзича бир-бир ипга тизиб, мулоҳаза қила бошлиди.

Демак, тўй кечаси машҳур З-пост бошлигининг арзанда қизи ўғирланган. Ўша куниёқ заводга тегишили ноёб ускуналар қалбаки ҳужжатлар билан гум қилинган. Ҳаммасида Нусратбек ва анави бароқтошнинг қўли борлиги шубҳасиз. Нусратбек, ҳойнаҳой, сувдан қуруқ чиқиши учун барча қинғирликни тўй кунига белгилаган кўринади. Наҳотки, ҳаммасига бош-қош ўзи бўлса?! Йў-ўқ, ишониш қийин, Нусратбек бунга ботинмайди, ҳар нечук унга соябонлик қилган, пишсанг берган бирор бир қўли узун акахони бор. Демак, калава учи ҳозирча мана шу чорбоқقا илашган. Чорбоғдаги юк машинасида ўта ноёб мол борлиги шубҳасиз. Ҳойнаҳой, қизни ҳам шу ерда ушлаб туришибди. Анавиларнинг гап-сўзига қараганда, режа пишган, қайсар бошлиқ кўнган, ярим тундан сўнг юкни Қозористон томонга ўтказиб кетишмоқчи! Афтидан, энг яқин ўтиш жойи бўлгани боис З-постни танлашган. Ё шунчаки ортиқча чиқим, ортиқча шов-шувдан қочишган. Балки, ўша ҳалол бошлиқ илгари хўб бурунларини қонатган бўлса, шу йўсин уч олиб, кўзини кўрқитиб, кейинги қинғирликлари учун ҳам ийдириб олмоқчи бўлишган. Қизик, Нусратбек нега бунақа ваҳимали қароқчиликда қатнашиб юрибди? Жуда бўйни бўш, саргузаштларга тоби йўқ йигит эди-ку. Ё, хув, ошхонада Нури айтгандай... Эҳ, қарздорлик не бир балоларга дуч қилмайди?!

Тавба, бу машмашаларга ўзининг ўралашиб қолганичи?! Демак, тўй кечаси олган суратларида шубҳали кадрлар ҳам бор экан-да?! Қизик, нега айнан Нусратбекнинг ўзи ўғриликка кирди? Мажбурлашганми? Бирор баҳона билан бошқа бирорвни тайинлаши мумкин эди-ку?!

Малик туйкус завод идорасида бароқтошнинг ўшқирганини эслади: «Баривир из қолдирибсан-да, а?! Адресини бизга беришга унамадинг, манави ипирисқини аядинг...»

Сураткашнинг баданидан совуқ тер чиқиб кетди: «Нусратбек манзилимни айтганда, аллақандай плёнка учун қўйдай бўғизланар эканман-да?!»

Бироқ ич-ичида пусиб ётган ғалати бир файирлик дўстининг олийжаноблигини тан олишга йўл қўймас эди. Малик тагин уч-тўрт дақиқа мулоҳазаларга берилса, яна Нусратбекнинг олдида бўйин қисиб қолишдан кўрқандек илкис ўрнидан туриб кетди.

Коронгиллик хийла қуюқлашган. Дов-дараҳтлар алла-нечук сирли ва ваҳимали шитирлаб тебранишади. Малик

яна кузатувни давом эттириш иштиёқида теваракка сергак-сергак аланглаб чорбоғ томон юрди. «Отряд кўринса отилиб олдига чиқаман», — хаёлидан ўтказди у, шахар йўлига интик-интиқ кўз ташлаб. Чорбоғ ичкарисидаги электр ёғдуси дарвоза теграсини ҳам фира-шира ёритиб туарар эди. Малик туйқус Ҳабибани эслади. Назарида қиз дала ховлининг қай бир ертўласида азобланиб ётгандек эди. «Озгина чида, Ҳабиба, озгина» — хаёлан астойдил илтижо қилди сураткаш юраги ўртаниб. Сўнг ўзининг халоскорлик хизматидан боладек қувонди. Тез орада Ҳабибанинг чексиз миннатдорчилик билан бокиб туришларини ўз-ўзича тасаввур этиб, энтикиб кетди.

Пусиб-пойлаб чорбоғ деворининг тубига етиб олган Маликнинг ногоҳ шахар томондан чайқала-чайқала келлаётган машинага қўзи тушди. Машина фараларининг ўткир нури дов-дараҳтлар узра безовта йўрғалар эди. Сураткаш деворга қапишган кўйи юраги гурс-турс уриб кузата бошлади. Машина чорбоғ томон бурилиб, дарвоза ёнида тўхтади. Бу хув, киракаш жўнаб кеттагач, анчадан сўнг, чорбоғдан чиқиб, шахар томон елиб кетган «Волга» эди. Ҳайдовчи дарвоза очилишини кутмай, негадир моторни ўчирди. Теваракка сирли бир сукунат тушган. Дарвоза қия очилиб, кимдир ҳовлиқканча чиқди. Ҳайдовчи уни имлади. Кимса фўдайганича яқин келди. Фира-шира ёруғда Малик уни таниди: «Бароққош!»

— Тинчликми? — пўнғиллаб гап қотди ҳайдовчи, сигарет тутатаркан.

Бароққош ҳам фудраб қўйди.

— Тинчлик.
— Кўёвтўрани тинчитиш керак, Галстук шуни хоҳлади.

— Йўғ-е?! Гуноҳи нима? Энди кераги йўқми унинг?
Ҳайдовчи хиринглади.

— Эрта-индин ишқал чиққудек бўлса, айни кимгадир афдариш керак-ку, ахир. Галстукнинг талаби қатъий, анавини орадан чиқариш керак.

— Ўзиям, жа-а латта чайнар экан-да, — деб пўнғиллади Бароққош, лоқайд керишиб. — Қилган ишидан из қолдиради. Анави сураткаш дўстини бизнинг чангальдан кутқараман, деб...

Бароққошнинг гапи бўғзида чала қолди. Дарвоза яна қия очилиб тагин бир шарпа мастона кийқирганича пайдо бўлди.

— Э, нега кирмай турибсила-а?

— Ҳозир.

Ҳайдовчи шоша-пиша ўзини кабинага уриб, моторни ўт олдириди. Бароққош дарвозани ланг очишга ошиқди.

Малик чинор томон қоқила-сурила юраркан, ҳанси-раганича ўйлар эди: «Галстук?! Ким у? Афтидан, ҳам-масига бош-қош амалдор!.. Нусратбекнинг шўри қуриди! Эҳ, тезроқ отряд етиб келса-чи...»

Сураткаш қоронгида ҳурпайиб турган чинорга тир-машиб чиқа бошлади. Шу пайт девор ортидан аёл кишининг хиркираб йиглаганими-ей, кулганими-ей қулоғига чалинди. Малик бир зум тек қотди. Энди эркак кишининг гулдирагани фира-шира эшитилди. Малик юрак ҳовучлаганича юқорилаб, баланд, бақувват бир шохга чиқиб олди. Ичкаридаги иморат пештоқидаги чироқ ёғудусидан ола-чалпоқ ёришган чорбоғ фира-шира кўринар эди. Малик товуш келган томон мўралаш илинжида шохдан-шохга сидирилиб ўтди. Шу пайт дарвоза тарафдан, ҳалигина кириб келган «Волга» ёнидан мастона қийқириқ, бўғиқ кулги эшитилдию, девор тубидан бир шарпа илкис қўзғалиб ўзини дараҳтлар панасига урди. Тағин бир кўланка уст-бошини қоқканича дарвоза томон ошиқди. У чироқ нури мўлгина тушиб турган жойга чиққан пайт, Малик бу шарпани таниди: «Нусратбек!»

Нусратбек бўшашибгина дарвоза томон юрди.

— Ия, куёвтўра, бу ёғда нима қилиб юрибсиз? — деб гап қотди унга «Волга» эгаси.

Нусратбек фудранди.

— Ўзим... чорбоғнинг у ёқ-бу ёғига кўз ташлаб...

— Об-бо, хушёр-ей, — дея хиринглади Бароққош, йигитни кўлтиқлаб. — Буниси амалмас, юринг, икковимиз би-ир айланиб келамиз.

Нусратбек алланима, дея фудранганича қаршилик килган бўлди. Бироқ Бароққош уни судраклай бошлади.

— Юрсангиз-чи, бир гап бор.

Улар кўлтиқлашиб, ҳалигина Нусратбек тарқ этган жойга қараб кела бошлашди. «Волга» эгаси уларга эргашди.

Малик томоқлари курқшаб, дағ-дағ титраганича уларни кузатар эди. «Нусратбек!» — дея барадла қичқирмоқчи бўлдию бироқ ботинолмади. Ич-ичидан илондек ўрмалаб чиққан аллақандай шилимшиқ хис товушини буткул бўғиб кўйгандай бўлди.

Бир пайт Нусратбек икки букланганча бўкириб юборди.

— Ва-ахх, единг-а, ифлос!

Кутуриб кетган Бароқкош чироқ нурида ярқираб кетган пичорини иккинчи зарба учун баланд кўтардию таҳтадай қотди. Нусратбек инграганича ерга қулади. Шаҳар йўлидан милиция машиналарининг чинқириғи баралла эшитилмоқда эди!

— Ментлар! — бўғиқ қичқирди Бароқкош орқага тисарилар экан. Сўнг ҳанг манг қотган шеригига ташланди. — Сен айтиб келгансан, сотқин!

Шериги унинг пичоқ тутган кўлинин қайириб, итқитиб ташлади.

— Ўчир! Ундан кўра тезроқ бўл, қочдик!

Шу чоғ ҳалигина девор тубидан дараҳтлар панасиға яширинган шарпа отилиб чиқдию чинқириб юборди.

— Нусратбек ака! Нусратбек!

Дараҳт шоҳида чувалчангдай ёпишиб турган Малик чўчиб тушди: «Ҳабиба-ку, бу?!»

Ҳабиба қокила-сурила чўзилиб ётган Нусратбек томон югорди.

— Ия, анови киз-ку бу?! Хонадан ким чиқарди уни? — ўшқирди «Волга» эгаси шеригининг ёқасига чанг солиб.

— Мен билмайман, — дея ҳирқиради Бароқкош уни силтаб ташлаб. — Кўйсанг-чи уни, қочдик!

— Ичкаридан пулларни опчиқ! Мен машинани ўнглай, тез бўл!

Улар ҳансирашганича дарвоза томон ошиқишиди.

Ҳабиба Нусратбекнинг бошига энгашди.

— Нусратбек ака, — дея ҳик-ҳик йиғлай бошлади у, — кўзингизни очинг, бу мен, Ҳабибангизман.

— Ҳабиба, — аранг сас берди Нусратбек, тўлғониб. — Жонгинам... мен учун шундай кўйларга тушдинг-а... кечир...

— Йўқ! Йўқ! — қиз Нусратбекнинг юзига юз босди. — Ўлманг азизим, кўзингизни очинг...

— Ҳаби... меҳрибоним, хонангга бор... икковимизнинг сиримизни ҳеч ким...

Нусратбек бир тўлғониб жим бўлди.

Шу аснода милиция машиналарининг шовқин-сурони, фараларнинг ўткир ёғудуси бутун теваракни тутиб кетди.

Малик дараҳт хазонларига қоришиб пастта тушди...

ҲИҚОЯЛАР

ЧҮЛДАН КЕЛГАН ТАШВИШ

Ўз маърузалари билан аҳли Оврўпони бирқур анграйтиб ташлаб Париждан қайтган руҳшунос олим жаноб Дўланов олқишу таҳсилларга кўмилиб кетди. Турқи-таровати газета саҳифаларию, телевизорлардан нари кетмай қолди. Таниш-нотаниш дўсту ёронлар бир-биридан ўзиб қутлашгани-қутлашган.

Жаноб Дўланов деганлари ўша маълуму машхур чўл кўйнидаги 41-посёлкада туғилиб ўсан ўзимизнинг Самад, Дўланов Самад Эргаш ўели. Бироқ айни чоғ уни дабдурустдан «ўзимизники», «чўллик» дейишга бирор ботинолмайди; афт-ангорига, юриш-туришига шаҳар нуқси сингиб кетган, келиштириб-келиштириб пойтахт лаҳжасида сўйлашади. Баъзи бир шаҳарлик қишлоқларга ўхшаб ижарама-ижара кўч-кўронини ортмоқлаб юргани йўқ, нақ марказдаги кўшқаватли гўшада уч хонали уйи бор. Болалари йўргакдан чиққандан бери инглизча боғчаю мактабга қатнашади. Ишқилиб, жаноб Дўланов, жаноб Самад деса дегулик.

Самад ўзини муборакбод этгали келган, юқори идоралардан бирининг масъул ходими саналмиш дўстини иззат-икром билан кузатиб кўйиб изига қайтди.

Кеч кузнинг совук бир оқшоми. Шаҳар аллақачон коронфиликка қоришиб кетган. Теваракдаги баланд-паст уйларнинг деразаларидан сон-саноқсиз электр чироқлар порлайди. Қай бир хонадондан қувноқ қийқириқлар, олатасир мусиқа садолари эшитилмоқда.

Самад муздек ҳаводан яйраб-яйраб керишди. Димоги чоғ. Ҳалигина дўсти иккови ўртасида кечган сирлигина суҳбат ҳануз қулоқларини қиздириб борар эди. Дўстининг масъул ходимларга хос мужмаллик ва эҳтиёткорлик билан шипшишига қараганда, Самад илм бобида кўрсатаётган кароматлар хукумат раҳбарларининг ҳам диққат эътиборида экан! Худо хоҳласа, яқин кунлар ичида бирор бир унвон ё нишон жаноб Дўлановга насиб этар эмиш!

Самад учқур хаёллар қанотида қандай қилиб ўз даҳлизида пайдо бўлганини сезмай ҳам қолди. Хотини Ширрина халигина жўшқин кечган зиёфат асоратларини бартараф этиш билан банд. Сўлдаги чоғроқ хонада ўн икки яшар ўғли компьютер ўйинига ўшёнгиган. Ёнида сингил-часи сақич чайнаб бетоқат кутиб турибди.

Самад залга ўтиб, юмшок курсилардан бирига ўтириди-да, ҳузур билан кўзларини юмди. У ўзини мукофотларга қизиқмайдиган, илму фан учун холис, фидойиларча хизмат киладиганлар каторига қўшиб юрса-да, айни чоғ дўсти келтирган муждалар ҳақида беихтиёр ўйларди: «Қизиқ, қанақа сийлов кутяпти мени? Бирор бир орден тақиб кўйишса-я?! Ё... ё «фан арбоби» унвонини беришармикан?! Эх, жа-а зўр бўларди-да, бунақа омад, бунақа баҳт ҳар кимга ҳам насиб этавермайди...»

Самад енгил бир шарпадан сергакланиб, кўзларини пирпиратганча очди. Думалоқ стол устига чойнак-пиёла келтириб қўйган хотини унга мулойимгина термилиб турарди.

— Ухляяпсизми, домулло? Қўйинг-е, қани, бир пиёла аччиқина чой ичиб олинг, хордигингиз чиқади.

Ширинанинг юз-кўзлари тўла табассум, мамнуният. Гўёки, аҳли Оврўпани қойил қолдириб келган эри эмас, айнан ўзгинаси, гўёки, эри энтикиб кутаётган мукофотни у аллақачон қўлга киритиб, сандиққа тиққан. Тоғни уриб талқон қилгудек бир кайфиятда дуррачасини қия-қия қўндириб, гулдор халатининг енгларини шимариб юрибди. Қадду басти тўлагина бўлса-да, саъй-харакатлари дадил ва чаккон.

— Чарчамадингизми, хоним? — деб сўради Самад, хотини назокат билан узатган бир пиёла чойни оларкан.

— Ву-уй, домулло, нега чарчарканман? Шунча илм килиб қўйган сиз-у, бизларни чарчашга ҳаққимиз йўқ.

Ширина ўз сўзини исботлаб қўймоқчилик иргиб ўрнидан турди-да, яна ошхона томон қувнок йўргалади. Самад унинг ортидан бош чайқаб, истеҳзоли илжайиб қўйди. Хотинига бу қадар жўшқинлик, бу қадар илмпарварлик ато этган тилсим унга жуда яхши аён: Самад, ҳув, Парижда майда-чўйда харажатлар учун берилган пулнинг хийлагинасини қисиб-қимтиб, тежаб-тергаб қайтган, бўса-гадаёқ талай совфа-саломлар ила хотинининг қўлига тут-

қазган эди. Шу-шу Ширина ял-ял яшнаб қолди. Ахир, бу пуллар мўмайгина даромад бўлишидан ташқари, «домулло» олис юртларда ҳеч бир қинғир-қийшиқ йўлларга юрмай, вафодор эр сифатида, қати бузилмай уйга қайтганидан далолат ҳам эди-да!

Самад иссиқ, хуштаъм чойдан босиб-босиб ҳўплади. Шу пайт столниng бир чеккасида гужанак тортиб турган телефон устма-уст жиринглаб юборди. Самад эринибги на узалди-да гўшакни кўтарди.

— Ал-ё.

Нариги томондан ҳаяжонга тўла, бўғиқ бир сахрои товуш эшитилди.

— Ол-а, ола-а! Бу ким, Самад, ўзингми?

— Ҳа, мен, — аранг сас берди навқирон олим, юраги алланечук ноҳушиликни сезиб.

— Ола-а-а, бу мен, Улаш акангман, танимадингми-а, ола-а? Шахрингта би-ир кеп қолдик-да, хайрият уйда экансан...

Самадниng таъби тирриқ бўлди. Бу вайсақи, ичкиликбоз нусха шаҳарда пайдо бўлибдими, демак муқаррар унигига дорийди! Ёлғиз ўзи эмасдир? Соғиниб кетдик сени, деб уйга уч-тўрт кун танда кўйиб олса борми?! Йўқ, бирор-бир силлиқ баҳона билан бу даҳмазанинг йўлини тўсиш керак, эсам, Ширинадан балога қолиши тайин. Кейин минг бир Парижниng минг қоп пулини орқалаб келса ҳам бу гунохини юволмайди. Ана, чўл исини олди, шекилли, хотини ҳурпайган кўйи бир-икки ёнига келиб кетди. Самад жеркиганинамо кўл силтаб уни ошхона томон ҳайдаган бўлди. Сўнг:

— Ҳа, гапираверинг, Улаш ака, қулоғим сизда, — дея телефон гўшагига тўнғиллаб кўйди.

Холбуки, бусиз ҳам Улаш ака деярли нафас олмай, ҳаяжон билан гапириб ётар, гоҳ аллакимниng саломини етказса, гоҳ чўл янгиликларига узук-юлуқ кўчар эди. Ҳамюртининг бу қадар тўлқинланиб, шоша-пиша гапириши Самадга ёқиб, кўнглида умид уйғотди: «Ҳарқалай, телефонда гаплашиб, хайр-хўш қилмоқчи-ёв...»

Бироқ лаҳза ўтмай ҳафсаласи пир бўлди.

— Ола-а-а, ол-а, — деб қолди бир пайт сахрои сўхта. — Самад, сенинг вақтингни олиб, тилфонда гапириб ётганимни қара-я, уйингга боргач бемалол...

Самад шоша-пиша тилга кирди:

— Йў-ў, йў-ў, гапираверинг, Улаш ака, овозингизни

эшитиб турганимдан жуда хурсандман, гапираверинг, бемалол. Каердан қўнғироқ қиляпсиз ўзи?

— Билмайман, — дея шарақлаб қулди Улаш ака. — Бир тилфонхонадан-да. Ҳозир шу ерга автобус тушириб кетди.

Таъби тобора тирриқ тортиб, энсаси қотаётган Самад вайсақи, ароқхўр нусхани бир амаллаб уйига йўлатмаслик учун хаёлан баҳона изларкан, атай гашни чўзди.

— Қандай ташвишлар билан юрибсиз ўзи, Улаш ака?

— Э, ҳали кўришганда айтаман. Ташвиш эмас, хайрли иш, Самадбой, хайрли иш.

— Са-ал учини чиқаринг-да, ака, ичим қизиб кетяпти.

Сахройи сўхта тағин шарақлатиб қулди, сўнг томок кириб-кириб тилга кирди.

— Кўймайсан-да, Самадбой. Мен тилшунослик илмида бир кашфиёт қилдим.

— Кашфиёт?!

— Ҳа, ҳали икковимиз тоза машхур бўб кетамиз. Сен мени тил билан шуғулланадиган жойларга олиб борасан.

— Қанақа кашфиёт, Улаш ака?

— Ҳозирча сир.

— Об-бо, айта қолинг, ҳеч қурса, андак имо-ишора қилинг.

Улаш ака тағин яйраб-яйраб қулди.

— Барибир илм одамисан-да, Самадбой, кашфиёт деган нарсани эшитсанг, қулоғинг динг бўлади. Ҳўп, майли, сал-пал сиримни шамоллатай, хў-ўш-ш... мен «қаҳрамон» сўзининг антонимини топганман.

— Нима? «Қаҳрамон» сўзининг антоними?! Бунинг нимаси кашф...

Шу пайт алоқа туйқус узилиб, телефон гўшагидан «дут-дут»лаган қисқа-қисқа сас эшитила бошлади. Бир-күр енгил тортган Самад гўшакни жойига қўйиб, ошхона ёқдан бош кўрсатган хотинига ташвишли тикилди.

— Ким экан, жа-а апоқ-чапоқ гаплашдингиз? — сўради Ширина. Эрининг биқинига қадалгудек авзойда яқинлашаркан. — Бирор чет эллик оғайнингизми, исмлари ҳам фалати экан.

— Чет элликдай гап, чўлдан келган. Фирт алкаш, жинни одам. Агар унинг қўлига тушар бўлсам, нақ бир ҳафта тинкамни қуритади. Бир бошоғриқ билан шаҳарга

келганга ўхшайди. Уйингни ҳам пайтава қўлансасига бўклириб юборади.

— Ву-уй, — дея ёқа ушлади Ширина, мусичадек беозор қиёфага кириб.

— Хозир жирингласса сиз трубкани кўтарасиз: Мени сўраса... мени сўраса... — Самад ҳам чўлликни ранжитмайдиган, ҳам унинг олдида обрўсини бир карра кўтариб кўядиган баҳона излаб обдон бош қашлади. — Ка-роче, чет эл элчихонасига чақиририб қолишди, денг.

Ширина димоғида илжайди.

— Хўп, хў-ўп, домулло.

Бироқ қайта қўнғироқ бўлмади. Ширина эри ёнида беш-ўн дақиқа солланиб, ҳозиру нозир тургач, тагин уй юмушлари билан куймалана кетди. Самад эса юмшоқ курсисига бемалол ястанган қўйи хаёлга толди. Ҳалиги-на қулоқ-чаккасига болғадай урилган дагал товуш эгаси-нинг қоп-қора, туршакдек афт-ангари бот-бот кўз ўнгига қалқиб чиқар эди.

Ха, ўша Улаш деганлари чиндан ҳам Самаднинг ҳам-кишлоги. Асли касби агрономлик. Аммо қурмагурнинг кўнгли шеъриятга шайдо. Хув, бир замонлар бир чим-димгина ғазали туман газетасида босилган. Шу-шу ўзини ахли қаламлардан санайди, донгдор-донгдор битикларни у-бу давраларда худди ўзиникидай ихлосу эъзоз билан ўқиб бериб, донг таратиб юради. Шу боис бировлар чиндан, бировлар масхараомуз уни агроном-шоир, деб аташади. Аллақандай Шурқор Ҳобил отлиғ ёзувчи 41-посёлкага борганида Улаш aka билан танишиб, хўб ичкилиkbозликлар силсиласида бир-бирларини ялаб-юл-қаб, қиёматли оға-ини тутинишган экан. Оқибат шулки, оға ёзувчи кейинчалик агроном-шоир ҳакида «Жазира-мадаги одам»ми, «Жазодаги одам»ми, деган асар битиб, унинг устидан сурбетларча кулган, маддоҳ, кўчирмачи сифатида таърифлаб агроном-шоирни ўзича ерпарчин ай-лаган. Аммо май шишаларига маҳкам таянган экан, ше-килли, Улаш аканинг қаддини бу янглиғ таҳқирлар ху-ружи буқолмаган.

Самад бултур баҳор адоғларида 41-посёлкага борган чоғи Улаш aka билан туйкус учрашиб қолишди. Агроном-шоир дала йўл ёқасидаги каллаклаб кесилган катта-кон тут танасига орқа тираб, хомуш ўтирган экан. Эгни-да жулдур камзул, оёғида йиртиқ ўн биринчи калиш, сийрак, тиканакдек соч-соқоли ўsicк.

Улар қуюқ салом-алик қилишгач, Самад ўзича агроном-шоирга мойдек ёқар мавзуга кўчди.

«Ижодлар қалай, шоир ака, бошқасини қўйинг, шундан гапиринг».

«Ҳарна... бўляпти». — деди Улаш ака истамайгина, кулимсираб.

«Э, бўшашманг-да, хув, илгари достонлар ёзиб ташлайман ҳали, деб кариллаб юрардингиз, ваъдалар қани, шоир ака?»

«Самадбой, мен достон битсам, анови Шункор Ҳобилларнинг нонини яримта қилиб ташлайман-да».

«Э, яримта қилманг, ош-нонини буткул тортиб олинг қўлидан, хе-хе-ҳе, сиз шунга арзийсиз, шоир ака».

«Самадбой, — деди Улаш ака олис-олисларга ҳорғин тикилиб. — Шу... шоир бўлиш учун шеър-достонлар ёзиш шартми?»

«Ия, афандичалиш гап қилдингиз-ку, ака, албатта, шарт-да. Сиз зинфиллатиб ёзиб ташланг, «Жаҳон адабиёти» деган журналга чиқаришга ўзим гарантия бераман. Асарни тайёр қилинг-у, дарҳол шаҳарга кўтариб боринг. Мана, сизга менинг визиткам...»

Самад уй манзили, телефон рақамлари зарҳал ҳарфлар билан битилган бежиримгина қофоз парчасини агроном-шоирнинг қўлига тутқазди.

Ўшанда у ака Улашнинг достон тугул икки қатор ўлан тўқишига-да ишонмаган, шунчаки, ичкилик касриданчувринди чолга айланиб қолган ҳамқишлоғига ҳазилмазах билан пишанг берган эди. Қарангки, шаҳарлик олимнинг ишонмаганини пайқагандай, агроном-шоир, ниҳоят, шеъру достонларни тинч қўйиб, ўзини тилшунослик илмига урибди! «Қаҳрамон» сўзининг антонимини топган эмиш...

Самад беихтиёр кулиб юборди. Аллақачон юмушларини тиндириб, телевизорга лоқайд термилиб ўтирган Ширина эрига, ҳайрон кўз ташлади.

— Тинчликми, домулло? Ё ухлаб туш кўрдиларми?

Самад «Э, шунчаки», дегандай енгил қўл силтади-да, чойи совиб қолган пиёлага интилди.

Мана, тагин анчагина вақт ўтди. Бироқ телефон хануз жим. «Қизиқ, нега қайта қўнғироқ қилмади», — андак хавотир билан ўйлади донгдор олим, — ё, хафа бўлдимикан?»

Самад уйига сахройи сўхтанинг келишини нечоғли

истамаётган бўлса, уни хафа килиб қўйишдан хам шунчалик чўчиётган эди. Ахир, гапчувалашса ёмон-да! Эргашбойнинг шаҳарлик эркатоий бечора ҳамкишлогини уйига киритмабди, деган шивир-шивир сассигига чидаб бўладими?

Самад хотинига алланечук мутеълик билан термилди.

— Хоним, анови озиб-ёзиб би-ир шаҳарга кеп қолибди, уйга таклиф қилиб қўяверайлик-а, сахар аzonда бир амаллаб жўнатиб юборамиз.

— Ихтиёрингиз, — Ширина лоқайд елка учирди. — Ана, телефон қилса ўзингиз бемалол жавоб бераверинг.

Самад бир кур енгил тортиб, мамнун илжайди. Сўнг тўзғиб ётган болалар хонаси томон кўз ташлади. Қизи диван устида аллақандай газетани юзига қоплаганича мусиқа тингламоқда. Ўғли эса ҳануз компьютер билан андармон.

— Эй, болалар, — деб жеркинди Самад, — етар энди, ухлаларинг.

Гоҳ мудраб, гоҳ ҳомузга тортиб ётган Ширина ҳам телевизорни ўчирди.

— Чарчадим, мен ҳам ётаман. Қилар ишим қолмади, шекилли.

У эринчоқлик билан ўрнидан қўзғалди-да, бир оз ивирсеб тургач, ётоқ томон юринди.

— Айтганча, хоним, — деб қолди хотинига анчадан бери паришон тикилиб турган Самад, — қип-қизил дипломли филологсиз, қанақа сўзлар антоним сўзлар дейиларди, сал унутибман.

Ширина узун бир ҳомузга тортиб оларкан.

— Қарама-карши маъноли сўзлар, антоним сўзлар, — деди билағон ўқувчилардек, — масалан, аччик-чучук, паст-баланд.

— «Қаҳрамон» сўзиники-чи?

— «Қаҳрамон...» — мужмал елка қисди Ширина, — «қўрқок», шекилли.

«Қаҳрамон-қўрқок» — хәёлидан ўтказди Самад, ётоққа кириб кетган хотини ортидан қараб қоларкан. Бироқ бу жавоб уни сира қониқтирмади.

Кўп ўтмай бутун хонадон чуқур сукунатга чўмди. Самад чойнакдаги яхна чойдан пиёлага қуйиб, паришон хўпларкан, ҳануз «қаҳрамон» сўзига антоним излар эди: «Қаҳрамон-номард», «Қаҳрамон-қочоқ», «Қаҳрамон-балойи баттар»...» Бироқ ҳеч бир топилдиққа кўнгли

тўлмай, асаблари чатнай бошлади. «Йўқ, хеч ўхшамаяпти-да, ух, уккағар агроном-шоир, жа-а бошини қотириб қўйди-ку?!

Телефон жимигандан-жимиб кетди. Аммо арзанда антоним сўз кўйида бир ўтириб-бир туриб, гоҳ бош қашлаб, гоҳ лаб тишлаб тўлғонаётган Самад қўнфироқ кутаётганини аллақачон унугтган. У бетоқатлик билан ўз иш ҳужрасига ўтди-да, баланд, кенг жавонга териб қўйилган жилд-жилд китоблар орасидан бирини сугириб олди.

Қани, изоҳли луғатга қараб кўрай-чи, — дея ўз-ўзига тўнғиллади Самад, семиз китобни шоша-пиша варақларкан. (Одатда у қизғин ижод чоғлари шундай ўз-ўзига гапириниб қолади.) — Та-ак... мана... Қахрамон — жамиятда ёрқин фаолияти билан ажralиб турувчи шахс; жангда жасорат кўрсатган аскар...

Самад тағин анча пайт ўз-ўзига пўнғиллаб китоб титкилади. Аммо барибир зорманда антоним сўзни тополмай, қайта баттар хуноби ошди.

«Сўраб кўриш керак, бирортасидан сўраб билиш керак, — дея шитоб ўйларди навқирон олим, гоҳ у, гоҳ бу хонада бетоқат кезинаркан. — Хўш, кимдан сўрай?»

Туйкус эсига таниш бир профессор тушди. Ўз имзолари биқинига, «фил.фан док.» деб ёзишни ҳеч унумайдиган бу серсавлат зот, у-бу йигинларда гумбаздек қорнини қашлаб, «Тил илмини еб-ичиб юборганиман» дея мақтанишни хуш кўрар эди.

Самад иш столи устидаги чарм жилдли дафтарчасини варақлай-варақлай тилшуноснинг телефон рақамларини топди-да, қўнфироқ қилишга чоғланди. Аммо телефон гўшагидан ҳануз ўша «дут-дут» — қисқа-қисқа сас эшитилмоқда эди. «Нима бало, бузуқми бу?» — хаёлидан ўтказди Самад, қизғиш аппаратнинг у ён-бу ёнига нуқилаб. Сўнг димоғида сўкинганича ошхонага ўтди. Ана, холос, худди ўйлаганидек — уй тармоғига жуфтлаб уланган телефон гўшаги ўз ўрнидан андак силжиб, қийшибигина турарди!

«Хойнаҳой, Ширинанинг қилмиши бу! — аччиғланиб ўйлади Самад. — Шунинг учун анови қайта қўнфироқ килолмаган. Ана энди чўлга бориб сасиди, Эргашбой-нинг ўғли атай телефонини узиб қўйди, деб айюҳаннос солади. Эҳ, шарманда килди-да бу хотин...»

Бироқ Самаднинг бутун қаҳру ғазаби телефон гўшагини зарда билан ўз ўрнига қўндиришга етди, холос.

Одатдаги эрлардек қони қайнаб, тишлари фижирлаб ётк томон чопиб кетмади, хотинини судраклаб турғизиб, бе-аёв калтакламади. Ҳамма-ҳаммасига олимона мушоҳада-мулоҳазалари панд берди, шаштини синдириб, қўллари-ни қайирди.

«Аввало асос керак, — хаёлидан ўтказди у, бир зум ошхонада сўнарибина тураркан, — гўшакни атай кўта-риб кўйганини исботлаш зарур, балки Ширинанинг шун-чаки тирсаги тегиб кетгандир, балки сим-пими қаттиқроқ тортилган бўлса, гўшак ўз бошига қўзғалиб қолгандир? Хўп, ёлғон гапиришдан қочиб шундай қилган бўлса-чи?! Уни алдовга ундан ўзинг-ку?! Элчихонага чақириб қол-ган эмиш...»

Нихоят, навқирон олим ёткода беозоргина ухлаб ёт-ган хотинидан ҳаш-паш дегунича енгилиб залга қайтди. Айни чоғда у ўзини ёв қуршовида қолган жангчидек хис этарди: бир тарафда телефон машмашаси, бир ёнда Улашнинг муқаррар маломати, қоқ қарписида эса алла-қандай антоним сўз жумбоги.

«Қаҳрамон-қўрқок», «қаҳрамон-қочоқ», «қаҳрамон-бўшанг» — антоним сўзлар галаси тағин хаёлига ёпи-рилди Самаднинг. У юмшок курсисига ҳорғин чўйкан кўйи хийла вақт бош чанглаб ўтирди. Сўнг шашт билан таниш тишлишуноснинг телефон рақамларини теришга киришди.

— Ал-лў-ў, — эшитаман, — деди нариги тарафдан телефон гўшагини кўтарган киши.

Бир зум жим қотган Самад профессорнинг қироатли товушини таниб жонланди.

— Ассалому алайкум, домла. Узр, бевақт безовта қилдим, бу мен...

Самад ўзини танитгач, икковлон бири кўйиб-бири олиб, қайта-қайта хол-ахвол сўрашишди, бир-бирини ол-қишилашди.

— Бир маслаҳатингизга мухтожмиз, домла, — дея нихоят мақсадга кўчди Самад пайт пойлаб. — Ёрдамин-гиз керак.

Тишлишунос дарҳол хушёр тортди.

— Хўш...хўш-ш...

— Бир жиянимиз аллақандай илмий иш ёзаётган эди. Кечадан бери «қаҳрамон» сўзининг антонимини то-полмайди, денг. Мендан сўрагани-сўраган, охири, чум-чуқ сўйса ҳам қассоб сўйсин, деб сизни безовта қилдим.

Тилшунос, пихиллаб-пихиллаб қулди.

— Самад Эргашевич, «қаҳрамон»нинг антоними бўлмайди. Масалан, сиз юрт довругини хорижда ёйиб юрган қаҳрамон олимсиз, сизга ҳеч қанақа антоним йўқ.

— Раҳмат, домла, раҳмат, — дея минғиллади Самад, профессорнинг аскияси ёғдек ёқиб, — аммо-лекин... анақа... тилшунослик илми нуқтаи назаридан...

«Фил.фан.док.» тагин ҳазил-хузул билан жавобдан тайсаллади. Сўнг туйқус гап мавзусини буткул бошқа ёққа буриб юборди.

«Падарлаънати, тўнка» — ич-ичида сўкинди Самад, анча пайт профессорнинг тийиксиз латифаларини паришон тингларкан. Нихоят, қуюқ-суюқ хайрлашувдан сўнг телефон гўшаклари жой-жойига қўнди.

Самад стол устидаги чойнакни шашт билан кўтариб яхна чойдан сипкорди. Бироқ ич-ичидан тошиб келаётган алланечук ташналик барибир босилмади. «Роса тинкамни қуритди-да бу бошқотрма, — деб ўйларди у, гарангсиб ошхонага киаркан. — Аммо ўша арзанда антоним сўзни топишим шарт».

Самад «фир-фир»лаб бир маромда ишлаб турган музлаткични очди-да, ҳув, оқшомги зиёфатда чала ичилган фарангি конъяк шишиасини қўлга олди. Шу пайт телефон туйқус устма-уст жиринглаб кетди. Туйқус чинқириқдан чўчиб тушган Самад, бир зум гангиг турди-ю, сўнг илдам бориб гўшакни кўтарди.

— Ал-ё-ё.

— Самадбой ака сизми? — деб сўради йўғон бир товуш бетакаллуфлик билан.

— Ҳа, мен.

— Улаш деганларини танийсизми?

Самад саросимада қолди. Таҳдидли товушга қараганда, гапираётган кимса орган одамига ўхшайди. Афтидан, агроном-шоир бирор ишқал чиқаргану қўлга тушган, ўзича Самаднинг номини сотиб, қутилиб чиқмоқчи бўлган.

— Негадир ҳеч бунақа одами эслолмаяпман, — деб мужмал минғиллади Самад. — Тинчликми? Сиз кимсиз?

— Мен учинчи касалхонада навбатчи врачман. У кишини машина туртиб юборган.

— А, нима?! — дея беихтиёр чинқириб юборди Самад, аммо бу чинқириқда ташвишдан қўра тантана, қайғудан қўра қувонч мўлроқ эди. Чунки у аллақандай алкашни деб орган одамларига чалкашиб қолганига бут-

кул ишонган, ич-ичидан бу балодан қутулиш йўлларини излаб ётган эди-да.

— Ташвишланманг, ака, — дея юпатган бўлди навбатчи врач, навқирон олимнинг чинқиригини ўзича тушуниб. — Ҳайдовчи яхши инсон экан, дарров бизнинг касалхонага келтирибди. Улаш аканинг ёнидан визиткангиз чиқди, шунинг учун қўнғироқ қилиб сизни огоҳлантириб қўймокчи бўлдим, узр.

Эс-хушини анча-мунча йиғиб олган Самад энди чинакам ташвишланиб сўради.

— Ахволи тузукми, ишқилиб?

— Тузук-ку-я, ну...

— Нима гап, гапирсангиз-чи?!

— Билмадим... эрталаб рентген қилиб кўрсак, аниқ бирор нима дейиш мумкин. Ҳозирча... назаримда Улаш аканинг мияси чайқалган...

— Мияси чайқалган?

— Менимча шундай, бир йиғлаб, бир қулади, ўзича алланималар, деб алжирайди. Кашибиёт дейдими-ей, антоним, дейдими-ей...

Самад туйкус сергак тортди. Ич-ичини тағин ўша сурбет қизиқиш қитиқлай бошлади.

— Кашибиёт қилдим, деб мақтандандир-да.

— Худди шундай, ака, — қийқириб юборди навбатчи врач. — Топдингиз. Аммо нимани кашиб қилганини билмадим. Аввал ўзакка боқ, кейин нофора қоқ, қаҳрамон-мехрибон, меҳрибон-қаҳрамон, деб шеърлар ўқийдими-ей...

Самаднинг бутун вужуди бўйлаб хузурбахш ҳарорат юргурди: «А, ха-а, қаҳрамон-мехрибон! Рост, аввал сўзнинг ўзагига қараш керак экан-ку?! Қаҳр-мехр... А, ха-а, мана сенга ҳақиқий антоним сўзлар, қаҳрамон-мехрибон, меҳрибон-қаҳрамон! Шу жўнгина жумбокни ечолмай эсим кетди-я?!»

— Ал-ё, ал-ё, — дея навбатчи врач у ёқда ҳануз бўғилиб ётарди. — Нега жимиб қолдингиз, ака? Ал-ё, гапиринг, эй, ухлаб қолдингизми?

— А, нимани гапирай?

— Ия, сизнинг ҳам миянгизни чайқаб қўйдим, шекилли, а кўп гапириб. Ахир қаерда ишлайсиз, деб қачондан бери сўраб ётибман.

Навбатчи врачнинг бу сўрови Самаднинг алланечук ҳамиятига тегди.

— Ўв, биродар, — деди у овозини бир парда кўтариб. — Ўзингизнинг миянгиз чайқалмаганми, ишқилиб. Ана, қўлингиздаги визиткада ҳаммаси ёзиб қўйилган-ку?

— Кечирасиз, — деб бўшашибгина минғиллади навбатчи врач, — бу қоғозга Улаш аканинг қони теккан, ёзувлари анча чапланиб кетибди.

— Газет-пазет ўқиб турасизми ўзи? — викор билан қўшиб қўйди донгдор олим.

— Э-э, Самадбой ака, энди сизни танидим. Лекин... лекин Улаш ака кимингиз бўлади?

Самад томоқ қирганча тараддуланиб қолди.

СҮНГИ ИҚРОР

Каршимда ўрта ёш, ўрта бўйли, қоп-кора қуюқ сочлари қиялатиб-қиялатиб силлиқ тараалган, ҳаворанг костюм-шими, парча-парча гулли бўйинбоги тик қоматига ярашиб турган, чиройли бир киши сипогарчилик билан боқиб туради. Бу одам унча-мунча олғирларнинг ҳам етти ухлаб тушига кирмайдиган довруғали бошқарманинг бошлиғи. Ҳайҳотдек хонадаги қимматбаҳо, антиқа-антиқа жиҳозлар ҳам шундан дарак бериб турибди. Бошлиқ узундан-узун чўзилган қуюқ бир зиёфатдан ҳозиргина кекириб қайтди. Кўз тегмасину, сўнгти пайтларда унинг ошиги олчи, бошқарма-ку бир четда турсин, керак бўлса, вазирликдаги баъзи керилмажонлар ҳам у билан чўчин-кираб гаплашадилар.

Эшик қия очилиб, котиба қизнинг саросимали юзи кўринди тошойна олдидан беихтиёр чекиндим, ҳатто, ўз-ўзимга маҳлиё-маҳлиё термилиб турганимдан уялган-дек бўлдим.

Котиба алланечук айбдор овозда деди: «Анови, иш сўраб келган аёл кетиб қолди».

«Нега?» сўрадим совуқ бир оҳангда, лекин жавобини кутмай, тўрдаги юмшоқ курси томон юрдим.

Бошқармамиз қошида баъзи ходимларнинг кўнглига қараб бир дардисар тиқув-бичув цехи очгандим. Бироқ у ерда ёлчитиб ишни ташкил этадиган етакчи йўқ, жаҳлим чиқиб ўтган ҳафта газетага эълон бериб юбордиму балога қолдим, ҳар куни, ҳечкурса, икки-учтаси етакчиликка даъвогар бўлиб, сахарлаб бўсағада уймаланишгани уймаланишган, лекин бирортаси ҳам кўнглимга ўтиришмаяпти, тўғриси, улардаги аллақандай хокисорликми-ей, ялтоқиликми-ей таъбимни тирриқ қиляпти. Мана, эрталаб ҳам зиёфатга шоша-пиша отланаётганимда телефон аччик-аччик жиринглаб қолди. Бу орада тошойна ёнида ўзимга оро бериш билан овора эдим. Бош иргаб изн берганимдан сўнг, котиба трубкани олди.

«Бир аёл ҳалиги иш масаласида...» деб ахборот бер-

ди котиба. «Тушлиқдан сўнг келсин, гаплашамиз» дедим эшик томон йўналиб. Мана, тушлиқдан кейин эса...

«Нега кетиб қолди? Сиз билан гаплашдими?» — деб сўрадим тобора қизиқишим ортиб.

«Ха, озгина гаплашдик, сизни таниркан...»

«Таниркан?» — ажабланиб қайта сўрадим.

«Ха, зерикиб коридорда юриб-турганда, ҳалиги... хурмат тахтасидаги суратингизни кўриб,вой, бу кишини танийман, дедио югуриб олдимга келди, сўнг пича ўйланаб турди-да, синглум, бу ер менга тўғри келмайди шекилли, деб чиқиб кетди. Мен ҳам ҳайрон қолдим...»

«Илгари қатта ишлаган экан?» — сўрадим таниш аёлларни бир-бир кўз олдимга келтиришга тиришиб.

Котиба андак ўйланиб тургач минғиллади:

«Баҳор кўчасидаги қайсиidi «Ателье мод»да деди-я, адашмасам...»

Ичимда нимадир гуриллаб қўзғалгандай бўлди. Гўё тубсиз бир бўшлиққа чўкиб кетаётгандек тирсакларим билан курси суюнчиғига таяниб қолдим. Котибанинг сўнгти сўzlари қулогимга кирмади. Хаёлимдаги бир овоз «ўша!» «ўша!» дея шангиллар, кўз олдимда йирик-йирик қоп-кора кўзлар, оппок, лўппи юзлар липлип кезинар эди.

«Хўп, бораверинг, — дедим билинар-билинмас титроқ овозда, котибага тик қараёлмай. — Бораверинг, илтимос, ҳозирча олдимга ҳеч кимни қўйманг».

Котиба илдамгина чиқиб кетди. Бироқ, ўрнига эзгин-эзгин хотиралар сўзсиз-сўроқсиз ёпирилиб кирди. Таниш, инжиқ ва қадрли хотира... ха, бу гал ўзи довулдек бостириб келди, одатда, мен унинг ҳузурига бош уриб бораардим. Титроқ кўллари билан идишдан дори излаган бемордек, мен ҳам эсадалик кунлар бағридан ҳашаматли ҳаётим икир-чикирларидан зада кўнглумга најкот ва таскин ахтарардим. Ўткир дори ачиштириб-ачиштириб, куйдириб-куйдириб яраларни тузатгандек, ўша хотиралар ҳам юрагимни азоблаб-азоблаб, ўртаб-ўртаб, сўнг, алланечук ҳаловат ва юпанч бағишиларди. Лекин кўнглумнинг туб-тубига яширинганду бу эсадаликларни ҳеч кимга ҳеч қачон гапириб бермаганман. Қолаверса, унинг бирорвларга тўлиб-тошиб ҳикоя қилиб берадиган, юракларга ғулгула соладиган жойи ҳам йўқ, бор-йўғи, бундан ўн йилча бурун, жазирама ёз кунлари бир шаҳарлик қизга ошиқ бўлиб, изидан эргашиб юрганман, холос...

Ўшанда узок бир овулдан «ўқиб одам бўлиш» ниятида бу улкан шаҳарга келиб қолгандим. Баҳор кўркини кўз-кўз қилиб, хайрлашаётган кунлар эди. Ҳаво гоҳ салкин, гоҳ иссик, дов-дараҳтлар ям-яшил, ҳаммаёқда хаёт қайнайди. Эндинга ҳарбий хизматдан қайтган, кони қайнок, бўз йигит бўлғанлигим сабаблими, ё, табиатимдаги серғайратлик, уддабуронлик боисми, ҳарқалай, теварагимдан ўтиб қайтувчиларнинг, таниш-нотанишларнинг барчаси ҳам очиқ кўнгил, яхши ниятли кишилардек кўринарди кўзимга, назаримда, дунёда хеч қийинчиликлар, чигалликлар, ёлғончиликлар йўқдек туюлар эди. Ҳатто, икки йил ҳарбийда юриб, мактабда ўқиб-ўргангандарим анча унтилган бўлса-да, негадир имтиҳонларни қойиллатиб, хоҳлаган институтимга талаба бўлишимга қаттиқ ишонардим. Бироқ, қабул имтиҳонларига ҳали бир неча ой вақт бор эди, шунинг учун ҳам бир қурилиш ташкилотига амал-тақал билан оддий қурувчи сифатида ишга жойлашганман. Маоши кўнгилдагидек, тағин, кўп қаватли ётоқхонадан бошпана ҳам беришганди. Хуллас, қорним тўқ, фамим йўқ эди.

Шундай кунларнинг бирида ётоқхонамидан унчалик узок бўлмаган тикув-бичув цехига шим буюртма қилиш ниятида кириб қолдим.

Бўсағадан оёқ оширишим билан турли газламаларнинг, аллақандай бўёқларнинг ҳидлари димогимга, тикув машиналарининг ғириллашлари, қиз-жувонларнинг шанфиллаб сўзлашишлари, кулгилари қулогимга урилди. Тикув-бичув артели катта-кичик уч хонадан иборат экан. Кираверишдаги залнинг тўрига тикилган кийимлар, кўрган кўзни куйдирадиган ранг-баранг газламалар кўргазма сифатида осиб қўйилганди.

Мен кириб борган пайт залда ҳеч ким кўринмасди. Қаёққа юришни, кимга дардимни айтишни билмай пича саросималаниб тургач, қаршимдаги эшиги қия очиқ хона томон юрдим.

«Сизга ким керак?» — деб сўради шу пайт майин бир товуш, буюртмачилар буюртмаларини кийиб кўрадиган парда ортидан.

«Шим заказ қилмоқчи эдим...» — дея тўнғилладим ўша томон юзланиб.

Бошқа сўров бўлмади. Андакдан сўнг, узун парда бир титраб қўзғалдию орқасидан... У чиқиб келди! Билмадим, қат-қат парда чеккага сурилганиданми, ё, шу

лаҳза бирор чироқ ёкиб юбордими, ногоҳ зал ёришиб кетгандай бўлди.

Унинг оппок, лўппи юзларида, узун-узун киприклар соя соглан йирик-йирик кўзларда алланечук бегуборлик ёғилиб турар, силлиқ тараб-ўриб нозик елкалари ўртасига ташлаб қўйган қуюқ, қўнғиртоб сочларида, бир четига озгина ип илашиб қолган сал қалин лабларида қандайдир жозиба ўйнар, нимаси биландир ўқувчилар кийимини эслатиб юборадиган оддийгина қўйлаги, қўлидаги қайчиси, газмол ўлчагич тасмаси бош-оёқ сирли бир назокатга чулғаб турар эди.

«Вой, гапирсангиз-чи, ўзингиз газмол опкелдингизми, деб сўраяпман?» — унинг майин товуши қулоғимга элас-элас эшитилдию бирдан сергак тортдим.

Баланд шипда ел қўзғар паррак бувуллаб айланиб турарди. (Балки, бошимдир?) Жуда таниш, жуда қадрдон бир ҳид димофимга урилгандек бўлди. Қаршимдаги эшик инграб кенг очилди-да, уч-тўрт фалтак кўтарган семиз бир хотин биқинимдаги хонага ўтиб кетди. Шундагина бир қадам нарида юзма-юз турган қизга тикилиб анчагина қотиб қолганимни, бутун борлиғимда фалати бир титрок кезиниб юрганини сездим. Бирок ўша маъсума қўзлар мени андак қизиқсиниб, андак ажабсиниб, андак... андак эркаланиб кузатаётганини кўрдиму яна ақлим учди. Ҳойнаҳой, қўлимдаги эски бир газетга ўроғлик газмолга қўшиб гурс-гурс уриб ётган юрагимни, эскушимни, бутун вужудимни унга тоширган эдим.

Бир пайт машиналар шовқинидан хушим жойига қўниб англадимки, аллақачон ташқаридаман. Қўлимдаги икки қатланган бир парча қоғоз буюртма қилиб чиққанимдан дарак бериб турарди. Аммо чевар қиз билан нелар ҳақида сўзлашганим, шимни қандай қилиб тикитирмоқчи бўлганим ўзимга ҳам қоронғи. Лекин, ичу ташим ёп-ёруғ эди! Ҳув, чевар қиз қаршимда пайдо бўлган чоғ зални тўлдириб юборган ёруғлик афтидан, мен билан ташқарига ёпирилиб чиқкан эди!

Негадир шу лаҳзада жимжитликни, ёлғизликни истардим. Юрагим тошарди, сал-пал қаловланиб ётоқхонага йўл олдим.

Мен ивирсиб юрган бу жой шаҳарнинг энг серқатнов, энг гавжум бўлакларидан бири эди. Икки қирғоғи бўйлаб баланд-паст иморатлар, дов-дараҳтларчувалашиб кетган кенг-мўл асфальт йўлда зувуллаб-гувлаб елаётган ав-

тоуловлар оқими бир зум ҳам тинмайди. Йўлаклар, бекатлар одамлар билан гавжум.

Ха, шу кундан, шу соатдан бошлаб сокин умримга тошқинлар кириб келганди. Мен эса қўнглимда кечаётган фалаёнларни тан олгим келмас, тўғрироғи, тан олмоққа ботинолмас эдим. Аммо вақт ўтган сайин, касални яширсанг, иситмаси ошкор этади, деганлариdek ўша энтикирувчи пўртанаалар бағрига баттар ботиб бораёттанимни ҳис этардим. Айниқса, ўша шим буюртма қилиб чиқкан куним, фалати-фалати туйгулар силсиласида силлам қуриди. Кунни бир амаллаб «ҳазм» қилдиму, лекин тун томогимга тиқилиб қолгандек туюлди. «Тарс» этиб ёрилгим келарди. Аксига олиб, ҳамхонам — Тошболта исмли дўстим ҳам бир сабаб билан қишлоғига кетиб қолган, тор ва дим хона баттар ҳаловатсизлантирар эди.

Мен фақат у ҳақида ўйлардим! Ўзимни минг бор чалғитсам-да, ўша йирик-йирик чақноқ қўзлар қоп-қора тунни ёритиб тағин қошимда пайдо бўлар ва узо-о-оқузоқ туриб қолар эди. Бир маҳал тўлғониб ётган жоимдан ширин бир илинж силтаб турғизди.

«Наҳотки, — ўйладим энтикиб, — наҳотки, У ҳам мен ҳақимда ўйлаётган бўлса?!». Бундай илиқ-илинж ипига илашиб қолишимга сабаб, бир пайтлар қандайдир журнал сахифасида ўқиганим — «бирор киши тўғрисида қаттиқ хаёл сурсанг, демак, у ҳам сен ҳақингда ўйлаётган бўлади», деган файласуфона фикр «лоп» этиб эсимга тушиб қолганди. Ана шундан кейин худо берди, лаб-лунжимни илжайишдан тиёлмай қолдим. Ҳатто, тонг олдидан, чўчиб уйғонганимда ҳам юзларимда алланечук табассум қотиб қолганини ҳис этдим...

Дунёда кутишдек азобли, кутишдек лаззатли машғулот бормикан? Магнит парчаси барча темир бўлаклари ни ўзига тортиб олгандек, кутиш ҳам одамнинг барча туйгуларини, хаёлларини, керак бўлса, инон-ихтиёрини ўзига қаратади-қўяди, киши фақатгина унинг қудрати измига бўйсуниб қолади, бирор эзма «яшашдан мақсадинг нима?» дея сўраб қолгудек бўлса, ҳеч иккиланмай «кутиш» деб жавоб беришга шайланади.

Мен ҳам шим тайёр бўладиган ўша буюртма қофозида кўрсатилган кунни интиқ-интизор кутдим. Қурол-яроғ, озиқ-овқат ғамламаси кўплигидан қўнгли тўқ қўшиндек, уч-тўрт кун ўтгач, шим баҳонасида Уни кўришим мум-

кинлиги мени тўлқинлантириб, ҳузурлантириб юарди. «Эх, ландавур, — дея ўйлардим баъзан кулгим қистаб, энсам қотиб, — ўша «Ателье мод» ётоқхонанинг яқинида-ку, нега ҳар куни, керак бўлса, ҳар соат у ерга бирор баҳона билан кириб боравермайсан? Нима, еб қўйишадими улар? Тентакка ўхшаб аллақандай муддатни кутиб юрибсан-а?»

Ўша «нега», «нега»ларга юрагимнинг бир бурчида миттигина жавоб чўғдек милтиллаб турарди-ю, бироқ уни пуфлаб алангалатишга хеч журъатим йўқ эди.

Мен Уни тагин бир карра кўришга қанчалар интиқ бўлмай, лекин, барибир, ўша маъсум кўзлар билан яна тўқнаш келишдан чўчиридим, ҳа, чўчиридим. Назаримда, унинг нигоҳлари юрагимнинг энг тубсиз, энг корони бурчак-бурчакларини ҳам ёритиб юборадигандек, у ерда пусиб ётган, ҳатто, ҳали ўзимга ҳам номаълум чиркин-чиркин хисларни сугуриб чиқариб мени шармандаю шармисор қиласидигандек эди. Бу азобли ҳақиқатга ўта илҳақ куттирган кун етиб келгач, яна бир бор амин бўлдим.

«Ателье мод» бўсағасидан ҳатларканман ҳавонинг иссиқлигиданми, ё, юрагимнинг ҳаддан ташқари гурсиллаб уришиданми бутун вужудимни лоҳаслик, ҳолсизлик қоплаб олди. Айниқса, ўша таниш манзаралардан, таниш ҳидлардан бошим айланиб, кўзим тиниб кетди. Бироқ... бироқ, кўлида қайчи, ўлчагич тасма ушлаб турган бошқа бир тунд қиёфали аёлга кўзим тушдию беихтиёр енгил тортдим. Ҳа, елкамдан тоғ ағдарилгандек бўлди! Шундагина залда мендан бошқа уч-тўрт буюртмачи фўддайиб турганини, уларнинг баъзиси чеккадаги устидаги «Мода» журналларини эринчоқлик билан ва-рақлашаётганини, айримлари эса кўргазмадаги газламалар атрофида уймаланишаётганини кўрдим.

Менинг навбатим етгач, ўша бичиқчи аёл қўлимдаги анчайин унниқиб, ҳилвираб қолган буюртма қофозини оларкан, «Нима бало, ёстиқ қилиб ётдингизми буни?» деб сўради аччиқланган товушда.

Мен бирдан сергак тортдим. Ҳатто, «ҳа» деб юборишимга оз қолди. Чунки, бу бир парча қофозни неча бор ҳижжалаб-ҳижжалаб ўқиб чиқсанларим, кечалари ҳидлаб-ҳидлаб бош остига қўйиб ётганларим чин эди, агар яна икки-уч кун кутганимда, балки эзиб ички каби ютиб юборишдан ҳам қайтмасдим. Ахир, ундан ҳув, олис болалик йилларим овулимиз бикинидаги ялангликда са-

харлаб-саҳарлаб улок-қўйларни ўтлатиб юрганимда димоғимни қитиқлаб-қитиқлаб, кўнглимни яиратиб-яиратиб ўтадиган барра оқкуврай исини туйгандим.

Қоғознинг унниқиб кетганлигидан бичиқчи аёл ёзувларни ўқиёлмай, исми-шарифимни ўзимдан сўраб қолди. Шунчалар паришон турган эканманки, савил қолгур, исми-шарифимни эслаёлмай анча гаранг бўлдим.

«Нима, ўз исмингизни ҳам унудингизми?» — деди бичиқчи аёл бир аччиқланиб, бир ажабланиб. Залда ивирсиб турган буюртмачилар хиринглашди. Мен ҳам синик илжайиб уларга қўшилдим.

Ниҳоят, тайёр шимни қоғозга ўраб, қўлтиққа қисиб кўчага чиқарканман, барибир, ичкарида ниманидир унуби қолдираётгандек эдим. Кирап чоғим бўсафада қолган ўша таниш кўнгилғашлик яна чиппа ёпишди. Боя ичкарида унинг кутилмаганда пайдо бўлиб қолишидан қанчалар чўчиб, тезроқ кетишга ошиқсан бўлсам, энди дадилланиб, хечкурса, ичкари хоналарга бир-бир кўз ташлаб чиқмаганим учун, Унинг бор-йўқлигини аниқламаганим учун ўзимни-ўзим койий бошладим.

Мен негадир унинг номи Феруза бўлса керак, деган хаёл билан юрар, ҳатто, ўз тахминимга буткул ишонар эдим. Феруза... Бу сўз, назаримда, дунёдаги энг тиникликнинг, назокат ва маъсумликнинг атамаси эди. Агар бирор ерда шу сўзни эшитсан, ўша болалигим ялангликларида қолган барра оқкуврайлар баргода сахар чоғлари осилиб турадиган шудринглар, беихтиёр, олмосдек товланиб, кўз олдимга келар, олис бир соғинч, олис бир ташналиқ энтиқтириб юборар эди.

Мен Уни кейинчалик уч-тўрт марта учраттгач, Унга фақатгина Феруза исми мос эканлигига буткул иқрор бўлдим.

«Ателье мод»нинг иш вақти соат еттида тамомланарди. Мен эса анча олдин серқатнов кўчанинг нариги бетидан, чеварларнинг уй-уйларига қайтишларини ҳормайтолмай кузатиб турардим. Мен учун энди Ферузани учратишнинг, имкони топилса, икки-уч оғиз сўзлашишнинг бошқа йўли қолмаганди.

Биринчи галдаги пойлоқчилигим омадли бўлмади. Феруза анча эрта «Ателье мод»дан чикиб, йўлак бўйлаб кета бошлади. Ҳақиқатан ҳам У эканлигига аввал кўзим ишонмади, ақлим бовар қилмади, лекин, юрагим дарров иқрор бўлди, муҳаббат мамлакатининг нурдек тез, нур-

дек покиза элчилари аллақачонлар юборган ажиб сезги-дан у гурсиллаб-гурсиллаб уриб ётарди!

Феруза йўлак бўйлаб озроқ юргач, серқатнов кўчани кесиб ўта бошлади. У чинқириб елаётган автоуловлар орасидан охуларгагина хос зийрак ва хуркак қарашлару, нозик бир чаққонлик билан юриб келардики, назаримда, бир парча оппок ҳарир булут парчаси шовқинли кўча бўйлаб сузиб ўтаётгандек туюлди.

Феруза йўлнинг мен турган бетидаги йўловчилар уймаланиб турган бекатга келиб оёқ илди. Билдимки, у шахарнинг кун ботар тарафига қараб кетар экан.

Мен ўзимнинг нақ бир ойлик ҳамроҳим — вужудимдаги фалати-фалати титроқ билан бекатта яқин келдим. Шу пайт Феруза мени кўриб қолди! Ўшал йирик-йирик сехрли кўзлар... Ўшал мен тик тикилишдан чўчийдиган маъсума кўзлар юзимга хиёл қадалиб қолгандай бўлди. Ўзимни беихтиёр серрайган одамлар панасига урдим. Ногоҳ, қуёшга боқиб кўзи қамашган киши, яна қайта қарашга журъат этолмаганидек, мен ҳам У томон кўз ташлашга ботинолмасдим. Яхшиям, шу орада бекатга троллейбус келиб тўхтадию, йўловчилар сергакланиб, унинг эшиклари томон ёпирилди. Талатўпдан фойдаланиб кўз қиrim билан Феруза турган ёққа қарадим, кўрдимки, у ҳам троллейбусга чиқиш учун тараддуздланиб, уймаланаётган йўловчилар тўдасига қўшилганди. Ич-ичимдан пусиб ётган аллақандай куч мени ҳам ўша тараф итариб юборганини сезмай қолдим.

Күёш ҳорғинлик билан баланд-баланд иморатлар орқасига юмалаб кетган бўлса-да, ҳаво ҳамон иссиқ ва дим эди. Йўл бўйлаб тизилишган алланечук паришон қиёфадаги дарахтлар ҳам ҳолсизлангандек тек қотгандилар. Тўхтаб турган троллейбус тандирдай ўзидан ҳовур пуркар, бир-бирини қистаб тикилишаётган йўловчиларнинг ҳансирашига ҳансираш, нолишига нолиши қўшар эди.

Йўловчиларнинг ур-сури, ич-ичимда қайнаб турган тизгинсиз хоҳиш тезгина мени Ферузага ёйма-ён келтириб қўйди. Ҳатто унинг икки нозик елкалари оралиғидан беллари томон илондек тўлғаниб интилаётган ўша йўғон соч ўрими шундоккина бурним олдида хуш атири ва яна аллақандай кўнглимга жуда таниш, жуда азиз бир хид уфуриб турарди.

Ўша куни ётоқхонага анча кеч қайтдим. Танишбилишларнинг, дўст-оғайниларнинг ҳиссиз-туйғусиз дав-

раларига, латифабозликлариға сира тоқатим йўқ эди. Мен фақат ёлғизликни, жимжитликни истардим. Ҳатто, хийла сийраклашган машиналарнинг физ-физио, узоқ-узоқлардан қулоғимга аранг етиб келаётган аллақандай вайсақи қўшиқ товуши ҳам асабларимни эговларди. Мен неон чироқлари олақуроқ ёритган кўча чеккаси бўйлаб далли девоналарча ивирсиб келарканман, улоқ-кўзиларни ўтлатган ўша адирларимни кўмсадим, оқкув-райларимни қучоқлаб, бир ойдан бери оромимни ўғирлаган қайғую қувончларимни айтиб хўнг-хўнг йиғлагим келарди. Мен... мен Ферузани буткул севиб қолгандим! Унинг маҳалласига довур қўланкадек эргашиб бориб эвазига худди шу икрорни олиб қайтдим. Юрагимга қувонч қалдирғочлари қўнди. Қувончларимнинг боиси Ферузанинг озгина лутфи марҳамати эди. У айғоқчидек тиркашиб юрганларимни сезди, ҳатто, яёв кетаётган чоғ етиб олишим учун қадамларини киши билмас секинлатди, йўл бўйидаги дўйонларга бош суқиб ўзича нималарнидир излагандек бўлди, бироқ унга ёнма-ён келиб дадиллик билан кўзларига тикилмоққа, икки оғиз сўз сўзламоққа журъятим етишмади. Журъат етишган тақдирда ҳам нима дейишпим мумкин унга?

Ферузанинг кўйида куну тун босган ҳар қадамимни ҳар гал қайта-қайта хаёлдан ўтказарканман, унга айттар ҳеч бир сўзим йўқлигини ҳис этардим. Мен фақатгина унга яширин-яширин термилмокқа ярадим, холос. Баъзан Ферузани ранжитадиган бирор кўпол ҳатти-харакат қилганимни сезсан, алам ва пушаймон ўтида куйиб, кўнглим фаш тортиб қолар, мабодо унинг ҳам юрагим майлига мойиллик билан жавоб этаётганини пайқасам, қувончдан энтикиб кетар эдим. Айниқса, хув, ўша бекатда панага қочишимга мажбур этган нигоҳлари ҳар гал ёдимга тушса, офтоб кўрган ниҳолдек яшнаб қолардим. Чунки, одатда кимнидир, ненидир узоқ куттган ва ногоҳ кўриб қолган кишигина шундай термилади.

Бироқ... бироқ ошиқ эли жиноятчининг ўз оғзидан эшитмагунча тинчимайдиган терговчилар каби шубҳакор ва инжиқ бўлар экан. Мен ҳам Ферузанинг интиқликларимга интиқлик билан жавоб беряётганини шунчаки тасодифга йўяр, ўзимни-ўзим шубҳаю гумонлар тифига тутиб азоблар эдим.

Орадан йиллар ўтиб ўша тароватли кунларни лаззат-

ли бир оғриқ билан неча бор эслаганимда барча гумонларим бекор эканлигига амин бўлдим. Мана, ҳозир ҳам юмшоқ курсимга оғир тошдай чўкиб, ялтироқ столимга бағримни бериб, ўша нотаниш қизнинг имолари тасодиф эмаслигини, у чиндан ҳам менини бўлишини истаганини етмиш икки томирим билан ҳис қилмоқдаман.

Бир куни, одатдагидек, кечки пайт иш вақти тугашини кутиб тургандим У «лип» этиб «Ателье мод» эшигидан чиқди-да, алланечук ҳаяжонли чехрада мен турган томон қаради, қарадио яна ичкари кириб кетди. Феруззанинг мени кўрганлигига шак-шубҳам йўқ эди. Чунки у соядек эргашиб юришларимга ўрганиб қолган, хатти-ҳаракатларимни аллақачон билиб олганди. Шу боис, назаримда, у мени масхаралаётгандай, гўдак каби лакиллатаётгандай туюлдио ички бир фурурим илкис қўзғолиб, турган жойимдан кетишга чоғландим. Бироқ кўнглимда бир овоз «узоқлашиб кетма», дея тинимсиз уқтирас, қадамларим тобора секинлашиб борар эди.

У яна пайдо бўлди! Йўқ, адашмасам, бу сафар кўқдан тушди, эгнидаги авваллари мен ҳеч қачон кўрмаган, ҳойнаҳой, ҳозиргина ўзи тикиб бўлгану кийиб чиқсан, кенг-узун, ҳаворанг кўйлаги шундан дарак бериб турарди.

Мен одатдагидек, гўё айб устида қўлга тушгандай, ўзимни йўл четида анчадан бери тўхтаб турган юк машинаси панасига олдим ва бир лаҳза тин олгач, яна секин мўраладим.

Феруза, ҳамкасби бўлса керак, бир қиз билан хушчакчақ кайфиятда сўзлашиб турар, ўқтин-ўқтин «жанговар постим» томон қараб-қараб кўяр эди. У сўзсиз мени изларди!

Феруза! Ҳа, янги кийган кўйлагида у чиндан ҳам кўқдан тушган, бу фубор ва қурум босган тош шахарга гўзаллигу нафосат олиб келган хурга ўхшарди. Унинг кулгиларидан бутун теварак файзланарди, бутун олам нурга чўлғанарди ўша маъсум қароқларидан! Ана, чинкириб елаётган автоуловлар ҳам бир зумга тизилиб-тизилиб тўхтаб қолдилар. Йўқ, улар қизил чироқ буйруғига бўйсуниб эмас, шундоққина йўл ёқасидан фир-фир эсаётган нажот ва ҳаловат эпкинини сезишиб, шовқин-сурондан, мой ва дуднинг кўланса хидидан энди вужудларига бир лаҳза ором бериш иштиёқида тўхташди. Баланд-паст бинолар ҳам, қатор-қатор дараҳтлар ҳам, гўё

кўринмас қўлларини силкитиб У томон талпинаётгандек, уни олқишаётгандек эди...

Шу учрашувдан сўнг нақ бир ҳафта шаҳардан қорам ўчди. Ишбошимиздан ялиниб-ёлвориб, улуш келтириш ваъдасини қуюқ қилиб, ниҳоят изн олгач, яқин бир қариндошимизнинг тўйига қатнашиш учун қишлоққа жўнаб кетдим. Ўша дабдабали тўй нимаси биландир ҳеч ёдимдан чикмайди. Мен қариндошларни, таниш-билишларни ҳайрон қолдириб, энг инжиқ, энг серташвиш хизматни, чойхоначиликни бўйнимга олгандим. Чунки самовар тагида чирсиллаб-чирсиллаб ёнаётган оловга термилиб узоқ шаҳардан хаёлларим қучофида етиб келган Ферузам билан шивирлашиш иштиёқида ўзга ҳою ҳавасларни, ўйин-кулгиларни кўнглимдан қувиб чиқаргандим. Ҳатто, бўй етиб қолган сулув-сулув қишлоқ қизларининг сирли-сирли, ишвали-ишвали боқишиларию, гангса солишлари ҳам кўп малол келар, фашимни кўзғар эди.

Тўй тугаб, бошқа юмушларим ҳам битгач, кечки поездни кутишга сабрим чидамай, йўл ҳаки анча қиммат бўлишига ҳам қарамай, эрталабки автобусга ўтириб шаҳарга қайтдим. Бахтга қарши, қон юрагимни баттар қон қилиб, йўлда қўлигимиз бузилиб қолди, шунинг учун ҳам шаҳарга мўлжалдагидан анча кеч етиб келдик.

Мен ётоқхонага кириб борганимда соат миллари етти рақами атрофида айбдорона титраб турар, аламимга тагин алам қўшар эди. Тарвузим қўлтиғимдан тушди, чунки, кузатишларимдан яхши билардимки, бу вакт «Ателье мод»дан ҳамма кетиб бўлади.

Бирок барибири, хонамда ҳам ялпайиб ўтиrolmasdim. Ўз-ўзимдан хўрлигим келиб, юрагим тошар, бир ёқларга бош олиб, дайдиб кетгим келар эди. Охири, йўлакларда учраб қолган таниш-билишларга сохта ва омонат табасумлар улаша-улаша ташқарига отилдим.

Ҳаво одатдагидай, иссиқ ва дим эди. Гўё қуёш кўқдан нур эмас, хорғинлик ва ланжлик ёғдирав, теграмдан ўтиб-қайтаётгандар норози қиёфада бўшашиб-бўшашиб қадам ташлашар, нажот излашаётгандек оёқлари остига термилишар эди.

Мен «Ателье мод» томон узокроқдан қўрқа-писа кўз ташладим, кўз ташладиму эшиқдаги калламдек қулфни кўриб гурс-гурс уриб ётган юрагим тагида нимадир «чирс» узилиб кетгандай туюлди. Ўша нимадир, мени

шу ёққа судраб келган, «зора, бугун кўпроқ ишлаб, ушланиб қолган бўлса...» деган ожизгина илинж или эди.

Аччиқ бир аламдан, ички бир хўрликтан хира торған кўзларимни қайга яширатимни билмасдим. Елкала-римга, кўл-оёқларимга тоғдек чарчоқ инди. Назаримда, қайфу-ҳасрат кўпчиб ётган, мени тобора домига тортиб бораётган йўлакдан тезроқ узоклашиш учун теграмдан ўтиб-қайтаётганлар чопқиллашаётгандай, асфалт кўча-ни тўлдириб елаётган автоуловлар илдамлигига илдам-лик, чинқириғига чинқириқ қўшилгандай туюларди.

Шу пайт... шу пайт... қорачиғларимни қоплаб келаётган кирчил туман тирқираб-тирқираб тарқаб кетди. Бағ-римнинг бир бурчида бекиниб ётган қувонч қўшинлари шиддат билан аввал юрагимни, юз-кўзимни, сўнгра бутун борлигимни ишғол этди. Мен уни кўриб қолгандим! Умидсизлик билан теваракни кузатиб турганимда, ногоҳ, ўша қадрдон бекатда Ферузага кўзим тушди. У йўловчи-лар тўдасидан андак четлашиб, аллақандай журнални ўзича варақлаб турар, ўқтин-ўқтин атрофига қараб-қараб қўяр эди.

Наҳотки, у кимнидир кутаётган бўлса? Ё, шунча вақтдан бери унинг маҳалласидан ўтадиган ўша таниш рақамли троллейбус келмадимикан? Ё, шу атрофдаги бирор дўкон-пўконга кириб ушланиб қолдимикин? На-хотки...

Қай йўсинда серқатнов йўлни кесиб ўтганимни билмай қолдим. Аммо шу орада ўша таниш рақамли троллейбус мендан илгарироқ ингиллаб бориб бекатда тўхта-ди. Беихтиёр ўйрғалаб юурдим. Бироқ унинг троллейбус томон лоқайд бир кўз ташлаб яна журналга термил-ганини кўрдиму яна қадамларим ўз-ўзидан секинлашди.

Троллейбус эшиги олдида йўловчилар одатдагидек уймаланиб қолдилар. Тушувчилару чиқувчилар ўртаси-даги беллашув авжи пардасига чиқди.

Шу пайт у мени кўриб қолди. Кўрдию беихтиёр юз-кўзини журнал оркасига яширди, сўнгра, троллейбус етиб келганини эндигина сезиб қолгандай, ҳуркак оху каби ўзини йўловчилар тўдасига урди. Бу ёқда эса унинг кўзи тушганини пайқаганданоқ мен хам йўл ёқасидаги дарахт панасига беихтиёр яшириниб олгандим.

Бекинишлар, пайт пойлашлар бошқа насиб этмаган экан. Шундан сўнг Ферузани хеч учратолмадим. Орадан кўп ўтмай, институтга кириш имтиҳонлари бошланиб

ташвишу ғалвадан бошим чиқмай қолди. Сўнгра «лоп» этиб студент бўлдиму неча йиллардан бери интиқ кутган орзуим амалга ошганиданми, анчайин, босар-тусаримни билмай, ҳаволаниб кетдим. Изидан ўқиш, пахта ҳашари, қишики синов, ёзги синов деган талабаликнинг ўзига яраша қайфу ҳасратлари севги савдоларини кўмиб юборди. Тўғри, қиши кунларининг бирида ўша томонларга йўлим тушиб қолиб, «Ателье мод»га кирдим. Бироқ, шоша-пиша кўз ташлаганим учунми, негадир у кўринмади. Ичкари хоналарда тикиб-бичиб ётган қизлардан сўрашга чоғландиму, лекин унинг ҳатто исмини ҳам билмаслигим эсимга тушиб ҳафсалам пир бўлди.

Бу кечинмалар кимнингдир кулгисини қисташи, кимнингдир энсасини қотириши тайин, бироқ, мен учун у ҳайрат қасридир. Бу қасрга ҳар гал кирганимда, гоҳо аччиқ, гоҳо ширин туйгулар оғушида яйрайман.

Мана, ҳозир ҳам ҳайҳотдек ишхонамда эмас, гўё, ўша улуғвор қасрим ичида узоқ ва қадрдон ҳисларга қоришиб кезинарканман бир қайсар ҳақиқатга қайта-қайта иқрор бўлашпман. Мен... мен уни аягандан, бирор ҳатти-харакатим, тўпори гап-сўзларим билан унга озор етказишдан чўчиганман, дея илгари ўз-ўзимга берган таскинларимнинг барчаси ёлғон, мен ҳамиша журъатсизлигим қалқони панасида ўз муҳаббатимни асраганман!

Кизиқ, ўша аёл ҳузуримга кирганда, кўзлар тўқнашганда не ҳол юз бериши мумкин эди?! Тўғриси, буни тасаввур этиб кўришни ҳам истамайман. Сабаби... Балки у буткул ўзгариб кетгандир? Балки... Котиба қиз у ҳақида менга маълумот берганда, кўз олдимда йирик-йирик кўзлари маъсум порлаган ўша ўн саккиз яшар беғубор қиз жонланиб, титраб кетдим. Бироқ иш сўраб келган аёл экан-ку? У бундан ўн йилча аввалгидек юрагимга ўт сола оладими, тўғрироғи... Тўғрироғи, уни кўргач юрагим ўша ёз кунларидагидек ёна оладими? Мен... мен шундан кўрқаман? Ия, шошма, шошма...

Мен яшиндек «ярқ» этиб миямга урилган, бутун хаёлотимни ёритиб юборган фикрдан қалқиб, андак ўзимга келдим. Шундагина ёнимни пайпаслаб анчадан бери чеким излаб ётганимни пайқадим. Шоша-пиша бир дона сигарет олиб лабларимга қистириб тутатдим. Тамакининг аччиқ тутуни ҳалқаланиб-ҳалқаланиб теваракка ёйила бошлиди.

Шошма-шошма, нега у ҳузуримга кирмай қайтиб кет-

ди? Ё, таниб қолишимдан кўркдими? Ия, нимасидан кўркади, қайтам, ўша эски саргузаштларни эслатиб, кўнглимни эритиб, ишини битириб олса бўларди-ку, ахир, «ха» йўқ, «бе» йўқ хузуримда минг хил товланиб, минг хил нағмалар кўрсатиб, баъзи бир илтимосларини бајартиб олаётган бекалар қанча? Ё, мени ҳам қийнаган, кўркитган ўша хислар Унинг ҳам юрагини тилка-пора қилдимикан? Наҳотки? Чиндан ҳам шундай бўлган, ичичимдан сезаяпман, худди шу хол Уни кетишга ундалан.

Махмадона котиба боя тафсилотларни чала айтди-ёв, мен, ахир, ҳозир ўша манзарани кўзгудан кўраётгандек кўриб турибман: ана, у коридорда осиёлиқ суратларни бир-бир кўздан кечиряпти. Ногоҳ менинг суратимни кўриб қолди. Йўқ, аввал, кўзларига ишонмади, сўнг, хотира кўзи билан, юрак кўзи билан чақнаб тикилдию... Котиба киз айтгандек, «вой», «вой»лаб қабулхона томон югурмади, балки «вой» дедиу, хув, ўша бекатда журнал панасига бекингандек, беихтиёр юзини лўппи қўлчалари билан яшириб қолди. Шу алфозда уч-тўрт лаҳза тошдек қотди, хаёллар қуюни ўша олис ёз оқшомлари томон бир зум учирив кетди. У шу қуюн чирпирагида югуриб ташкарига чиқиб кетардию, лекин котиба қизда шубҳа уйғотишини истамади. Шунинг учун ҳам «менга тўғри келмайди, шекилли» деб икки-уч оғиз гапиришди. Сўнгра, кетди. Йўқ, у қочиб кетмади, балки... юрагининг аллақаеридадир яширинган алланарсани бу ҳай-хотдек идорада йўқотиб қўймаслик учун ўзини-ўзи опқо-чиб кетди.

Мен чуқур тин олиб курсимга чўқдим. Кўлимдаги чала чекилган сигарет аллақачон ўчиб қолганди. Унинг кулга айланган қисмига бир зум паришон тикилиб турдим-да, чиқинди челягига ташладим. Кўл-оёқларимга эзгин бир чарчоқ инди. Кўнғироқ тугмасини босиб котибани чорладим. Зум ўтмай хонада котибанинг доимги саросимали юзи пайдо бўлди.

Мен осмон парча-парча бўлиб, кўриниб турган дераза томон юзланиб дедим:

— Буйруқ тайёрланг, тикув-бичув цехи ёпилди...

АЛДОҚЧИ ТУНЛАР

Шом қоронғиси қуйилиб келаётган бир пайтда Нур қўрбоши харсанг тошлар панасидан бош кўтариб, кенг ялангликдаги қишлоғи томон маъюс-маҳзун термилди.

Ё, раб, ҳувуллаб ётган манов ҳаробазор наҳот унинг ота маскани?! Қани, қир бағрида ёйилиб юрувчи сурув-сурув қўй-қўзилар? Қани, бутун қишлоқни қий-чувга кўмиб юборадиган болалар? Сув баҳона, булоқ бошига қимтиниб-қимтиниб йифилувчи қиз-жувонлар қани?

Нур қўрбоши ўз қишлоғига уч баҳору уч қишдан бери бу қадар яқин келмаган, ҳувв, ўша илиқ кўклам сахарида ўн байталга бир дунё қоракўл тери юклаб, қаршилиқ савдогарлар билан Қашқар тарафларга отланганида сафарининг бунчалик узайиб кетишини сирасира кутмаган эди. Ўшанда, отаси – кекса чорвадор бой, кўзларидан ўт чақнаб турган йигирма беш яшар ўғлини, одатдагидек, ишонч билан фахрлана-фахрлана кузатиб қолганди.

Аммо атиги бир сафар қайроқдек Нур бойваччага ҳам, нақ бир аср чўзилгандай бўлди. Ҳайбатли-хайбатли тоғлардан ошиб, қаҳратоннинг совуқ шамолларига қоришиб, олис Қашқар бозорларига ҳам етиб келган аллақандай инқилоб тўғрисидаги миш-мишлар ҳамма мусофиirlар қатори уни ҳам ташвишлантириб қўйганди. Айникса, кетар пайти орқасида чирқираб қолган бир яшар ўғилчасини ўлардай соғинганидан қўнглига қил сиғмасди. Шу сабаб, гоҳо, савдони ҳам йифишириб, ўтар-қайтар болакайларни томошалаб ўтирас, уларга кўп-кўп совғалар улашар эди. Охири, сабр косаси лиммо-лим тўлиб, илк кўклам кунларидан бирида, шерикларини қистай-қистай йўлга чоғланди. Соғинчу интизорликда бойваччадан ками йўқ, дўстлари ҳам жон-жон дея отларга қамчи босдилар.

Улар йўллар айрилар сарҳадда узок-узок хайрлашишиди.

Ўша йили кўклам хийла иссиқ келиб, кор-музлар

ҳил-ҳил эриб оқар, кенг қир бағирларию сайҳонликларда кўм-кўк ўт-ўланлар гуркираб ётар, гул-чечакларнинг товусдек таровати кўрган кўзни қувонтирас эди. Аммо соғинчини ичига сиёдиролмаган Нур бойвачча орқа-олдига қарамай, шошиб-шошиб йўл босарди.

Бир пайт, қадрдан қишлоғига ярим кунлик йўл қолган бир маҳал, тор бир яланглиқда бир тўп отлиқлар олдини тўсиб чиқиши. Нур қўрбоши чавандозларнинг важоҳатидан ўтакаси ёрилса-да, улар ичидағи ҳамқишлоғини, қишлоқ оқсоқолининг арзанда боласини таниб, ҳаяжон билан отидан сакраб тушди.

— Ассалому алайкум, — деди қучоқ очиб кўришувга чоғланиб. Лаб-лунжи қувончдан ёйилиб кетганди.

Аммо ҳамқишлоқ Сулаймон аргумоғини чир-чир айлантиаркан қуруққина саломлашди:

— Яхши етиб келдингми?

Нур бойвачча анграйди-қолди: ё, Оллоҳ, қишлоқ оқсоқолининг муллавачча ўғли Сулаймонми шу? Ё, ажаб, нозиккина, сипогина, кўй оғзидан чўп олмаган йигитча эди-ку? Мунча қаҳру фазаб, мунча шиддат қайдан келди унга?! Елкасида антиқа милтиқ, уст-боши кирчил, сочсоқоли ўsic, бу не ҳол?!

— Оғир бўл, Нур, — деди Сулаймон от жиловини тортиб. — Кўргулик! Ҳаммаёқда инқилоб балоси!

Эмишки, уч ойча илгари қишлоқни қизил қўшин мўри малаҳдек босибди. Мол-мулкка кўз олайтирибди, зангарлар. Қишлоқ оқсоқоли номусига чидаёлмай, ҳовлисида амирлардек кезиниб юрган аскарларга ўроқ олиб ташланган чоғ қизил кўмондон какликдек отиб ташлабди уни! Сулаймон эса деразадан чиқиб қочганмиш. Нурбекнинг отасидан уч хум олтин талаб қилиб, уни отхонага қамаб кўйишибди. Бечора чолни ёзилгани ҳам олиб чиқишибди. «Отхона кенг, билганингни қилавермайсанми, аҳмок» деб қаҳ-қаҳ уришибди. Эртасига, қовуғи ёрилиб ўша кечәёқ тингчиган қарияни ўлган хачирдек ташқарига судраб ташлашибди.

Бошидан тўқмоқ егандек, аллақачонлар ялпайиб ётган Нур бойвачча, бир маҳал, гўё тўсатдан уйқуси ўчган инжик гўдакдай увв тортиб юборди.

— Отажо-о-он, уввв, ота-а...

У тошлок ерни алам билан муштлар, фужанак бўлиб типирчилар эди.

Бойваччанинг жазавасидан асов тулпорлар ҳам ҳай-

ратлангандай кўзларини чақчайтиб, бошларини силкитарди. Чавандозлар бирин-кетин отлардан тушиб, лекин жиловларни қўлдан қўймай, ерга тиззалаб ўтиришди.

Сулаймон қисқагина мунгли тиловат қилди.

Фотихадан сўнг, тўдабоши ҳамон ўзини босолмай, ҳиқиллаб ётган аламзаданинг елкасига жундор қўлини қўйиб:

— Исломнинг турк навкарина кўз ёш ярашмас, — деди хиёл бошқа лаҳжада.

Нур бойвачча «эса, нима қиласай, дегандек, ёшли кўзларини унга қаратди. Атрофдагилар, худди шуни кутиб турган каби чувиллай кетдилар:

— Қонга-қон «Ал-қасос!»

— Ҳеч кимнинг дарди сеникидан кам эмас, — деди Сулаймон қамчи сопи билан йигитларга ишора қилиб.

Нур бойвачча чангта беланиб қад тиклади, хўрсинди. Сўнг, тоғлар ортидаги қишлоғи тараф ғамгингина қараб тураркан пичирлади:

— Менга ҳам яроғ беринг...

Унинг нақ икки йилга чўзилган қонли сафари худди шу тошлоқ сойдан бошланди.

Улар ўша куниёқ Анвар пошшонинг буюк лашкарига қўшилиш ниятида Бойсун тоғлари томон йўл олдилар.

Кечга яқин бир тубсиз жар лабидаги сўқмоқдан ўтиш арафасида Нур бойвачча ёнма-ён от йўрттириб бораётган Сулаймонга ботинмайгина кўз ташлаб, ўғли ҳақида сўради. Сўради-ю, гўё, яна нохуш хабар эшитадигандай, дами ичига тушиб юраги бежо ура кетди.

— Ўғлинг, — деб гап бошлади Сулаймон, сочкин ўйларини бир зум йиғиб, — ўғлинг Нишон хизматкорнинг қарамогида, хотининг... ўшанга тегди, қанжиқ.

У гапини тугатар-тугатмас, Нур бойвачча отига аччиқ қамчи тортди...

Эртасига, намозидан сўнг, бойвачча фўдайған ёшгина навкардан бир қулич тасма топиб, ўғлига атаб келтираётган, ёрочдан устакорлик билан ясалган ўйинчоқ тойни бўйнига дурбиндай осиб олди. Ўша фаройиб кийимли савдогарнинг лаби-лабига тегмай таърифлашича бу матоҳ нақ Фарангистонда ясалган эмиш.

Қаҳрли, суронли дамлар... Жангу жадал — Қашкар бозорида мол сотиш эмаслигини Нур бойвачча лаҳза сайин ҳис қила борди. Ўғлининг ҳидига зор

димоғи, қон иси, ўқ-дори исига кўниқди. Ҳатто, бу исларсиз туролмайдиган, кўзи тиниб, боши айланадиган азобга йўлиқди. Шу сабабданми, ҳар қалай, у савашларда шердек олишар, сачраётган қонни кўриб телбаларча ҳоҳолар эди.

Бир оқшом, сийрак арчазор устида адашиб чарх ураётган тўргайга хаёлчан термилиб турган Нурбек, шундок ёнгинасида, бўйнидаги ўйинчоқ тойга ошуфта тикилаётган сардорни сезмай қолди.

— Ўғлонимизни Оллоҳ паноҳ этсин! — деди сардор жилмайиб.

Бойвачча ҳайратланиб унга юзланди.

Ўғли борлигини у қайдан билди?» Сулаймон айтдимикин, ё? Унда «ўғлонимиз» демоқнинг боиси не? Ё, сардорнинг ҳам ўғли бормикан?

Нурбек тўда бошининг меҳрли тилагидан бўшашиб, қўлини кўксига қўйди.

— Ташаккур, афандим...

Уларнинг сардори Истанбул тарафлардан келган бўлиб, Анвар пошшонинг ишонган ноибларидан бири экан. Қизиллар орасида «Кари қоплон» лақаби билан донг чиқарган бу саксон яшар чолнинг foят тетиклиги ҳаммани ҳайратга соларди. Ҳатто, ҳарбларнинг бирида оғир яраланиб ётса ҳам хийла вақт қўзлари чақнаб турди. Нихоят, «Оллоҳга шукурлар... боболар юртина шаҳид бўлмак насиб этмиш...», дея энтика-энтика жон берди.

Ўшанда Нур бойваччанинг қилич тутганига роса бир йил тўлган эди. «Кари қоплон»нинг мурдаси совимай туриб, қўрбошилик даъво қилмиш бир чақчайган фаламисни у қоқ оғзидан отиб ташлади. Сўнг, ўша чошгоҳ улуғ қарияни иззат-икром билан кўмишгач, Нурбекнинг ўзи усталик билан йигитларни савашга бошлаб кирди. Энди, у — Нур қўрбоши эди!

Кўп ўтмай, Анвар пошшо ҳам дайди ўқка учди-ю, «буюк лашкар» тўзғиб қолди. Беклар, понсадлар хокимлик талашиб бир-бирларига тиф кўтардилар, анчадан буён саросимада юрган қизил қўшиннинг елкасига офтоб тегди.

Нур қўрбоши эса эси борида этагини йиғдию юзтacha навкарини бошлаб, яна изига — ўз қишлоғи ёққа қайтди. Улар йўл-йўлакай — Оқтош овули атрофида катта бир тўдага йўлиқишиди. Учраган тўда сардори Нурбекни

менсимай, унинг бўйнидаги фарангига ўйинчоқни яйраб-яйраб мазах қилди.

«Ҳали гўдак экансан-ку, ота ўғил, йигитларни менга топшир, ҳаққи учун бошқа зўр ўйинчоқ топиб бераман», дей қаҳ-қаҳ отди. Бироқ ўша тунда, унинг ўзи саксон азаматни «гўдак»ка мерос қолдириб, заҳарланган қовур-доқдан тил тортмай қулади.

Ўша йили Нур қўрбоши Бойсун тог этакларида ивирсиб қолиб кетди. Лаънати қизил қўшин деганлари дақиқа сайн кучайиб борар, ҳар учраган сайхонлик, ҳар учраган довонда милтиқ ўқталиб турар эди.

Нурбек йигитларини зимдан кузатаркан, улар ҳам ўзидан баттар ҳориб, эзилиб бораётганини, милтиқлар гумбуридан, қиличлар жарангидан безиб бўлганини хис қиласди. Қайсиdir кеч, полвон йигитлардан бири ўзини жардан ташлаб юборди. Раҳматлиknинг изидан ҳавас билан қараб қолмиш навкарларнинг шивир-шивирича, хувв, кир этагида бечоранинг ўйнаб-ўсган овули қолиб кетаёттир экан.

Шундай қақшаган кунларнинг бирида, улар кенг ялангликда бемалол чувалашиб, еб-ичишаётган ёйи устидан чикиб қолишли!

Аввалига, Сулаймон уч азаматини ёнига олиб, қай-бир арча панасида, босмачилардан кўра командирларидан бекиниб, хотиржам қартабозлик қилаётган тўрт соқчини кўйдай бўғизлаб келди.

Андан сўнг, қонсираб, тўлқинланиб турган юз йигирма нафар чавандоз баб-баравар отлар жиловини бўша-тишиди. Кенг ялангликни ваҳший қийқириқлар қоплаб кетди.

— Ўқ отилмаси-ин! Фақат бурдала-анг, бурдаланг! — дей ўкиради кўзи қонга тўлиб, қуондек чарх уриб бораётган қўрбоши Унинг бўйнидаги ўйинчоқ той шиддатдан афсунгардек силкинар, гўё сардорини тортқилаб-тортқилаб кирғинга ундаётгандай кўринар эди.

Буткул вахимада қолган ҳангуманг қизиллар пала-партиш ўқ уза-уза дуч келган ёққа тумтаракай қоча кетдилар. Жанг хидини сезган отлари эса аччиқ-аччиқ кишнар, қозиклари атрофида чир-чир айланар эди.

Урҳо-ур ичидаги калхатдай шўнғиб келмиш қўрбоши иккала қўлинини ҳам жони борича кўтариб жавдираётган аскарнинг бўғзини тилиб юборди. Ариқдай очилиб қолган кекирдақдан шариллаб иссиқ қон отила кетди. Ун-

дан сал нарида кимдир аллақачон иккига бўлиб ўтган гавда типирлаб ётарди.

Голиб қийкириқларга бир зумда доду фарёд, ингрок саслари қоришиб кетди. Отлар туёғидан кўтарилаётган чант-тўзон кенг ялангликни кирчил пардадек қоплади.

Кўз очиб юмгунча, чавақланган юзга яқин ёғий аскари қуюқ кон буғи таратиб, дўуппайиб-дўуппайиб қолдилар.

Чиндан ҳам, бугун тўймисан тўй экан. Асиirlардан бирининг тутила-тутила тушунтиришича улуф инқилобнинг нечадир йиллигини тантанали нишонлашаётган экан.

Голиблар қаҳ-қаҳ отиб кулдилар. Асиirlар эса ўйчан кезаётган қўрбошининг бўйнидаги фараанг ўйинчоққа ноумид термилиша-термилиша ўз тақдирларини кутишарди.

Нурбек, нихоят, хорғин-хорғин кўзларини олис-олис чўққилар томон олиб қочаркан буюрди:

— Отиб ташлансан!

Орадан ойлар ўтиб, қизилларнинг бешафқат таъкибларидан қоча-қоча, қишининг қаҳрли аёzlарида форматор бикиниб дийдирашаркан, ўша охирги ғалабани лаззат билан эслаб юришди.

Нур қўрбошининг кўнглига қил сифмасди. У ҳарбларнинг бирида дайди ўқ ярмини юлиб кетган ўйинчоқ тойни бағрига босганича қаҳратондан бир амаллаб чиқиб олиш режаларини ўйлаб ўтиарди.

Ҳеч қаердан таъминотнинг йўқлиги, устига-устак, теваракдаги бошқа тўдаларнинг, худди душманига карағандай, ғижиниб олайишлари йигитларнинг кўнглини буткул чўқтириб юборганди. Яратганга шукурким, баландбаланд қоялар орасидан манови — қўй қумалоқлари бўйрадай тўшалиб ётган форлар топила қолди. Ҳар нечук бошпана.

Йигитлар теварак-атрофда ғиж-ғиж ўсиб ётган арчалардан келтириб форлар ўртасида гулханлар ёқишар, сўнгра ловуллаб ёнаётган олов теграсида тўп-тўп ўтириб, турли-туман хаёлларга фарқ бўлишар эди.

Форлар ичида бўртиб-бўртиб чиққан тош бўлаклари, аллақандай дарахт илдизлари тез орада кора қурум билан қопланиб кетди.

Бир куни аср намозидан сўнг ўнбоши Сулаймон сеқин пичирлади:

— Нур, кишлоқлардан ўлпон йигайлик, йигитлар оч!

Кўрбоши ялт этиб унга юзланди:

— Шунча йил қон кечмоқдин мақсадинг шу эдими, қори?!

Сулаймон унга гап уқтириб бўлмаслигини англаб оғир тин олди. Кўрбоши эса кўзларини чала юмиб, «ярадор» ўйинчоқни силаганича яна хаёлга чўмди.

Сулаймоннинг фаши қўзғалди:

— Ўйинчоқ ўйнагунча, — деб димогидан кулди у, — навкарлар ғамини е.

— Сулаймон, Оқтошдаги сардорни унутма! — деди Нурбек ўзини аранг босиб, аммо югурик кўллари, беихтиёр, ёнidan маузерни суурдию тиззасига қўйди.

Ўноши шарт туриб, энгашганча фордан чиқиб кетди ва ўша тунда гумбурлаган ўқ товушидан хамма оёққа қалқди. Изидан, Сулаймоннинг алам-изтиробли мазахга лиммо-лим ҳайқириғи тоғлардан-тоғларга, даралардан-дарарапарга урилиб янгради:

— Э, ҳе-ҳе-ҳе-ҳе-ей, — (овоз қайдан келаётганини ҳеч ким илғаёлмасди) — Нурбекка ишонмангла-ар, у ўғлини кутқариш пайида юриди-и-и, барибир сизларни сотади-и-и!

Нур қўрбошини титроқ босди: «Ё, оллоҳ, бу не қўргулик...» лекин шу лаҳзәёқ, гапга чечан навкарлардан бирининг жавоби кўнглини тоғдай ўстирди.

— Ҳей, — деди у бутун зулматни ларзага келтириб. — Сен ҳезалакда йўқ бўлса йўқдир, биз ҳаммамиз ўғилли-и-и! Ҳамманинг нияти би-ир!

Навкар гапини тугатар-тугатмас, чийиллаб келган ўқ орқадаги қояга урилди.

Тўданинг ярмини Сулаймон авраб, эргаштириб кетган экан. Отишма бошланди.

Карийб икки йилдан бўён ўқ ёмғири остида изғиган Нур қўрбоши, илк бор, шу ерда елкасидан яраланиб инграганича қулади... ва зор-зор кутилган кўкламнинг ўрталарига довур турмади.

Тоғларда қорлар эриб, дарёлар шовуллай бошлади, кушлар чукурлапиб, кўкатлар бўй тараф қолипди.

Бироқ аламзада тўданинг юрак-бағри муз эди.

Кўрбоши туну кун алаҳлаб, мулозимлар қуршовида ётар, гоҳо ўғлини чақира-чақира сапчиб туриб, фор оғзи ни қидириб қолар эди. Мулозимлар ҳай-ҳайлашиб, қўли-

га ўша... «ярадор» от ўйинчоқни тутқазишгач, қалтирай-қалтирай, ўз-ўзидан тинчиб яна чўзиларди.

Нихоят, навкарларидан ҳам баттар озиб-тўзиб кетган Нурбек оёққа турди. Эртаси куни садоқатли мулозимлар қўрқа-писа гап бошлиши:

— Бек, бу ерларда энди кунимиз биттанга ўхшайди, ўзга юргларга бош олиб кетайлик...

— Сиз Қашқар тарафларни хўб билармишсиз...

— Иншооллоҳ, яна қайтармиз...

Кўрбоши сесканиб-сесканиб тушди, аммо, озгин қўллари бу гал тўппончанинг совуқ дастаги томон узалмади.

Мулозимлар ҳақ эди. Буткул ҳолдан тойган йигитлар арзимаган ҳужумга ҳам дош беролмасдилар. Худога шукур, қизиллар негадир йўқлаб келишмаяпти, ё, «аёзда қирилиб битган», дея ўйлашайтимиликан?! Устига-устак, Тоштуёқдан — Нурбекнинг суюкли тулпоридан бошка ҳамма отларни сўйиб ейишганди...

— Сафарга тахт эмасмиз ҳали, — деди қўрбоши оҳисата, унинг гап оҳангидаги розилик аломатларини пайқаган мулозимлар енгил нафас олдилар.

Олис ва оғир йўлга тараддуд роса бир ойга чўзилди. Ўқ-дори, озиқ-овқат ғамладилар. Ҳатто, шу атрофда қўй боқиб юрган чўпонни ишга солиб, яна ўн беш нафар от ҳам топишиди.

Аммо сафар соатлари яқинлашган сайин йигитлар алланечук каловланиб, паришон кезинадиган одат чиқармоқда эдилар. Айниқса, қўзларида битмас-туганмас карахтлик қотиб қолган Нур кўрбоши кундан-кунга буқчайиб бораради. У баъзан кунбўйи туз тотмай, қорни оғриётганини баҳона қилиб, қирма-қир дайдиб юрар, чирқиллаб учайтган қушларга, асрий арчаларга, ҳайбатли қояларга соатлаб тикилиб ўтирас эди. Лекин отдан тушсаям эгардан тушмайдиган бу қайсар навкарларга тез-тез аччиқ-тизиқ буйруқлар қиласар, гоҳо ўзича ҳазил-муトイбачига айланар, ишқилиб, ҳеч кимга сир бой бер-маслик илинжида бўлар эди.

— Эртага отланамиз! — деди Нурбек,nihоят, май ойининг охирларида.

Ўша кеч хуфтон намозини ҳаддан ташқари эзид ўқидилар. Фотиҳалар кетидан фотиҳалар, илтижолар кетидан илтижолар жаранглади.

Ибодатдан сўнг, бошлари тагига эгар-жабдуқларини қўйиб, ҳамма жим-жим чўзилди.

Тун... Такдиридек қоп-қора тун. Юксак чўққилар тарафдан совуқ шамол эсмокда. Шошкин сой шовуллайди. Тун ҳашаротлари тинмай чирқиллайдилар.

Нур кўрбоши сачраб кетган учқунлардек кўк тўла юлдузларга термиларкан, хувв, ажойиб ёз кечаларидан бирини эзилиб эслади. Ўшанда, чорбоғлари ўртасидаги супачада ағанаб ётар, хотини илондек тўлғониб унинг кўл-оёқларини уқалар, ўғилчаси эса осмонга кўл чўзиб «юлдуз обберинг», деган маънода хархашалар қиласди.

«Катта бўлсанг, ўзинг оласан» дейишарди эру хотин гўдак инжиқлигидан баттар завқланиб.

Хозир ўғли роса еттига тўлган! Уни кўрса танирмикан? Танийди, танийди! Ахир, Нур уч яшарлигига олис савдо сафаридан қайтувчи отасини таниб, олдига югуриб чикқанди-ку?!

Кўрбоши аёл ва гўдак исини димоғига туйиб бесаранжомланди. Шу чоқ сал нарида ётган йигитлардан бири:

— Юлдузлар йиғлаяпти, — деди шивирлаб.

Нурбек ялт этиб унга юзланди. Аммо навкар бутун борликни унугиб, кўқдан кўз узмас, ҳатто илкис кўзғалиб, юзига бақрайиб тикилаётган сардорни ҳам сезмас эди.

Кўрбоши яшин тезлигига ўн беш навкарнинг барига бир-бир анграйиб чиқди. Не кўз билан кўрсинки, унингча аллақачонлар донг қотиб ухлаётган йигитлар... мўлтилабгина қараб ётар, гўё, алланечук гаройиб мусиқани қилт этмай, нафас олмай, қайта-қайта тинглар эдилар.

Кўрбошининг фимиirlаб қолганидан сергак тортган ўнг мулозими оҳиста ёнбош бўлди, лекин ҳамишагидай, «Э, нега безовтасиз, бек?!» дея сўранмай, тубсиз коронгифликка тикилиб тураверди.

— Бек, — пицирлади у, — сой мунчалар шовуллади-я?!

— У ҳам соғинади, — деб юборди Нурбек беихтиёр.

— Ҳа, соғинади, — деди аллаким туриб ўтиаркан.

Колганлар ҳам бирин-кетин қўзғалиб қолдилар:

— Ҳа, соғинади.

— Ҳа, соғинади.

— Соғинади...

Навкарларининг ҳар бирига мўлтираб-мўлтираб тикилаётган Нур кўрбошининг ўз-ўзидан ўпкаси тўлиб келарди. Бир маҳал у шартта чўкка тушди:

— Йигитлар...

Бироқ бўғзига муштдек тиқилган хўрлик гапирмоққа қўймади.

— Йигитлар...

У шундай дедио ортиқ бардоши етмай, ўкириб, ёнидаги мулозимининг тиззаларига ўзини ташлади.

Хеч ким уни тинчлантирмасди. Гўё кўпдан интиқ кутилган ёмғирда ивиёттан ишқибозлардек, маъюс энтика-энтика жим ўтирадилар.

— Азизларим, — деди Нур қўрбоши кўз ёшларига қоришиб бош кўтараркан, аллақандай хирқираган, хирриллаган товушда. — Рухсат берингиз, биродарлар, ўғлимни опкелай, Оллоҳ ҳақи, ортиқ тоқат қилолмайман...

У жавоб ҳам қутмасдан сапчиб қўзғалди-да, эгар жабдуғини ердан супуриб кўтарди.

— Бек, — деди ўнг мулозим туриб-туриб, — Ёлгиз кетманг...

— Йўқ-йўқ, ўзим... У ёқда қизиллар қароргоҳи...

Эгасининг шарпасини сезган Тоштуёқ қисқа-қисқа кишинаганича депсиниб турарди.

— Бизни кутинг, — деярди Нур қўрбоши орқа-олдига қарамай, отни чоғлар экан. — Эртан саҳар шу ерда бўламиз, иншооллоҳ!

Кўп ўтмай учқур тулпор туёқларининг гумбур-гумбури бутун тоғу тошни тутиб кетди.

* * *

Шомдан сўнг теварак-атроф зулмат чодрасига буркандию, Нур қўрбоши аланглай-аланглай харсанг панасидан чиқди. Улкан арча тагида пишқира-пишқира ўтлаб турган Тоштуёқ қулоқларини диккайтирганича орқасидан қараб қолди.

Нур қўрбоши бу ерларни бешқўлдай биларди. Аммо, айни пайтда, тошдан-тошга кийикдек сакрай туриб тўрт тарафни эҳтиёткорлик билан кузатар, тиқ этган хар товушга, нафас олмай, сергакланиб қулоқ тутиб турар эди.

Кишлоқ итлари бири қўйиб, бири олиб узлуксиз хургани-хурган. Унда-мунда милиллаган чироклар кўзга ташланди. Хувв, кир этагида адашиб қолган бузок мўрамоқда. Аллақандайдир чала куйган тезак ҳиди анқийди.

Нур қўрбоши зум ўтмай сойга тушиб, нафас ростлаш

дардида ер бағирлаб ётди. У пухта режалар тузиб ол-ганди ўзича:

...Боради, Ҳовлининг қоронғи бир бурчидан биқиниб лаънати Нишоннинг ташқари чиқишини кутади. Албатта, чиқади у ебтўймас. Ўша пайт, шартта бўғзига тўппонча тираб: «Ў, ҳароми, — дейди. — Жонингдан умидинг бўлса, фингинг чиқмасин, мен ўғлимни оламану кетаман!»... Ёки тўпша-тўғри бориб, эшикни тақиллатади, ичкаридан анови нонкўрнинг саси чиқди дегунча, бир зарб билан эшикни қўпоради-ю бостириб киради. Агар гапга қўнмай, хунар кўрсатгудек бўлсан...

Нур қўрбоши қовжироқ лабларини қимтиб, мушукдек писа-писа илгарилаб бораркан, югурик қўллари беихтиёр яроғ излаб пайпасланди.

Мана, бостирмалари ҳурпайиб турган, биринчи ҳовлидан ҳам ўтди. Анови қорайиб кўринаётган жой, собик қайнотаси — тегирмончининг уйи! Үнгаям, қизигаям минг лаънат. Наҳотки, уч талогини олмай туриб, бошқанинг қўйнига кириш шунчалар осон? Яна келиб-келиб Нишон ислиқига теккани-чи?

Нур қўрбоши тўнғиздай эт-сўлли Нишоннинг тузсиз кўзларини хаёлида жонлантиаркан, нафрат ва жирканчдан бўғриқиб кетди. У, бир вақтлар, катта шаҳар бозорида гадойлик қилиб юрган кезлари қоқсуяк нарса эди. Нурнинг отаси ачина-ачина уни бу ерга эргаштириб келди-ю, йил ўтмай новвосдай семириб кетди, зангар. Аммо бўрдоқи боқиш, отларга қарашиш, деган хизматларни дўндиарди. Балки шунинг учун ҳам уни халиги... нима эди, ха, шўро раиси этиб тайинлашгандир? Балки, анови мегажин шу мансабига учгандир? Эҳ, барибир, таги пастлигига борибди-да, қанжиқ?! Туф, ҳаммасига туф, унга ўғли керак, ўғли! Ўғлини оладиу, Тоштуёқни тўпирлабит йўқолади бу ерлардан.

Қўрбоши аламли хаёллар гирдобида ҳамон шарпадек сирғаниб борар, ҳар уч қадамда теваракни аланглаб-аланглаб кузатар эди.

Хувв, тепаликдаги ҳашаматли бино-бечора оқсоқолнинг уйи. Қўрбошининг қачонлардир эшитишича, ҳозир у ер аллақандай шўронинг идораси эмиш. Шу гап тўғриёв, ана, атрофида бир аскар паришон айланиб юрибди. Шу орада Нурбекнинг кўз олдида Сулаймон кори жонланди-ю, ич-ичини изтиробли қўмсаш тимдалаб ўтди: «Эҳ, дўстим...»

Бир маҳал қўрбошининг хаёллари хазондек тўзғиб, бутун вужуди титраб кетди. Ахир, қирқ-эллик қадам нарида унинг уйи мунфайбигина турарди. Ана, ота мақон.

У бир пайтлар анови қўшқанотли дарвозадан, ингичка мўйловини силаб, охорли кийимларда, чақмоқдай бўлиб чиқиб кетганди.

Мана қайтди...

...бошида салла қийиқча, соч-соқоли ўсиқ, кир-чир, эгнида юпкариб кетган олача тўн, белида «Ҳари қоплон»дан қолган қўрбошилик камари.

...бўйнида ўша антиқа ўйинчогу ёнида яроғ билан қайтди!

Ховли атрофи тошлоқ билан ўралган. Сал пастда ястаниб ётган чорбоғ, гўё кимнидир йўқлагандай, маҳзун шовуллайди.

Нурнинг отаси дабдабаю ҳашамга сира қизиқмасди. Шу боис ҳовлилари кенг бўлса-да, аммо қўримсизгина эди. Яхшиям шундайлиги, эсам уларникиям халигидака шўро-тўраларга ин бўлиб кетган бўлармиди? Лекин, барабир, ҳовлининг Нишонга қолгани Нурбекни алам ўтида қовуради. Берса, ана, Эрмат чўпонга берсин эди, ана, Мирзо боғбонга берсин эди.

Айниқса, қай бир шаҳарда ҳам отасининг ҳайҳотдай уй-жойи, бола-чақаси бор, деб эшитувди, уларнинг ахволи нима кечди, экан?! Эҳ, бу дунё!

Нур қўрбоши тош девордан ошиб, ичкари тушди. У тобора сутдек кўпира бораётган ҳаяжондан қалт-қалт титрар, юраги турс-турс уриб, нафаси қайтар эди.

Қўрбошининг назарида, ҳозироқ, югурдаклар пешвоз келиб хизматига илҳақ турадигандек, отаси айвонда ёнбошлиб чой ичаётгандек, бош иргаб, Нурни ёнига имлаётгандек туюларди. Унинг ўй-хаёлида ажойибдан-ажошиб манзара лоп-лоп жонланади бошлади.

...Ана, ана дераза ойнасидан кузатиб турган хотини, кўз-кўзга тушгач, нозлана-нозлана ўзини панага олди. Зум ўтмай, ичкаридан завқ-шавқ билан ўғилчаси пилдираб чиқди...

Нурбек, ҳатто боласининг шодон қийқирганини эшитгандай бўлди.

Бироқ ҳовли қабристондек хувиллаб ётарди. Фақат нариги чеккадаги ҳужра деразасидан чироқнинг хира ёфуди лишиллаб турарди.

Ишком тагида серрайиб қолган Нурбек, қалт-қалт титраб ўша ёкка юрди. Шу тобда у қай ниятда келганини буткул унуган, шомдан бери пишитиб юрган режала-ри кераксиз бир хаёлга айланиб қолганди.

Кўрбоши журъатсизлик билан ҳужра эшигини тақиллатди. Шу лаҳзадаёқ, ёш боланинг «отам келди, отам», деган кувноқ овози ва дуп-дуп юргилагани эшитилди.

— Ўғлим!

Нурнинг зор қақшаган бўғзидан, юраги тубида зар-додек йиғилиб ётган соғинчу илхақлик, ўқинчу севинч биргина шу сўз тусида отилиб чиқди:

— Ўғлим!

Аммо ичкаридан бошқа садо чиқмади. Нурбек эса ўз-ўзидан қайнаб тошаётган кўз ёшини арта-арта эшикка қапишганича турарди. У шу чоғда, қоча-қоч, қува-қувлардан буткул зада бўлганини, хеч қаёқка ошиқмаётганини, хеч қачон энди ортга қайтолмаслигини чуқур хис килди. Қанийди, дунёда ёғий зоти бўлмасаю, у бир умр мана шу кўпол эшикка суюниб турса?!

— Ўғлим, — деди Нурбек яна ботинмайгина эшикни тақиллатаркан.

Ичкаридан аёл кишининг жон ҳолатда пи chirлагани кулоққа чалинди-ю, кўрбоши бир сесканиб ўзига келди, аллақачон уни тарқ этган нияти, режалари яна қайта миясида чарх ура бошлади.

Демак, ичкарида ўғли ва анови!.. Нишон қайгадир йўқолган! Афтидан, анови болани эшикка йўлатмаяпти!

Шу пайт, гўё Нурбекнинг фикрини тасдиқлагандай ўқтам болакайнинг чарс-чарс овози эшитилди:

— Отам мажлисда, сиз — босмачи! Кетинг! Кетинг!

Кўрбошининг кўз олди қоронfilaшиб, эшикни зарб билан итариб юборганини ўзи ҳам сезмай қолди.

Бир бўлак занжири учиб кетган эшик қарсиллаб очи-либ кетди. Очилдию ичкаридан аёл кишининг «Вой!» деган ожизона саси, ёш боланинг ваҳимали чинқириги ташкарига отилди.

Кадрдон ҳужра хиди, кўзга таниш манзарапар ғоят довдиратиб қўйган Нурбек, бир зум караҳт бўлиб турди.

Токчадаги чироқнинг хира ёғдусидан вассажуфтлар, тахмонлар, девордаги уч-тўрт қозиққа илинган кийим — бошлар андак ёришиб турарди.

Ана! Ана унинг ўғли! Унинг арслони! Э-хе, катта йигит бўлиб кетибди-ку?

Нурбек бўсағага секин чўнқаяркан:

— Ўёлим, — деди энтикиб.

Аммо бир бурчакда тошдек қотган, кўзлари ола-кула хотинининг этакларига маҳкам чирмасиб олган болакайдан ҳеч бир садо чиқмади.

— Ўёлим, бу мен, — деди Нурбек аранг, — танима-япсанми, болам?!

Сўнгра у хўрлиги келиб, қучогини кенг ёйганича ўғли томон судракланди.

Болакай эса ҳиқ-ҳиқ йиғлаб, орқага тисарилаверди.

Ё, Оллоҳ! Бу не кўргулик? Уч йилдирки, хаёлида зор-зор куттган, чопқиллаб ўйлига чиққан, бўйнига эркаланиб осилган ўз ўғли танимаса-я?!

— Бу мен-ку, ахир, болам! — деб қақшади қўрбоши кўз ёшларини тиёлмай. — Кел, бир бағримга босай, кел!

Шу чоқ орқа тарафдан дўриллаган буйруқ янгради:

— Қимирламанг, қўрбоши!

Нурбек тиз чўккан жойида шарт ўгирилиб ортга қаради: «Нишон!»

У бўсағада тўшпонча ўқталиб турагар, изидан яна ўн чоғли навкар милтиқларини шайлаб ичкарига мўралашарди.

— Хуш келибсиз, — деди Нишон димоғидан кулиб. — Биз сизни ёлғиз кутмагандик, қолганлар қайда, бек?

Кўрбоши сийрак қошларини чимириб, қақроқ лабларини қимтиб яна ўша кирғин дунёсига қайта бошлади. Соғинчу илинжкининг, ўқинчу севинчнинг омонат дунёси яна тўзғиб кетди.

— Ота-а-а!

Онасининг пинжида бикиниб турган болакай Нишон томон ҳайқириб югурди. Унинг хар бир хатти-харакатини энтикиб кузатётган Нурбекнинг ич-ичида нимадир узилиб кетгандек бўлди ва...

Кўз очиб юмгунча варанглаган ўқ товуши ҳовлининг ичу ташини зириллатиб юборди. Изидан, ўз ўки ўз бўғзини тешиб ўтган Нур қўрбоши гурсиллаб қулади. Бўйнида осиғлиқ ўша фаройиб ўйинчоқ той қонга белангандча сирғалиб ерга тушди...

Ўша тун Тоштуёқнинг аччиқ-аччиқ кишинаши бутун тоғу тошни титратди. Қадрдон отхона ҳидини олиб келган бу тулпор ўз чавандозини излаб тошқолоқ теварагида гир-гир айланарди.

СИНОВ МУДДАТИ

Олди ойнабанд, серҳашам бино эшигидан отилиб чиқкан Жасур аланглаганича Собирни излади. Дўсти йўлакча бўйидаги ёғоч ўриндикда ўйчан ўтирган экан.

— Собир! — деб қичкирди Жасур мармар зиналардан сакраб-сакраб тушаркан. — Суюнчи бер, мен ўтдим, сухбатдан зўр ўтдим!

Собир қувончдан ял-ял яшина бтурган дўстининг қўлини самимий сиқиб, жилмайди.

— Табриклайман, жўра, омадингни берсин.

Собир ва Жасур болалиқдан қалин дўст. Бир маҳаллада ўсиб-улгайишган, синфдош. Жасур хийла маҳмадона, Собир эса анчайин оғир-вазмин.

«Ҳечқиси йўқ, — дея ҳазиллашарди адабиёт муаллими, — икковлашиб бир-бутун одам бўласизлар».

Аммо тақдир уларни аста-секин ажратиб бормоқда эди. Собир мактабдан сўнг институт эшигига осилиб кўрди. Бироқ туппа-тузук билими бўлса-да, омад бўлмаса қийин экан. Собир кетма-кет икки йил «йиқилди». Сўнг харбий хизматга чоғланди. Қарангки, бу хаёлчан йигитчадан омад яна юз ўгири; тиббий кўрик пайти Собирнинг соғлигидан аллақандай қусурлар топишди. Кўзи андак хирапоқ эмиш. Аскарликка ҳам арзимаган Собир анча пайт ўз-ўзидан хафа бўлиб юрди, кўли ишга бормади. Бироқ ич-ичидаги аллақандай аланга ҳали-ҳали сўнмаган эди. Собир қандайдир буюк, қандайдир эзгу ишлар қилишни истарди. Шу орзулар уни оёққа турғазди. Ўзини анча-мунча кўлга олган Собир тагин китобларга ёпишди, бўш вақтлари томорқада куймаланди. (Ахир тирикчилик ҳам керак-да.) Шу орада Жасур ҳарбийдан қайтди. У мактабни амал-тақал битиргани учунми, ҳарқалай, қадрдон жўрасига ўхшаб институтлар бўсағасида кўз ёш тўкиб юрмади. Ўзини савдога урди. Ҳаракатчан, тилли-жағалигина бўлгани учунми, ҳарнечук, то-пиш-тушишдан ёлчиди. Бироқ туйкус ҳарбийликка ишқи тушиб қолди.

«Ўша ёқда қолиб, катта қўмондон бўлиб кетаман», — деб мақтандонди Жасур жўраларига, аскарликка жўнаётган пайт. Аммо муддати тугадиу негадир ими-жимида қайтиб келди. «Нега қолмадинг, мақтанишинг бошқача эди-ку!» дея бирор сўрамади, Жасурнинг ўзи ҳам ёрилиб ҳеч кимга ҳеч нарса демади. Пишикқина-да, қурмагур.

Ҳарбий хизматдан қайтган Жасур икки ой ялло килиб юрди. Бир куни Собир иккови туман марказидаги клубга кинога тушишди. Рона қизик, ур-сур, қувди-кучди кино қўйилаётган эди. Фильм чўқаётган кемани қутқаришга отланган бир жанговар отряднинг саргузаштлари ҳақида экан. Отряд аъзоларининг жасорати, чапдастлиги икки дўстни обдон энтикирди. Улар томошадан сўнг ҳам хийла вакт ҳаяжонларини босолмай, кино тўғрисида гаплашиб кўчаларни кезишди. Бир пайт катта йўл ёқасидаги панодаги ёзувлар Собирнинг диккатини тортиди. Андак оёқ илиб, битикларни ўқишига тутинди.

— Нималарни ёзибди? — деб бетоқат сўради Жасур, чарс-чурс писта чақаркан.

— Фавқулодда вазиятлар бошқармасининг туман бўлими хизматга таклиф этибди.

— Йўғ-э?!

— Ҳа... агар хоҳлассанг сени олишса керак, шартларига какраз тўғри келасан. Ҳарбийда бўлгансан, қаддикоматинг ҳам зўр.

Жасур ҳам ҳовлиққанича ёзувларни хижжалаб-хижжалаб ўқишига тутинди. Ҳалигина кўрилган кино таъсириданми, ё ҳамишаги жўшқинлиги сабабми, ҳарнечук, унда кутқарув хизматига иштиёқ уйғонган эди.

Эртаси куни икковлон тағин туман марказида пайдо бўлишди. Жасур тегишли жойга хужжатларини топшириди.

— Сиз-чи, сиз хизматга киришни хоҳламайсизми? — деб сўради Собирдан кул ранг мундир кийган, баланд бўйли, дўнгпешона киши.

Собир елка қисиб, ерга қаради.

— Шартларингизга тўғри келмайман.

— Армияга бормаган, сал-пал соғлиги чатоқроқ, — шоша-пиша қўшиб қўйди Жасур ҳам.

Масъул киши алланечук таажжубланиб дўстларга бир-бир кўз югуртириб чиқди.

Мана, ўша кундан бери ҳам роппа-роса икки ой ўтди. Жасурни минг бир чириққа солишиди, ҳарқалай, у «бутун» чиқди.

Бугун эса бир талай хизматта киришга чоғланган ёш-яланглар қатори Жасурни ҳам сухбатга чорлашган экан. Икковлон эрталаб етиб келишиди. Нихоят...

— Роса койил қилдим-да ўзиям, — деб мактанаради Жасур, ҳануз қувонганидан қайнаб, — сухбат олаётган бошлиқларнинг оғзи очилиб қолди.

Ха, Жасур чиндан ҳам сухбат чоғи гапни эшиб ташлаган эди. Ҳатто узун стол орқасида қатор ўтириб бўлғуси ходимни кетма-кет саволга туваётган масъуллар ҳам анчайин шошиб қолишиди.

— Яхши, — деди нихоят тўладан келган, тепакал бошлиқ, Жасурнинг хужжатларига алланеларни қайд этиб, — чиройли гапларнинг яримгинасини амалда кўрсатсангиз ҳам сиздан тузук хизматчи чиқади. Хўп, ҳозирча синов муддати билан ишга оламиз. Душанба куни эрталаб шу ерда бўлинг.

Жасур хушхандон ташқарига чиқди.

Мана, хушхандон дўсти билан уйга қайтмоқда. Уларнинг қишлоғи туман марказининг шундокқина биқинида эди. Атиги тўрт-беш чақирим келади. Шу сабаб яёв кетишмоқда.

— Ҳозир бизникига бориб ювамиз, — деди Жасур Собирнинг елкасидан қучиб. — Лекин жўра... шартларга тўғри келмаслигинг ёмон бўлди-да, эсам, иккимиз...

Собир жилмайди.

— Кўявер, мен яна ўқишига уриниб кўрмоқчиман.

Теваракка нира-шира шом қоронғиси инмоқда эди. Икковлон катта йўл ёқалаб боришмоқда. Марказ ҳам ортда қолди. Бир пайт ёнгиналаридан елиб ўтган эскигина «Жигули»нинг олд фиддираги «пак» этиб ёрилиб кетди. Машина мувозанатини йўқотиб, ўнгу сўлга кескин чайқалдию йўл ёқасидаги ариққа ёнбош қулади. Чангтўзон кўтарилди.

Икки дўст таҳлика ичиди бир зум ҳангу манг қотди.

— Югурдик! Ёрдам берамиз! — деди Собир, энг аввал эс-хушини йиғиб олиб.

Бироқ кўзлари ола-кула Жасур унинг енгидан силтаб тортиди.

— Гарангмисан?! Ҳозир портлайди, бензини тўкилиб кетган! Ундан кўра қочдик... эсам гувоҳ бўлиб қоламиз.

Аммо Собир дўстининг қўлини силтаб ташлади-да, автоҳалокат томон югурди.

— Эй, тўхта, тўхта тентак! — дея қичқирди унинг ортидан Жасур. — Ўргилдим сендай қаҳрамондан!

У шартта ўгирилиб қишлоқ томон чопди: «Тезроқ, тезроқ даф бўлиш керак. Ҳозир портлаб кетади! Бир камим органма-орган сўрок бериб юришми?!»

Жасур ҳаш-паш дегунча шом қоронғисига қоришиб кўздан йўқолди.

Собир хансираганча етиб борганда «Жигули»нинг ердан узилган фиддираклари аста-секин айланиб турар эди. Кабина ичидан узук-юлуқ товушлар, инграшлар эшилди.

Собир машинанинг орқа эшигини бир амаллаб очди. Ичкарида тўрт киши бор экан. Ҳайдовчи ва олд ўриндиқдаги киши афтидан бехуш кўринади. Машинанинг пешойнасига қон сачраган.

— Раҳмат, ука, — аранг сас берди орқа ўриндиқда тиқилиб ётган ўловчилардан бири, — қани, қўлимдан тортиб юбор. Кейин икковлашамиз.

* * *

Жасур орқа-олдига қарамай, қоқила-сурила уйига етиб олди. Оёқ-қўллари дағ-дағ титрар, юраги бежо ураг эди. У ўзини босиш учун ҳовлидаги жўмракдан ҳовучлаб-ҳовучлаб сув ичди. Юзини ювди. Шу пайт ичкаридан онаси отилиб чиқди.

— Жасуржон, келдингми болам, шўримиз қисиб қолди!

— Ҳа, тинчликми?!

Онаси шўрқ-шўрқ йиғлаб юз-кўзига рўмолини босди.

— Даданг таксида келаётib аварияга учрабди. Ҳозир касалхонадан телефон қилишди. Юра кол, тезроқ борайлик. Айтганча, Собир жўранг ўша ерда экан. Барака топсин.

— А, нима?!

Хангуд манг қотган Жасурнинг бўғизидан аранг шу сас чиқди. У кўз ўнги қоронғилашиб деворга елка тираб туриб колди.

КУТИЛГАН КУН

*Мен сенга келтирдим
бўм-бўш қўчоқлар.*

Доғларжа

...Бойхон бу кунни илҳақ кутган эди. Узоқ даштда улоқиб қолган, бирор ўткинчи улов шарпасига умидвор кўз тиккан йўловчидек у ҳам шу кунга муштоқ эди.

Бойхон танаси тарам-тарам бўлиб кетган дарахтга бе-ҳол суюниб, чуқур-чуқур нафас олди. Кул ранг қоронғи-ликка чўмиб бораётган катта-кичик дарахтлар, баланду паст иморатлар, кенг йўлда физ-физ ўтиб қайтаётган машиналар кўз ўнгидаги бетиним чайқаларди. Оёқлари остида бўм-бўш ароқ шишалари, колбаса бурдалари-ю, гижимланган қофоз парчалари сочилиб ётибди.

Бойхоннинг юраги увушди. Барча қилмишлари кўз олдидан айқаш-уйқаш бўлиб ўтди-ю қўнгли ғашланди. «Энди ҳеч ўнгарилмаслигим тайин, охириги умидим ҳам кул бўлди, тамом», деб ўйлади у руҳсизланиб.

...Бойхон бу кунни ихлос билан кутганди. Гўё бу кун у бир юмалаб бошқа хил одамга айланиб қоладигандек, жиккак, тажанг Бойхоннинг ўрнида этли-сўлли, келишган Бойхон талтайиб турадигандай эди. Эҳ, бу кун, бу кун...

У бир қучоқ совға келтириб, хотинини туғилган куни билан қутламоқчи, унинг лабларида ширин бир табасум кўрмоқчи, сўнгра эса ўзи орзу қилган ўша ўрик гуллари ифорига бурканиб, ҳамма-ҳаммаси — ҳаётини, турмушни қайтадан бошламоқчи эди. Шул боисдан тонг бўзармасданоқ шошилиб, аммо тетик ва алланечук хуш кайфиятда кўчага отилган, хотини — икки ойлик келинчак орқасидан ажабланиб қараб қолганди.

Бойхоннинг касби бетайн эди. У бир вақтлар мотор заводида хизмат қилас, ишга ширакайф келса-да, берилган топшириқларни тузуккина дўндирап эди. Бироқ бу орада ароқхўрликка қарши кураш бошланиб кетдиу, намуна сифатида унинг ковушини тўғрилаб қўйиш-

ди. Бойхон шу-шу ҳеч жойдан иш тополмади. Охири мардикорликка куни қолди.

У лаънати шу ичкиликбозликини ташлашга неча марта сўз берар, лекин уч-тўрт кун ўтмасданоқ, «ўзи билмай» яна эчки қасамга айланиб — уйига одатдагидек чайқалганича кириб келар, бошини хам қилган кўйи кекса онаси ning беозоргина нолишларини тинглар эди.

Бойхон якинда уйланди. Тўғрироғи, уни уйлантиришиди. Ака-опалар қўлни-қўлга бериб, онлари билан обдан маслаҳатлашиб келин топдилар. Келин янги даҳа томонда яшовчи аммасининг қизи бўлди. Аммаси тўйдан сўнг уларникига тез-тез келиб тураг, бироқ ҳар ташрифида куёвини таънаю танбеҳлар тош бўронида эзис ташлар эди: «Ҳой, жиян, соқол-поколни мундоғ қиртишлаб юрсангиз бўлмайдими? Ҳой, йигит, қачон сиз ҳам мундоғ одамга ўхшаб уйга ойлик кўтариб келасиз? Раҳматли акамнинг арвоҳлари ҳурмати, гулдай қизимни бир яланг-оёққа қўшдим, эсам...»

Амманинг узундан-узоқ оҳ-воҳини Бойхон тоқат билан эшитарди-ю, бироқ келин, «Ойи, бўлди, бас!» дегандай овозсиз илтижо қиласарди.

Аммасининг қизи сарғишдан келган, юзлари чўзинчоқ, қошлари сийрак, қўнғиртоб кўзлари ўйчан бўлиб, ишқилиб, гулдай эмасди. Лекин тилло экан. У келин бўлиб келди-ю, ҳаробгина ҳовличага файз кириб қолди. Аммо Бойхонда ҳеч бир ўзгариш сезилмасди. У ҳар эрта бир ёқларга гум бўлар, аллакимларгадир ёлланиб, ишлаб топган беш-олти сўмини кечқурун хотинининг олдига уялиб, авайлабгина қўяр эди. Бироқ ҳар уч-тўрт кунда гандираклаганича ғўддайиб бўсафада пайдо бўлишини хам ташламасди.

Бойхон маст чоғлари, негадир, кўпроқ ийманар, хотининг айюҳаннос солишини, «кетаман», дея пўписа қилишини, уввос тортиб ийғлашини жуда-жуда истар эди. Хотини эса ҳеч бир жирканмай, ҳайикмай, эрининг ифлос кийимларини ечар, ювинтиради.

Бойхон кўпинча кечки емакдан сўнг муздай дераза ойнасига манглай тираб, маҳзун қоронфиликка чўмган торгина ҳовлидаги совук урган ўрик дарахтига сўзсиз тикиларди. Неч-неча баҳорлардан бери гулламайдиган, фуж-фуж япроқлари кузнинг оловли дами етмасданоқ сарфайиб, ковжираб битадиган бу дарахт, сертомир қадоқ қўллардек шохларини кўкка чўзиб, неларнидир фалак-

дан сўраёттандай совуқ шамолда дийдираб, чайқалиб турар эди.

«Барибир мени ташлаб кетади», деб ўйларди у хотини ҳакида, деразадан ҳорғин кўзларини узмай.

Лекин хотинида кетиб қолиш нияти йўқقا ўхшарди. У эртаю кеч ҳовлида куймалана, супуриб-сидириб, ювибтарар, кекса қайнонасига гирдикапалак бўлар эди. Унинг фимир-фимирлари, айниқса Бойхон уйда пайтлари авжига чиқар, ҳойнаҳой, эри билан юзма-юз, бекорчи ўтиришдан, гап тополмай қийналишдан бениҳоя чўчир эди. Шу сабабли ҳарқалай Бойхон хотинига тик қарамоққа ботинолмасди. Баъзан Бойхоннинг ўз-ўзидан завки жўшар, келинчакни эркалагиси, меҳрибонликлар кўрсатгиси келар, лекин бунга журъат этолмас, тўғрироғи, бу хил яқинликка ўзини мутлақо ҳақсиз, деб ҳисоблар, бутун бор-йўғи, юриш-туриши билан хотини олдида ўзини муттаҳамдай ҳис этарди!

Аммо қунлар кетидан қунлар ўтаркан, юрак-бағрида тош бўлиб ётган муз қатламлари аллақандай англаб бўлмас олов тафтидан аста-секин эриб кетаёттганини Бойхон пайқаб борарди. Мардикорликдан қайтишда уй томон ихтиёrsиз катта-катта қадам ташлапши, тез орада рўй берадиган кўзлар тўқнашувини ҳис қилиб энтикиши, уйида юмшоқ ўринга сўзсиз чўзилишаркан, сахарнинг яна учтўрт баробар узаймоғини исташи, худди, шу антиқа иликликларидан далолат бериб турарди. Лекин жамики ноумид ва ношукур бандалар каби Бойхон ҳам кўнглида аланталаниб келаётган оромбахш оловга шубҳаю гумонлар сувини беаёв пуркар, ўзини-ўзи тушкунлик, руҳсизлик тифига тутиб берар эди.

«У барибир мен билан яшолмайди, — деб ўйларди Бойхон. — Яна беш-олти қундан сўнг онасиникига жўнаворади...»

Бироқ уч кунча бурунги бир ҳодиса уни буткул бошқа ўзанг бараборди.

Ўша куни омади юришмаган Бойхон тушдан сўнг шалвирабгина уйига қайтганди. У ҳовли эшигидан оёғини оширди-ю, ажойиб манзаранинг гувоҳи бўлди.

Сочини чиройли турмаклаб, дуррача билан танғиб олган хотини ўша ўрик дараҳтининг шохларига кир ёймоқда эди. Дуррачаси тагидан чиқиб турган, шамол ҳилпиратаётган узун-узун соч толаларига дараҳтининг нурдек ингичка бир шохи гўё ўпмоқчидай оҳиста-оҳиста

суйкалар, келинчак эса ширин-шакар хаёллар оғушида завқланиб бетиним илжаярди.

Бойхон бу хушманзарани тўрт-беш дақиқа — то унга хотинининг кўзи тушгунича томоша қилиб тураркан, ногоҳ, димоғига гуп этиб ўрик гулларининг ифори урилгандек туюлди. Боши айланиб кетди.

Хотини у томон илкис назар ташлади-ю, икковлари баравар илжайдилар. Бу уларнинг бир-бировига биринчи самимий табассуми эди.

Ўша куни кечки таомдан сўнг Бойхон одатдагидек деразанинг совуқ ойнасига юзма-юз бўларкан хаёлга чўмганди. «Йўқ, бундай яшаб бўлмайди. Одамсифат бўлишим керак, одам...»

У дераза ёнида узок турди. Бир пайт миясига келган ажойиб фикрдан севиниб, қалқиб кетди. Алланималарни тикиб-бичиб ўтирган хотини бу ҳолни сезмади.

«Наҳотки, уч кундан сўнг унинг туғилган куни?!
Балки адашаётгандирман?»

Бойхон зўр диққат билан хотирасини титкилаб чиқди ва адашмаганига яна бир бор амин бўлди.

Ўша чошгоҳ — хукумат никоҳидан ўтказувчи танноз ходима ўз қалин дафтарига ёш келин-куёвларнинг исм-шарифларию туғилган йил, ойларини қайд этаётган чоги, у ўз қаллифининг таваллуд кунига негадир қизиқсиниб қараган ва яхшигина эслаб қолганди.

...Бойхон бу кунни энтикиб кутган эди. Миясига ажойиб фикр урилган ўша оқшомдан бошлаб уч кун бетиним ўзича турли-туман режалар тузди. Ҳаяжонланди. Ҳовлиқди.

Нихоят, ўша арзанда кун ҳам этиб келди-ю тонг коронфисида икки ойлик келинчакни саросимада қолдириб кўчага отилди. Аммо кўча эшиги орқасида хотини ювиб-дазмоллаган шимни обдан гижимлашни унутмади, унда-мунда учраб қоладиган ўзига ўхшаш бетайин оғайниларининг «пўрим күёв бола» дея масхара килишидан уялди.

...Бойхон бу кунни ширин хаёллар оғушида кутган эди. Шунинг учун ҳам нақ тунга довур қора терга ботиб сувоқ киларкан, чарчаш ўрнига тобора ғайрати қайнаб, юз-кўзидан табассум аримади. Нихоят, мардикорининг антиқа хатти-харакатларидан лол бўлган тепакал хўжаин қайта-қайта санаб узатган пулни чанглаллаганича ҳовлиқиб кўчага отилди.

У хотинига қандай совға олишини ҳув ўша оқшомдаёқ дилига туғиб кўйган, ҳар эслаганда тўлқинланиб-тўлқинланиб юрганди. Кўз остидаги бу тортиқ — сопол кўзача эди. Бойхон уни илк марта, бир ойча аввал, ароқ қаҳатчилиги сабаб арzon атири илинжида машхур дўкон бўйлаб хўб изғиб юраркан, тепасига «Подарки» деб ёзилган бўлинма сотувчиси иддао билан кўргазмага кўяётган пайт кўриб қолганди. Ўшанда у сопол кўзачанинг бежирим ва ялтироқлигига, шунчаки, қизиксиниб қараб турган, сўнгра бирданига сарғиш бўёқ билан тасвирланган бир жуфт қушга сийрак киприклирини пирпирата-пирпирата узоқ вақт анграйганди.

Унинг назарида қушлар қоп-кора тун аро ҳорғин учиб боришар, митти кўзларида шубҳа-ю ҳадик, умидсизлик ва аламзадалик қалқиб турар, чор-тарафда ҳеч бир қўналға белгиси кўриимас эди.

Бойхон ўшанда сопол кўзачага тикилиб туаркан тиззаларига, бармоқ учларига титроқ инаётганини, юраги алғов-далғов бўлиб кетаётганини сезди. Беихтиёр қушларнинг оёқчалари тагига оппоқ гуллаган ўрик шохи тасвирини туширгиси ва қушларни шу ерга қўндириб чек-чегарасиз парвозни буткул тугатгиси келиб кетганди.

Шу-шу бўлдию, у бу мўъжаз дўконга тез-тез келиб турадиган, фоят антиқа туюлган ўша сопол кўзачага хийла вақт ҳайратланиб тикиладиган ташвиш ортириди. Бироқ унинг дайдиларча ивирсиши дўкончиларни шубҳалантириб қўйди, шекилли, куни кеча Бойхон пештахта ёнида пайдо бўлиши биланоқ, «хизмат, укагинам» деб сўради сотувчи аёл пардоз-андоздан андак тўхтаб.

— Анави кўзачангиз... — фўлдиради Бойхон, — жуда зўр экан.

У, негадир сотувчининг «ҳа, жудаям ажойиб, менга ҳам ёқади», дейишини, сўнгра ўзи тасвирдаги учиб бораётган қушлар ҳақида тўлиб-тошиб гапириши, хотинига шу кўзачани совға қилмоқчи эканлигини айтиб маслаҳатлашишни жуда-жуда истаган, ҳатто, шундай бўлишига қаттиқ ишонган эди.

Аммо сотувчи аёл аллақандай фашланган қиёфада ҳеч гап-сўзсиз у ишора килган матоҳни олиб узатмоққа шайланди.

— Йўқ-йўқ, ҳозирмас, — деб юборди шоша-пиша Бойхон, худди қўккис ширин уйқудан уйғонгандек. — Эртага оламан.

Сотувчи аёл елка учирди:

— Ихтиёргиз, лекин шу охиргиси...

...Бойхон бу кунни интиқ кутган эди. Шунинг учун хам хотинининг кечқурун қувонч ва меҳрдан лов-лов қизаришини хаёлида жонлантира-жонлантира энтикканча кетиб борарди. Аммо...

Аммо катта чорраҳа бикинидаги ҳар бир тош-кесаги-гача ўзига таниш бўлган ичимликлар дўкончаси ёнидан ўтаётганида қадамлари беихтиёр секинлашди. Ахир у ерда бакалоқ сотувчи турли ичимликларга лиммо-лим ёғоч қутиларни файрат билан ичкарига таширди-да.

«Об-ба, зап устидан чиқибман-у» деб юборганини Бойхон ўзи ҳам сезмай қолди. Лекин дарров сергак тортди. Қайга, не сабабдан кетаётганини эслади.

Ичимликлар дўкончаси ёнида одамлар дақиқа сайин кўпайиб, ғала-ғовур билан навбат талашардилар.

Бойхон чўнтағидаги пулларни кафтида сиққанча йўлида давом этди. «Кўпроқ пулим бўлганда, икковгина олиб қўйсам яхши эди-да», деб ўйлади пулларини янада маҳкамроқ сиқимлаб.

«Озгина ютиб олганимда чарчоқларим тарқаб бир хузурланардим-а», деб тагин ўйлади Бойхон негадир аса-бийлашиб. Унинг қадамлари ўз-ўзидан сусая-сусая, ниҳоят, харакатдан тўхтади. Уч-тўрт шиша ароқ қучоқлаб шодон кетаётган ур-тўполон билан навбат талашаётган кишиларга саросималаниб термилди.

«Бир шишага-ку қурбим етар-ов», деб ўйлади Бойхон оломон томон беихтиёр уч-тўрт қадам ташлаб. — «Бир донагина атиргул олсан ҳам бўлади-ку, ахир совфанинг катта-кичиги, яхши-ёмони йўқ».

Бойхон чўнтағига қўл солди. Ютоқди. Лекин, шу лахзаёқ хотинининг хувв, ўша ўрик дарахти тагидаги табассуми «лоп» этиб қўз олдига келди-ю, шаштидан қайтди.

«Йўқ, бугунча ичмайман», деб ўйлади у қўлларини мушт қилиб. Бойхон изига қайрилди-да, йўлига равона бўлишга чоғланди. Шу пайт оломон орасидан сирғалиб чиқаётган икки саёқ оғайнисига кўзи тушди-ю кўнгли равшан тортиб кетди.

Бойхон дарҳол гум бўлиш ўрнига беихтиёр одимлаши сусайди, анавиларнинг назарига тушиш учун пинҳона хужум бошлади.

«Дўстлардан қочиш яхши эмас», дея ўйлади ўз-ўзини алдаб. Нихоят, орқадан таниш хуштак овози янгради.

Шусиз ҳам тоқати тоқ бўлиб турган Бойхон «ялт» этиб ўгирилди.

Ур-тўполонда терлаб кетган, соч-соқоли ўсик, қўзла-ри қизарган оғайнилар этиб келишди. Қисқагина ҳол-аҳвол сўрашдилар.

— Бу дейман, томоқлар қуриб битибди-ёв, а, — деди шерикларидан бири Бойхонга карата.

Бойхон айбдорона илжайди.

— Юр, биз билан, — сирли кўз қисиши оғайнилар.

Бойхон ботинолмайгина минғиллади:

— Йўғ-э, ишим бор-да.

Икковлон бараварига хоҳолашди.

— Ҳа, энди, — деди ароқ қўлтиқлагани, — уйлан-гандан сўнг қийин-да.

Шериги лукма ташлади:

— Айниқса, хотинидан қўрқадиганга.

— Мен ҳеч кимдан қўрқмайман, — деди Бойхон қўрслик билан. Шу тобда бари ширин ўй-хәёллари-ю, совға олиш йўлида ҳаллослаб юришлари ўзига эриш ту-юлиб кетди.

— Кўрқмаслигингни ҳали исботлаган эмассан, — деди оғайнилар олдин-кетин.

Бойхон бу қочириқни деярли эшитмади, чунки у айни пайтда фоят паришон туриб хотинидан қўрқар-қўрқмаслигини ўзича, ростакамига ўйлаб кўрмоқда эди.

Оғайнилар бетокатланди:

— Юрасанми, йўқми?!

Бойхон бир чўчиб тушди-да, индамай уларга эргашди. «Озроқ ичсам ўлмасман», деб ўйлади ўз-ўзидан ғазаб-ланиб. «Хотинни табриклиш қочмас...»

Улар ўзларига қадрдон дарахтзорга йўл олиши.

Бойхон бошқа ҳеч вақони рўйирост эслай олмайди. Агар адашмаса, у боши сал қизигач, одатдагидай сахий-лиги тутиб чўнтагидаги бор пулни ўртага ташлаган, оғайнилардан чаққонроғи шартта олиб яна дўконга ютурган.

...Бойхон бу кунни зор-зор кутган эди. Энди эса қўнгли айниб, қақшаб-титраб, дарахтга мадорсиз суюниб турар, кимгадир тинмай алжирагиси, хўнг-хўнг йиғлаги-си келар, боягина нафрат ва масҳарага лиммо-лим юраги яна қуриб-қовжираб, халим тортиб борар эди.

«Кетгин, мени ташлаб кета қолгин. Шунча хорлик, шунча зорлик сенга зарилми? Юзимга мириқиб туфла, дунёни бошингта кўтариб қарға, лекин мени ташлаб кет».

Бойхон хотинига хаёлан мурожаат киларкан, ўша ўрик дарахти ёнидаги меҳрли табассум, ҳовли бўйлаб сассиз куймаланишлар қўз олдидан лоп-лоп ўтди-ю, ўз-ўзидан ўпкаси тўлиб хўрлиги келди. Лекин хўнграб юбормаслик учун гандираклаганича юриб кетди.

Кеч кузнинг эрта қоронғилиги қуишиб келар, бироқ кўча-кўйда одамлар ҳали гавжум, машиналар вағиллаб ўтиб-қайтар эди. Ёғин-сочиндан дарак бўлмаса-да, ҳаво хийла совуқ.

«Йўқ, мен барибир ўшани обераман, — деб ўйлади Бойхон гандираклаб юриб бораркан, совға қиласман, совға...»

У кулаб тушмасликка тиришиб, бир тўхтаб, бир юриб борар, унда-мунда учраб қолувчилар шоша-пиша ўзларини четга суришар, баъзилари фижиниб, сўкиниб қолишар эди.

Бойхон бир амаллаб ўша дўконга етиб келди. Ичкари кирди. Дўконнинг чароғонлигидан кўзлари қамашиб, бир зум нафас ростлаш дардида четроққа тисарилди.

Ичкарида одам гавжум. Сотувчиарнинг қўли-қўлига тегмайди. Фала-ғовур авжида.

Бойхон бир амаллаб пештахтага яқинлашди. Юраги нечукдир, ўз-ўзидан гурс-гурс ура кетди.

«Ҳов, қушлар, — деди хаёлан у, — шошманг, биз сизларга қўналға чизиб берамиз. Биз ҳам...»

Бойхон сотувчи хотин ва харидорларнинг ўзига ажабланиб-ажабланиб тикилаётганини кўриб сал сергак тортиди. Афтидан, у хаёлида эмас, ташида фулдираганди.

Бойхон беёҳшов ишшайиб яна тасвирга сукланиб тикила бошлади.

— Хизмат, укагинам, — деб сўради сотувчи хотин, шекилли, у «укагинасини» таниган эди.

Бойхон илжая-илжая:

— Опа, анави... — деди зўрга.

Сотувчи у гапини тутатмасданоқ ўша сопол кўзачани дўқиллатиб пештахтага кўйди.

Бойхон ишшайиб уни ўзига имлади:

— Опа, қулоғингизга бир гапим бор эди.

Сотувчининг энсаси қотди:

— Айтаверинг...

— Шу... илтимос, — деб фўлдиради Бойхон кўзачани қўли билан силаб туриб, — шунингизни насияга бериб тулинг, жо-он опа, эртан пул онкеламан, хўп.

Сотувчи Бойхонга қайрилиб ҳам қарамай, кўзачани кўттарди-ю, жойига қўйди.

Шу чоғ бошқа бир харидор энтикиб турган Бойхонни туртиб юборгудек бўлиб ўтди-да:

— Ие, кўзачани бу ёқقا узатинг, — деди сотувчига қарата. — Кўрайлик-чи...

Бойхон сергакланиб тилга кирди:

— Ўв, бу... меники...

Харидор ҳеч вақога тушунмай бир Бойхонга, бир сотувчига ҳайрон тикилди.

— Сал кайфи тарақ, эътибор берманг, — деди сотувчи қўл силтаб.

Харидор оқилона бош чайқаб пул санаркан, Бойхон пештахта устида турган кўзачага чанг солди.

— Бу меники... меники...

Харидор одоб билан ёпишқоқни орқага суриб қўйди.

— Қандай тузсиз одамсиз, — деди у Бойхоннинг тирсаги теккан костюмини қоқа туриб.

Бойхон шаштидан қайтмади.

— Меники... Совфа қиласман...

Унинг ёшдан хира тортган кўзлари сопол кўзачадан бошқа ҳеч нимани кўрмас, қулоқлари ҳеч қандай ҳайҳайлашни эшитмас, айни чоғда, тинмай алжирашни, жанжал-тўполон кўтаришни жуда-жуда истар эди.

Бўлинма олдида томошаталаблар тўплана бошладилар.

Шу пайт аллақаердан айиқдай бақувват эркак сотувчи пайдо бўлди-да, Бойхонни осонгина қўлтиқлаб ташқари томон судраб кетди. Бойхон жон аччиғида типирлаб қаршилик қилишга уринди. Аммо зум ўтмай ўзини ойнабанд эшик орқасида кўрди. Совуқ ҳавода эти жунжиқди.

— Йўқол! — деди сотувчи оёғи билан ерни тапиллатиб, гўё ёш болани ҳайдагандай. — Йўқолмасанг ҳозир мелиса чақираман...

Барзангি мушти билан яна бир бор пўписа қилди-ю ўзини ичкари олди.

Бойхон қаёққа юрарини билмай анча вақт эшик олдида гарантисиб туриб қолди. Унинг қулаб тушгудай чайқалётганини, ғулдираб, тушунуксиз сўкаётганини кўрган ўтиб-қайтувчилар ўзларини дарҳол четга тортишарди.

Коронгилик тобора қуюқлашарди...

ҚҰЛГА ТУШГАН ҚОРБОБО

Шахарнинг қок киндигига ўрнатиб безатилган баҳай-бат арчани кўрдию Собир беихтиёр уф тортиб юборди. Ям-яшил игна барглар нақ юрагига санчилгандай бўлди. Ичида армонгинаси бор-да, ҳар йили ваъда берадио бироқ болаларини мана шу арча атрофида бўладиган томошаларга олиб келолмайди. Озгина чиким ҳам кисса қурғурга малол келади. Янги йил бўсағасида ҳамиша бир дунё сарф-харажат кутиб туришини айтмайсизми тагин?

Собир аллақандай амалдорнинг шаҳар четидаги чала битган ҳовлисида яшайди. «Ўка, ижара ҳаки керакмас, кулбачага кўз-кулоқ бўлиб, чироқ-фироғига пул тўлаб кўйсангиз, бас», деган ўша баланд бўйли, серсавлат бойвачча. Собир бажонидил рози бўлган. Аммо кенг-мўлгина ҳам кенг-мўлгина бўлар экан. Гоҳ газ, гоҳ сув идорасининг ходими кунора эшик қоқиб келади. Тунов куни тажанг бир хизматчи ер солиги учун хийла чикимдор қилди. «Йил охири, тўламасаларинг бўлмайди» деди у қатъий қилиб. Ишхонаси минг бир миннат билан берган «картошка» пулини минг бир жойидан туғиб, Арча байрами учун аяб юрган Собир минг бир саросимада қолди. Охири, хукумбардор солиқчининг қатъий пўписаси, уй эгасининг фойибона қош-қобоги устун келди.

Хуллас, бу машмашаларнинг бирорга айттилиги йўқ. Эшитганлар ичида бети қолиб кети билан куладиганлар кўп. «Ўл, бу кунингдан, илмий ходим» дейишади. Йўқ, Собир таниш-нотанишнинг пичингларига эътибор бермайди, турмушнинг бундай ўткинчи маشاққатларига чинакам сабр-тоқат билан чидайди. Фақат... болалари...

Собир алғов-далғов хаёллар оғушида ижара уйининг дарвозаси ёнида пайдо бўлганини сезмай ҳам қолди. Теваракка фирғи-шира оқшом чўкмоқда. Ҳаво совук. Кечагина ёғиб ўтган қор аралаш ёмғир касридан йўл-йўлаклар шилта-шалаббо. Кўччанинг у ер-бу еридаги чала ярим иморатлар маҳалланинг янгилигидан, бир маҳмадана таърифлагандай, ҳали ой куни тўлмаганидан дарак бериб турибди.

Собир дарвозадан бош сукди. Кутганидек, болалари ҳовлида аллақандай ўйин билан овора экан. Тўнғичи қиз — Орзигул, учинчи синфда ўқийди. Ҳасан-Ҳусан ўғилчалари бу йил мактабга чиқишган. Умидбек эса эндиғина икки ёшга тўлди, юришлари ҳали атак-чечак.

Собир йўлак бошида бир зум оёқ илди. Хотини — Ҳалима электр чироғидан чароғон ошхонада куймалашиб юрибди, бошида кия-кия қўндирилган дуррача, белида оқ пешбанд. Юз-қўзлари тўла хаёл.

— Дадам келдилар! Дадажон!

Туйкус Собирга кўзи тушиб қолган Ҳусан қийқирганича дарвоза томон югурди. Изидан Ҳасан чопқиллади. Орзигул довдир-совдир билан имиллаётган Умидбекни чинқириганича қўлтиқлаб олди.

— Дадам ишдан қайтдилар! Ур-а!

Собир бир зумда болалари қуршовида қолди. Бири бўйнига, бири этагига осилди. Ҳовлидаги қий-чувдан сергакланган хотини ошхона дарвозасини очиб қаради. Унинг юзидағи табассумданми ё ошхона чироғининг ёғдусиданми бутун теварак чараклаб кетгандай бўлди.

Собир Умидбекни опичлаб уй томон юрди. Чарм жилдли папкани Ҳасан зўриққанича қўлтиқлаб олди.

— Дадажон, арча байрамига олиб чиқасиз-а, бизни? — деди Орзигул кувонч билан иргишилаб.

— Ур-е! — қийқириб юборди Ҳусан. — Давлат Арчага борамиз, Давлат Корбобони кўрамиз!

Собирнинг кулгиси қистади. Телевизорда нимаики кўрсатишича болалари «давлат бу» дейишади. Бувилари — Собирнинг ойиси шунга ўргатган. Ҳатто бир гал невараалар қуршовида ўтирган чоғ, «Дадангиз ҳам менинг ўвлиммас, давлатники», деб ҳазиллашган. Шу-шу болалари Собирни тез-тез сўроқ-терговга тутиб туришади: «Сиз давлат боласими? Ҳали телевизорга кириб кетасизми? Сиз ростакам дада экансиз-да! Сиз жуда зўр экансиз-да?!..»

Собир уч-қуйруқсиз саволларга кулганича «ҳа» деб жавоб беради, арзандалари эса қувноқ қийқириклар билан унинг бўйнига осилишпади.

Қизиқ, болаларнинг назарида «давлат» — бу «ростакам», «жуда зўр», «жуда ёқимли» дегани. «Ростакам», «жуда зўр», «жуда ёқимли» нарсалар, яъни «давлат» эса телевизорга кириб олган.

Собир болаларида бунақа фалати тасаввурни бузишга бир-икки енг шимардию тагин шаштидан қайтди.

«Майли, — дея ўйлади у ҳатто қувониб. — Давлат, Ватан деган сўзлар уларда шунаقا гўзал тасаввурлар уйғотсин...»

Катта бир институтнинг катта илмий ходими онаси-нинг тарбия усули нечоғлик содда, таъсирчан эканидан ажабланди.

Собир болаларининг кий-чуви остида кийимларини алмаштириди. Ювениб-таранди. Сўнг оқ-қора жилоларда порлаб турган телевизор қаршисига ўтириди. Ҳасан-Хусанлар пайт пойлаб дарров икки тиззани эгаллашди. Орзигул бўйнига осилди. Телевизорда қишки таътил пайти не бир гўшаларда ўтказиладиган Арча байрамлари кўз-кўз қилинаётган экан. Собир болаларни чалғитиш илинжида шоша-пиша бошқа каналга буради. Афсуски, бу ёғда ҳам тиниб-тингимаган Корбобо болаларни Янги йил томошалирига чорлаб ётар эди.

— Ана, давлат Корбобо! — чинқириб қолди Ҳасан. — Ана, ростакам Корбобо!

— Ўшанинг ёнига борамиз-а? — дея кўзларини пир-пиратиб дадасига термилди Хусан.

Собир гоҳ у, гоҳ бу ўғилчасининг юзига юз босиб эркаларкан, кечадан бери хаёлида пишишиб юрган айёрликнинг бир учгинасини чиқариш пайти етганини англади.

— Жаноблар ва хонимлар! — деди у артистларга хос ўйнокилик билан. — Эртага кечқурун бизникига Давлат Корбобо келади! Ростакам Корбобо ўз қўли билан совфа улашади!

Собирнинг оғзига анграйиб турган болалари баб-бравар кийқириб юборишиди.

— Ур-е! Бизникига ростакам Корбобо келаркан!

Шоша-пиша дастурхон тузатаётган Ҳалима эрига тажжубланиб тикилди. Собир хотинига қувлик билан кўз қисиб кўйди...

* * *

Пешиндан сўнг кўчага чикқан Собир гавжум бозорда тентий-тентий тинкаси қуриб, шом қоронғисида уйга қайтиди. Аразон-гаров ширинлигу ўйинчоқлардан танлаб-танлаб тайёрлаган тўрт ўрам совғасини ялтироқ халтага солиб олган эди.

Хаво кечагидан баттар совуқ. Коронғилик тобора қуюқлашмоқда. Кўшни ҳовли пештоқидаги чироқ ёғдулари кўзга тиғдек санчилди.

Собир ўғри мушукдек мўралаб ҳовлисига кирди. «Янги ийни бирга кутамиз деб меҳмон-пехмон келиб қолган бўлмасин-да, ишқилиб» — хаёлидан ўтди унинг. Даҳлиз ва ошхона чирофи ёниб турган уй томон сергак-сергак тикилди. Жимжитлик, ҳайтовур хавотирга ўрин йўқ.

Кеча у ўз айёrona режасини хотинига шишшиганида Ҳалима ҳам қувониб кетди. «Болаларни би-ир хурсанд қилардингиз-да», деди кулиб. Эркатойлар ухлаб қолишгач, эру хотин тарааддудни бошлаб юборишиди. Ҳалиманинг эплигина аёллиги хўб қўл келди-да. Аввал қаттиқ қофоздан қуббасимон қалпоқ, сўнг момиқ паҳтадан куюқцина соқол тайёрлашди. Собир күёвлик чоғларидан бери эҳтиром билан кийиб юрадиган, анча-мунча оҳори кетиб қолган чопонга обдан «ишлов» беришиди. Ишқилиб, қўлбола Қорбобонинг сарупоси таҳт бўлгунча тун ярмидан оғди. Эру хотин кула-кула тонг оттиришиди.

Собир ўтган тунги ташвиш-тарааддудни эслай-эслай ҳовли чеккасидаги омборхона томон юрди. Кўлбола Қорбобонинг қўлбола сарупоси ўша ерда.

Бир пайт даҳлиз эшиги очилиб Ҳалима сидрилибгини ташқари чиқди.

— Келдингизми, дадаси? — деди у шивирлаб.

— Ҳа.

— Тезроқ бўлақолайлик. Болаларнинг тоқати ток бўлди. Қорбобо қачон келади деб ҳолу жонимга қўйишмаяпти...

* * *

Хотинининг кўмагида туппа-тузук Қорбобога айланган Собир узун хассасини дўқиллатиб даҳлиз эшигига яқин борди. Юзларига обдан чапланган бўёқ ҳидидан димоғлари ачишар эди. Аллақачон ичкари кириб кетган Ҳалиманинг «сигнал»ини бетоқат кутди. Нихоят, хотинининг атай баландлатган товуши кулоғига чалинди. «Қани болалар, қарайлик-чи, Қорбобо келиб қолгандир!»

Улар даҳлизда юзма-юз бўлишиди.

— Салом, азизларим! — деди Собир-Қорбобо овозини артистларча дўриллатиб. — Мана, мен келдим. Сизларни соғиниб келдим.

Ичкаридан отилиб чиқсан болалар бир зум ҳангуманг қотиб қолишиди. Ҳайрату ҳаяжонга тўла кўзлари пир-пир учар эди.

Энг аввал хушига келган Орзигул севинч билан ирғишилаб чапак чалди.

— Ур-е! Ростакам Қорбобо!

Хусан қувончдан қикир-қиқир кула бошлади.

— Қойил, — деди Ҳасан аранг, ҳануз хайратдан энтикаркан. — Жуда зўр Қорбобо экан.

Собир хассасини дўқиллатиб болаларга якинлашди.

— Сизларни хўб одобли, ақлли кичкинтойлар деб эшийтдим. Шунинг учун энг аввал сизнинг уйингизга келдим.

Ёлғондакам хаяжон билан болаларига жўр бўлиб турган Ҳалима танбех берган бўлди.

— Вой, Қорбобога салом бермайсизларми? Қани-и...

Болалар бири кўйиб, бири олиб чувиллашди.

— Ас-са-лому-у алай-ку-ум!

— Баракалло, баракалло-о, жажжиларим, — дея ялтироқ халтасини очди Собир-Қорбобо. — Мен сизларга совғалар келтирдим.

Ўзи томон узатилган қоғоз қутичани Ҳусан илжайганича қўлига олди.

— Яна бир полвонтой кўринмайди-ку, қани у? — деб сўради Собир-Қорбобо Ҳасаннинг ҳам улушини тутқазаркан.

— Умидбек ухлаб қолди, — деди Ҳасан «ростакам» мавжудотга ҳануз хайрат билан тикилиб.

Собир-Қорбобо афсусланганнамо бош чайқаб, галдаги қоғоз қутичани Ҳалимага узатди.

— Мана бу Умидбекка. — Сўнг ҳануз севинчдан gox иргишлаб, gox чапак чалиб қўяётган Орзигулга юзланди. — Якинроқ кел, қизалогим. Мана бу сенга.

Орзигул узатган совғани ола-ола беихтиёр чинқириб юборди.

— Ойи! Қаранг, дадамнинг чопони-ку?! Ана, енгидаги ямоғидан танидим!

Қизгиш-сарғинш ленталар билан танғилган қоғоз қутини очишга уннаётган Ҳусан туйқус сергакланди. Қорбобонинг оқ пахтаю зар толалар ёпиштирилган узун чопонига тикилди.

— Рост, ойи! Дадамники бу!

Ҳасан эса аллақачон қутичани ерга ташлаб, Собир-Қорбобонинг барига чанг солган эди.

— Ечинг, дадамнинг чопони бу, сиз ўғри экансиз!

Туйқус бошланиб кетган исёндан шошиб қолган «ростакам» Қорбобо:

— Болажонларим... болажонларим, — дерди аранг, ўзига бошқа оқлов тополмай.

Ҳасан шашт билан тортқиласа чоғ чопоннинг бари кўтарилиб, тагидаги кийимлар ҳам кўзга танландию Ҳусан баралла чинқириб юборди.

— Ана, шими ҳам дадамни экан!

— Ойи! — Орзигул Ҳалиманинг билагига зорланиб осилди. — Бу Корбобо қароқчи! Кўчада дадамни калтаклаб, кийимларини тортиб олган.

Опасининг гапларидан гиж-гижланган Ҳусан ҳам «жуда зўр» Корбобога ташланди.

— Ечинг! Дадамнинг кийимларини ечинг! Ёлғончи Корбобо экансиз!

Собир-Корбобо болалардан базўр ҳимояланиб орқага тисарилди. Тисарила-тисарила «энди нима қилай» дегандай Ҳалимага кўз қирини ташлади. Не ажабки, хотини ҳам гўё ростакам ўғрини кўргандай безовта болалар ёнида «Вой-ву-уй»лаб турар эди.

— Сиз ёмонсиз. Катта бўлсан сизни ўлдираман! — дея чинқирди Ҳусан бўёқлар чапланган башараға нафрат билан қараб.

Орзигул қўлидаги совға қутичани қуббасимон қалпоққа қаратиб отди.

— Мана! Олинг нарсангизни, менга керакмас.

— Менга ҳам керакмас, — дея чийиллади Ҳусан ҳам қофоз қутичани бир бурчакка улоқтиаркан.

Собир-Корбобо бир амаллаб ташқарига чиқиб олди. Даҳлиз эшигини зичлаб ёпиб орқасидан итариб туарarkan, ич-ичидан тошиб келаётган кулгини аранг босди.

Даҳлизда шовқин-тўполон ҳамон авжида эди.

— Қочиб кетди-ку, ойи, — дея йифламсиради Ҳусан, эшикни тепкилаб очишга уринаркан.

— Ойи, дадам келса айтаман, энди ҳеч қачон Арча байрамга бормаймиз. Ростакам Корбобо ўғри экан, — дея ҳануз куйинарди Орзигул.

Ҳасаннинг ҳам умид тўла товуши баралла жаранглади.

— Ойи, ҳозир дадам келиб қолса анави Корбобони ушлаб олади-я? Калтаклаб, кийимларини қайтиб олади-я?

Ҳалима алланелардир деб болаларини юпатишга, ховуридан туширишга киришиб кетди.

Собир ҳануз даҳлиз эшигига елка тираб туаркан ясама соқоли сирғалиб тушганини пайқамай қолди. Унинг бўёқлар чапланган юз-кўзида синик бир табассум қалқиб турар эди.

БЕКАТДАГИ ҚИЗ

Шаҳар чеккасидаги катта бир заводнинг кичик бир хизматчиси Замонқул шалоги чиққан автобуснинг орқа бурчагида қисилиб-осилиб ишдан қайтаркан, тўсатдан мўъжизалар мўъжизасига дуч келиб қолди, аммо ҳушидан айрилиб йиқилмади, қайтага чарчоқлари тарқаб, бош оғриғи сал босилгандай, тиқилинч автобусни, ундаги иссиқ, дим ҳавою теварагида серрайганларнинг адоватли тикилишларини бир зум унутгандай бўлди, юраги тошиб, ақли шошиб, хаёли қочиб лаззатли карахтилик оғушида қолди. Бошка йўловчилар ҳам унинг тинчи йўқолганига ажаблана-ажаблана тўхтаб турган автобус деразачаларидан ташқарига – одамлар уймалашиб ётган бекат ёққа мўралади, бироқ ҳеч қандай тансик мол сотилмаётганини кўриб баттар ҳанг манг бўлдилар.

Замонқул бундай мўъжизалар мўъжизасига йўликишини ҳатто хаёлига ҳам келтирмаганди, тўғрироғи, унинг эс-хушини ишга мудраб бориб, мудраб қайтиш учун автобус ўриндиқларидан бирини амал-тақал қилиб эгаллашдан ортиқ ташвиш забт этолмаганди. Ҳар эрталаб ётоқхона қошида, кечқурунлари эса завод дарвозаси ёнида қантарилиб турадиган ишчиларни ташувчи маҳсус автобус томон орқа-олдига қарамай, кимдандир ўзиб, ни-мадандир қолиб, бирорни суриб, бирордан сурилиб ошиқишлиар, қий-чув билан жой талашишлар уни буткул зада қилиб ташлаганди.

Шу сабабдан ҳам худди бирор арпасини хом ўргандай ижирғаниб фудраниб юарди. Замонқул айниқса сўнгти пайлар айнигандан айниди. Илфорлиги учун онда-сонда мақтаниб турадиган туппа-тузук ишчидан тамбал ва тажанг хаёлпастга айланди қолди. Юриш-туришидан, гап-сўзидан алланечук бесаранжомлик, жонсараклик уфуриб турарди. Одатда кимнидир, ненидир узок ва илҳақ кутган кимсалар шу янглиғ калавасининг учини йўқотиб қўядилар. Замонқулдаги фалати-фалати ўзгаришларни турган гап энг аввал хотини пайқаб қолди. “Мендан кўнгли совияпти” дея ўйларди у кўпдан бери

пардоз-андозни дўндиrolмаётганидан куюниб. Айниқса эриниб аллақандай сабрсизлик билан эртани кутиши, ишхонасига ошиқиши уни қаттиқ шубҳага қўйганди. Бирорқ, ишхонада ҳам шу ҳолат эканини, эри қурғур у ёқдан уйига бемақсад шошилишини билмасди-да, бечора.

Мана, бугун ҳам Замонқул бирорвинг йўлига интизор кўз тиккандек, цехнинг чанг ва ёф қоплаган деразаси ёнида устма-уст тамаки тутата-тутата кунни кеч қилди. Тағин, иш вақти тугамасданоқ, ҳаммани бесаранжомлаштириб наридан-бери шошиб-тараниб ташқарига отилди. Завод дарвозаси ёнида ишчиларни кутиб турган маҳсус автобуснинг олдинги қулай ўриндиқларидан бирини эгаллаш иштиёқида эканлиги шундоққина юз-кўзидан сезилиб туарди. Аммо, чучварани хом санаган экан. У ушлаган товукнинг аллақачон патларини юлиб олган догоули хизматчиilar ҳамма ўриндиқларни эгаллаб, бепарво гап сотиб ўтиришарди. Замонқулнинг таъби баттар тирриқ бўлди-да ташига чиқармай сўкинди. Бу ҳузурбахш сўкинишдан илгари Замонқул анча енгил тортар ва яна хотиржам атобуснинг бирор чеккасида осилиб кетаверар эди. Аммо ҳозир ичига чироқ ёқса ёришмасди. Гўё бўшлиқ қилиб бирортасига уч сўм қарз бергандай кўнгли хижил, асаблари тараңг эди. Шу сабабли бўлса керак, ҳеч нарса ёқмас, айниқса, автобусга бирин-кетин чиқиб келаётган оғайниларининг олди-қочди гап-сўзлари, ҳазилхузуллари фашини қўзғаб, жаҳли чиқарди.

Кўп ўтмай автобус ишчилар билан лиқ тўлди. Тору чангнинг арzon тамакию атир-упаларнинг кўланса ислари қариндошларча аралаш-куралашиб, бўғиқ ҳавони баттар бўғиб қўйди. Лекин одамларни бўғиб бўпти, айни пайтда улар учун нафас олишдан ҳам кўра, қулайроқ жойлашиб олиб, қулайроқ шерикка қулайроқ миш-мишни оқизмай-тотизмай, керак бўлса ўзидан пича-пича қўшиб етказиш муҳимроқдай эди. Шу боис бесаранжомлик, кий-чув, шовқин-сурон авж пардасига олганди. Кимdir автобус салонининг ўттарогига силжиш ниятида кўймаланаётганларни жеркир, кимdir ҳамма келиб бўлганини айтиб, ҳайдовчининг шалоқ аравасини қўзғашга даъват этар, яна бирор ёнилғи хидидан кўнгли беҳузур бўлишидан нолий-нолий тил тагига бир кафт носвой ташлашга чоғланар эди. Аммо, мақтанчоқлигию кўрқоқлигини сохта вазминлик панасига яшириш учун ўлиб-тириладиган ҳайдовчининг чиранчиқ овози ҳаммасидан ошиб тушди.

— Ўв-в-в, — деди у микрофонни андак қитирлатиб тургач, — ёткъача тўхтамай кетаман, агар унда-мунда тушиб қолувчилар бўлса марҳамат, оворагарчиликсиз хозироқ бўшатиб қўйсин. Яна бир тақрорлайман, бизнинг ўз йўлимиз бор...

Унинг одатдаги узундан-узоқ огоҳлантиришлари кўпларнинг ғашини кўзғаб, кўпларнинг кулгисини қистар, баъзи сиркаси сув кўтармайдиганларни эса фулдираб сўкинишга мажбурлар эди. Чунки бу сафсатабоз ҳар гал жўнаш олдида тантанали баёнот берса-да, жойидан андак жилмасдан киракашликни бошлаб юборар, хеч курса, йўл-йўлакай беш-олти одам олмаса кўнгли ўрнига тушмай колар эди.

Нихоят, автобус қўзғалди. Куюқ дуд бурқситганча зўрикиб ишлайдиган мотор шовқини, автобуснинг ичу ташини зириллатиб, йўловчилар кий-чувини босиб кетди. Димоқларга қадрдон ачимсиқ дуд иси урилди.

Кеч куз фасли эканлигига қарамай ҳаво хийла иссиқ ва дим эди. Серқатнов йўл бўйлаб сийрак тизилиб кетган ўриси дарахтлар хазон ташлаб паришон туришарди. Ўнгу сўлда машиналар занжири бир зум ҳам узилмайди. Узоқ-яқиндан кўзга ташланиб турган баланд-паст иморатлар, баҳайбат-баҳайбат қувурлар, чала қолган қурилишлар аллақандай ноумид бўзрайишар эди. Шаҳарнинг хув чеккасини ҳарир пардадай кул ранг туман қоплаб ётарди.

Ҳавонинг иссиқлигидан, автобуснинг бир маромда ингиллаб тебранишидан йўловчилар тобора эликиб, фалавонур, вағур-вуғур тиниб борар, бутун автобус салони бўйлаб хорғинлигу лоқайдлик, тажанглигу караҳтлик кезиниб юради.

Замонқул бутун борлиги кучсизланиб, кўзи тинибтиниб кетаётганидан узун тутқичнинг бир четига буткул осилиб олганди. Ўзининг ҳолсиз, сўлжайиб туриши хув болалик чоғлари онаси хипчин билан хўб савалаб-савалаб чангини қокқач дорга ташлаб қўядиган эски қуроқ кўрпани эсига солар, бу фира-шира хотирадан юрагининг қай бир бурчида соғинчга ўхшаш алламбало қўзғалиб қўяр эди.

Замонқул лаблари қовжираб, томоқлари қақраётганини ҳис қилиб беихтиёр устма-уст ютинди, изидан хузурланиб узун “уф-ф” тортди. Бироқ енгил тортмади. Қайтам, баттар дармони қуриб, шундоққина ияги тагидаги

ястаниб ўтирган, боши бир ёнига сал эгилган кўйи бемалол пинакка кетган ишчининг устига лопиллаб қулаёзи.

Ўтирганнинг сарғиштоб ўсиқ соchlари уч-тўрт кун сув кўрмаганидан норозидай хурпайишиб сўлғин қовоқларга довур бостириб келгандилар. Юз-бўйин терилари эса гўё еб тўймас ёф юқи булғаган қўлларини нари-бери арта бир чеккага улоқтирган қофоз бўлаги каби тиришиб-буришиб ётарди. Япаски бурнининг керилган катакларидан хийла ўсиб чиккан, тўлкин тутар нозик симларни эслатувчи туклар, тамакиданми ё тузукроқ емиш илинжиданми сарғайишиб кетган сийрак тишлар кўрганнинг кўнглини фашлар эди. Бу фаройиб нусханинг эгнидаги оддийгина арzon костюми яп-янги бўлса-да, озғин гавдасига ярашмай, шалвираганича осилиб турар, хойнаҳой, бирор меҳрибон кимса алдаб-сулдаб, қўярда-кўймай кийгизган бўлса керак, деган ўй пайдо қиласр эди. Бу қурғур эса ношукурларча яrim очиқ оғзидан сўлагини оқизиб ажойишиб кийимнинг ёқасини бемалол булғар эди. Гўё у шунчаки пинакка кетган, балки, ўша меҳрибон кимса костюм кийгизишга кийгизгану, бироқ изидан боплаб тепишиб сулайтирган, баҳайбат-баҳайбат товоnlари билан эз-филаб-эзғилаб ташлаган эди.

Замонқул мизғиётган йўловчимас, гўё ойнага қараб ўзини кўраётгандай беихтиёр хурпайган соchlарига, уч-тўрт кундан бери устара кўрмаган даҳанига бир-бир қўл юборди. Фаши келди.

Шу орада автобус навбатдаги гавжум бекатлардан бирида силкиниб-силкиниб тўхтади. Шусиз ҳам оёқ учидаги зўрға илашиб, минг бир азобда келаётгандар илкис мункиб-мункиб кетдилар, “уфф”, “об-бо-о”, “Тағин, писс...” деган аламзада жаврашлар яна жонланиб қолди.

Замонқул бўйинни андек энгаштириб, гўё ҳаммасига айбдорни топмоқчидек, автобус деразасидан ташқарига аланглади. Ва ... мўъжизалар мўъжизасига, автобус ёқка саллона-саллона юриб келаётган сулув бир кизга кўзи тушиди.

Кизнинг оппоқ юзида оппоқ хаёллар кезиниб турарди. Нозик елкаларига чулғанган толим-толим соchlаридан тортиб оёғи учларига довур беғуборлик уфуриб турарди. Узун-узун кипприклари химоясида маъюс-маъюс термилевчи андак хуркак, андак мағрур, мовий кўзлари, бир керилиб, бир чимрилевчи қундуз қошлари, хиёл

қимтилган юпқа лаблари алланечук изтиробдан дарак берарди. Баланд-баланд иморатлар ортига ботиб бораёт-ган қүёшнинг кечки нурлари қизнинг бошидан зардек куюлар, дайдиган шабада узун-харир этакларидан илти-жоли-илтижоли тортқилар эди.

Замонқул танга тоғган гадойдек ўз-ўзидан севиниб кетди. Ҳар доимги асабийлик ва норозиликдан тиришиб-буришиб юрадиган юзларига мудроққа мойил қўзла-рига табассум ёйилди. Кўп қатори ҳайдовчининг сурбет-ларча автобусни тўхтатаверишидан ғазабланадиган Замон-қул, айни чоғда, шалтоқ араванинг яна пича хаяллаши-ни, анави сулувнинг ҳам бир амаллаб илашишини жуда-жуда истарди.

Бекатдаги мўъжизалар мўъжизаси ҳам ичкаридаги бир гарифнинг кўнглидагини англагандай иккилана-ик-килана автобус эшиги ёнида уймаланаётган тўдага қўшилди. Ичкарида эса ғала-ғовур ёғ сепилган оловдай гурулаб кетди: “Етар, ҳайданг энди”, “Томига ҳам одам чи-қармоқчимисиз”, “Устингиздан арз қиласиз!” деган тур-ли-туман даъватлар, қочириқларнинг кети узилмасди. За-монқул ташқаридаги манзарани алланечук сабрсизлик ва интиқлик билан кузатаркан, одамларнинг қийин-қистови остида ҳайдовчи автобусни қўзғаб қолишидан чинаками-га хавотирлана бошлади. Охири тоқати тоқ бўлиб, худди ёрдами тегиб қоладигандек йўловчилар чиқаётган олд эшик томон эгила, бурала интилди, ҳар тарафдан дўлдек ёғилган норози тўнғиллашлару беомон жаврашларга эъти-бор бермади.

Замонқулнинг жаҳдидан куч олдими ёки орқасидан сурга-сур қилиб ётганларнинг мадади бўлдими, ҳар қалай, сулув қизнинг нозик елкалари тез орада эшик оғзида лип-лип қўзга ташлана бошлади, бир оздан сўнг, бутун қадди-басти, латофату малоҳати билан ичкарида пайдо бўлди. Шундагина Замонқул юраги гурс-гурс уриб ётга-нини, кўл учлари билинар-билинмас титраётганини сез-ди. Назарида бутун автобус салонини атиргулнинг хуш-бўйи тутиб кетгандай бўлди. Чиндан ҳам, узун-узун кип-приклари пирпираб, тим қора қўзлари жовдираб мувоза-нат сақлаш учун теварагидан ботинмайгина тутқич изла-ётган хурлиқо лойқа анҳор юзида қалқиб турган бир боғлам гул-лолани эслатарди.

Кизнинг бу тиқилинч атобусга чиқиб қолганидан аф-сусланаётгани шундокқина юз-кўзидан сезилиб турарди.

Замонқул эса унинг ўнгайсиз ахволда қолишига ўзи айбдордай хижолатга тушганди.

Автобус кўзғалди. Унинг устма-уст силкинишидан йўловчилар сурилиб, урилиб, айкаш-уйқаш бўлиб кетишиди. “Вой-вуйй”, “Оҳ-воҳ” саслари, койинишу сўкинишлар яна бир карра авж пардасига кўтарилади.

Замонқул силкиниш баҳонасида қарийб сулув билан ёнма-ён келиб қолди. Ўртада фақаттина кимнингдир гўладай билаги тўсиқ бўлиб туради, холос. Тўсиқ эгаси баланд бўйли, келишган йигит қизнинг қулайроқ ўрнашиб олишига атайин ҳалақит берар, нариги тирсаги билан унинг бўртиб турган кўкракларига суйкалишга харакат қилас, ҳузурланиб ўз-ўзидан иржаяр эди. Замонқулнинг жаҳли чиقا бошлади. Назарида, қиз ҳам йигит томон мойиллик билан талпинаётгандай туюлди.

Катта бир заводнинг кичик хизматчиси баҳтиёр рақибининг хушбичим ва ўқтам чехрасига ўғринча кўз қирини ташлаб оларкан, унинг олдида ўзини баттар кўримсиз ва шалвираган ҳис қилди, ич-ичидан аччиқ ўқинчга ўхшаш нимадир қайнаб кела бошлади, костюмининг ёқалари ичига худди тошбақадай бошини тортиб уввос согланича қайларгадир қочиб йўқолгиси келди. Ҳайрият, бу орада қиз анови йигитнинг харакатларини пайқаб қолиб шаҳд билан орқага тисарилди, ҳатто нимадир деб жеркигандай ҳам бўлди.

Замонқул ўш боладай севиниб кетди. Қулайроқ жойлашиш баҳонасида ракибининг гўладай билаги остидан сирфалиб қиз томон ўтиб олди.

— Нозиккина бўлсангиз ҳам, — деб зардали тўнғиллади йигит гўзалга қарат, — ҳамма сикқан автобусга сифмайсиз-а, хоним?

Киз танбехни деярли эшитмади, у ҳамон тузукрок жойлашолмай гаранг эди.

— Нимасини айтасиз, — деб луқма қистирди бесаранжомликни зимдан кузатаётган, тиқилинч баҳонасида қизни киши билмас кучиб олишдан умидвор яна бир эркак. — Таксида юриб ўрганган ойимтиллалардан-да.

Уларга яқин ўриндикда гумбаз бўлиб ўтирган, дастрўмлочаси билан тинимсиз елпинаётган серсавлат хотин ҳам тилини тиймади.

— Ажаб бўпти, автобусда юриш қандайлигини бир кўриб қўйсинлар, бошқа керилмайдиган бўладилар.

Замонқул мўъжизалар мўъжизасини даҳанаки ҳужум-

лардан химоя килиб нималардир дегиси келди-ю, лекин жўяли сўз тополмай, ўтирган аёлга яхшигина ўқрайиб кўйди, холос. У тўсиқдан ўтишга ўтди-ю, бирор марта ҳам қизнинг лобар чехрасига ботиниб қараёлмади. Нимадир унга беҳад ҳалақит берарди. Қиз эса бу орада ўзидан анчагина узоқдаги тутқични бир ушлаб, бир қўйиб, ҳамон тикилинчга кўниколмай овора эди. Аммо бу оворагарчиликлар, одамлардан ҳурккан оҳудай жавдирашлар унинг чиройини янада очиб юборганди!

Замонқул ажаб карахтлик оғушида қолди. Қизга энди фоят яқин қолганидан унинг бирор жойига тегиб кетиб, хафа килиб қўйишдан чўчирди... лекин хаёлан унинг момик қўлларидан тутиб аллақачонлар узоқ-узоқларга, ҳеч бир каснинг пойи қадами етмайдиган олис гўшага кетиб қолганди. Ташна лаблари билан қизнинг маъюс-маҳзун кўзларидан, пахтадай юмшоқ ёнокларидан ўпар, шалола-шалола соchlарига қўшилиб сархуш-сархуш энтикарди.

Замонқул бетизгин хаёлларидан сулув қиз хабар топиб қолгандай ўз-ўзидан уялиб, зимдан ёнига қараб олди. Бироқ, айни чоғда, оппоқ юзлари баттар оқариб кетган қизнинг ўз дарди ўзига етарлидай эди. Афтидан, у қуруқликка чиқиб қолган тилла балиқчадай нафас ололмай чинакамига қийналарди.

— Тўхтатинг, — деди у деярли шивирлаб ҳайдовчи ёққа юзланаркан. — Тўхтатинг, илтимос.

Аммо, унинг ўтинчлари нақ биқинида карахт қотган Замонқулдан бошқага етиб бормади. Замонқул эса, тайин гап, унга онда-сонда илтижоли-илтижоли термилишдан бошқасига ярамасди. Устига-устак, мўъжизалар мўъжизасининг автобусдан тушиб қолишини асло истамасди.

— Тўхтатинг, — деди қиз яна титроқли овозда ва жаҳд билан эшик томон ёриб ўта бошлади — Тўхтатинг, кўнглим айниятти.

Замонқул ҳам уйқусирагандай-уйқусирагандай беихтиёр унга эргашди.

Кизнинг илтимоси оғиздан-оғизга ўтиб, ҳайдовчига етиб борди шекилли, автобус йўл чеккасида ёқалаб тўхтади.

— Нима гап? — қичқирди ҳайдовчи жаҳл билан ўрнидан тураркан. — Ҳар қадамда тўхтайверар эканмизда, а?

Лекин шу лаҳзадаёқ ўнгу сўлига боқмай эшик томон

талпинаётган қиз қўлидаги бир сиким пулни кўргач шаштидан тушди, илжайганча “тисиллатиб” эшикни очди. Қиз йўл ҳаққини кимнингдир қўлига тутқаза-тутқаза ўзини ташкарига ташлади.

Замонқул эса тушарини ҳам, тушмаслигини ҳам билмай пича қаловланиб қолди. Бироқ, барибир, аллақандағай файритабий куч таъсиридан шоша-пиша ташкарига талпинди, афсуски, улгуrolмади, шарақлаб ёпилган эшик унинг нақ бўйнидан фалакдай қисиб қолди. Замонқул зарбани аввалига сезмади, лекин кўз олдидан қиз йўқолиб, ўрнида жимир-жимир юлдузчалар пайдо бўлиб, бутун баданига алланечук лаззатли оғриқ ёйила боргач не юз берганини англаб етди.

— Нима бало, мастми? — деб тўнфиллади кимдир Замонқулни ичкарига тортаркан.

Эндиғина жила бошлаган автобуснинг яна жаҳд билан эшиклари очилди.

— Тушмоқчи, шекилли? — деди тағин аллаким Замонқулни ташкарига итараркан.

Кўрқувдан кўзлари олайиб кетган ҳайдовчи бир оз қаловланиб тургач, жабрдийданинг ўлмай қолганидан илхомланиб ўшқира кетди:

— Ўн сўмдан қочмоқчи бўлдинг, а, номард? Ўлишингта оз қолди-ку! — Шу орада Замонқулнинг ишчилардан бири эканлигини пайқаб қолди-ю, гапни бошқа ёққа бурди. — Об-бо, кайфи тарофу, қани уни бирор ерга ўтқазинглар, об-бо...

Автобус салонидан шов-шув яна жонланиб кетди! “Нима гап?”, “Кимни босибди?”, “Ўлибдими?”

Замонқул эшик ёнидагиларнинг иддао билан силкинишларидан чинакам мастдай чайқалар, ўз-ўзидан тинимсиз илжаяр, одамларнинг гап-сўзлари, фала-ғовури узок-узоклардан элас-элас қулоғига чалинар эди. У кимнингдир норози шангиллай-шангиллай бўшатган ўрнига гўё мовий осмонда яйраб-яйраб қанот қоқиб, яна қафасга қайтган қуш каби охиста чўкди. Кўз олдида яна юлдузчалар жимиirlаб кетди...

М У Н Д А Р И Ж А

Қиссалар

Чорбоғ кўриқчиси ёхуд Хизр кўрган йигит	4
Сирли муаллим	75
Кидирувдаги қиз	131

Хикоялар

Чўлдан келган ташвиш	188
Сўнгти иқрор	200
Алдоқчи тунлар	214
Синов муддати	228
Кутилган кун	232
Кўлга тушган қорбобо	241
Бекатдаги қиз	247

ЛУҚМОН БҮРИХОН

ХИЗР КҮРГАН ЙИГИТ

«Шарқ» нашриёт-матбаа
акциядорлик компанияси
Бош таҳририяти
Тошкент — 2007

Муҳаррирлар *И. Шоймардонов, Н. Тошматов*
Бадий мұхаррир *А. Мусахұжаев*
Техник мұхаррир *Р. Бобохонова*
Мусаҳидлар: *М. Зиямұхамедова, Ж. Тоғрова*
Сағидаловчы Т. Огай

Теришга берили 18.08.2006. Босишига рухсат этилди 15.11.2006.
Бичими 84x108¹/₃₂. «Петербург» гарнитураси. Офсет босма. Шартли
босма табоги 13,44. Нашриёт ҳисоб табоги 14,3. Адади 5000 дона.
Буюртма № 2865. Баҳоси келишилган нархда.

**«Шарқ» нашриёт-матбаа
акциядорлик компанияси босмахонаси,
700083, Тошкент шаҳри, «Буюк Турон» қўчаси, 41-уй.**